

TNÚHU NÍ CHÍDÓ TNÙNÍ TÉ LÚCÁ

Nàcuáa ní ngódó tnùní tnúhu Yá Ndiöxí

¹ Te vâi ñáyiú chîdo tnuní-yu nchaa nàcuáa ndùu tnúhu ñihí-yu nàcuáa ní cuu, te nchoo tnàhá-ó sà naha-o nacuáa ní cuu. ² Te ñi-yu-ni nchaa tnúhu chîdo tnuní-yu-áⁿ cúú-xí tnúhu ní cáháⁿ nchaa cue téé ní xíní ndáá nàcuáa ní cuu ndéé díhna, cue téé ní cáháⁿ tnúhu Yá Ndiöxí. ³ Te yúhú sa ní cuu nduu quide cuendá-í nchaa nàcuáa ní cuu, núu xíⁿ ní sani iní-í tee váha-í nchaa tnúhu-a núú tütú sá cúú-xí yòhó té Těofilú chí ío váha cùu iní-í sá cúú-xí-n, ⁴ te tē-í cuendá cutnùní iní-n sá sá ndáá cúú-xí nchaa sá ñí dánèhé ñáhá-güedé xii-n.

Ïⁿ espíritú xínú cuèchi núú Yá Ndiöxí càhí-xi sá cácu ñⁿ téé cunani Juáá

⁵ Te cútnàhá ní xíndaha té Hèrodés ñáyiú dis-tritú Jùdeá dàvá-áⁿ ñí xíndecu ñⁿ dútú ñí xínani-dě Zacàriá, te ní cundihí-dé cue dútú Àbiás. Te ñadìhí-dé ní xínani-aⁿ Elisabét, te ñaha-áⁿ ñí cuu-aⁿ ñaní tnàhá ndi Àrón. ⁶ Te ndi ndúú-yu ío ní quide ndáá-yu núú Dütú Ndiöxí, chí ní tñí-yu nchaa tnúhu ní cáháⁿ-gá. ⁷ Te ñá túú ñí ñⁿ déhe-yu, chí ducaⁿ tãhú tã Elisabét sá vã cóó dēhe-aⁿ, te ducaⁿ ndi ndúú-yu ío ní sahnú-yu.

⁸ Te ñⁿ nduu xínu cuechi tucu té Zacàriá ndihí nchaa cue téé cundihí-dé núú Yá Ndiöxí xiti veñúhu. ⁹ Te dàvá-áⁿ ñí xito ndeé-güedé cuendá

cutnùní iní-güedé nõu ndëdacàa-güedé quíhu núú nàá xítí veñúhu-áⁿ cahmi-güedé sá sàháⁿ tnámí, te ní cutnùní sá tẽ Zacàriá quíhu-dé. Te ducaⁿ nĩ quide-güedé, chi ducaⁿ tnàhí ní xóo cada nchaá cue dútú dāvá-áⁿ. ¹⁰ Te nini sàhmi té Zacàriá sá sàháⁿ tnámí núú nàá, te vãi vihi ñáyiú xĩndecu quehé veñúhu-áⁿ càháⁿ ndihí-yu Yá Ndiõxí. ¹¹ Te ní xiní té Zacàriá ìⁿ espíritú xínú cuèchi núú Yá Ndiõxí nútñi-xi xio cùha núú nàá núú càyú sá sàháⁿ tnámí-áⁿ. ¹² Te òré ní xiní té Zacàriá espíritú-áⁿ te ñá ní cùtnuní iní-dé nása cada-dé chi ío ní yùhú-dé. ¹³ Te espíritú-áⁿ nĩ xáhaⁿ-xi:

—Zacàriá, vá yùhú-n chi Yá Ndiõxí ní tedóho-gá tnúhu ní cáháⁿ-n, te vitna coo ìⁿ déhe ñadìhí-n tã Elisábét te danàni-n-dé Juàá. ¹⁴ Te ío cudíí iní-n, te ducaⁿ ío vãi ñáyiú cudíí iní-yu na càcu-dé. ¹⁵ Te ío cudíu-dé núú Yá Ndiõxí, te ni vã cóhó-dě ndidí te ni vã cóhó-dě ndudí sá nĩ natíu, te sa cundecu ndihí-dé Espíritú Yá Ndiõxí òré cacu-dé. ¹⁶ Te diu-dé cada te ío vãi ñáyiú isràél natuhá-yu ichi Dútú Ndiõxí Yaá cúú Ndiõxí-ó. ¹⁷ Te té Juàá-áⁿ codonùu-dé núú-gã, te cundecu ndihí-dé Espíritú-gá, te taxi tnùní-dé dàtná ní quide té Èliás. Te nacanu ichi-dé cue tée cùu sacuéhé cuendá cada-güedé sá vãha sá cúú-xí cuè tée cuechi, te cuèi cue tée ío sàá iní-xi, te diu-dé cada te tñi-güedé tnúhu váha, tnúhu càháⁿ ñáyiú quide ndáá. Te ducaⁿ càda-dé cada túha-dé ñáyiú cuendá cunu cuèchí-yu núú Dútú Ndiõxí —càchí-xi xáhaⁿ-xi xì-dé.

¹⁸ Te té Zacàriá ní ndúcú tnùhu-dé núú espíritú-áⁿ, te xáhaⁿ-dẽ:

—¿Te nása cutnùní ndáá iní-í tnúhu càháⁿ-n-í?

Chi yúhú ío ní sahnu-í ndihi ñadìhí-í —càchí-dé xǎhaⁿ-dě xii-xi.

¹⁹ Te espíritú-áⁿ ñí xáhaⁿ-xi:

—Yúhú cúu-í espíritú nání Gàbriél, te xínu cuechi-í núú Yǎ Ndiǒxí, te mee-gǎ ní táúchíúⁿ-gǎ náhà-í tnúhu-gǎ véxi cuendá cutnùní iní-n nàcuáa cada ñaha-gǎ xii-ndo. ²⁰ Te vitna cuu ñihí-n te vá càháⁿ-gǎ-n ndèé ná sàá nduu càcu déhe ñadìhí-n, chi ñǎ túú ní sàndáá-ni iní-n tnúhu ní càháⁿ-í. Te dacuítí sǎá nduu càda-xi nacuáa ní càháⁿ-í-a —càchí espíritú-áⁿ xǎhaⁿ-xi xii-dé.

²¹ Te nchaa ñáyiú xǐndecu quehé ndétǔ-yu té Zacàriá, te xǐcuñúhu-yu sá ío cùyaa-dé xití veñúhu.

²² Te òré ní ndee té Zacàriá, te ñǎ ní cùu-gǎ càháⁿ ndihi ñaha-dě xii-yu, te òré-áⁿ ñí cutnùní iní-yu sá ñí xiní-dé ìⁿ espíritú xínú cuèchi núú Yǎ Ndiǒxí xití veñúhu. Te mee-nǎ ndaha-dé ní quide-dé núu-yu chi ñǎ ní cùu-gǎ càháⁿ-dé.

²³ Te ní xínu nduu ñí xínu cuechi tǎ Zacàriá núú Yǎ Ndiǒxí xití veñúhu, te cuánuhú-dé vehe-dé. ²⁴ Te sátá dúcáⁿ ñí cuu te ñadìhí-dé tá Elisàbét ní ngúhuⁿ déhe-aⁿ, te úhúⁿ yóó ñǎ túú tnàhí-gǎ ní quèe-aⁿ caca cuu-aⁿ, te ní cachí-aⁿ: ²⁵ “Mee Dütú Ndiǒxí duha ní cundàhú iní ñáhá-gǎ sá cóó ìⁿ déhe-í cuendá sá vǎ cúú yíchí iní ñáhá ñáyiú xii-í”, duha ní cachí-aⁿ.

Íⁿ espíritú xínú cuèchi núú Yǎ Ndiǒxí càchí-xi sá cácu Jèsús

²⁶⁻²⁷ Te núú ìhú yóó sǎ ñí ngúhuⁿ déhe tá Elisàbét, te ní tendaha tùcu Yá Ndiǒxí espíritú nání Gàbriél cuáháⁿ-xi ìⁿ ñuú nání Nàzarét cuáháⁿ ngoto-xi ìⁿ xíchí cuéchí nàni Mariá. Te ñuú-áⁿ yíndèhu-xi dis-tritú Galìleá. Te xíchí-ǎⁿ sa ní cundáá tnúhu sá

tnăndaha-xi ndihî ïⁿ tée nàni Cheé ñanî tnáhá ndîi Dàvíí. ²⁸ Te espíritú-áⁿ ñí quihu-xi ndéé xití vehe núú ndécú tă Măriá, te ní xáhaⁿ-xi:

—¡Cóvãha-n-aⁿ! Dútú Ndiöxí ío cùu iní ñáhá-gă xii-n te ndècu ndihî ñaha-gá, te ío-gá xitó ñàha-gá xii-n dàcúúxí dâva-gá ñâyiu dîhî —càchí espíritú-áⁿ xăhaⁿ-xi.

²⁹ Dico òré ní xiní tá Măriá espíritú-áⁿ, te ní quiyùhú iní-xi sá dúcáⁿ ñí cáháⁿ espíritú-áⁿ. Te ní sani iní-xi: “¿Ná cuendá duha càháⁿ-tu espíritú-a-i?”, duha ní sani iní-xi. ³⁰ Te espíritú-áⁿ ñí xáhaⁿ-xi:

—Măriá, vâ yùhú-n chi ducaⁿ ñí nduu táhú-n nŭu Yá Ndiöxí. ³¹ Te vitna ngúhuⁿ déhe-n, te na càcu-dé te danàni-n-dé Jèsús. ³² Te ío cunuu-dě, chi Dútú Ndiöxí Yaá ío cunuu cachí-gá sá Dêhe-gá cúú-dě, te dîu-gá cada te cuu-dé ïⁿ tée cunuu núú ñâyiu isràél dàtná ní quide-gá ndîi Dàvíí. ³³ Te taxi tnùnî-dé ñâyiu isràél, te ducaⁿ-ni cunuu-dé ñi caa ñi quihîⁿ —càchí-xi xăhaⁿ-xi.

³⁴ Te tá Măriá ní xáhaⁿ-xi xîi espíritú-áⁿ:

—¿Te nása cuu tnúhu càháⁿ-n te ñá túú yîi-í-i? —càchí-xi xăhaⁿ-xi.

³⁵ Te ní xáhaⁿ espíritú-áⁿ:

—Espíritú Yă Ndiöxí quixi cundecu ndihî-n, te ducaⁿ Yă Ndiöxí cada-gă ïⁿ sá vãha sá cúú-xí-n ná càcu déhe-n. Te Yá Ndiöxí càchí-gá sá ïo cundecu yîñùhu-dé núú-gă, chi Dêhe-gá cúú-dě. ³⁶ Te tnáhá didí-n tă Elisàbét ñúhú dēhe-aⁿ cuèi ío ní sahnu-aⁿ, te dîu-aⁿ càchí-yu sá vâ cóó dēhe-aⁿ ñi cùu, te vitna sa ní cuu ínú yóó ñúhú dēhe-aⁿ. ³⁷ Chi Yá Ndiöxí ndácú-gă quidé-gă nchaa sá vâ yôo tnàhî ndàcu cada —cachí-xi xăhaⁿ-xi.

38 Te tá Màriá ní xáhaⁿ-xi:

—Yúhú ná cúnú cuèchi-í núú Dütú Ndiöxí, te mee-gă ná cádá ñàha-gá xii-í nàcuáa ní cachí-n — cächí-xi xăhaⁿ-xi xii espíritú-áⁿ.

Te sáta dúcáⁿ te espíritú-áⁿ ñi xica-xi cuáháⁿ-xi.

Tá Màriá cuáháⁿ ngoto-xi tá Elisàbét

39 Te tá Màriá ío ndihi cuáháⁿ-xi ñⁿ ñuú cáá xiti yucu distrítú Júdeá. 40 Te ní sáa-xi vehe té Zacàriá, te cuánguihu-xi ní dándácõo váha-xi tá Elisàbét.

41 Te òré ní tecú dóho tá Elisàbét ní cáháⁿ tá Màriá, te ní candá déhe-aⁿ xiti-aⁿ, te òré-áⁿ ñi ngúndecu ndihi-aⁿ Espíritú Yă Ndiöxí. 42 Te níhi ní cáháⁿ-aⁿ, te xăhaⁿ-aⁿ xii tá Màriá:

—Yá Ndiöxí ío xito ñaha-gá xii-n dácúúxí dáva-gá tnàha dihí-ó, te ducaⁿ-ni xito-gá cuèi déhe-n. 43 ¿Te ná cúú yúhú núu véxi coto ñaha yòhó năná Yaá cúú Xitohó-í-i? 44 Chi òré-ni ní tecú dóho-í ní cáháⁿ-n te ní candá-ni déhe-í xiti-í sá cùdíí ìní-dé. 45 Te váha táhú yòhó sá ni sàndáá ìní-n, chi dacuítí sã cádá Dütú Ndiöxí nàcuáa ní cáháⁿ espíritú ní tendaha-gă ní quixi ní cachí tnúhu xii-n nàcuáa cada-gá — cächí-aⁿ xăhaⁿ-aⁿ xii tá Màriá.

46 Te ní xáhaⁿ tă Màriá:

Ío cànnu cuu Dütú Ndiöxí,

47 ío cùdíí ìní-í chi diu-gá taunihnu ñaha-gă xii-í núú ùhú núú ndàhú.

48 Chi ní ndacu ìní ñáhá-gă xii yúhú, te dícó ñi xíchí xínú cuèchi núú-gă cúú-í, te vitna te nchaandi túhú ñáyiu cachí-yu sá ío váha táhù-í.

49 Te Yá Ndiöxí cándòo caa nine ìní-gá, te ío cànnu ñⁿ sá vâha ní quide-gá sá cúú-xi-í.

50 Te cùndahú iní-gá nchaa ñáyiú nèhe sá yíñùhu nùú-gă.

Te ducaⁿ-ní cuèi ñáyiú sa ndècu ñuyíú-a ndihí ñáyiú vitna véxi.

51 Chi ta quide-gá nchaa sá vă yõo tnàhí ndàcu cada véxi,

te ta dândóo canúú-gă cue ñáyiú quide cahnu mee-xi.

52 Te cue ñáyiú tàxi tnuní ñá túú-gă dáñá-gă taxi tnùní-yu,

te cue ñáyiú ndàhú ní quide nínu ñaha-gă xií-yu.

53 Te cue ñáyiú ndècu ndihí tnúndòho tnúhu ndàhú ní quide váha ñaha-gă xií-yu,

te cue ñáyiú cuica ñà túú nă ní ñhí-gă-yu cundecu ndihí-yu.

54 Te chindee-gá ñáyiú isràél, ñáyiú xínu cuechi nùú-gă, te ñá túú dàña nihnu ñaha-gá xií-yu, chi cùndahú iní ñáhá-gă.

55 Chi ducaⁿ ñí xáhaⁿ-gă xii ndíi Àbrahám, ndihí cue ñaná tnáhá ndíi.

Duha ní xáhaⁿ tă Màriá xii tá Elisàbét.

56 Te ní xíndecu tá Màriá dàtná úní yóó ndihí tá Elisàbét te dătnùní cuánuhú-xi vehe-xi.

Ní cacu té Juàá tée dacuàndute ñaha xii ñáyiú

57 Te ní sáá nduu ñí cacu ìⁿ déhe tée tá Elisàbét.

58 Te nchaa ñáyiú ndècu yatni ndihí-aⁿ, ndihí nchaa ñaná tnáhá-áⁿ ñí ñhí-yu tnúhu nàcuáa ní chindee ñàha Yá Ndiõxí xii-aⁿ. Te ío ní cudíí iní-yu cuendá-aⁿ. 59 Te nùú ùná nduu sá ñí cacu déhe-aⁿ, te ní sáháⁿ ñáyiú nùú ndécú-áⁿ cuendá cuáhă-yu sèñá ñíi déhe-aⁿ. Te cùní-yu cunani dèhe-áⁿ Zacàriá dàtná nání tătá ní cùu. 60 Te ní xáhaⁿ năná dèhe-áⁿ:

—Ñáhá, chi Juàá cunani-dě —càchí-aⁿ xǎhaⁿ-aⁿ xíi-yu.

⁶¹ Te ní xáhǎⁿ-yu:

—¿Te ná cuendá te ñá túú nì ìⁿ ñaní tnáhá-ndó dùcaⁿ nani-i? —cachí-yu xǎhǎⁿ-yu.

⁶² Te ní quidé-yu ndàhá-yu núú tǎtá dēhe-áⁿ cuendá cuíní-yu núu nása cuíní méé-dě cunani dēhe-dé. ⁶³ Te ní xícáⁿ-dé ìⁿ tutú ní chídó tnùní-dé nàcuáa cunani dēhe-dé, te duha ní chídó tnùní-dé: “Juàá cunani-dě”, càchí-xi núú tütú ní tee-dé-áⁿ. Te nchaa ñáyiú xǐndecu-áⁿ nǐ cuñúhu-yu nàcuáa ní cuu. ⁶⁴ Te òré-áⁿ nǐ nacáháⁿ té Zacàriá sá nǐ cuu ñihí-dé ní cùu, te ní ngüíta-dé ní cachí-dé sá ìo càhnu cuu Yá Ndiöxí. ⁶⁵ Te nchaa ñáyiú xǐndecu yatni ndìhi-dé ní cuñúhu-yu, te nchaa ñáyiú xǐndecu nihí xití yucu distritú Jùdeá ní níhí-yu tnúhu nàcuáa ní cuu. ⁶⁶ Te nchaa ñáyiú-áⁿ ìo vài ní sani iní-yu, te ní xítnàhá-yu:

—¿Ná cúú sǎ cádá tē-ǎⁿ ndéé ìdá-gá ná cuèhnu-dé? —càchí-yu xítnàhá-yu.

Te ducaⁿ nǐ xítnàhá-yu chi Dútú Ndiöxí ndécú ndìhi ñaha-gá xii-dé.

Té Zacàriá càchí-dé sá ìo càhnu cuu Yá Ndiöxí

⁶⁷ Te té Zacàriá tǎtá té líhli-áⁿ nǐ ngúndecu ndìhi-dé Espiritú Yǎ Ndiöxí te ní cáháⁿ-dé nchaa tnúhu sá nǐ dánèhé ñáhá-gǎ, te ní cachí-dé:

⁶⁸ Ío càhnu cuu Dútú Ndiöxí nchoo ñáyiú isràél, chi ní quixi coto ñaha-gǎ xii-o, te cùu-o ñáyiú cùu cuendá-gá, chi dàcácu nihnu ñaha-gǎ xii-o vìtna.

⁶⁹ Chi ní tendaha-gǎ ìⁿ tée véxi-dé dàcácu nihnu ñaha-dě xii-o nǔú ùhú núú ndàhú.

Te cùu-dé ñaní tnáhá ndïi Dàvií téé ní xinu cuechi nùú-gã ndéé sanaha.

70 Te ñi-ni tnúhu ní cáháⁿ Yã Ndiöxí ní cáháⁿ cue téé ní quide ndáá ní xindecu nùú-gã ñuyíú-a ndéé sanaha.

71 Te ní cachí-güedé sá táúnihnu ñaha-gá xii-o nùú nchàa ñáyiú cùu úhú iní ñáhá, ndihí nùú nchàa ñáyiú ñá túú cùu quiní ndee ñáhá.

72 Te ní xáhaⁿ-gã sá cündàhú iní ñáhá-gã xii-o, te ducaⁿ càda-gá chi vá nácuànaa-gá tnúhu ní cáháⁿ-gã ndihí-güedé.

73 Te ñi ducaⁿ ndùu tnúhu ní xáhaⁿ-gã xii ndíi Àbrahám sá

74 táúnihnu ñaha-gá xii-o nùú nchàa ñáyiú cùu úhú iní ñáhá, cuendá sá vã yùhú-ó cùnu cuechi-o nùú-gã.

75 Te cada ndáá-ó, te cundecu yíñùhu-o nùú-gã ndi nchàa nduu cundecu-o ñuyíú-a.

Duha ní cachí té Zacàriá.

76 Te xáhaⁿ-dë xii té líhli-áⁿ:

Te yòhó té líhli, cáháⁿ ñáyiú cuendá-n sã cúu-n ñⁿ téé càháⁿ tnúhu Dútú Ndiöxí Yaá ío cùnuu, chi quíhíⁿ-n còdonuu-n nùú Yãá cúú Xítohó-ó dátúha-n ñáyiú cuendá cundecu túha-yu òré quexìo-gá.

77 Te cúñaha-n xìi ñáyiú isràél sá cuíní-gá cada càhnu iní-gá nchaa cuéchi-yu, te naníhí tàhú-yu.

78 Te ducaⁿ càda-gá chi ío cùu iní ñáhá-gã xii-o, chi ndéé andiú ñí tendaha-gã ñⁿ téé véxi cuuⁿ-dé dandixi túu-dé iní-ó cuendá cutnùní iní-ó nácuáa ndùu cuendá Yã Ndiöxí.

79 Te ducaⁿ dàndixi túu-dé iní nchaa ñáyi ndècu ichi cuehé ichi duha ta x̣ta nihnu cuáháⁿ cuèndá nucúnu ichí-yu ìⁿ ichi váha.

Duha ní xáhaⁿ t̄e Zacàriá xii déhe-dé.

80 Te té l̄hli-áⁿ tá sàhnu-dé, te ta ch̄ndee chitúu ñaha Yă Ndiöxí xii-dé cuáháⁿ, te ní x̄ndecu-dé x̄t̄i yucu ndéé ní sáá nduu ñi ngüita-dé ní cáháⁿ-dé núu cuè ñáyi isràél tnúhu Yá Ndiöxí.

2

Ní cacu Jèsús (Mt. 1:18-25)

1 Te dàvá-áⁿ ñi táúchíúⁿ t̄e Àugustú Cèsár nucódó tnùnì nchaa ñáyi nacióⁿ ȳndàha-dé. 2 Te xéhé s̄a d̄hnanuu ñi nucódó tnùnì ñáyi, te d̄i-u-ni dàvá-áⁿ ñi cunuu té C̄reniú distritú Siríá. 3 Te nchaa ñáyi ní nataká-yu ñúú núú ñi cacú-yu cuèndá nucódó tnùnì-yu. 4 Núu x̄iáⁿ ní quee té Chèè ñúú Nazàrét ìⁿ ñúú ȳndèhu distritú Galileá, te cuáháⁿ-dé ñúú Bèlén ìⁿ ñúú ȳndèhu distritú Jùdeá, chi x̄iáⁿ ñi cuu ñúú ndí Dàvíí, te d̄i-u-ni ñani tnáhá t̄e Chèè-áⁿ ñi cuu ndí. 5 Núu x̄iáⁿ cuáháⁿ-dé ndéé ñúú Bèlén nucódó tnùnì-dé, te tnáhá tá Màriá x̄ichí ñi cundáá tnúhu sá tn̄ndaha nd̄ih-dé cuáháⁿ nd̄ih ñaha-d̄e, te sa ñùhu déhe-xi. 6 Te ñini c̄yaa-yu ñúú Bèlén-áⁿ ñi sáá òré cacu déhe-xi. 7 Te ní cacu déhe d̄ihna-xi, te ní chidúcúⁿnuu-xi dóó, te ní sacáⁿ ñáhá-xi ìⁿ vehe núu cúú v̄ehe qui^{t̄i}, chi ñá túú ní ñh̄i-yu vehe coó-yu.

Cue esp̄iritú x̄ínú cuèchi núú Yă Ndiöxí nd̄ih cue toli.

⁸ Te yatni ñuú-áⁿ xĩndecu ñⁿ ùú toli ndèé-güedé mbèé-güedé ndécú-güedé majadá niú-áⁿ. ⁹ Te uuⁿni ní quexìo ñⁿ espíritú xínú cuèchi núú Yá Ndiõxí, te Yá Ndiõxí ní quide-gá ní dáyèhé-xi ní càndéé núú xĩndecu-güedé, te ní yùhú víhí-güedé. ¹⁰ Te ní xáhaⁿ espíritú-áⁿ:

—Vá yùhú-ndó, chi nàha-í ñⁿ tnúhu váha véxi sá cúú-xí-ndó, te ío cudíí ñn-ndó ndìhi nchaa ñáyiu. ¹¹ Chi vitna ní cacu ñⁿ téé dàcácu nihnu ñaha xìi-ndo núú ùhú núú ndàhú ñuú ndí Dàvíí, te téé-áⁿ cúú-dé Xítóhó Jesucrístú. ¹² Te dàtná ñⁿ señá te naníhí-ndó tē lĩhli-áⁿ yídúcúⁿ nuu-dé dóo cáá-dé ñⁿ vehe quiti —càchí-xi xáhaⁿ-xi xìi-güedé.

¹³ Te òré-áⁿ ñⁿ quexìo cuéhé víhí espíritú véxi cuuⁿ andi^u ñⁿ naníhí tnáhá-xí ndìhi espíritú-áⁿ, te ní ngüíta-xi ní chiñuhu-xi Yá Ndiõxí, te càchí-xi:

¹⁴ ¡Ío càhnu cuu Yá Ndiõxí Yaá ndécú àndi^u, te na cùndecu váha-ni nchaa ñáyiu cùu ñn méé-gá! Duha càchí cue espíritú-áⁿ.

¹⁵ Te òré cuánda^a cue espíritú-áⁿ andi^u, te ní ngüíta cue toli-áⁿ xĩtnàha-güedé:

—Na quíhíⁿ-ó ñuú Bèlén quíní-ó nàcuáa ní cuu, chi Dútú Ndiõxí sa ní cachí tnúhu-gá —càchí-güedé xĩtnàha-güedé.

¹⁶ Te ní tñi-güedé ichi súní ndìhi cuáháⁿ-güedé, te ní naníhí-güedé tá Màriá ndìhi té Chèé, ndìhi té lĩhli-áⁿ cáá-dé xití ñⁿ vehe quiti. ¹⁷ Te òré ní xíní ñáhá-güedé te ní xáhaⁿ-güedé xii-yu nàcuáa ní xáhaⁿ espíritú-áⁿ xii-güedé cuendá té lĩhli-áⁿ. ¹⁸ Te nchaa ñáyiu ní tecú dóho-xi ní cuñúhu-yu nàcuáa ní cáháⁿ-güedé. ¹⁹ Dico tá Màriá chi ñuhu nahi-ni ñn-xi, te dícó-ni sàni ñn-xi cuendá nchaa

tnúhu-án. ²⁰ Te cue toli-ǎⁿ nǐ natnⁱⁱ-güedé ichi, te ta xǐtnàha-güedé cuánuhú sá ïo càhnu cuu Yá Ndiǒxí cuèndá nchaa tnúhu ní xíndedóho-güedé, ndi^{hi} cuèndá nchaa sá nǐ xiní-güedé, chi cuèndá sá ndàá ní cuu nchaa nàcuáa ní tecú tnúhu-güedé.

Ndècá-yu Jèsús cuáháⁿ veñúhu

²¹ Te núú ùná nduu sá nǐ cacu té lǐhli-án, te ní sáha-güedé señá ñⁱⁱ-dé, te ní dánání ñàha-güedé Jèsús xii-dé, ñⁱⁱ-ni nàcuáa ní xáhaⁿ espíritú xínú cuèchi núú Yá Ndiǒxí xii tá Màriá ndéé cútnàhá vátá ngǔhuⁿ-gá-dé xití-xi.

²² Te sátá nǐ tnahá nduu, ndùu ïⁱⁱ-yu nàcuáa càháⁿ nchaa tnúhu ní chídó tnùní ndíi Moisés, te ndècá-yu té lǐhli-án cuáháⁿ ñⁱⁱú Jerusàlén cuèndá quee túu-dé núú Dütú Ndiǒxí. ²³ Te ducaⁿ nǐ quidé-yu, chi ducaⁿ càháⁿ-xi núú tütú Yá Ndiǒxí sá ncháá làndú té na càcu díhna quetúu-güexi núú-gǎ cuèndá cundecu-ná-güexi cuèndá-gá. ²⁴ Te ní quidé-yu nàcuáa càháⁿ Yá Ndiǒxí núú tütú-gá núú càchí-xi: “Canehe-ndo ùú lõmá àdi úú cǔcu quíhíⁿ nduu táhú ñáhá Yá Ndiǒxí”, duha càháⁿ-gá núú tütú-gá.

²⁵ Te dàvá-áⁿ ndécú ñⁱⁱ-tée nàni Mió ñⁱⁱú Jerusàlén. Te ío váha iní-dé, te chiñuhu-dé Yá Ndiǒxí, te ndètu-dé sáá nduu chindee ñàha Yá Ndiǒxí xii ñáyⁱⁱ isràél. Te ndècu ndi^{hi} té Mìó-áⁿ Espíritú Yá Ndiǒxí. ²⁶ Te sa ní xáhaⁿ-xi xii-dé sá vǎ cùu-ni-dé, chi dacuítí quíní-dé Crìstú Yaá tendaha Yá Ndiǒxí quixi ñuyíu-a. ²⁷ Te té-áⁿ ndécá ñàha Espíritú Yá Ndiǒxí xii-dé cuáháⁿ veñúhu càhnu sá ïo cùn^{uu}. Te cuáháⁿ-yu ndi^{hi} Jèsús veñúhu-áⁿ cuèndá cadá-yu ndi^{hi}-gá nàcuáa càháⁿ tnúhu ní chídó tnùní ndíi

Moisés. ²⁸ Te òré ní sáá-yu, te té Mió-áⁿ nǐ nguídèhé-dé Jèsús, te ní cáháⁿ-dé sá ïo càhnu cuu Yá Ndiöxí, te ní xáhaⁿ-dě xii-gá:

²⁹ Yòhó Dútú Ndiöxí sa ní cuu dañà-n cùú-í vitna, chi sa ní quide-n nàcuáa ní cachí-n xii yúhú téé xìnu cuechi núú-n.

³⁰ Chi sa ní xiní núù-í Yaá dàcácu nihnu ñaha xii ñáyiu núú ùhú núú ndàhú vitna.

³¹ Te Yaá ní tendaha-n vëxi núú ndécú nchàa ñáyiu ñuyíú-a.

³² Te cùu-gá dàtná ìⁿ ñuhú, chi dandìxi túu-gá iní ñáyiu cuendá cutnùní iní-yu cuendá Yá Ndiöxí cuèi ñá díú ñáyiu isràél cúù-yu.

Te ñu-gá cada, te canehe ñáyiu dava-gá ñuú sá yíñuhu núú ñáyiu isràél chi ñu ñáyiu isràél cúù-yu ñáyiu cùu cuendá-n.

Duha ní xáhaⁿ tē Mió xii Yá Ndiöxí.

³³ Te té Chèé ndìhi nǎná Jèsús ní cuñúhu-yu tnúhu ní cáháⁿ té Mió cuendá-gá. ³⁴ Te dàtnùní té Mió ní xicáⁿ táhú-dě núú Yá Ndiöxí cuendá-yu, te xáhaⁿ-dě xii tá Màriá nǎná Jèsús:

—Cudedóho tnúhu na càháⁿ-í-a, té líhli-a ní nduu táhú-dě nacanu ichi-dé dava ñáyiu isràél ichi Yá Ndiöxí, te davá-yu vá tnǐ-yu tnúhu cáháⁿ-dé, te ñáyiu-áⁿ cuíta nihnú-yu, te cada-dé nàcuáa cutnùní iní ñáyiu sá Yá Ndiöxí ní tendaha ñaha-gá xii-dé, dico vá quindáá iní-yu, chi daquèe tíhú ñáhã-yu xii-dé. ³⁵ Te ducaⁿ te cutnùní nàcuáa sàni iní ìⁿ ñáyiu. Dico sá cúú-xí yòhó chi ío cada ndàhú-xi iní-n, chi sùúni dàtná sá nǐ nícuèhé iní-n càda-xi — cachí-dé xáhaⁿ-dě xii tá Màriá.

³⁶ Te xiáⁿ ndécú tnàhá ìⁿ ñaha càháⁿ tnúhu Yá Ndiöxí nání-áⁿ Àná, te tǎtá-aⁿ ní xínani-dě Fànuél

ñaní tnáhá ndïi Àsér. Te ñaha-áⁿ sa ní sahnu vïhi-aⁿ, te cuechi-ni-aⁿ ñí tnándaha-aⁿ te úsá-ni cuíá ñí xíndecu-aⁿ ndïhi yïi-aⁿ, ³⁷ te ní quendóo queé-aⁿ, te sa ñùhu-aⁿ cúmídícó cùmí cuíá-aⁿ. Te ñá túú ní xõo quee-aⁿ veñúhu càhnu sá ïo cùnuu, chi nduu niú ní xóo chiñuhu-aⁿ Dútú Ndiõxí, te áma ñá túú tnàhí ná ní xõo caxi-aⁿ ní xóo cáháⁿ ndïhi-aⁿ Yá Ndiõxí. ³⁸ Te ðiu-ni òré ndécü-yu ndïhi Jèsús ní quexìo-aⁿ núú-yu, te ní ndacáⁿ táhú-áⁿ núú Yá Ndiõxí cuendá sá ñí xiní-aⁿ Jèsús, te dàtnùní ní ngüíta-aⁿ cáháⁿ váha-aⁿ cuendá-gá núú nchàa ñáyiu, ñáyiu ndètu quiní sáá nduu dàcácu Yá Ndiõxí ñáyiu Jerusalén núú tnündòho tnúhu ndàhú.

Cuánuhú-yu ñuú Nazàrét

³⁹ Te sáta ñí quidé-yu nchaa nàcuáa cáháⁿ tnúhu Yá Ndiõxí, te cuánuhú-yu ñuú Nazàrét núú ndécú tnàhí-yu, te ñuú-áⁿ yíndèhu-xi distritú Galileá. ⁴⁰ Te té líhli nàni Jesús-áⁿ tá sàhnu-dé, te ta nihí ndéé-dé cuáháⁿ, te ducaⁿ ïo váha ta sáá sá xiní tnùní-dé cuáháⁿ, chi Yá Ndiõxí ndécú ndïhi ñaha-gá xii-dé.

Jèsús ndécú-gã veñúhu

⁴¹ Te ndi tnahá cuíá ñí xóo quíhíⁿ té Chèé ndïhi năná Jèsús vico pàscuá ñuú Jerusalén. ⁴² Te cútnàhá ní chítú Jèsús úxúú cuíá-gã, te cuáháⁿ-yu ndïhi-gá ñuú Jerusalén vico pàscuá, chi ducaⁿ tnàhí quidé-yu. ⁴³ Te òré ní yáha vico, te ní natnïí-yu ichi cuánuhú-yu, te ní quendóo-gá ñuú Jerusalén, te ni năná-gã, te ni té Chèé ñá túú ní xiní ní quendóo-gá. ⁴⁴ Chi ní sani iní-yu sá ñútnàhá-gá tnuú nchaa ñáyiu ní sáháⁿ vico cuánuhú. Te ní xúhuⁿ-yu ïⁿ nduu ichi ta ndùcu tnúhu-yu-gá núú nchàa ñaní tnáhã-yu, ndïhi núú nchàa ñáyiu xiní

tnáhá ndihí-yu, ⁴⁵ te ñá túú ní nàníhí ñáhă-yu xii-gá. Núu ní nacuicó-yu cuánuhú tucú-yu ñuú Jerusàlén cuèndá yàcáⁿ nanducu ñàhá-yu xii-gá.

⁴⁶ Te núú ùní nduu sá ñí dana núú ñáhă-yu xii-gá, te ní naníhí ñáhă-yu nùcòo-gá xití veñúhu càhnu sá ïo cùnuu tnuú cue téé dàcuaha ñaha xii-yu nchaa tnúhu ní chídó tnùní ndíi Moisés, te ndèdóho ñaha-gă xii-güedé, te nándi sá ndúcú tnúhu-gá núú-güedě. ⁴⁷ Te nchaa cue téé xîndedóho ñaha xì-gá xîcuñúhu-güedé sá ïo váha sàá sá xìní tnùní-gá, te ío váha ñihí-gá tnúhu nàdanchocáva-gá. ⁴⁸ Te òré ní xìní ñáhá tě Chèé ndihí năná-gă xii-gá, te ío ní cuñúhu-yu, te ní xáhaⁿ năná-gă xii-gá:

—Yòhó déhe-í, ¿ná cuèndá ducaⁿ ñí quide ñaha-n xì-ndí? Te tătá-n ndihí yúhú ndíhú iní-ndí xícá nànducu ñaha-ndí xii-n —càchí-xi xăhaⁿ-xi xì-gá.

⁴⁹ Te ní xáhaⁿ Jèsús xií-yu:

—¿Ná cuèndá nánducu ñaha-ndo? ¿Náa ñá túú xìní-ndó să núú chíúⁿ Tătà-í tàú-í caca cuu-í-ăⁿ? —càchí-gá xăhaⁿ-gă xií-yu.

⁵⁰ Dico mèé-yu ñá túú ní tècú tnùní-yu nàcuáa ní xáhaⁿ-gă.

⁵¹ Te sátá dúcáⁿ te cuánuhú ndihí ñàhá-yu xii-gá ñuú Nazàrét, te ío ní sándáá iní ñáhă-gă xií-yu. Te nchaa sá ñí quide-gá-áⁿ ñí xúhuⁿ nahi-ni iní năná-gă. ⁵² Te Jèsús ducaⁿ-ni ta sàhnu-gá cuáháⁿ, te ta sàá-gá sá xìní tnùní-gá cuáháⁿ, te ducaⁿ cùdiu-gá núú Yă Ndiõxí, ndihí núú nchàa ñáyiú.

3

Té Juàá téé dàcuandute ñaha xii ñáyiú càháⁿ-dé

*tnúhu Yá Ndiöxí xítí yucu**(Mt. 3:1-12; Mr. 1:1-8; Jn. 1:19-28)*

¹ Te ní cuu sáhúⁿ cuiá sá yíndàha té Tiberiú cuéhé nàcióⁿ, te dàvâ-áⁿ nǐ cunuu té Pilatú distritú Jùdeá, te té Hèrodés ní cunuu-dě distritú Galileá, te ñaní-dé té Lìpé ní cunuu-dě distritú Itùreá ndihì ingá distritú nání Tràconité, te té Lisaniás ní cunuu-dě distritú Abiliniá. ² Te té Ànás ndihì té Caifás ní cuu-güedé dútú cùnùu. Te dàvâ-áⁿ nǐ cáháⁿ ndihì ñaha Yá Ndiöxí xii té Juàá déhe té Zacariá xítí yucu sá quihíⁿ-dé cáháⁿ-dé tnúhu-gá núú ñáyiu. ³ Te té Juàá ní yáha-dé nchaa ñuu cáa yàtni yúte Jòrdán, te xáhaⁿ-dě xii nchaa ñáyiu:

—Chí dándìxi túu iní sá ñà túú quide váha-ndo, te dañà-ndo nchàa ichi cuehé ichi duha ndècu-ndo, te cuandute-ndo, te ducaⁿ te cada càhnu iní Yá Ndiöxí nchaa yíca cuèchi-ndo —duha ní xáhaⁿ-dě xií-yu.

⁴ Te ducaⁿ nǐ quide-dé chi ní quee ndáá-xi nàcuáa ní chídó tnùnì ndi Chàíá téé ní xóo cáháⁿ tnúhu Yá Ndiöxí ndéé sanaha núú tütú ndíi núú càchí-xi: Tècú cáháⁿ níhi ìⁿ téé yìhi xítí yucu, te xáhaⁿ-dě xii ñáyiu:

“Chí dáñá nchàa ichi cuehé ichi duha ndècu-ndo, te tñi-ndo ìchi váha, te ducaⁿ càda-ndo cuendá cundecu túha-ndo, chi véxi Yaá ío cùnùu.

⁵ Te nchaa núú cùnú nachítú, te nchaa tindúú ndihì nchaa yucu ngoyo nihnu cuendá nduu ndáá, te nchaa ichi ñá túú cuǎháⁿ ndáá nduu ndáá, te nchaa ichi ñá túú càváha nduu váha.

⁶ Te nchaa ñáyiu ñuyíú-a níhí-yu tnúhu sá Yá Ndiöxí véxi-gá dàcácu nihnu ñaha-gǎ xií-yu núú ùhú núú ndàhú.”

Duha ní chídó tnùní ndíi Chàíá núú tùtú ndíi.

⁷ Te òré ní xica ñáyiú cuáháⁿ-yú cuendá dacuàndute ñaha té Juáá xií-yú, te ní xáhaⁿ-dě:

—¡Nchaa nchòhó cúú-ndó dàtná ìⁿ cóó dǎéⁿ chi ío cuihna ìní-ndó! ¿Te nása ní cuu núú tnàhá nchòhó ndúcú-ndó nàcuáa cácu nihnu-ndo núú tnùndòho cahnu vihi sá tá cùyatni ñaha xii-ndo véxi-i? ⁸ Te chí cádá vǎha vitna cuendá ducaⁿ cùtnuní sá ní dáñá-ndó nchaa ichi cuehé ichi duha ndècu-ndo. Te vǎ cǎchí-ndó sǎ ío cǎhnu cuu-ndo cuendá sá cúú-ndó ñàní tnáhá ndíi Àbrahám, chi cuèi ndéé yúú te ndacu Yá Ndiǒxí ndada-gǎ ñáyiú te cuú-yú ñàní tnáhá ndíi Àbrahám. ⁹ Te caá chi ndècu túha-xi sá quèhndé-xi nchaa yutnu sá ñà túú cǎváha sǎvidí-xi, chi nchaa yutnu-áⁿ tèhndé-xi te cuánguee-xi núú ñùhú càyú-xi. Te duha sǎtnahá-xi ndoho nchaa ñáyiú ñá túú quide váha, chi nchaa ñáyiú ducaⁿ ñà túú quide váha cùú-yú dàtná nchaa yutnu sá ñà túú cǎváha sǎvidí-xi. —cǎchí-dé xǎhaⁿ-dě xií-yú.

¹⁰ Te ní xícáⁿ tnúhu-yú núú-dě, te xǎhǎⁿ-yú:

—¿Te nása cada-ndí váíⁿ? —cǎchí-yú xǎhǎⁿ-yú xii-dé.

¹¹ Te xǎhaⁿ-dě:

—Te núú ndédacàa-ndo ndecu ndíhi-ndo úú dóó te cuáñaha-ndo ìⁿ xii ñáyiú ñá túú ndècu ndíhi, àdi núú ndècu ndíhi-ndo sá nchító-ó te cuáha-ndò-yú na cǎxi-yú —cǎchí-dé xǎhaⁿ-dě xií-yú.

¹² Te ní quexìo ìⁿ úú cue téé cuihna ìní-xi quide cobrá ñáhá xii ñáyiú cuendá impuèstú cuendá cuàndute-güedé, te ní xícáⁿ tnúhu-güedé núú tǎ Juáá, te xǎhaⁿ-güedě:

—Mèstrú, ¿te nása cada-ndí cuendá cuu váha iní Yă Ndiöxí-í? —càchí-güedé xăhaⁿ-güedě xii-dé.

¹³ Te té Juàá ní xáhaⁿ-dě:

—Vá cuidó-ndó càda cobrá-ndó ñăyiu —càchí-dé xăhaⁿ-dě xii-güedé.

¹⁴ Te tnàhá ìⁿ ũú cue tée cùu sandadú xĩndecu-áⁿ nĩ xícáⁿ tnúhú-güedě núú tē Juàá, te xăhaⁿ-güedě:

—Te nchúhú ¿nása cada-ndí cuendá cuu váha iní Yă Ndiöxí-í? —càchí-güedé xăhaⁿ-güedě xii-dé.

Te ní xáhaⁿ tē Juàá:

—Vá quéndèè-ndó sã néhé tnàha ñăyiu-ndo, te ni vă dácàa díquí-ndö-yu ìⁿ sá ñà túú nă quidě-yu, te nduu vétú iní-ndó nàcuáa ñùhu yáhu-ndo —càchí-dé xăhaⁿ-dě xii-güedé.

¹⁵ Te nchaa ñăyiu xĩndetu sá quíxí Crìstú sàni ìⁿ sani úú iní-yu núu sá díú Crìstú Yaá tendaha Yă Ndiöxí quixi ñuyíú-a cùu te Juàá àdi ñáhá. ¹⁶ Dico té Juàá ní cáháⁿ ndodo-dé núú-yu ncháá-yu, te xăhaⁿ-dě:

—Na càchí tnúhu ndáá-í xii-ndo sã yǔhú véxi-í sá cuendá-ni dacuàndute ñaha-í xii-ndo dàtná ní cachí Yă Ndiöxí, dico nchìcúⁿ ingá tée véxi, te tée-áⁿ taxi-dé Espiritú Yă Ndiöxí cundecu ndihí-ndo, te cùu-xi datná ìⁿ ñuhú, chi ndada ndoo ndada nine-xi iní-ndó. Te tée-áⁿ ìo-gá cúnùu-dé dàcúúxí yǔhú, chi yúhú cùu-í ìⁿ tée duuⁿ duuⁿ ñá túú tàu-í nandaxi-í cuèdicó ñi chàú-dé dico quide-í chiuⁿ-dé. ¹⁷ Te tée-áⁿ sa véxi túha-dé sá cádá dèⁿ ñaha-dé xii-o dàtná quidé ñăyiu ndàda ndoo triú, chi ñăyiu-áⁿ sa nèhe túha-ná-yu yaxíⁿ-yu òré náñani cuendá ndada ndoo-yu, te òré ndádá ndòó-yu triú-áⁿ te dàquee díⁿ-yu mihi-xi, te tàxúha-yu mee-nă triú-áⁿ, te mihi-xi-áⁿ sáhmí-yu. Te dàtná

quidě-yu mihi triú-áⁿ ducaⁿ sãtnahá-xi cada ñaha téé-áⁿ xii nchaa ñáyiu ñá túú quide váha, chi daquihíⁿ ñáhá-dě xií-yu núú ñùhú núú càyú, te ñuhú-áⁿ ñà túú tnàhí ndàhvá —càchí-dé xãhaⁿ-dě xií-yu.

¹⁸ Te titní víhí-gã tnúhu váha ní xáhaⁿ tě Juáá xií-yu òré ní dásàhú ñáhá-dě. ¹⁹ Te ní cáháⁿ-dé dóho té Hèrodés cuendá sá ndécá-dě ìⁿ ñaha nàni Herodiás ñaha ní cándeca ñani-dé té Lìpé, te ní xáhaⁿ-dě cuendá nchaa dava-gá sá cuèhé sá dúhá quide-dé. ²⁰ Dico té Hèrodés ñá túú ní quide cuendá-dé tnúhu ní cáháⁿ té Juáá, chi nèhé-gá tucu ní quide-dé, chi da vecaá ní chihi-dé té Juáá.

Sàndute Jesús

(Mt. 3:13-17; Mr. 1:9-11)

²¹ Te òré dácuàndute té Juáá nchaa ñáyiu, te tnàhá Jèsús ní dácuàndute ñaha-dé xii-gá. Te nini càháⁿ ndihí-gá Dútú Ndiõxí ní nacaáⁿ andiù, ²² te ní quee Espiritú Yã Ndiõxí véxi cuuⁿ túu-xi, te càa-xi datná cáá ìⁿ lómá, te òré-áⁿ ñí tecú ní cáháⁿ Yã Ndiõxí ndéé andiù, te xãhaⁿ-gã xii Jèsús:

—Yòhó cúú-n Dèhe-í téé ío cùu iní-í, te ío cùdí iní ñáhà-í xii-n —càchí-gá xãhaⁿ-gã xii Jèsús.

Cue téé ní xíndecu díhna-gá ñuyíú-a dàcúúxí Xĩtohó Jesucristú

(Mt. 1:1-17)

²³ Te ndècu Jesús dàtná ócó úxí cuíá-gã cútnàhá ní chisaha-gã chiùⁿ ní táhú Tãtá-gã Dútú Ndiõxí cada-gá. Te ní cuu-gá déhe té Chèé chi ducaⁿ sàni iní ñáyiu ñuyíú-a. Te té Chèé-áⁿ ñí cuu-dé déhe té Èlì, ²⁴ te téé-áⁿ ñí cuu-dé déhe té Mátát. Te té Mátát-áⁿ ñí cuu-dé déhe té Lèví, te téé-áⁿ ñí cuu-dé

déhe té Mèlquí. Te té Mèlquí-án nǐ cuu-dé déhe té Jàná, te té-án nǐ cuu-dé déhe té Chèé. ²⁵ Te té Chèé-án nǐ cuu-dé déhe té Matàtiás, te té-án nǐ cuu-dé déhe té Àmós. Te té Àmós-án nǐ cuu-dé déhe té Nàhúm, te té-án nǐ cuu-dé déhe té Èslí. Te té Èslí-án nǐ cuu-dé déhe té Nagàí, ²⁶ te té-án nǐ cuu-dé déhe té Màát. Te té Màát-án nǐ cuu-dé déhe té Matàtiás, te té-án nǐ cuu-dé déhe té Semèí. Te té Semèí-án nǐ cuu-dé déhe té Chèé, te té-án nǐ cuu-dé déhe té Jùdá. ²⁷ Te té Jùdá-án nǐ cuu-dé déhe té Jòaná, te té-án nǐ cuu-dé déhe té Rèsá. Te té Rèsá-án nǐ cuu-dé déhe té Zorobàbél, te té-án nǐ cuu-dé déhe té Salàtiél. Te té Salàtiél-án nǐ cuu-dé déhe té Nèrí, ²⁸ te té-án nǐ cuu-dé déhe té Mèlquí. Te té Mèlquí-án nǐ cuu-dé déhe té Àdí, te té-án nǐ cuu-dé déhe té Còsám. Te té Còsám-án nǐ cuu-dé déhe té Elmòdám, te té-án nǐ cuu-dé déhe té Ęr. ²⁹ Te té Ęr-án nǐ cuu-dé déhe té Jòsué, te té-án nǐ cuu-dé déhe té Elièzér. Te té Elièzér-án nǐ cuu-dé déhe té Jòrím, te té-án nǐ cuu-dé déhe té Mátát. ³⁰ Te té Mátát-án nǐ cuu-dé déhe té Lèví, te té-án nǐ cuu-dé déhe té Mió. Te té Mió-án nǐ cuu-dé déhe té Jùdá, te té-án nǐ cuu-dé déhe té Chèé. Te té Chèé-án nǐ cuu-dé déhe té Jònán, te té-án nǐ cuu-dé déhe té Eliàquíim. ³¹ Te té Eliàquíim-án nǐ cuu-dé déhe té Mèléá, te té-án nǐ cuu-dé déhe té Mainán. Te té Mainán-án nǐ cuu-dé déhe té Mátatá, te té-án nǐ cuu-dé déhe té Nátán. ³² Te té Nátán-án nǐ cuu-dé déhe té Dàvíí, te té-án nǐ cuu-dé déhe té Isàí. Te té Isàí-án nǐ cuu-dé déhe té Òbéd, te té-án nǐ cuu-dé déhe té Bòóz. Te té Bòóz-án nǐ cuu-dé déhe té Sàlmón, te té-án nǐ cuu-dé déhe té Naàson. ³³ Te té Naàson-án nǐ cuu-dé déhe té Aminàdáb, te té-án nǐ cuu-dé déhe té Àrám. Te té Àrám-án nǐ cuu-dé

déhe té Èsróm, te téé-áⁿ nǐ cuu-dé déhe té Fàrés. Te té Fàrés-áⁿ nǐ cuu-dé déhe té Jùdá, ³⁴ te téé-áⁿ nǐ cuu-dé déhe té Jàcób. Te té Jàcób-áⁿ nǐ cuu-dé déhe té Isàác, te téé-áⁿ nǐ cuu-dé déhe té Àbrahám. Te té Àbrahám-áⁿ nǐ cuu-dé déhe té Tàré, te téé-áⁿ nǐ cuu-dé déhe té Nàcór. ³⁵ Te té Nàcór-áⁿ nǐ cuu-dé déhe té Sèrúg, te téé-áⁿ nǐ cuu-dé déhe té Ragàú. Te té Ragàú-áⁿ nǐ cuu-dé déhe té Pèlég, te téé-áⁿ nǐ cuu-dé déhe té Hèbér. Te té Hèbér-áⁿ nǐ cuu-dé déhe té Sàlá, ³⁶ te téé-áⁿ nǐ cuu-dé déhe té Cànán. Te té Cànán-áⁿ nǐ cuu-dé déhe té Arfàxád, te téé-áⁿ nǐ cuu-dé déhe té Sëm. Te té Sëm-áⁿ nǐ cuu-dé déhe té Nöé, te téé-áⁿ nǐ cuu-dé déhe té Làméc. ³⁷ Te té Làméc-áⁿ nǐ cuu-dé déhe té Matusalén, te téé-áⁿ nǐ cuu-dé déhe té Ènóc. Te té Ènóc-áⁿ nǐ cuu-dé déhe té Jàréd, te téé-áⁿ nǐ cuu-dé déhe té Mahalàleél. Te té Mahalàleél-áⁿ nǐ cuu-dé déhe té Cànán, ³⁸ te téé-áⁿ nǐ cuu-dé déhe té Ènós. Te té Ènós-áⁿ nǐ cuu-dé déhe té Sèt, te téé-áⁿ nǐ cuu-dé déhe té Àdán. Te té Àdán-áⁿ chi mee Yă Ndiöxí ní cadúha ndaha ñàha-gá xii-dé.

4

Sácuíhná quidé yica-xi cada Jesús sá ñà túú tàú-gá cada-gá ní cùu

(Mt. 4:1-11; Mr. 1:12-13)

¹ Te Jèsús ní naqueheⁿ-gá ichi yuhu yúte Jòrdán cuánuhú-gá. Te sa ndècu ndihi-gá Espíritú Yă Ndiöxí, te Espíritú-áⁿ ndécá ñàha-xi xii-gá cuáháⁿ ñⁿ xití yucu. ² Te yàcáⁿ ní xíndecu-gá údico nduu, te sácuíhná nǐ cuiní-xi coto ndeé ñáhá-xí xì-gá te núu ndisa sá vă cádá-gă ñⁿ sá ñà túú tàú-gá cada-gá. Te ñá túú tnàhí ná ní xèxi-gá ndi údico nduu-áⁿ, te sátá

dúcáⁿ te ní xícáⁿ iní-gá caxi-gá. ³ Te sácúíhná-ǎⁿ nǎ xáhaⁿ-xi xì-gá:

—Te núu ndisa sá cúú-n Dèhe Yá Ndiǒxí, te cúñaha xì yúú-a na ndùu-xi paá —càchí-xi xǎhaⁿ-xi xì-gá.

⁴ Te Jèsús ní xáhaⁿ-gǎ xii-xi:

—Núú tütú Yǎ Ndiǒxí càchí-xi: “Ñá díú mèe-ni paá candeca-xi iní ñáyiu, chi tnàhá nchaa tnúhu càháⁿ Yǎ Ndiǒxí candeca-xi iní-yu”, duha càchí-xi núú tütú-gá —càchí-gá xǎhaⁿ-gǎ xii-xi.

⁵ Te dǎtnùní sácúíhná ndécá ñàha-xi xii-gá cuáháⁿ ñⁿ núú tìndúú dùcúⁿ, te uuⁿni ní dánèhé núú ñháá-xí xì-gá nchaandi túhú nàcióⁿ cáá ñùyúú. ⁶ Te ní xáhaⁿ-xi xì-gá:

—Yúhú cada-í, te taxi tnùní-n nchàa-ndi túhú nàcióⁿ-a ndihi nchaa sá vǎha íó díu-ni nchaa nàcióⁿ-a, te cachí ñáyiu sá ío cùnuu-n, chi yúhú cúú cuendá-í nchaa sá íó nchaa nàcióⁿ-a, te ndǎdani càa ñáyiu cùu iní-í te cúñaha-í xii-yu taxi tnùní-yu. ⁷ Te núu ni yùhu ni iní-n chìñuhu ñaha-n xii-í ñá, te nchaa taxi-í cuu cuendá-n —càchí-xi xǎhaⁿ-xi xì-gá.

⁸ Te Jèsús ní xáhaⁿ-gǎ xii-xi:

—Xocuñí yòhó sácúíhná núú ndécù-í-a, chi vá cúú càda-í nàcuáa càchí-n chi núú tütú Yá Ndiǒxí càchí-xi: “Chìñuhu-ndo Dütú Ndiǒxí Yaá cúú Ndiǒxí-ndó, te ñⁿdì díí-ni-gǎ cada-ndo nchàa nacuáa càháⁿ-gá”, duha càchí-xi núú tütú-gá —càchí-gá xǎhaⁿ-gǎ xii-xi.

⁹ Te sácúíhná ndécá ñàha tucu-xi xii-gá cuáháⁿ ñúú Jerusàlén, te ní xáhaⁿ-xi xì-gá cuásaá-gá díquí veñúhu càhnu sá ío cùnuu, te ní xáhaⁿ tucu-xi:

—Te núu ndisa cùu-n Déhe Yá Ndiöxí te cuandèe ndava ndéé núú ñúhú ¹⁰ cuendá quee ndáá-xi nàcuáa càháⁿ-xi núú tütú Yă Ndiöxí núú càchí-xi: Yá Ndiöxí tendaha-gă cue espíritú xínú cuèchi núú-gă quixi-xi coto ñaha-xi xì-n.

¹¹ Te núú ndáhá-xí càundodo-n cuendá sá vă dánĉcuèhé yúú sähá-n, duha càchí-xi núú tütú-gá —càchí sácuíhná xăhaⁿ-xi xì-gá.

¹² Te Jèsús ní xáhaⁿ-gă xii-xi:

—Te càchí tucu-xi núú tütú Yă Ndiöxí: “Vá cání ìní-n còto ndéé-ñ Dütú Ndiöxí Yaá cúú Ndiöxí-n núu ndisa sá dácăcu nihnu ñaha-gă xii-n cuendá ĩⁿ sá sání ìní-n càda-n sá cúú-xí mèe-n”, duha càchí-xi núú tütú-gá —càchí-gă xăhaⁿ-gă xii-xi.

¹³ Te sátá dúcáⁿ te sácuíhná ñà túú-gă ní cùtnuní ìní-xi nása cada-xi Jèsús, núu xiáⁿ ní xica-xi cuáháⁿ-xi ní sanaa tnaa-xi.

Distritú Galileá ní chisaha Jèsús chiúⁿ ní táhú Tătá-gă Dütú Ndiöxí cada-gá

(Mt. 4:12-17; Mr. 1:14-15)

¹⁴ Te Jèsús cuáháⁿ tucu-gă distritú Galileá, dico sa ndècu ndihí-gă Espíritú Yă Ndiöxí, te ñi càa xico xiáⁿ ñi níhĭ-yu tnúhu nchaa nàcuáa quide-gá.

¹⁵ Te ndi tnahá ñúú cuáháⁿ-gă ducaⁿ cuănguĭhu-gă veñúhu-yu dānehé ñáhá-gă xií-yu, te nchaá-yu càchí-yu sá ĩo cāhnu cuu-gá.

Jèsús ndécú-gă ñúú Nazàrét

(Mt. 13:53-58; Mr. 6:1-6)

¹⁶ Te Jèsús ní sáháⁿ-gă ñúú Nazàrét ñúú núú ñi sahnu-gá. Te nduu ndètatú ñáyiú ní quĭhu-gă veñúhu, chi ducaⁿ tnàhí quide-gá, te ní ngúnutnĭí-gá dăcuàha-gá tutú ndèé tnúhu Yá Ndiöxí. ¹⁷ Te

ní sáñaha-güedě xii-gá tutú ndèé tnúhu ní cáháⁿ ndíi Chàíá téé ní xóo cáháⁿ tnúhu Yá Ndiöxí ndéé sanaha, te òré ní nandicá-gá núú tütú-áⁿ te ní naníhí-gă núú cächí-xi:

18 Espíritú Yă Ndiöxí ndécú ndìhi ñaha-xi xii-í, chi ní cachí-gá sá cáháⁿ-í tnúhu-gá sá cúú-xí ñáyiú ndàhú,

ñáyiú vátá cündedóho tnàhí-gá.

Te véxi-í cuendá vá ndìhú-gá iní ñáyiú ñá túú ndècu váha iní-xi,

te cue ñáyiú sa nèhe váha ñaha-nă yucu ñăvâha dâcâcu nihnu-í-yu.

Te cue ñáyiú cuâá nacaáⁿ-í núŭ-yu,

te ñáyiú ndòho dandoho ñaha tnaha ñáyiú-xi tauni-hnu-í-yu.

19 Te cúñaha-í xii ñáyiú sá sàá nduu càda Yá Ndiöxí ñⁿ sá vâha sá cúú-xí-yu.

Duha cächí-xi núú tütú dâcuâha-gá.

20 Te Jèsús ní nacadí-gá núú tütú-áⁿ, te ní nacuâha-gá ñⁿ téé xìnu cuechi veñúhu-áⁿ, te ní ngóo-gá. Te nchaa ñáyiú yìhi veñúhu ñá núú núŭ-yu ndèhe ñahá-yu xii-gá. 21 Te xăhaⁿ-gă xií-yu:

—Mei vitna ní quee ndáá-xi nâcuâa cáháⁿ-xi núú tütú Yă Ndiöxí —cächí-gá xăhaⁿ-gă xií-yu.

22 Te ncháá-yu ní cáháⁿ váha-yu cuendá-gá, te ní cuñúhu-yu tnúhu váha cáháⁿ-gá, te xìtnàhá-yu:

—¿Te náa ñá díú tēe-a cùu-dé déhe té Chèé-ăⁿ? — cächí-yu xìtnàhá-yu.

23 Te Jèsús ní xáhaⁿ-gă:

—Na cächí tnúhu ndáá-í xii-ndo să ñúhú iní-ndó cūñaha-ndo xii-í ñⁿ tnúhu cùtexínu sá cáháⁿ méé-ndó, te quesaha-ndo: “Ñátátná cada tátna

mee-n”, duha quesaha-ndo. Te cúñaha tùcu-ndo xii-í: “Sa ní níhí-ndí tnúhu nàcuáa ní quide-n ñúú Capèrnaúm, te cada-n tnàhá ñúú núú ní sahnú-n”, duha quesaha-ndo —càchí-gá xǎhaⁿ-gǎ xií-yu.

²⁴ Te ní xáhaⁿ tùcu-gá:

—Na càchí tnúhu ndáá-í xii-ndo sǎ nì ñⁿ téè càháⁿ tnúhu Yá Ndiõxí ñá túú tnàhá iní ñáhá ñǎyiu ñúú-dé. ²⁵ Te na càchí tnúhu ndáá tucu-í xii-ndo sǎ ïo vai ñáyiu ñíhí ñáyiu quèé ní xíndecu nàcióⁿ Isràél cútnàhá ní xíndecu té Èliás cútnàhá ñá túú ní cùuⁿ dáú ùní cuíá dava, te dàvá-áⁿ ïo ní ndoho ñáyiu docó nitùhú nàcióⁿ. ²⁶ Dico Yá Ndiõxí ñá túú ní tëndaha-gá té Èliás quíhíⁿ-dé vehe ndédani càa ñáyiu ñíhí-áⁿ, chi vehe ñⁿ ñaha ñúú Sàreptá ní xáhaⁿ-gǎ ní sáháⁿ-dé, te ñúú-áⁿ cáa yàtni-xi ñúú Sídón. ²⁷ Te ní xíndecu tucu ingá téè ní xóo cáháⁿ tnúhu Yá Ndiõxí ndéé sanaha, te téè-áⁿ ní xínani-dě Eliseú, te ñíu-ni dàvá-áⁿ ní xíndecu tucu vai ñáyiu cùhú nàcióⁿ Isràél, ñáyiu ní tnahá cuéhé sǎ dátèhyú nihnu-xi yiqui cùñú-yu dico ñá túú ní ndúha-yu, chi ñⁿ ñíi-ni té Nàamán téè distritú Síríá ní ndúha-dé —càchí-gá xǎhaⁿ-gǎ xií-yu.

²⁸ Te sá dúcáⁿ ní cáháⁿ-gá te xǎⁿ ní cudééⁿ víhí nchàa ñáyiu yíhí veñúhu-ǎⁿ núú-gǎ. ²⁹ Te ní queñuhú-yu Jèsús yuhu dèhvá tìndúú núú cáa ñúú-yu-áⁿ cuèndá yàcáⁿ dàquée-yu-gá dèhvá ní cùu. ³⁰ Dico Jèsús vii-ni ní quee-gá tnuú-yu cuáháⁿ-gá.

Ñⁿ téè yíhí ñaha espíritú cùndíhí yucu ñávǎha
(Mr. 1:21-28)

³¹ Te Jèsús cuáháⁿ-gá ñúú Capèrnaúm, te ñúú-áⁿ yíndèhu-xi distritú Galileá. Te yàcáⁿ ndécú-gǎ ní tnahá nduu ndètátú ñáyiu, te ní ngúíta-gá

dácuàha-gá ñáyi. ³² Te x̄icuñúhu-yu nchaa nàcuáa dànehé ñáhá-gă xií-yu, chi càháⁿ-gá dàtná càháⁿ ìⁿ téé cùnū, te cùnū ndisa-gá.

³³ Te xití veñúhu yìhi ìⁿ téé yìhi ñaha ìⁿ espíritú cúndìhi yucu ñávãha, te espíritú-áⁿ n̄i quide-xi níhi ní càháⁿ téé-áⁿ, te xãhaⁿ-dě xii Jèsús:

³⁴ —¿Te ná cuíní yòhó Jèsús téé ñūú Nazàrét cada ñaha-n x̄i-ndí nūu véxi-n nūú ndécú-ndĩ-i? ¿Áⁿ v̄xi-n dànaa ñaha-n xii-ndí? Chi yúhú x̄iní ñáhà-í xii-n sã cúú-n ìⁿ téé ñá túú tnàhí cuéchi-xi chi núú Yã Ndiòxí ní quee-n v̄xi-n ñùyíú-a —càchí-dé xãhaⁿ-dě xii-gá.

³⁵ Te Jèsús ní tenàá-gá espíritú cúndìhi yucu ñávãha-áⁿ, te xãhaⁿ-gă:

—¡Cadí yuhu-n, te taquèe yiqui cuñú téé-áⁿ! —
càchí-gá xãhaⁿ-gă.

Te espíritú cúndìhi yucu ñávãha-áⁿ n̄i dándùá-xi téé-áⁿ ndeé ñuhu tnuú ñáyi x̄indecu-áⁿ, te ñá túú-gă ná ní quide ñaha-xi, te ní quee ñaha-xi x̄i-dé.

³⁶ Te nchaa ñáyi x̄indecu-áⁿ n̄i cuñúhu-yu, te ní x̄itnàhá-yu:

—¿Te nása ndūu-tu tnúhu càháⁿ téé-ãⁿ ñá? ¡Te càháⁿ-dé dàtná càháⁿ ìⁿ téé tàxi tnuní víhí, chi càháⁿ-ni-dé te nchaa espíritú cúndìhi yucu ñávãha quèe-ni-xi yiqui cuñú-yu! —càchí-yu x̄itnàhá-yu.

³⁷ Te nchaa xichi ní níhí-yu tnúhu nàcuáa quide Jèsús.

*Jèsús quidé tãtna-gá nãná ñadìhí té Xímú
(Mt. 8:14-15; Mr. 1:29-31)*

³⁸ Te Jèsús ní ndee-gá xití veñúhu, te cuáháⁿ-gá vehe té Xímú. Te nãná ñadìhí té Xímú-áⁿ cùhú-aⁿ

ñùhu vihi-aⁿ cahni, te ní cáháⁿ ndàhú-yu núú Jèsús cuèndá-aⁿ. ³⁹ Te Jèsús ní sáháⁿ-gá núú ndécú-áⁿ, te ní ngúnundeyi-gá te ní xáhaⁿ-gá xii cahni-áⁿ sá ná xòcuìñí-xi, te ní xòcuìñí-ni-xi, te òré-ni-áⁿ nǐ ndúha ñaha cùhú-áⁿ te ní ndacóo-aⁿ ní xinu cuechi-aⁿ nùú-güedě ndihì-gá.

Jèsús quidé tătna-gá vài ñáyiu cùhú
(Mt. 8:16-17; Mr. 1:32-34)

⁴⁰ Te òré ní ngódó tnùú nchícanhii, te nchaa ñáyiu xĩndecu ndihì ñáyiu cùhú vehe-xi ndèca ñahá-yu cuáháⁿ núú Jèsús. Te Jèsús ní sacáⁿ ndodo-gá ndaha-gá díquí ìⁿ ìⁿ ñáyiu cùhú-áⁿ, te ducaⁿ nǐ quide-gá te ní ndúha-yu. Te ndi dííⁿ nùú cuèhé tnàhá-yu ìⁿ íⁿ-yu ni cùu. ⁴¹ Te tnàhá dava ñáyiu cùhú-áⁿ yíhí ñàha espíritú cùndihì yucu ñávãha xií-yu ni cùu, te òré ní quee ñaha-xi xii-yu, te xíãⁿ ní quide-xi níhi ní cáháⁿ-yu, te xãhãⁿ-yu xii Jèsús:

—Yòhó cúú-n Dèhe Dútú Ndiõxí —càchí-yu xãhãⁿ-yu xii-gá.

Dico Jèsús níhi ní cáháⁿ-gá ní tenàá-gá nchaa espíritú cùndihì yucu ñávãha-áⁿ, te xãhaⁿ-gá sá vã dúcáⁿ-gã cada-xi, chi sa xiní-xi sá díú-gã cúú-gã Crìstú Yáá ní tendaha Yã Ndiõxí véxi ñuyíú-a.

Jèsús dánèhé-gá ñáyiu distritú Galileá
(Mr. 1:35-39)

⁴² Te ìⁿ nduu ní túndaá-ni ní quee Jèsús ñuú núú ndécú-gã-áⁿ cuáháⁿ-gá ìⁿ xichi núú ñã túú ñáyiu ndècu. Te cue ñáyiu ní ngüíta-yu nànducu ñahá-yu xii-gá te ní naníhí ñáhãⁿ-yu, te cuíní-yu

ngani ñàhá-yu xii-gá cuèndá sá ñà túú-gă ndèé quíhíⁿ-gá ní cùu. ⁴³ Dico ní xáhaⁿ-gă xii-yu:

—Dacuití quíhíⁿ-í cúñaha-ĩ xii nchaa ñáyiu dava-gá ñuú tnúhu sá càháⁿ nàcuáa ndíhu ndaha ñàha Yá Ndiöxí xii-yu, chi chiùⁿ tnahí-ăⁿ vëxi-í —càchí-gá xăhaⁿ-gă xii-yu.

⁴⁴ Te ní xica cuu Jèsús ní dánèhé-gá ñáyiu tnúhu-gá nchaa xití veñúhu ndăa distritú Galileá.

5

Jèsús ní quide-gá ní ñíhí-güedě chácá
(Mt. 4:18-22; Mr. 1:16-20)

¹ Te ñⁿ xito ndècu Jèsús yuhu làgúná Genesàrét, te ío cuéhé ñáyiu ní sáá, te ta dàdehnde ñaha-ná-yu xii-gá cuáháⁿ sá cuìní-yu cundedóho-yu nchaa tnúhu càháⁿ-gá. ² Te Jèsús ní xiní-gá úú bàrcú cue téé tñè chácá xĩnutñí-xi yatni yuhu làgúná-áⁿ, te sa ní quene cue téé ñùhu xití-xi-áⁿ xĩnaquete-güedé ñunu-güedé. ³ Te Jèsús cuásaá-gá núú ñⁿ bàrcú-áⁿ, te bàrcú-áⁿ cúú-xí bàrcú té Xímú, te ní xáhaⁿ-gă xii té Xímú-áⁿ să dánñdehe-dé-xi luha-gá xití ndute. Te dătnùní ní ngóo-gá núú bàrcú-áⁿ, te xíaⁿ núcöo-gá ní ngüíta-gá dánèhé-gá ñáyiu. ⁴ Te òré ní túhú ní dánèhé ñàhá-gă xii-yu, te ní xáhaⁿ-gă xii té Xímú:

—Daquíhíⁿ bàrcú-a xití làgúná mei núú cùnú-gá, te dàquée-ndo ñunu-ndo tñè-ndo chácá —càchí-gá xăhaⁿ-gă xii-dé.

⁵ Te té Xímú ní xáhaⁿ-dè:

—Mèstrú, ñi niú ní quide chiùⁿ-ndí te ñi ñⁿ chácá ñà túú ní ñíhí-ndí, dico vitna cuèndá-ñi sá yòhó

táuchìuⁿ-n te na dàquée-ndí ñunu-ndí váⁿ —càchí-dé xăhaⁿ-dě xii-gá.

⁶ Te òré ní dáquëe-güedé ñunu-güedé te súúní vâi chácá nǐ níhí-güedé, te ta ndátá-nă ñunu-güedé cuáháⁿ ní cùu. ⁷ Núu ní quide-güedé ndaha-güedé núu dâva-gá cue tée cùndihí-güedé xǐxúhuⁿ ingá bàrcú cuendá quíhíⁿ-güedé chindee ñàha-güedé. Te cue tée-áⁿ nǐ sáháⁿ-güedé ní chindee tnàha-güedé ní dáchítú-güedé ndí ndúu bàrcú mee-ni chácá, te súúní nǐ cuu véé núu cuìní-na-xi quée naa-güedé ndihí bàrcú ní cùu. ⁸ Te sá dúcáⁿ cuìní-xi quée naa bàrcú ní cùu, núu té Xímú, àdi Pelú chi úú diu-dé, ní ngúíñí xítí-dě núu Jèsús, te xăhaⁿ-dě:

—Xocuíñí yòhó Jèsús núu ndécú-í-a, chi yúhú cúu-í ñⁿ tée ío ndécú cuéchi-xi —càchí-dé xăhaⁿ-dě xii-gá.

⁹ Te ducaⁿ nǐ cáháⁿ-dé chi ní yùhú-dé, te ní cuñúhu-dé ndihí nchaa cue tée ndihí-dé-áⁿ cuendá sá ío vâi chácá nǐ níhí-güedé. ¹⁰ Te tnàhá té Jàcobó ndihí té Juàá cue déhe té Zebèdeú ío ní cuñúhu-güedé, te diu-ni cue tée cùndihí té Xímú-áⁿ cúu-güedé tnàhá-güedé. Te Jèsús ní xáhaⁿ-gă xii té Xímú:

—Vá yùhú-n, chi není vitna quíhíⁿ-n dàcaháⁿ-n ñăyiu cuendá tuha ñàhá-yu xii-í —càchí-gá xăhaⁿ-gă xii-dé.

¹¹ Te ní quene-güedé ndihí bàrcú ndée ñuhu yìchí yuhu làgúná-áⁿ. Te òré-áⁿ nǐ dándõo-güedé nchaandi túhú sá ndécú ndihí-güedé, te ní tuha-güedé Jèsús.

Jèsús quidé tătna-gá ïⁿ tée tnàhá cuéhé sã dátèhyú nihnu-xi yiqui cùñú-ó

(Mt. 8:1-4; Mr. 1:40-45)

¹² Te òré ní quexìo Jèsús ïⁿ ñuú, te ní quexìo ïⁿ tée cùhú tnàhá-dé cuéhé sã dátèhyú nihnu-xi yiqui cùñú-ó, te òré ní xiní-dé Jèsús te ní sáháⁿ-dé núú ndécú-gã, te ní ngüñí xítí-dě núú-gã te ní nuu núú-dě ndàa núú ñúhú te càháⁿ ndàhú-dé, te xãhaⁿ-dě xii-gá:

—Mèstrú, véxi-í càháⁿ ndàhú-í núú-n nũu vá cùndèe iní-n càda tătna ñaha-n xii-í, chi cùnuni iní-í sã ndácú-n —càchí-dé xãhaⁿ-dě xii-gá.

¹³ Te Jèsús ní dácàá-gá ndaha-gá ní tendaha ñaha-gá xii-dé, te xãhaⁿ-gã:

—Cuu cada tătna ñaha-í xii-n, te vitna te ndúha-n —càchí-gã xãhaⁿ-gã xii-dé.

Te òré-ni ní xócuñí cuéhé tnàhá-dé. ¹⁴ Te dătnùní ní xãhaⁿ tùcu Jèsús xii-dé:

—Vá yõo ïⁿ cúñaha-n sã ñí quide tătna ñaha-í xii-n, núú dütú-ni cuàháⁿ cuendá sá ná quini ñáhá-dě xii-n sã ñí ndúha-n te cuáha-n-dě sá ndúú tãhú Yã Ndiõxí dătná ní cachí ndíi Moisés cuendá ná quini ñăyiu sã ndàá ní ndúha-n —càchí-gã xãhaⁿ-gã xii-dé.

¹⁵ Te ducaⁿ ta xíté nuu-gá tnúhu nchaa nàcuáa quide Jèsús, te ío cuéhé ñăyiu ní xóo tacá nchaa núú ñí xíndecu-gá cuendá sá cuini-yu cundedóho-yu tnúhu càháⁿ-gá, ndihí cuendá sá cuini-yu cada tătna ñaha-gã xii-yu. ¹⁶ Dico Jèsús ní xóo quee nihni-gá tnuú-yu ní xóo quihíⁿ-gá núú ñà túú ñăyiu ndècu ní xóo càháⁿ ndihí-gá Yã Ndiõxí.

Jèsús quidé tătna-gá ìⁿ té cùhú ñá cúú-gă candá nihnu

(Mt. 9:1-8; Mr. 2:1-12)

17 Te ìⁿ nduu dànehé-gá ñáyiù, te xīnucóo ìⁿ ũú cue té cùu fariséú, ndihì cue té dācuaha ñaha xii ñáyiù nchaa tnúhu ní chídó tnùnì ndíi Moisés. Te cue té-áⁿ ñí quee-güedé nchaa ñuú yíndèhu distritú Galileá, ndihì distritú Jüdeá, ndihì ñuú Jerusalén, te nchaa ñuú-áⁿ ñí quee-güedé cuáháⁿ-güedé núú ndécú-gă. Te Yá Ndiöxí chindèe ñaha-gá quidé tătna-gá ñáyiù cùhú. 18 Te ìⁿ ũú cue té nchido-güedé ìⁿ té cùhú ñá cúú-gă candá nihnu ñuhu-dé xító ní quexìo ndihì ñaha-güedé, te cuìnì-güedé quíhu ndihì ñaha-güedě ndéé xití vehe, sáá-güedé ndéé núú Jèsús ndihì té cùhú-áⁿ. 19 Dico ñá túú ní ñhí-güedě ndéé ichi quíhu-güedé, chi cuendá ío cuéhé ñáyiù ndècu, núú xíáⁿ ní sáá-güedé díquí véhé-áⁿ ñí caáⁿ-güedé te ndàa díquí véhé-áⁿ ñí dáquëe-güedé té cùhú-áⁿ, te ñuhu-ni-dé xító ní dáquëe ñaha-güedě tnuú ñáyiù ní sáá ndéé núú Jèsús. 20 Te Jèsús ní cutnùnì iní-gá sá ñè yuhu ñí iní-güedé sàndáá iní ñáhá-güedé xii-gá, núú ní xáhaⁿ-gă xii té cùhú-áⁿ:

—Yòhó té cùhú, sa ní quide càhnu iní-í nchaa cuéchi-n —càchí-gá xăhaⁿ-gă xii-dé.

21 Te cue té dācuaha ñaha xií-yu nchaa tnúhu ní chídó tnùnì ndíi Moisés ndihì cue té cùu fariséú ní sani iní-güedé: “¿Ná cúú té-a núú càháⁿ cuéhé-dé cuendá Yá Ndiöxí-i? Te vá yóo ìⁿ ndàcu cada cahnu iní nchaa yíca cuéchi ñáyiù, chi ìⁿdii díi-ni Yá Ndiöxí quidé càhnu iní-gá”, duha ní sani iní-güedé.

22 Dico Jèsús sa ní cutnùní iní-gá nàcuáa sàni iní-güedé nũu ní xáhaⁿ-gã xii-güedé:

—¿Te ná cuèndá ducaⁿ sàni iní-ndó-í? 23 Te sá dúhá nĩ xáhaⁿ-ĩ xii tée cùhú-a sá cádá càhnu iní-í nchaa yíca cuèchi-dé, te xíáⁿ nchòhó ñá túú cùtnuní iní-ndó nũu ndáá càháⁿ-í àdi ñá ndáá. Dico núu cúu-í-dé sá ndácòo-dé, te caca-dé te cutnùní ndáá iní-ndó nũu ndáá càháⁿ-í àdi ñá ndáá, chi cundehe nũú-ndó nàcuáa cada-í. 24 Te vitna na càda-í nàcuáa cutnùní iní-ndó nchàa-ndo sá yùhú Tée cùu ñani tnàhá-ndó nchàa-ndo ndecu ndihí-í tnúhu ndee iní sá cádá càhnu iní-í nchaa cuèchi ñáyiu ñuyíú-a —càchí-gá xáhaⁿ-gã xii-güedé.

Te sátá dúcáⁿ te ní xáhaⁿ-gã xii tée cùhú-án:

—Ndacóo, te ndocani-n xíto ñùhu-n véxi-án, te núhú-n vèhe-n —cachí-gá xáhaⁿ-gã xii-dé.

25 Te òré-ni-án nĩ ndúha tée cùhú-án te ní ndacóo-dé, te ní ndocani-dé xíto ñùhu-dé ní quexiò-án, te ní natni-dé ichi ta cãháⁿ-dé cuánuhú sá ïo càhnu cuu Yá Ndiöxí. 26 Te nchaa ñáyiu xĩndecu-án nĩ cuñúhu-yu, te tnàhá-yu ní cachí-yu sá ïo càhnu cuu Yá Ndiöxí, te ducaⁿ ïo ní yùhú-yu, te ní xítnàhá-yu:

—Vitna ní xiní-ó ìⁿ sá ñà túú tnàhí xìní-ó ní cùu —cachí-yu xítnàhá-yu.

Jèsús cána-gã té Leví

(Mt. 9:9-13; Mr. 2:13-17)

27 Te sátá dúcáⁿ nĩ cuu te ní quee Jèsús xíán, te ní xiní-gá ìⁿ tée nàni Leví núcòo-dé ìⁿ xichi quide cobrá-dé ñáyiu cuèndá impuèstú, chi cobràdór cúu-dé, te ní xáhaⁿ-gã xii-dé:

—Néhe chìtnàhá ñàhá-n xii-í —càchí-gá xáhaⁿ-gã xii-dé.

28 Te té Lèví-áⁿ ñi ndàcuíñí-dé te ní dándõ-dé nchaa sá ndécú ndìhi-dé núú núcõ-dé-áⁿ, te ní tuha-dé Jèsús.

29 Te sátá dúcáⁿ te té Lèví-áⁿ ñi quide-dé ìⁿ vico càhnu vehe-dé sá cúú-xí Jèsús, te ní tacá vài cue téé quide chiuⁿ quide-dé, te nchaa-güedé cuánguìhu-güedé mèsá ní ngóo-güedé ndìhi dava-gá ñáyiu ní quexìo cuendá caxi-güedé ndìhí-yu. 30 Dico cue téé cùu fariséú ndìhi cue téé dàcuaha ñaha xií-yu nchaa tnúhu ní chídó tnùnì ndíi Moisés ní ngúíta-güedé xìcuèhé-güedé cue téé xìca cuu ndìhi-gá, te xáhaⁿ-güedé:

—¿Ná cuendá xéxí-ndó xìhi-ndo ndìhi cue téé cuihna ìní-xì quide cobrá ñáhá xì ñáyiu cuendá impuèstú, ndìhi nchaa dava-gá cue téé ndècu ichi cuehé ichi duha-i? —càchí-güedé xáhaⁿ-güedé.

31 Te Jèsús ní xáhaⁿ-gá xii-güedé:

—Nchaa ñáyiu ñá túú cùhú chi ñá túú xìni ñuhú-yu ñátátná, dico nchaa ñáyiu cùhú chi xìni ñuhu ñahá-yu. 32 Te yúhú véxi-í càháⁿ-í ñáyiu cùtnunì ìní-xì sá ndécú cuèchi-xì cuendá dàñá-yu nchaa sá cuèhé sá dúhá quidé-yu, te ñá túú vèxi-í càháⁿ-í ñáyiu càchí sá ñá túú ndècu cuèchi-xì —càchí-gá xáhaⁿ-gá xii-güedé.

Cue téé ndècu tnúhu núú Jèsús cuendá ñáyiu ñá túú tnàhí ná xéxí ãma càháⁿ ndìhí-yu Yá Ndiõxí

(Mt. 9:14-17; Mr. 2:18-22)

33 Te ní xáhaⁿ-güedé xii Jèsús:

—Te áma ñá túú tnàhí ná xéxí cuè téé xìca cuu ndìhi té Juáá càháⁿ ndìhi-güedé Yá Ndiõxí, te ñu-ni ducaⁿ quide cue téé xìca cuu ndìhi nchúhú cue téé cùu fariséú. ¿Te ná cuendá cue téé xìca cuu

ndihi-n ñá túú dùcaⁿ quide-güedé nũ nchaa-ni nduu xèxi-güedé xìhi-güedé quidé-güedě-i? — cachí-güedé xǎhaⁿ-güedé xii-gá.

³⁴ Te Jèsús ní xáhaⁿ-gǎ xii-güedé:

—Nchòhó xìní-ndó sǎ vǎ cúú cǔñaha-o xìi cue ñáyiu ñùhu vico tnándaha sá vǎ cúú càxí-yu nini ndècu ndihi ñaha téé tnǎndaha-áⁿ xií-yu. ³⁵ Dico sáá nduu te vǎ cùndècu ndihi ñaha-gá téé tnǎndaha-áⁿ xií-yu, te dàvá-áⁿ te cahni iní-yu vǎ cǎxí-yu sá ndìhú iní-yu —càchí-gá xǎhaⁿ-gǎ xii-güedé.

³⁶ Te ní cani-gá ìⁿ cuèndú núú ñáyiu nàcuáa tecú tnùní-yu tnúhu-gá, te xǎhaⁿ-gǎ:

—Vǎ yǒo ìⁿ dǎndée luha dóó sáá ìⁿ dóó sa ní cuu tùhú víhí, chí núu yoo ducaⁿ na càda, te dóó sáá-ǎⁿ nàndiyi-xi te uuⁿ-gá ndata-xi dǒó sǎ ñí cuu tùhú-áⁿ, te luha dóó sáá-ǎⁿ ñà túú nàtaú-xi ndée dóó sǎ ñí cuu tùhú-áⁿ. ³⁷ Te ñí vǎ yǒo ìⁿ chìhi ndidí sáá xití ìⁿ lamba sa ní cuu tùhú víhí, chí núu yoo ducaⁿ na càda, te ndava lamba sa ní cuu tùhú-áⁿ chí ío níhi yóó ndidí-áⁿ, te cuíta-ni ndidí-áⁿ te cuíta-ni lamba-áⁿ. ³⁸ Núu xǎá xíní ñùhu-xi quée ndidí sáá-ǎⁿ xití ìⁿ lamba saa cuèndá ducaⁿ ñà túú ñǎ cuu cováha-xi. ³⁹ Te ñí ìⁿ ñáyiu ñá túú tnàhá iní-yu cohó-yu ndidí sáá, te núu díhna-gá ná cohó-yu ndidí sá ñí quene díhna-gá, chí càchí-yu sá xíhí vǎha-gá ndidí sá ñí quene díhna-gá-áⁿ dàcúúxí ndidí sáá —càchí-gá xǎhaⁿ-gǎ xií-yu.

6

Cue téé xica cuu ndihi Jesús sàhnú-güedé yoco triú nduu ndètatú ñáyiu

(Mt. 12:1-8; Mr. 2:23-28)

1 Te ñⁿ nduu cùu-xi nduu ndetatú ñáyiú ñùhu Jesús ichi ndìhi cue téé xìca cuu ndìhi-gá, te ta yáha-gá ndìhi-güedé ñⁿ xichi núú cáá triú, te ní ngüíta-güedé sàhnú-güedé yoco triú-áⁿ te ndìhi ndaha-güedé quíⁿ-güedé quée triú tá xèxi-güedé cuáháⁿ. 2 Te ñⁿ ùú cue téé cùu fariséú ní xáhaⁿ-güedé xii cue téé xìca cuu ndìhi-gá:

—¿Te ná cuendá ducaⁿ quide nchohó ñⁿ sá ñà túú tàú-ó càda-o vitna cuu-xi nduu ndetatú-ó-í? —càchí-güedé xáhaⁿ-güedé.

3 Te Jèsús ní xáhaⁿ-gá xii-güedé:

—¿Te náa ñá túú dàcuaha-ndo núú tùtú Yá Ndiöxí núú càháⁿ-xi nàcuáa ní quide ndíi Dàvíí cútnàhá ní xíhí ndíi docó ndìhi cue téé ní xica cuu ndìhi ndíi-áⁿ? 4 Chi ní quíhu ndíi vehe Yá Ndiöxí, te ní queheⁿ ndíi pàá ní cuu íí ndécú-áⁿ ní dácãhñu ndíi cue téé xìca cuu ndìhi ndíi ní xexi ndíi ndìhi-güedé, te ñá túú tàú ndíi sá dúcáⁿ càda ndíi ní cùu, chi mee-ni cuè dútú tàú-güedé caxi-güedé pàá-áⁿ ní cùu —cachí-gá xáhaⁿ-gá xii-güedé.

5 Te ní xáhaⁿ tùcu-gá:

—Te yúhú Téé cùu ñaní tnáhá-ndó nchàa-ndo, tnàhá-í ndécú ndìhi-í tnúhu ndee ìní sá cùu-í nchaa ñáyiú nàcuáa cadá-yu nduu ndetatú-ó-á —càchí-gá xáhaⁿ-gá xii-güedé.

Ñⁿ téé ní yíchí ñⁿ xio ndaha-xi

(Mt. 12:9-14; Mr. 3:1-6)

6 Te ingá nduu ñⁿ-ni nduu ndetatú ñáyiú cuánguñhu Jèsús xití veñúhu dànehé-gá ñáyiú. Te xíaⁿ ndécú ñⁿ téé cùhú ní yíchí nihnu ñⁿ xio ndaha cùha-dé. 7 Te cue téé dàcuaha ñaha xii ñáyiú nchaa tnúhu ní chídó tnùní ndíi Moisés, ndìhi cue

tée cùu fariséú ndéhé-güedě nõu cada tátna ñaha Jèsús xii tée cùhú-áⁿ nduu ndètatú-güedé-áⁿ cuendá níhí-güedě nàcuáa cada-güedé cacáⁿ cuéchi-güedé cuendá-gá. ⁸ Dico Jèsús sa ní cutnùní iní-gá nàcuáa sàni iní-güedé, te ní xáhaⁿ-gã xii tée cùhú ndaha-xi-áⁿ:

—Ndacuíñí te ngúnutnñí-n cuádava tnuú-ndí-a — cächí-gá xáhaⁿ-gã xii-dé.

Te tée-áⁿ ñí ndacuíñí-dé te ní ngúnutnñí-dé cuádava tnuú-güedé ndihí-gá. ⁹ Te dätñùní Jèsús ní xícáⁿ tnúhu-gã núú cué ñáyiú xĩndecu-áⁿ, te xáhaⁿ-gã xií-yu:

—Cuíní-í cachí tnúhu-ndo nã cúú sã vãha cada-o ndùu ndetátú-ó. ¿Híⁿ chiúⁿ váha àdi híⁿ chiuⁿ cuehé, sá cáda tátna-o ñáyiú cùhú àdi sá cáhni-ó-yu? — cächí-gá xáhaⁿ-gã xií-yu.

¹⁰ Te dätñùní ní ndacoto-gá núu-yu nchaá-yu, te ní xáhaⁿ-gã xii tée cùhú ndaha-xi-áⁿ:

—Ndocani ndaha-n —cächí-gá xáhaⁿ-gã xii-dé.

Te ní ndocani-dé ndaha-dé, te òré-ni ní ndúha. ¹¹ Te cue tée xĩndecu-áⁿ sũúni ñí cudééⁿ-güedě sá dúcáⁿ ñí quide tátna Jèsús tée cùhú-áⁿ, te ní ngüíta-güedé ndátnũhu-güedé nõu nása cada ñaha-güedě xii-gá.

Jèsús cáxi-gá úxúú tnàhá cue tée dacuàha ñaha xii ñáyiú tnúhu-gá

(Mt. 10:1-4; Mr. 3:13-19)

¹² Te sátá dúcáⁿ ñí cuu te ní xica Jèsús cuáháⁿ-gá xití yucu cuendá yacáⁿ cáháⁿ ndihí-gá Tátá-gã Dútú Ndiõxí, te ñí niú ní cáháⁿ ndihí ñaha-gã. ¹³ Te sátá ñí túnadaá, te ní cana-gá nchaá cue tée xica cuu ndihí-gá, te ní cáxi-gá úxúú tnàhá-güedé, te

cue téé-áⁿ ñĩ xáhaⁿ-gǎ sá díú-güedě cuu-güedé cue téé quiíⁿ cáháⁿ tnúhu-gá núú ñǎyiu. ¹⁴ Te duha xĩnani ndi ùxúú cue téé-áⁿ. Té Xĩmú, àdi Pelú chi úú dìu-dé, ndihĩ ñnaní-dé té Ndrĩxí, ndihĩ té Jàcobó, ndihĩ té Juàá, ndihĩ té Lìpé, ndihĩ té Bartolòmé, ¹⁵ ndihĩ té Màteú, ndihĩ té Mǎxí, ndihĩ té Jàcobó déhe té Àlfeú, ndihĩ ingá té Xĩmú téé ní cundihĩ cue téé canànistá, ¹⁶ ndihĩ té Jùdás ñnaní té Jàcobó, ndihĩ té Jùdás Iscarioté téé ní sáá nduu ñĩ sáha cuendá ñáhá xii Jesús núú cuè téé cùu úhú iní ñáhá xii-gá, duha xĩnani cuè téé ní cáxi Jèsús ní xica cuu ndihĩ-gá.

*Jèsús dánèhé-gá cuéhé vĩhĩ ñǎyiu
(Mt. 4:23-25)*

¹⁷ Te Jèsús cuánuu-gá yucu núú ñĩ sáá-gá-áⁿ, te ní ngava-gá ìⁿ núú ndàá ndihĩ cue téé xica cuu ndihĩ-gá, te xíaⁿ ñĩ ngúnutnĩ-gá. Te xíaⁿ ndécú dàva-gá cue téé xica cuu ndihĩ-gá ndihĩ vài ñǎyiu ndètu ñahá-yu xii-gá, te ñáyiu-áⁿ vèxi-yu nchaa ñuú cáá dìstritú Jùdeá, ndihĩ ñuú Jerusalén, te ndècu ñáyiu véxi ndàa yuhu lamár yatni ñuú Tìrú, ndihĩ ñuú Sidón. Te nchaa ñáyiu-áⁿ ñĩ quexió-yu cuìní-yu cundedóho-yu nchaa tnúhu càháⁿ Jèsús, ndihĩ cuendá sá cuìní-yu ndúha-yu nchaa cuéhé tnàhá-yu. ¹⁸ Te tnàhá ñáyiu yihĩ ñaha espíritú cundihĩ yucu ñávãha. ¹⁹ Te nchaá-yu cuìní-yu dacáá-yu ndahá-yu tendàhá-yu Jèsús ní cùu cuendá sá ñĩ níhĩ-yu tnúhu sá ndècu ndihĩ-gá tnúhu ndee iní quidé tátna-gá nchaa ñáyiu cùhú.

*Cuendá ñáyiu ío váha táhú-xi
(Mt. 5:1-12)*

20 Te Jèsús ní ndacoto-gá núú cuè téé xica cuu ndihí-gá, te ní xáhaⁿ-gă:

—Váha táhú nchaa nchòhó cue ñáyiú ndàhú, chi nduu táhú-ndó cùndecu-ndo núú táxí tnùní Yá Ndiöxí.

21 'Váha táhú nchaa nchòhó ñáyiú ío cuení cund-edóho tnúhu Yá Ndiöxí chi ío vii ío váha cuu iní-ndó.

'Váha táhú nchaa nchòhó ñáyiú ndàhyú sá ndihú iní-ndó, chi sáá nduu te cudíí iní-ndó ñì caa ñi quíhíⁿ.

22 'Váha táhú nchaa nchòhó ñáyiú na cùu úhú iní ñáhá tnàha ñáyiú-xi, chi sáá nduu te vá dáñá-gă-yu quíhu-ndo vèñúhu, te cúcuèhé ñáhă-yu xii-ndo, te cachí-yu sá ñà díú ñáyiú váha cùu-ndo, te ducaⁿ càda ñahá-yu xii-ndo sã cuendá yúhú Téé cùu ñaní tnáhá-ndó nchàa-ndo. 23 Te òré ducaⁿ na càda ñahá-yu xii-ndo te cudíí víhí-ní iní-ndó cùndecu-ndo, chi sáá nduu ndùu táhú-ndó sã ío váha càa ndecu andíu cundecu ndihí-ndo nduu na nasaá-ndó yàcáⁿ cundecu-ndo, chi díu-ni ducaⁿ ñì xóo cada ñaha cuè ñaní tnáhă-yu xii cue téé ní xóo cáháⁿ tnúhu Yá Ndiöxí ní xíndecu ndéé sanaha.

24 'Te ndàhú ní cuu nchaa ñáyiú cuica ñà túú sàndáá iní ñáhá xii Yá Ndiöxí, chi vitna ío váha ndècú-yu, dico sáá nduu te nduu ndàhú-yu.

25 'Te ndàhú ní cuu tucu nchaa ñáyiú ñá túú tnàhí ná cúmăñí xii-xi vitna, chi sáá nduu quíní-yu tnúndòho tnúhu ndàhú.

'Te ndàhú ní cuu nchaa ñáyiú cùdíí iní-xi ndècu ichi cuehé ichi duha vitna, chi sáá nduu te ndàhyú-yu sá ndihú iní-yu.

26 'Te ndàhú ní cuu nchaa ñáyiú na càháⁿ váha dava-gá ñáyiú cuendá-xi, chi ducaⁿ ñì xóo cáháⁿ

váha-yu cuèndá nchaa cue téé ní xóo dandàhú ñáhá xii ñáyiú ndéé sanaha, chi ní cachí-güedé sá càháⁿ-güedé tnúhu Yá Ndiǒxí te ñá ndàá —càchí-gá xáhaⁿ-gã xii-güedé.

Cuu iní-ó nchàa ñáyiú cùu úhú iní ñáhá xii-o
(Mt. 5:38-48; 7:12)

²⁷ Te Jèsús ní xáhaⁿ-gã xii nchaa ñáyiú xǐndecu-áⁿ: —Nchaa nchòhó ñáyiú xǐndedóho ñaha càchí tnúhu-í xii-ndo sã cúú iní-ndó ñáyiú cùu úhú iní ñáhá xii-ndo, te cada-ndo sã vâha sá cúú-xǐ-yu cuèi nándi sá ná cáda ñàhá-yu xii-ndo. ²⁸ Te cácaⁿ táhú-ndó núú Yá Ndiǒxí cuèndá ñáyiú càháⁿ úhú ñáhá xii-ndo, ndihí cuèndá ñáyiú tèe ñaha cuéchi neñùú xii-ndo. ²⁹ Te núu ní canihá-yu xii-ndo ìⁿ xito te cuení tucú-yu canihá-yu, te dañá-ndo na cànihá-yu, àdi núu na quèndeé-yu dóó ndíxí ndòdo-ndo, ndihí dúhnú-ndó, te dañá-ndo na cànehé-yu quíhíⁿ. ³⁰ Te núu xicáⁿ-yu ìⁿ sá nándíhi-yu núú-ndó te cuáñaha-ndo, àdi quèndeé-yu ìⁿ ndachìuⁿ-ndo, te vá nándàcáⁿ-ndó núú-yu. ³¹ Te nchaa sá vâha cuení-ndó càda tnaha ñáyiú-ndo, te cada-ndo tnàhá-ndó ndihí-yu.

³² 'Chi núu nchòhó ná cùu iní-ndó mèe-ni ñáyiú cùu iní ñáhá xii-ndo, te vá càchí-ndó sã ïo vâha quède-ndo, chi tnàhá nchaa ñáyiú ndècu ichi cuehé ichi duha ducaⁿ xǐquidé-yu. ³³ Àdi mee-ni ñáyiú quède ñaha sá vâha xii-ndo quède váha-ndó-yu, te vá càchí-ndó sã ïo vâha quède-ndo, chi tnàhá nchaa ñáyiú ndècu ichi cuehé ichi duha ducaⁿ xǐquidé-yu. ³⁴ Àdi mee-ni ñáyiú sàni iní-ndó nàcoto ñaha xii-ndo cuáñaha-ndo ìⁿ sá xicáⁿ-yu núú-ndó, te vá cání

iní-ndó sã ïo quide váha-ndo, chi tnàhá ñáyiú ndècu ichi cuehé ichi duha dàsaⁿ nuú-yu ìⁿ sá néhé vãha-yu, te ndètu cahnu-ná-yu nacoto ñaha ñáyiú ní sãha nuú-yu-áⁿ. ³⁵ Dico nchòhó xíní ñùhu-xí cuu iní-ndó ñáyiú cùu úhú iní ñáhá xii-ndo, te cada-ndo sã vãha sá cúu-xí-yu, te cuãñaha nuú-ndo ìⁿ sá ná ndìhi-yu te núu xicáⁿ-yu núu-ndó, te vá cùndètu-ndo nacoto ñahá-yu xii-ndo. Te ducaⁿ te ío-gá cuehé ñihí-ndó cùndecu ndìhi-ndo, te cuu ndisa-ndo dèhe Dútú Ndiõxí, chi ío càhnu iní-gá sá cúu-xí nchaa ñáyiú ñá túú ndàcáⁿ táhú núú-gã cuendá nchaa sá vãha quide-gá, ndìhi sá cúu-xí nchaa ñáyiú ndècu ichi cuehé ichi duha. ³⁶ Te cunduú càhnu iní nchòhó tucu dàtná càhnu iní Tátá-ó Dútú Ndiõxí.

*Vá càháⁿ cuehé-ó cuendá tnàha ñáyiú-o
(Mt. 7:1-5)*

³⁷ Te vá càháⁿ cuehé-ndó cuendá sá quidé tnàha ñáyiú-ndo, te ducaⁿ te Yá Ndiõxí ñá túú nà tnúhu cúñaha-gã xii-ndo. Te vá cùñaha-ndo xii ñáyiú sá quìhíⁿ-yu ìⁿ xichi núú ùhú núú ndàhú ndohó-yu cuendá nchaa sá ñá túú vãha quide-yu, te ducaⁿ te Yá Ndiõxí vá cùñaha-gã xii-ndo sã tnàhá-ndó quìhíⁿ-ndó ìⁿ xichi núú ùhú núú ndàhú ndohó-ndo. Te chí cádá càhnu iní nchaa sá quidè-yu, te ducaⁿ te Yá Ndiõxí cada càhnu iní ñáhá-gã xii-ndo tucu. ³⁸ Te chí cuãñaha xii ñáyiú núu ná cúu sã xíní ñùhú-yu, te dàtná chitu ìⁿ yicá súúni xidó coyo-ná, ducaⁿ tàxi Yá Ndiõxí xii-ndo. Te nánicuáa na càda-ndo cada váha-ndo sã cúu-xí tnàha ñáyiú-ndo, te ñiu-ni ducaⁿ càda ñaha Yá Ndiõxí xii-ndo —càchí Jèsús xãhaⁿ-gã xií-yu.

39 Te dǎtnùní ní cani-gá ìᵿ cuèndú núŷ-yu nàcuáa tecú tnùní-yu tnúhu-gá, te xǎhaⁿ-gǎ:

— ìᵿ tée cuáá chi ñá ndácú-dě cuita nehe-dé ìngá tée cuáá, chi núu ducaⁿ na càda-güedé te ndi ndùú-güedé ngaunihnu-güedé déhvá. 40 Te ni ìᵿ landú yíhí scuèlá ñá túú cùnuu-gá-güexi dàcúúxí mèstrú-güexi, te ndéé núu na cùtúha váha-güexi, te dǎtnùní nútahá-güexi tée dànehé ñáhá xì-güexi.

41 "Te na càchí tnúhu-í xii-ndo sǎ nchàa cuéchi quide ñáyiu cùu-xi datná ìᵿ mihi líhli. ¿Te ná cuèndá ndéhé-ndó ìᵿ sá ñà túú vǎha quide tnaha ñáyiu-ndo, te mee-ndo vîhi-gá quidé-ndó-í? Te sá dúcáⁿ quide-ndo te cada iní-ndó sǎ ndéhé-ndó dàtná ìᵿ mihi líhli ñùhu núú tnàha ñáyiu-ndo, te mee-ndo ñùhu ìᵿ mihi cahnu-gá núú-ndó. 42 Te núu na nàcanu ichi-ndo tnaha ñáyiu-ndo cuèndá sá ñà túú quide váha-yu ndècú-yu te mee-ndo vîhi-gá quidé-ndó ñá, te cada iní-ndó sǎ xǎhaⁿ-ndo xii-yu sá nátàva-ndo mihi líhli ñùhu núŷ-yu, te mihi càhnu ñùhu núú méé-ndó ñà túú quide cuendá-ndó. ¿Te sá dúcáⁿ quide-ndo te ío dándahú-ndó mèe-ndo sá quidé ndǎá-ndó te ñá ndáá sá quidé ndǎá-ndó! Te xìni ñùhu-xi díhna-gá dañà-ndo nchàa sá ñà túú vǎha quide-ndo, te dǎtnùní ducaⁿ te cutnùní váha iní-ndó nàcuáa nacanu ichi-ndo tnàha ñáyiu-ndo.

Ndi dǎᵿ núú yutnu xìní-ó nǎ yutnu cùu-xi cuendá sá sǎvidí-xi

(Mt. 7:17-20; 12:34-35)

43 "Te ñá túú nì ìᵿ yutnu váha te quiní-ó cùuⁿ sávidí sá ñà túú vǎha, te ni ìᵿ yutnu sá ñà túú vǎha, te quiní-ó cùuⁿ sávidí váha, chi mee-ni sávidí sá ñà túú vǎha cùuⁿ. 44 Te ndi dǎᵿ núú yutnu xìní-ó nǎ

yutnu cùu-xi cuendá sá sǎvidí-xi, chi ñá túú xìní-ó cùuⁿ ngúxí ñⁿ tnu ìñu, te ni ñà túú xìní-ó cùuⁿ ndéhé yoho yàha stilé díquí ñⁿ yoho yàha cutexínu. ⁴⁵ Te nchaa ñáyu váha ìní-xi càháⁿ-yu tnúhu váha, chi ñu-ni tnúhu váha tnàhí-áⁿ ñúhú ìní-yu, te nchaa ñáyu ñá túú vǎha ìní-xi càháⁿ cuèhé-yu, chi ñu-ni tnúhu cuèhé tnàhí-áⁿ ñúhú ìní-yu, chi nchaa sá ñúhú ìní-yu te xǐⁿ càháⁿ-yu.

Íⁿ vehe ndècu cimientú-xi ndíhi ñⁿ vehe ñá túú cimientú-xi
(Mt. 7:24-27)

⁴⁶ ¿Te ná cuendá càchí-ndó sǎ yǔhú cúú-í Yaá cúú Xítohó-ndó te ñá túú quide-ndo nchaa nacuaá càháⁿ-í-i? ⁴⁷ Te na càchí tnúhu-í xii-ndo cuendá ñáyu tǔha ñaha xii-í, chi ñáyu-áⁿ sácúndedóho-yu nchaa tnúhu càháⁿ-í te tnǐⁿ-yu. ⁴⁸ Te ñáyu-áⁿ cúu-yu dàtná ñⁿ téé ní dácáá ñⁿ vehe, chi téé-áⁿ dǐhna-gá ní xete-dé ndéé ní tnahá-dé yúú cáxíⁿ te dàtnùní ní tava-dé cimientú-xi, te òré ní cuuⁿ dáú, te ní ndee ndute ñuhu, te ní ndacáⁿ-xi ndéé núú cáá vèhe-áⁿ, dico ñá túú ní ndàcu-xi cuido-xi, te ducaⁿ chi téé ní dácáá vèhe-áⁿ ñⁿ tava-dé cimientú-xi núú yúú cáxíⁿ. Duha sǎtnahá-xi cùu nchaa ñáyu sácúndedóho tnúhu càháⁿ-í te tnǐⁿ-yu. ⁴⁹ Te ñáyu sácúndedóho tnúhu càháⁿ-í te ñá túú tnǐⁿ-yu, ñáyu-áⁿ cúu-yu dàtná ñⁿ téé ní dácáá ñⁿ vehe, te ñá túú ní tava-dé cimientú-xi, te òré ní cuuⁿ dáú, te ní ndee ndute ñuhu, te ní ndacáⁿ-xi ndéé núú cáá vèhe-áⁿ, te íí-ni ní xido-xi vehe-áⁿ cuendá sá ñà túú ní quène cimientú-xi. Duha sǎtnahá-xi cùu nchaa ñáyu sácúndedóho tnúhu-í te ñá túú cuíní-yu tnǐⁿ-yu —càchí-gá xǎhaⁿ-gǎ xií-yu.

7

Jèsús quidé tătna-gá ìⁿ téé xìnu cuechi núú ìⁿ téé cùu capitáⁿ

(Mt. 8:5-13)

¹ Te sáta ní yáha ní cáháⁿ Jèsús ndihì ñáyiú, te cuáháⁿ-gá ñúú Capèrnaúm. ² Te yàcáⁿ ndécú ìⁿ téé cùu capitáⁿ, te cùhú ìⁿ téé xìnu cuechi núú-dě téé ío-gá cúú ìní-dé, te sa ndècu-ná-dé sá cúú-dé. ³ Te òré ní níhí tée cùu capitáⁿ-áⁿ tnùhu cuendá Jèsús, te ní tendaha-dě ìⁿ úú cue téé cùu sacuéhé núú ñáyiú isràél cuáháⁿ-güedé cáháⁿ ndàhú-güedé núú-gá núú vá cündèe ìní-gá quíhíⁿ-gá cada tătna-gá téé xìnu cuechi núú-dě-áⁿ. ⁴ Te ní quexìo-güedé núú ndécú Jèsús, te ní ngüíta-güedé càháⁿ ndàhú víhí-güedé núú-gá, te xàhaⁿ-güedé:

—Tée cùu capitáⁿ ní cachí-dé véxi-ndí núú vá cündèe ìní-n quíhíⁿ-n càda tătna-n ìⁿ téé xìnu cuechi núú-dě chí cùhú-dé, te tàú ndisa-n càda-n nacúaa càháⁿ capitáⁿ-áⁿ, ⁵ chí téé-áⁿ ío cùu ìní ñáhá-dě xii nchaa nchúhú ñáyiú isràél te diu-dé ní táúchíúⁿ-dě ní sáá veñúhu-ndí —càchí-güedé xàhaⁿ-güedé xii-gá.

⁶ Te sáta dúcáⁿ te Jèsús ní xica-gá cuáháⁿ-gá ndihì-güedé, te òré tá cùyatni-gá vehe núú ndécú tée cùhú-áⁿ cuáháⁿ, te téé cùu capitáⁿ-áⁿ ní xàhaⁿ-dě xii ìⁿ úú cue téé càháⁿ ndihì-dé:

—Quíhíⁿ-ndó cüñaha-ndo xì Yaá cúú Mèstrú sá càchí-í sá ñà túú ñà cani ìní-gá, chí ñà túú tàú-í sá quíhu-gá ndéé xití vehe-í, ⁷ chí nì sá cùnú ndúcú mèe-í-gá ñà túú ní cùyii-í. Núú xíáⁿ cüñaha-ndo xì-gá sá ná càháⁿ-ni-gá sá ndùha téé xìnu cuechi núú-í-a te ndúha-dé. ⁸ Chí yúhú ndécú cuè téé

tàxi tnuní ñáhá xii-í, te ducaⁿ yǎhú tucu ndècu cue sandadú táxí tnùn-í. Te òré xǎhaⁿ-í xii ìⁿ-dé quíhíⁿ-dé ìⁿ chiuⁿ te cuáháⁿ-dé, te òré xǎhaⁿ-í xii ingá-dé quixi-dé te véxi-dé, te òré xǎhaⁿ-í xii téé xinu cuechi núu-í cada-dé ìⁿ chiuⁿ te quide-dé. Duha càchí-í cúñaha-ndo xii-gá —càchí-dé xǎhaⁿ-dē xii cue téé càháⁿ ndihí-dé-án.

⁹ Te sátá dúcáⁿ ñí xáhaⁿ-güedē xii Jèsús, te ní cuñúhu-gá nchaa tnúhu ní cáháⁿ téé cùu capitáⁿ-án, te ní nchócótó-gǎ núú nchàa ñáyiu nchìcúⁿ ñáhá xii-gá cuáháⁿ, te ní xáhaⁿ-gǎ:

—Na càchí tnúhu ndáá-í xii-ndo sǎ vǎtá quini-gá-í ni ìⁿ ñáyiu isràél, ñáyiu ío váha sàndáá iní-xi Yá Ndiǒxí dàtná sàndáá iní ñáhá tēe-ǎⁿ xii-gá —càchí-gá xǎhaⁿ-gǎ xií-yu.

¹⁰ Te òré ní ndexìo cue téé nèhe tnúhu-án ñí sáháⁿ núú Jèsús, te sa ní ndúha téé cùhú-án.

Jèsús dándòto-gá déhe ìⁿ ñaha quèé

¹¹ Te sátá dúcáⁿ ñí cuu te ní xica Jèsús cuáháⁿ-gá ìⁿ ñúú nání Nàín, ndihí cue téé xica cuu ndihí-gá, ndihí vǎi ñáyiu. ¹² Te òré ní sáá-gá yuhu ñúú-án, te ní xiní-gá nchídó-güedē ìⁿ ndíyí cuáháⁿ chindúxi ñaha-güedē, te ndíyí-án cúú dēhe ìⁿ ñaha quèé, te ìⁿndì ducaⁿ-ni déhe-aⁿ ndècu ni cuu te ní xihí-dé. Te ío cuéhé ñáyiu cuáháⁿ chindúxi ñaha. ¹³ Te òré ní xiní ñáhá Jèsús xii-aⁿ ndàhyú-aⁿ te ní cundàhú iní ñáhá-gǎ, te ní xáhaⁿ-gǎ:

—Vǎ ndàhyú-n —càchí-gá xǎhaⁿ-gǎ xii-aⁿ.

¹⁴ Te ní dáyátní-gǎ cǎjá ñúhú ndíyí-án te ní dácàá-gá ndaha-gá te ní tendaha-gǎ cǎjá-án, te ní ngüíñí cue téé nchìdo ñaha-án. Te ní xáhaⁿ-gǎ xii ndíyí-án:

—Tée cuechi, yúhú càchí-í sá ndácõo-n —càchí-gá xăhaⁿ-gă xii ndíyi-áⁿ.

15 Te tée ní xíhí-áⁿ nǐ nucúnucóo-dé te ní ngüíta-dé càháⁿ-dé, te Jèsús ní nacuáha cuendá ñáhá-gă xii-dé ndaha năná-dě. 16 Te sá dúcáⁿ nǐ quide Jèsús ní xiní-yu te ío ní yúhú-yu, te ní xítñhá-yu:

—Ío càhnu cuu Yá Ndiõxí chi ñⁿ tée càháⁿ tnúhu-gá ní quexìo núú ndécú-ó —càchí-yu xítñhá-yu.

Te ní xítñhá tucú-yu:

—Yá Ndiõxí véxi-gá chindee ñàha-gá xii nchaa nchoo ñăyiu cùu cuendá-gá —càchí-yu xítñhá-yu.

17 Te nchaa ñuú distritú Jùdeá, ndíhi dava-gá ñuú ní níhí-yu tnúhu nàcuáa ní quide Jèsús.

Cue tée ní tendaha té Juáá cuáháⁿ núú ndécú Jèsús (Mt. 11:2-19)

18 Te cue tée xica cuu ndíhi té Juáá ní xáhaⁿ-güedě xii-dé nchaa sá nǐ quide-gá, núu ní cana-dé úú tñhá-güedé 19 cuendá cúñaha-dě quíhíⁿ-güedé nducu tnúhu-güedé núú Jèsús, te núu sá díú-gă cúú-gă Crístú Yaá ní tendaha Yă Ndiõxí véxi ñuyíú-a àdi sá cündetu nahi-ni-güedé mei Yàá-áⁿ.

20 Te òré ní quexìo cue tée ní tendaha tē Juáá núú ndécú Jèsús, te xăhaⁿ-güedě xii-gá:

—Té Juáá tée dàcuandute ñaha xii ñăyiu ní tendaha ñàha-dé xii-ndí véxi-ndí cacăⁿ tnúhú-ndí núú-n, núu sá díú-n cùu Crístú Yaá quixi ñuyíú-a, àdi sá cündetu-ndí mei Crístú càchí-dé —càchí-güedé xăhaⁿ-güedé xii-gá.

21 Te mei òré ní quexìo-güedé-áⁿ nǐ quide tátna Jèsús vâi ñăyiu cùhú, te davá-yu càhú víhí tñhá-yu,

te ndi dííⁿ ndi dííⁿ núú cuèhé tnàhá-yu ìⁿ ííⁿ-yu, te cue ñáyiú yìhi ñaha espíritú cúndìhi yucu ñávàha ní queñuhu-gá espíritú-áⁿ yìqui cùñú-yu, te ío vài ñáyiú cuàá ní nacaáⁿ-gá núŭ-yu. ²² Te Jèsús ní xáhaⁿ-gă xii-güedé:

—Chí cuánùhú te cani-ndo cuèndú núú tẽ Juàá nchaa sá nĩ xiní-ndó quìde-í, ndìhi nchaa nàcuáa ndùu tnúhu ní cáháⁿ-í ní xíndedóho-ndo. Te cúñaha-ndo xii-dé sá quídé tátna-í núú cuè ñáyiú cuàá, te quìde tátna-í cue ñáyiú yacua, ndìhi cue ñáyiú tnàhá cuéhé sã dátèhyú nihnu-xi yìqui cùñú-yu, ndìhi cue ñáyiú doho, nchaa ñáyiú-áⁿ quìde tátna-í te ndũha-yu, te ndéé cue ñáyiú sa ní xíhí dándòto-í cúñaha-ndo xii-dé, te cúñaha tùcu-ndo xii-dé sá nděcuu-í dánèhé-í nchaa ñáyiú ndàhú tnúhu sá sánú ìchi ñaha xií-yu nàcuáa naníhí tàhú-yu. ²³ Te cúñaha tùcu-ndo xii-dé sá ìo váha táhú nchaa ñáyiú ñá túú quìde sáá iní nchaa tnúhu càháⁿ-í, duha cúñaha-ndo xii-dé —càchí-gă xáhaⁿ-gă xii-güedé.

²⁴ Te sátá nĩ yáha-güedé cuánuhú-güedé, te ní ngüíta Jèsús ní cáháⁿ-gá núú ñáyiú cuèndá té Juàá, te xáhaⁿ-gă xií-yu:

—Nchòhó ní sándéhé-ndó ìⁿ tée ndècu xití yucu, te tée-áⁿ ñà túú sàni ìⁿ sani úú iní-dé, chí ñá túú quìde-dé dàtná quídé nchaa ité náhnú cuáháⁿ-xi duha cuáháⁿ-xi dàcáⁿ òré quéné tãchí. ²⁵ Te ni ñà túú ní sándéhé-ndó ìⁿ tée nihnu dóó vãha dóó vii càa. Te nchòhó xiní-ndó sã ñáyiú sàcuíhnu dóó vãha dóó vii càa ñá túú nã cúmãní xií-yu, te nchaa ñáyiú-áⁿ ndécũ-yu vehe cue tée cùnūu yíndaha ñaha xii ñáyiú. ²⁶ Dico nchòhó chí ní sándéhé-ndó ìⁿ tée

càháⁿ tnúhu Yá Ndiöxí. Te ndáá sá díú tée càháⁿ tnúhu-gá cúú-dě dico cùnuu-gá-dé dàcúúxí dàva-gá cue tée càháⁿ tnúhu-gá. ²⁷ Te ñiu cuendá té Juàá-áⁿ càháⁿ-xi núú tùtú Yá Ndiöxí nàcuáa ní xáhaⁿ-gã xii Crístú, te duha ní xáhaⁿ-gã:

Tendaha-ĩ ìⁿ tée cáháⁿ tnúhu-í codonùu-dé núú-n cuendá dàtúha-dé ñáyiu cuendá quíndáá iní-yu tnúhu-n.

Duha ní xáhaⁿ-gã, te ducaⁿ ñí ngódó tnùní núú tùtú-gá. ²⁸ Te na càchí tnúhu-í xii-ndo sã ñí ìⁿ cue tée ñuyíú-a ñá túú cùnuu-güedé dàtná cùnùu té Juàá tée dàcuandute ñaha xii ñáyiu. Te nchaa ñáyiu sa ta ndíhu ndaha ñàha Yá Ndiöxí vitna cuáháⁿ cùnùu-gá-ni tucú-yu dàcúúxí tẽ Juàá cuẽi cúú-yu ñáyiu ñá túú cùnuu dàcúúxí dàva-gá ñáyiu yìndaha-gá —càchí Jèsús xáhaⁿ-gã xií-yu.

²⁹ Te sá dúcáⁿ ñí cáháⁿ Jèsús, núu nchaa ñáyiu ní dácúúndute té Juàá ní cachí-yu sá ïo vaha quide Yá Ndiöxí, te ñiu-ni ducaⁿ ñí cáháⁿ cue tée cuihna iní-xi quide cobrá ñáhá xii ñáyiu cuendá impuèstú, cue tée ní dácúúndute-dé. ³⁰ Dico cue tée cùu fariséú, ndíhi cue tée dàcuaha ñaha xii ñáyiu nchaa tnúhu ní chídó tnùní ndí Moisés, cue tée ñá túú ní dàcuandute té Juàá ñá túú ní tnàhá iní-güedé cada-güedé nchaa sá vaha cuíní Yá Ndiöxí. ³¹ Te Xítohó Jesucrístú ní xáhaⁿ-gã xií-yu:

—Na càchí tnúhu-í xii-ndo nàcuáa sãtnahá-xi cùu ñáyiu ndècu vitna. ³² Chi ñáyiu-áⁿ cúú-yu dàtná cue landú sácõo núú yãhu dàdiqui-güexi te níhi càháⁿ-güexi, te xitnàha-güexi: “Ní tiú-ndí yaá ndíhi vílu te ñá túú ní cuíní-ndó càta-ndo. Te ïo yica iní ní xita yuhu-ndí te ñá túú ní ndãhyú-ndó”, càchí-güexi xitnàha-güexi. Te ducaⁿ sãtnahá-xi

cùu ñáyiú ndècu vitna. ³³ Te té Juàá téé ní xóo dacuàndute ñaha xii ñáyiú ío ndàhú ní xóo caxi-dé, te ní ñà túú ní xóo coho-dé ndudí ndéhé yoho yàha stilé sá sà ní nduu-xi ndidí, te ní cachí-ndó sã ñí xíndecu ndihi-dé espíritú cúndìhi yucu ñávãha. ³⁴ Te sátá ñí quexìo yúhú Téé cùu ñaní tnahá-ndó nchàa-ndo, te xèxi-í xìhi-í ndécù-í te cächí-ndó sã cùu-í téé xèxi vihi te xìhi vihi-í. Te cächí tucu-ndo sã cùu-í téé xica cuu ndihi cue téé cuihna ìní-xi quide cobrá ñáhá xii ñáyiú cuendá impuéstú, ndihi nchaa dava-gá cue téé ndècu ichi cuehé ichi duha, duha cächí-ndó. ³⁵ Te ñáyiú ní tnahá tnúhu ndihi Yá Ndiõxí, ñáyiú-áⁿ quidě-yu nàcuáa cutnùní sá méé-gã ío ndècu ndihi-gá sá xìní tnùní-gá –cächí-gá xãhaⁿ-gã xií-yu.

Jèsús ndécú-gã vehe ìⁿ téé cùu fariséú téé nàni Xímú

³⁶ Te ìⁿ téé cùu fariséú ní cáháⁿ-dé Jèsús vehe-dé caxi-gá, te òré ní quexìo-gá te cuànguihu-gá mèsá. ³⁷ Te xiáⁿ núcõo-gá ní sáá ìⁿ ñadìhí te diu-ni ñaha ñúú-áⁿ cùú-áⁿ, te ndècu-aⁿ ichi díí ìní, te sá ñí níhí-aⁿ tnúhu sá cuãngaxi Jèsús vehe téé cùu fariséú-áⁿ, núu nèhe-aⁿ ìⁿ yoó chitu àcití sàháⁿ tnámí. ³⁸ Te ní ngóo-aⁿ ìⁿ xio dñi Jesús, te ní ngúíta-aⁿ ndàhyú-aⁿ te ndihi ndute núú-aⁿ ní naquete-aⁿ sáhá-gã. Te dãtnùní ní nadayìchí-aⁿ ndihi idi díquí-aⁿ, te ní teyuhu-aⁿ sáhá-gã, te ní chihi ñaha-aⁿ àcití sàháⁿ tnámí-ãⁿ. ³⁹ Te sá dúcáⁿ ñí quide-aⁿ ní xiní téé cùu fariséú téé ní cáháⁿ ñáhá xii-gá-áⁿ núu ní sani ìní-dé: “Te núu dìcò ndisa téé càháⁿ tnúhu Yá Ndiõxí cùú tée-a ña, te sa cutnùní ìní-dé yoo cùu ñaha tnándeé ñáhá xii-dé, àdi ná ñáyiú cùu-aⁿ, te dìcò ìⁿ

ñaha ndècu ichi díí ínì cúú-áⁿ”, duha ní sani ínì-dé.
 40 Te Jèsús ní xáhaⁿ-gă xii-dé:

—Xímú, ndècu ìⁿ tnúhu cachí tnúhu-í xii-n —
 cächí-gă xăhaⁿ-gă xii-dé.

Te téé cùu fariséú-áⁿ xăhaⁿ-dě xii-gă:

—Cachí tnúhu, Mèstrú —cächí-dé xăhaⁿ-dě xii-gă.

41 Te Jèsús ní xáhaⁿ-gă:

—Ní xíndecu ìⁿ téé ní xóo dasaⁿ nùu díhúⁿ, te ní
 xítaú úú tnàhá-güedé núú-dě. Te ìⁿ-dé ní sáha-dé
 úhúⁿ cièndú díhúⁿ denàriú, te ingá-dé ní sáha-dé
 údico úxí. 42 Te ñá ní ñíhí-güedě nacháhu-güedé
 núú-dě, te téé ní sánùu ñaha-áⁿ ñí quide càhnu
 ínì-dé ndì ndùú-güedé. Te vitna cachí-ò tucu te
 núu nděda càa-güedé cúú ínì ñáhá-gă-güedé xii-dé
 —cächí-gă xáhaⁿ-gă xii-dé.

43 Te ní xáhaⁿ tē Xímú-áⁿ:

—Sànùu sá tēe tàú vâi-gă díhúⁿ ìo-gă cúú ínì-dé téé
 ní sánùu ñaha díhúⁿ-ăⁿ —cächí-dé xăhaⁿ-dě xii-gă.

Te ní xáhaⁿ Jèsús:

—Sá ndăá càháⁿ-n —cächí-gă xáhaⁿ-gă xii-dé.

44-46 Te Jèsús ní ndacoto-gă núú ñadìhí-áⁿ, te ní
 xáhaⁿ-gă xii té Xímú-áⁿ:

—¿Ndèhe-n nacuáa quide ñadìhí-a ñă? Chi
 cuánguihu-í vehe-n, dico ñá túú ní tàxi-n ndute
 ndoo sáhà-í, te ñí ñà túú ní tēyuhu ñaha-n, te
 ñí ñà túú ní chìhi-n acití díquí-í, dico ñadìhí-a
 ní naquete-aⁿ ndìhì ndute núú-aⁿ sáhà-í, te
 ní nadayìchí-aⁿ ndìhì idi díquí-aⁿ, te nuu núu
 teyuhu-aⁿ sáhà-í, te ní chìhi-aⁿ acití sáháⁿ tnámí
 sáhà-í. 47 Te na cächí tnúhu-í xii-n sã ìo cùu ínì
 ñáhá-áⁿ xì-í, te núu xíãⁿ cútnùní ínì-ó sã cuèi ìo vâi
 sã cuèhé sã dúhá ñí quide-aⁿ, dico Yá Ndiõxí sa ní

quide càhnu iní ñáhá-gă xii-aⁿ. Chi Yá Ndiöxí quidé càhnu iní-gá ñáyiú cuéi vâi àdi sacú cuéchi-yu, te núu sacú cuéchi-yu te sacú cúú ìní ñáhă-yu xii-í —càchí-gá xáhaⁿ-gă xii-dé.

⁴⁸ Te ní xáhaⁿ-gă xii ñadìhí-áⁿ:

—Sa ní quide càhnu iní-í nchaa cuéchi-n —càchí-gá xáhaⁿ-gă xii-aⁿ.

⁴⁹ Te cue téé xǐnucóo ndìhi-gá xǐtnàha-güedé:

—¿Ná téé cùu téé-a núu nándi sá quidé-dě, te ndéé nchaa yíca cuéchi ñáyiú quide cahnu iní-dé-i? —càchí-güedé xǐtnàha-güedé.

⁵⁰ Te Jèsús ní xáhaⁿ tùcu-gá xii ñadìhí-áⁿ:

—Sa ní cácu nihnu-n nǔú ùhú núú ndàhú vitna chi ní sándáá iní ñáhá-n xii-í, te vitna cuanùhú te ñá túú-gă ná cani iní-n —càchí-gá xáhaⁿ-gă xii-aⁿ.

8

Ñáyiú dìhí ní chindee ñàha xii Jèsús

¹ Te sátá dúcáⁿ ñǐ cuu te Jèsús ní xica-gá cuáháⁿ-gá titní víhí ñùú náhnú, ndìhi ñuú lǐhli dànehé-gá ñáyiú nàcuáa ndìhu ndaha ñàha Yá Ndiöxí xii-yu. Te cuáháⁿ ndìhi-gá ndì ùxúú tnàhá cue téé xica cuu ndìhi-gá, ² ndìhi ìⁿ úú ñáyiú dìhí ní quide tátna-gá ní xíhi ñàha espíritú cùndìhi yucu ñávàha, ndìhi ñáyiú tnàhá dava-gá cuéhé ùhú ní cùu. Te xiáⁿ tnàhá tucu ìⁿ ñàha nàni Mariá Magdalèná, te ñàha-áⁿ ñǐ xíhi ñàha ùsá espíritú cùndìhi yucu ñávàha xii-aⁿ ñǐ cùu, te ní quee ñàha-xi. ³ Te tnàhá ìⁿ ñàha nàni Juáná ñadìhí ìⁿ téé nàni Chúza téé ní cunuu ñǐ xinu cuechi vèhe té Hèrodés, ndìhi ìngá ñàha nàni Susaná nchaa ñáyiú-áⁿ ñǐ chindee

ñàhá-yu xii-gá ndihì nchaa sá ndécú ndìhí-yu, te ñàhá-yu ní ducaⁿ ñǎ quide vài-gá tucu ñáiyu nchìcúⁿ ñàhá xii-gá cuáháⁿ.

Nàcuáa quide té cuángacáⁿ triú
(Mt. 13:1-9; Mr. 4:1-9)

⁴ Te ío vài ñáiyu ndaa ñúú ní tacá-yu núú ndécú Jèsús, te ní ngüíta-gá ní cani-gá ñⁿ cuèndú núú-yu cuèndá tecú tnùnì-yu tnúhu-gá, te xáhaⁿ-gǎ xií-yu:

⁵ —Íⁿ té cuángacáⁿ-dé triú. Te òré ní ngüíta-dé ñǎngoyo-dé triú-áⁿ te dava ní quene ndava ní ngava ndéé ichi, te ní xénihnu ñáiyu, te ní xiní tílaá te ní nadatácá-güedi. ⁶ Te dava ní ngava ñuhu yadi núú yíhí vèhì yúú, te ní xínu-xi dico núú sàcú-ni nduu te ní yíchí-xi, chi ñá túú cǎhyo yèhì. ⁷ Te dava ní ngava núú yúcú ndǎquíⁿ tnu ñú, te ñⁿnuu-ni ñǎ xínu-xi ndihì tnu ñú-áⁿ, te tnu ñú-áⁿ ñǎ dánáá-xi nchàa triú sá ñǎ xínu-áⁿ. ⁸ Dico dava triú-áⁿ ñǎ ngava-xi núú ndécú ñúhu cocoⁿ, te xiáⁿ ní xínu-xi te ní sahnú-xi, te ío váha ní cuu, chi núú ñⁿ-ní triú te ní nguíhì yoco-xi ñⁿ cièndú triú-xi —càchí-gá xáhaⁿ-gǎ xií-yu.

Te níhi ní cáháⁿ-gá ní xáhaⁿ tùcu-gá xií-yu:

—Nchaa nchòhó ñáiyu ní xíndedóho tnúhu ní cáháⁿ-í-a, te ío váha chí cuáha cuèndá —càchí-gá xáhaⁿ-gǎ xií-yu.

Nàcuáa quèe-xi tnúhu ní cáháⁿ Jèsús
(Mt. 13:10-17; Mr. 4:10-12)

⁹ Te cue té xica cuu ndihì Jèsús ní xícaⁿ tnúhú-güedé núú-gǎ ñú nása quèe-xi cuèndú ní cani-gá núú ñáiyu. ¹⁰ Te ní xáhaⁿ-gǎ xii-güedé:

—Nchòhó chi sa càchí tnúhu Yá Ndiõxí xii-ndo ñⁿ sá vătă quèní-gá-ndó, chi càchí tnúhu-gá nàcuáa cada-gá ndíhu ndaha-gã ñáyiú, dico dava-gá ñáyiú càni-í mee-ni cuèndú núŷ-yu, chi cuèi na quèní-yu nchaa nàcuáa cuu dico nì vá cútnùní iní-yu ná cuèndá ducaⁿ cùu, àdi cuèi na cùndedóho-yu dico nì vá tècú tnùní-yu —càchí-gá xáhaⁿ-gã xii-güedé.

Jèsús càháⁿ-gá nàcuáa quèe-xi tnúhu cuèndá téé cuàngacáⁿ triú

(Mt. 13:18-23; Mr. 4:13-20)

¹¹ Te xáhaⁿ tùcu-gá xii-güedé:

—Duha quèe-xi cuèndú ní cani-í núú-ndó, chi triú ní sacáⁿ téé-áⁿ cúú-xí dàtná tnúhu Yá Ndiõxí. ¹² Te triú sá ñ quene ndava ní ngava ndéé ichi-áⁿ, xíáⁿ cúú-xí dàtná ñáyiú ní quèe iní-xi tnúhu Yá Ndiõxí, dico sácúíhná cuáháⁿ-xi xòcani-xi tnúhu-gá iní-yu cuèndá sá vă quèndáá iní-yu, te vá nánihí tàhú-yu. ¹³ Te triú sá ñ ngava ñuhu yadi núú yíhí vìhi yúú, xíáⁿ cúú-xí dàtná ñáyiú ní xíndedóho tnúhu Yá Ndiõxí te díí ìní ní tníⁿ-yu tnúhu-gá, dico òré ná dàcaháⁿ ñáhá yùcu ñávãha xíi-yu nándi cadá-yu, te dàña nihnú-yu tnúhu-gá chi ñá nihí ndéë-yu canchicúⁿ nihnú-yu nàcuáa càháⁿ tnúhu-gá. ¹⁴ Te triú sá ñ ngava núú yúcu ndíquíⁿ tnu ìñu-áⁿ, xíáⁿ cúú-xí dàtná ñáyiú ní tecú dóho-xi tnúhu Yá Ndiõxí, dico cuèé cuèé ní nacuanaá-yu tnúhu-gá, chi cuèndá mee-ni sã cúú-xí mèé-yu ñùhu iní-yu, ndíhí cuèndá sá ïo sàni iní-yu cuu cuìcá-yu, ndíhí cuèndá sá ïo cùdíí ìní-yu nchaa sá ïó ñuyíú-a núu xíáⁿ àúⁿ nã cuu ní xíndedóho-yu tnúhu-gá. ¹⁵ Dico triú sá ñ ngava núú ndécú ñùhu cocoⁿ, xíáⁿ cúú-xí dàtná

ñáyiú váha iní-xi ní xíndedóho tnúhu Yá Ndiõxí chi ñá túú dàña nihnú-yu, te ni yùhu ni iní-yu quidé-yu nchaa nàcuáa càháⁿ tnúhu-gá.

Nàcuáa quidé-yu iti

(Mr. 4:21-25)

¹⁶ Te ñá túú ni ìⁿ ñáyiú tènühú-yu ìⁿ iti te dàdáhu-yu, àdi chiváha-yu ìⁿ caha càamá, chi tàxi ndecú-yu núú ñnu cuendá cutnùní núú nchaa ñáyiú ndècu vehe. ¹⁷ Te ni ìⁿ tnúhu sá ñă tècú tnùní ñáyiú vitna vá càchí-ó sã vã tècú tnùní-yu chi dacuèi sá tècú tnùní-yu, te ni ìⁿ tnúhu sá càchí-ó cùu yuhu vitna vá cúú yùhu chi dacuítí sã quée tũu-xi núú ñáyiú.

¹⁸ Te chí cùndedóho váha tnúhu na càháⁿ-í-a. Nchaa ñáyiú sàndáá iní ñáhá xii Yá Ndiõxí ío-gá cuita quindáá-gá iní ñáhă-yu xii-gá quíhíⁿ, te nchaa ñáyiú ñá túú sàndáá iní ñáhá xii-gá uuⁿ-gá cuita cuu sàá-gá iní-yu núú-gă quíhíⁿ —càchí-gá xáhaⁿ-gă xii-güedé.

Cue ñaní Jèsús ndihí năná-gă

(Mt. 12:46-50; Mr. 3:31-35)

¹⁹ Te ní quexìo náná Jèsús ndihí cue ñaní-gá vehe núú ndécú-gă, te ñá ndácũ-yu cáháⁿ ndihí ñáhá-yu xii-gá chi ío cuéhé ñáyiú ndècu núú ndécú-gă. ²⁰ Te ìⁿ ñáyiú xĩndecu-áⁿ ní dáyăha-yu tnúhu núú-gă, te xăhăⁿ-yu:

—Ní quexìo náná-n ndihí cue ñaní-n xĩnutnĩi-yu quehé, te cuiní-yu cáháⁿ ndihí ñáhá-yu xii-n —càchí-yu xăhăⁿ-yu xii-gá.

²¹ Te ní xáhaⁿ-gă:

—Nchaa ñáyiú sàcúndedóho tnúhu Yá Ndiõxí te quidé-yu nchaa nàcuáa càháⁿ tnúhu-gá, ñáyiú-áⁿ cúũ-yu dàtná nǎnà-í ndihí dàtná cue ñaní-í — càchí-gá xáhaⁿ-gǎ xii ñáyiú ní dáyǎha tnúhu núú-gǎ-áⁿ.

Jèsús ngání-gǎ táchí ndihí ndute làgúná
(Mt. 8:23-27; Mr. 4:35-41)

²² Te ñⁿ nduu ní quée Jèsús bàrcú ndihí cue téé xica cuu ndihí-gá, te ní xáhaⁿ-gǎ:

—Chí ná quíhíⁿ-ó ndàa ingá xio yuhu làgúná — càchí-gá xáhaⁿ-gǎ xii-güedé.

Te cuáháⁿ-güedé ndihí-gá. ²³ Te ñini ñùhu barcú ichi cuáháⁿ-xi núú ndute ní xídí Jèsús. Te ní ngüíta-xi níhi vihi quene táchí te ta nàdachitú-xi ndute xití bàrcú-áⁿ cuáháⁿ, te sa cuíní-nǎ-xi quée naa bàrcú-áⁿ xití ndute ni cùu. ²⁴ Te ní sáháⁿ-güedé núú cáá Jèsús xídí-gá, te ní xáhaⁿ-güedě xii-gá:

—¡Mèstrú, ndiquíú ìní chi tà quée naa-o cuáháⁿ!
—càchí-güedé xáhaⁿ-güedě xii-gá.

Te Jèsús ní ndiquíú ìní-gá te ní ndacóo-gá te ní tenáa-gá táchí-ǎⁿ ndihí ndute làgúná-áⁿ, te ní ngüíñí-ni táchí-ǎⁿ te ní nucúndecu nahi-nǎ ndute làgúná-áⁿ. ²⁵ Te ní xáhaⁿ-gǎ xii-güedé:

—¿Náa ñá túú sàndáá ìní ñáhá ndìsa-ndo xii-í ǎⁿ?
—càchí-gá xáhaⁿ-gǎ xii-güedé.

Te ní cuñúhu-güedé sá dúcáⁿ ñí quide-gá ní xiní-güedé, te ní yùhú-güedé, te ní xítñaha-güedé:

—¿Te ná téé cùu téé-a núu ní cáháⁿ-ni-dé te ní ngüíñí táchí te ní nucúndecu nahi-ni ndùte làgúná-a-i? —càchí-güedé xítñaha-güedé.

*Tée yìhi ñaha cue espíritú cùndìhi yucu ñávãha
(Mt. 8:28-34; Mr. 5:1-20)*

²⁶ Te ní sáá-gá ndihi-güedé yucu cue téé ñuú Gàdará, te yìhi ndáá-ni ndàa ingá xio làgúná-án cáá dìstrítú Galiléa. ²⁷ Te òré ní quene Jèsús xítí bàrcú te ní dáyátní ñàha ìⁿ téé ñuú-án xii-gá, te yìhi ñaha titní espíritú cùndìhi yucu ñávãha xii-dé. Te ní cunaha ñà túú-gã sácũhnu-dé dóó-dě, te ni ñà túú-gã sácũndecu-dé vehe-dé, chi da nchaa núú yíndũxi ndíyì quide vehe-dé. ²⁸ Te òré ní xiní-dé Jèsús te ní ngüíñí xítí-dě núú-gã, te cue espíritú yíhí ñaha xii-dé-án ñí quide-xi níhi ní cáháⁿ-dé, te xãhaⁿ-dě xii-gá:

—¿Ná cuendá véxi-õ Jèsús Déhe Dútú Ndiõxí sàdí-n ìchi-í-i? Te cáháⁿ ndàhú-í núú-n sã và dándòho ñaha-n xii-í —càchí-dé xãhaⁿ-dě xii-gá.

²⁹ Te ducaⁿ ñí cáháⁿ-dé cuendá sá Jèsús ní xáhaⁿ-gã xii nchaa espíritú cùndìhi yucu ñávãha yìhi ñaha sá ná quèe ñaha-xi xii-dé. Te nchaa xíãⁿ ní xóo dacàháⁿ-xi iní-dé nándi sá ñí xóo cada-dé ñũu ní xóo dacùtu ñaha-güedé cadèná xii-dé cuendá sá ñà túú-gã ná cada-dé, te ní xóo cundee ñáhá-güedě, dico cuèi ducaⁿ dico ní xóo dandáva-ni-dé cadèná, te cue espíritú cùndìhi yucu ñávãha-án ñí xóo dacùnu ñaha-xi xii-dé ní xóo quíhíⁿ-dé xítí yucu.

³⁰ Te Jèsús ní xícáⁿ tnúhú-gã núú-dě, te xáhaⁿ-gã:

—¿Nása nàni-n-i? —cachí-gá xáhaⁿ-gã.

Te ní xáhaⁿ-dě:

—Vài Sandadú nàni-í —càchí-dé xãhaⁿ-dě xii-gá.

Te ducaⁿ ñí xáhaⁿ-dě xii-gá cuendá sá ïo cuéhé espíritú cùndìhi yucu ñávãha yìhi ñaha xii-dé. ³¹ Te

nchaa espíritú-án nǐ cáháⁿ ndàhú-xi núú Jèsús sá vǎ téndàha ñaha-gá xii-xi quíhíⁿ-xi núú ùhú núú ndàhú. ³² Te ðiu-ni yatni yucu núú ndécú Jèsús-án yíhí vǎi cuchí xǐxexi-güedi, te nchaa espíritú-án nǐ cáháⁿ ndàhú-xi núú-gǎ sá ná dàña-gá quíhu-xi yiqui cùñú nchaa cùchí-án, te Jèsús ní xáhaⁿ-gǎ sá cúú quíhu-xi yiqui cùñú-güedi. ³³ Te ní quee ñaha nchàa espíritú-án xii téé-án, te ní quíhu-xi nchaa cùchí-án, te cùchí-án nǐ xinu-güedi duha ní queé-güedi ndàa núú dèhvǎ yuhu làgúná-án, te ní ngaunihnu-güedi xití ndute te ní ndíhi-güedi ní cáhá.

³⁴ Te òré ní xiní cue téé xìto cuchí-án nàcuáa ní cuu te ní yùhú-güedé ní xinu-güedé, te ní sáháⁿ-güedé ní cani-güedé cuèndú núú cuè ñáyiú ndècu xití ñuú, ndíhi núú cuè ñáyiú ndècu xití yucu. ³⁵ Te nchaa ñáyiú ní níhí tnǔhu ní queé-yu cuáhán ndéhě-yu nàcuáa ní cuu. Te òré ní quexìo-yu núú ndécú Jèsús, te ní xiní-yu téé ní xíhi ñaha cuè espíritú cùndíhi yucu ñávǎha-án núcõo-dé núú sàhá Jèsús, te nìhnu-ná-dé dóo-dě, te nùcõo-dé dàtná ìⁿ ñáyiú váha, te ní yùhú-yu òré ní xiní ñáhǎ-yu xii-dé. ³⁶ Te nchaa ñáyiú ní xiní nàcuáa ní cuu ní ndúha téé yíhi ñaha cue espíritú cùndíhi yucu ñávǎha-án ní cùu ní caní-yu cuèndú núú nchàa ñáyiú ní quexìo-án nàcuáa ní cuu ní ndúha téé-án ndíhi nàcuáa ní cuu cuèndá nchaa cùchí-án. ³⁷ Te sá dúcán nǐ níhí-yu tnúhu nàcuáa ní cuu, núu nchaa ñáyiú ñuú Gàdará ío ní yùhú-yu te ní ngúita-yu càháⁿ ndàhú-yu núú Jèsús sá ná nùhú-gá nǔu ndèé ichi véxi-gá. Te sá dúcán nǐ cáháⁿ-yu núu cuáhán-gá núú ndécú

bàrcú. Te òré ndée-gá bàrcú-án nùhú-gá ³⁸ ní ngüíta tée ní xíhi ñaha cuè espíritú cùndìhi yucu ñávàha càháⁿ ndàhú-dé núú-gă nŭu vá cùndèe iní-gá quíhíⁿ ndìhi ñaha-gă xii-dé, dico Jèsús ní quide ndee iní ñáhá-ni-gă xii-dé, te ní xáhaⁿ-gă:

³⁹ —Cuanùhú vehe-n, te cani-n cuèndú núú nchàa ñáyiu sá ïo càhnu cuu nchaa sá vâha ní quide ñaha Yă Ndiöxí xii-n —càchí-gá xáhaⁿ-gă xii-dé.

Te tée-án ñí xica-dé cuánuhú-dé te ní ngüíta-dé ní cani-dé cuèndú núú nchàa ñáyiu xĩndecu ñihí ñuú sá ïo càhnu cuu nchaa sá vâha ní quide ñaha Jèsús xii-dé.

Cuèndá déhe yoco tẽ Jàirú, ndìhi cuèndá ìⁿ ñadìhí ní tnándeé dóó Jèsús

(Mt. 9:18-26; Mr. 5:21-43)

⁴⁰ Te òré ní ndexìo Jèsús ndàa ingá xio yuhu làgúná, te ñáyiu xĩndecu xiáⁿ sa ndètu cahnu ñaha-ná-yu, te ïo váha ní cáháⁿ ndìhi ñáhá-yu xii-gá òré ní nasáá-gá. ⁴¹ Te ìⁿ tée tàxi tnuní veñúhu ní quexìo-dé núú ndécú Jèsús, te tée-án nání-dě Jàirú, te ní ngüíñí xítí-dě núú-gă càháⁿ ndàhú-dé, te xáhaⁿ-dě xii-gá:

—Véxi-í càháⁿ ndàhú-í núú-n nŭu vá cùndèe iní-n quíhíⁿ-ó vèhe-í cada tátna-n déhe yoco-ï —càchí-dé xáhaⁿ-dě xii-gá.

⁴² Te ducaⁿ ñí xáhaⁿ-dě chi ndècu ìⁿ dii-ni déhe yoco-dě, te ndècu-xi datná úxúú cuíá-xi, te càhú víhí tnàhá-xi cùhú-xi te cuìní-xi cuú-xi. Te Jèsús ní xica-gá cuáháⁿ-gá ndìhi tée-án, te ïo vâi ñáyiu nchìcúⁿ ñáhá xii-gá cuáháⁿ, te dàdehnde ñaha-ná-yu xii-gá ní cùu.

43 Te tnuú nchaa ñáyi-u-áⁿ ñútnàhá ìⁿ ñaha cùhú, te ñaha-áⁿ sà ní cuu úxúú cuíá sǎ cùhú-aⁿ ngòyo ñaha níñí xii-aⁿ, te ío cuéhé dǐhúⁿ ñí cuu dàndòñuhu-aⁿ chi ní nadico-aⁿ nchàa sá ndécú ndìhi-aⁿ cuendá ní níhí-aⁿ dǐhúⁿ ñí queheⁿ nchaa ñáyi-u ní quide tátna ñaha xìi-aⁿ, dico ní ìⁿ-yu ñá túú ní ndàcú-yu ndúha-aⁿ. 44 Te ní sáháⁿ ndehe yatni-aⁿ ndàa sátá Jèsús, te ní tnándeé-aⁿ luha yuhu dǒó-gǎ te òré-ni-áⁿ ñí ndúha-aⁿ.

45 Te Jèsús ní xícáⁿ tnúhú-gǎ núŷ-yu, te xáhaⁿ-gǎ:
—¿Ndédacàa-ndo ní tnándeé ñáhá xìi-í? —càchí-gǎ xáhaⁿ-gǎ xií-yu.

Te ncháa-yu ní xáhǎⁿ-yu sá ñí ìⁿ-yu ñá túú ní tnándeé ñáhá xìi-gǎ. Te té Pèlú ndìhi cue té cùndìhi-dé ní xáhaⁿ-güedé xii-gǎ:

—Mèstrú, ndèhe-n sá vái ñǎyi-u nchìcúⁿ ñáhá xìi-n, te xio xio dàdehnde ñahá-yu, te xícáⁿ tnúhú-gǎ-n yòo ní tnándeé ñáhá xìi-n —cachí-güedé xǎhaⁿ-güedé xii-gǎ.

46 Dico Jèsús ní xáhaⁿ-gǎ xií-yu:

—Dico ñíu ìⁿ-ndo ñí tnándeé ñáhá xìi-í, chi ní cutnùnì iní-í sá ìⁿ ñáyi-u cùhú ní tnándeé ñáhá xìi-í te ní ndúha-yu —càchí-gǎ xáhaⁿ-gǎ xií-yu.

47 Te sátá ñí xini ñaha-áⁿ sǎ ñí cutnùnì iní Jèsús sá ñí tnándeé ñáhá-áⁿ xìi-gǎ, te yùhú yùhú-aⁿ ní sáhá-aⁿ ní ngüíñí xítí-áⁿ núú-gǎ, te ní náhmá-aⁿ núú-gǎ, ndìhi núú nchàa ñáyi-u ná cuendá ducaⁿ ñí quide-aⁿ ní tnándeé-aⁿ-gǎ, ndìhi cuendá sá òré-ni-áⁿ ñí ndúha-aⁿ. 48 Te Jèsús ní xáhaⁿ-gǎ xii-aⁿ:

—Yòhó ñaha cùhú, ní sándáá iní ñáhá-n xìi-í núu ní ndúha-n, te cuanùhú vitna te ñá túú-gǎ ná cani iní-n —càchí-gǎ xáhaⁿ-gǎ xii-aⁿ.

49 Te càháⁿ dúcáⁿ-ní Jèsús ní sáá ìⁿ tée xìnu cuechi vehe té Jàirú tée tàxi tñuní veñúhu, te xǎhaⁿ tée xìnu cuechi-áⁿ xii-dé:

—Sa ní xíhí déhe-n, vá chíhìuⁿ-gá-n Mèstrú — càchí-dé xǎhaⁿ-dě.

50 Te sá dúcáⁿ xǎhaⁿ tée xìnu cuechi-áⁿ xii té Jàirú ní tecú dóho Jèsús, núu ní xáhaⁿ-gǎ xii-dé:

—Vá ndìhú iní-n, quíndáá iní ñáhá-ní-n xii-í te ndúha déhe-n —càchí-gá xáhaⁿ-gǎ xii-dé.

51 Te òré ní sáá-gá vehe té Jàirú te ñá ní dàña-gá quíhu ñáyiú cùtexínu, núu té Pèlú-ni ndihí té Jàcobó-ni, ndihí té Juàá-ni, ndihí tǎtá ndihí nǎná-ni xíchí ñí xíhí-áⁿ cuǎnguihu ndihí-gá xití vehe. 52 Te nchaa ñáyiú sa xíndecu vehe-dé-áⁿ xǐndáhyú-yu sá ndìhú iní-yu cuèndá sá ñí xíhí-xi. Te Jèsús ní xáhaⁿ-gǎ xií-yu:

—Vá ndàhyú-ndó, chí dícó-ni xidí-xi ñá túú ní xíhí-xi —càchí-gá xáhaⁿ-gǎ xií-yu.

53 Te ní sácú ndeé ñáhǎ-yu xii-gá, chí sá cúú-xí mèe-yu chí ní xíhí ndisa xíchí-ǎⁿ. 54 Te Jèsús ní tñi-gá ndaha xíchí ñí xíhí-áⁿ, te níhi ní cáháⁿ-gá, te xáhaⁿ-gǎ:

—Xíchí cuéchí, ndacóo —càchí-gá xáhaⁿ-gǎ.

55 Te xíchí-ǎⁿ ñí ndoto-xi, te òré-ni ní ndacóo-xi, te Jèsús ní xáhaⁿ-gǎ sá ná cuǎñáhá-yu sá cáxí-xí. 56 Te tǎtá-xi ndihí nǎná-xi súúní ñí cuñúhu-yu sá dúcáⁿ ñí dándótó ñàha Jesús xii-xi, te ní xáhaⁿ-gǎ xií-yu sá vǎ yǒo ìⁿ cúñáhá-yu sá dúcáⁿ ñí quide-gá.

9

*Jèsús téndàha-gá ndi ùxúú cue téé xìca cuu ndihi-gá
quihíⁿ-güedé cáháⁿ-güedé tnúhu-gá
(Mt. 10:5-15; Mr. 6:7-13)*

¹ Te Jèsús ní cana-gá ndi ùxúú cue téé xìca cuu ndihi-gá, te ní sáñaha-gã xii-güedé tnúhu ndee ìní cundecu ndihi-güedé cuendá queñuhu-güedé nchaa espíritú cúndihi yucu ñávàha yìhi ñaha xii ñáyiú, ndihi cuendá sá cádá tátna-güedé nchaa ñáyiú cùhú. ² Te ní xáhaⁿ-gã xii-güedé sá quihíⁿ-güedé danèhé-güedé ñáyiú nàcuáa cada Yá Ndiöxí ndíhu ndaha ñàha-gá xií-yu, te ducaⁿ càda tátna-güedé cue ñáyiú cùhú. ³ Te cùmání-gã caca-güedé quihíⁿ-güedé, te ní xáhaⁿ-gã xii-güedé:

—Ñá túú tnàhí ná canehe-ndo cùu ichi-ndo, ni tátnu, ni ñunu, ni sã cáxí-ndó, ni díhúⁿ. Te ni vã cánèhe-ndo ingá ichi dóó-ndó, chi ðiu-ni dóó níhnú-ndó-ǎⁿ xiǎⁿ tnàhí-ni. ⁴ Te ndédani càa vehe na saá-ndó, te xiáⁿ cundecu-ndo ndèé ná sàá nduu ndèe-ndo. ⁵ Te núu ñá túú cuìní-yu queheⁿ cuendá ñáhã-yu xii-ndo, te ndee-ndo ñùú-áⁿ, te naquidi-ndo ticá chúhmá ñí tníi sáhá-ndó cuendá sá ná cùtnuní iní-yu sá ñà túú quìde váha-yu — càchí-gá xáhaⁿ-gã xii-güedé.

⁶ Te sátá dúcáⁿ ñí xáhaⁿ Jèsús xii-güedé, te ní quee-güedé cuáháⁿ-güedé nchaa ñuú dácuàha-güedé ñáyiú tnúhu Yá Ndiöxí, tnúhu sá càháⁿ nàcuáa naníhí tàhú-yu, te ducaⁿ ta quìde tátna-güedé nchaa ñáyiú cùhú cuáháⁿ.

Nàcuáa ní cuu ní xíhí té Juàá téé dàcuandute ñaha xii ñáyíu

(Mt. 14:1-12; Mr. 6:14-29)

⁷ Te té Hèrodés téé cùu gobiernú ní níhí-dě tnúhu nchaa nàcuáa quide Jesús, te quíyuhú iní-dé te sàni iní-dé yoo cùu-gá. Te ducaⁿ ní sani iní-dé chi dava ñáyíu càchí-yu sá tẽ Juàá téé ní xóo dacuandute ñaha xii ñáyíu ní ndoto cùu-gá. ⁸ Te davá-yu càchí-yu sá tẽ Èliás cúú-gă, te davá-yu càchí-yu sá ìⁿ téé ní xóo cáháⁿ tnúhu Yá Ndiõxí ndéé sanaha vìhi ní ndoto cùu-gá, càchí-yu. ⁹ Dico té Hèrodés ní cachí-dé:

—Yúhú ní táúchíúⁿ-í ní xehndé-güedé díquí tẽ Juàá. ¿Te yoo cùu téé dii cuèndú-xi nihí-a sá súúni cuèhé núú sã quidé-dě váiⁿ? —duha ní cachí-dé.

Te té Hèrodés ndúcú-dě nàcuáa cada-dé cuèndá quiní-dé Jèsús.

Jèsús dácàxi-gá úhúⁿ mĩl cue téé te dèⁿ ñáyíu dèhí ndíhi landú

(Mt. 14:13-21; Mr. 6:30-44; Jn. 6:1-14)

¹⁰ Te nchaa cue téé ní táúchíúⁿ Jèsús cuáháⁿ cáháⁿ tnúhu Yá Ndiõxí núú ñáyíu ní ndexìo-güedé núú-gă te ní ngüíta-güedé nácàni tnúhu-güedé nchaa nàcuáa ní quide-güedé. Te dătnùníní ní xica-gá medii-ni-gá ndécá ñaha-gá xii-güedé cuáháⁿ ìⁿ xichi núú ñà túú ñáyíu ndècu, yatni núú cáá ñúú Bètsaidá. ¹¹ Dico òré ní níhí ñáyíu tnúhu sá cuáháⁿ Jèsús, te nchìcúⁿ-yu-gá cuáháⁿ, te òré ní quexìo-yu núú-gă, te ní queheⁿ cuèndá ñáhá-gă xií-yu, te ní dánèhé ñáhá-gă xií-yu nàcuáa ndíhu ndaha ñaha Yá Ndiõxí xií-yu, te ní quide tátna-gá nchaa ñáyíu cùhú.

12 Te òré sa ní cuaa te ní natacá ndi ùxúú cue téé xìca cuu ndihì-gá núú-gǎ, te ní xáhaⁿ-güedě xii-gá:

—Sa ní cuu dandàca-n nchaa ñáyiú-a, chi sa ní cuaa, te na quíhíⁿ-yu nchaa vehe càa yatni iha, ndihì nchaa xití ñuú cáá yatni iha cuaáⁿ-yu sá cáxí-yu, te ñuú-ni yàcáⁿ ndetatú-yu, chi núú ndécú-ó iha ñá túú tnàhí ná lò —càchí-güedé xáhaⁿ-güedě xii-gá.

13 Te Jèsús ní xáhaⁿ-gǎ xii-güedé:

—Mee-ndo chǐ cuǎñaha sǎ ná càxí-yu —càchí-gá xáhaⁿ-gǎ xii-güedé.

Te ní xáhaⁿ-güedě xii-gá:

—Ñá túú nǎgá ndécú ndihì-ndí, chi úhúⁿ duha-ná pàá, ndihì úú-nǎ chácá ndécú ndihì-ndí, te ñuú-ni núú quíhíⁿ-ndí cuaaⁿ-ndí sá cáxí-yu —càchí-güedé xáhaⁿ-güedě xii-gá.

14 Te xǐnu dàtná úhúⁿ mǐl mee-ni cuè téé, te ñuú-ni ñáyiú ñáyiú ndihì landú. Te Jèsús ní xáhaⁿ-gǎ xii cue téé xìca cuu ndihì-gá:

—Chí cǔñaha na ngõo ndi údico úxí ndi údico úxí-yu ñí ñí xichi —càchí-gá xáhaⁿ-gǎ xii-güedé.

15 Te ducaⁿ ñí quide-güedé, te ní ngóo-yu nchaá-yu. 16 Te dàtnùní ní queheⁿ-gá ndi ùhúⁿ pàá-án, ndihì ndi ndùú chácá-ǎⁿ. Te ní ndacoto-gá andiú, te ní ndacáⁿ táhú-gǎ núú Yǎ Ndiõxí, te dàtnùní ní táhú cuèchi-gá pàá-án ndihì chácá-ǎⁿ, te ní sáha-gá nchaa cue téé xìca cuu ndihì-gá ní dácǎhñu ñaha-güedě xii-yu. 17 Te nchaá-yu ní xexí-yu ní ndahá xití-yu. Te sátá ñí túhú cóhõ-yu te ní nadatàcá-güedé nchaa sá ñí quendóo, te ní chítú ùxúú tnàhá tídihi mee-ni sǎ ñí quendóo.

*Té Pèlú xáhaⁿ-dě xii Jèsús sá díú-gă cúú-gă Crìstú
(Mt. 16:13-19; Mr. 8:27-29)*

18 Te ìⁿ nduu ndècu mee Jèsús ndìhì cue tée xìca cuu ndìhì-gá, te càháⁿ ndìhì-gá Yă Ndiöxí, te sátá nǐ yáha ní cáháⁿ ndìhì-gá Yă Ndiöxí, te ní xícáⁿ tnúhú-gă núú-güedě, te xáhaⁿ-gă xii-güedě:

—¿Yoo cùu yúhú càchí ñáyìu-va? —càchí-gá xáhaⁿ-gă xii-güedě.

19 Te ní xáhaⁿ-güedě xii-gá:

—Davá-yu càchí-yu sá cúú-n ndìi Juàá tée ní xóo dacuàndute ñaha xii ñáyìu, te davá-yu càchí-yu sá cúú-n tě Èliás, te davá-yu càchí-yu sá ìⁿ tée ní xóo cáháⁿ tnúhu Yá Ndiöxí ndéé sanaha nǐ ndoto cùu-n, duha càchí-yu —càchí-güedě xáhaⁿ-güedě xii-gá.

20 Te ní xícáⁿ tnúhú tùcu-gá núú-güedě, te xáhaⁿ-gă xii-güedě:

—Te nchòhó, ¿yoo sàni iní-ndó cùu-í-i? —càchí-gá xáhaⁿ-gă xii-güedě.

Te té Pèlú ní xáhaⁿ-dě xii-gá:

—Yòhó cúú-n Crìstú Déhe Dútú Ndiöxí —càchí-dé xáhaⁿ-dě xii-gá.

*Jèsús càháⁿ-gá sá cáhni ñàha-güedě xii-gá
(Mt. 16:20-28; Mr. 8:30-9:1)*

21 Te ní xáhaⁿ-gă xii-güedě sá vǎ yǒo ìⁿ cúñaha-güedě yoo cùu-gá. 22 Te ní xáhaⁿ-gă xii-güedě:

—Yúhú Tée cùu ñaní tnáhá-ndó nchàa-ndo ío cuéhé sǎ ndóhò-í, chi daquèe tíhú ñáhá cuè tée cùu sacuéhé núú ñáyìu isràél, ndìhì cue dútú cúnùu, ndìhì cue tée dàcuaha ñaha xii ñáyìu nchaa tnúhu ní chídó tnùnì ndíi Moisés, te sáá nduu te cahni

ñaha-güedě xii-í, dico nduu úní sá cùú-í te ndoto-í
—càchí-gá xáhaⁿ-gă xii-güedé.

²³ Te dătnùní ní xáhaⁿ-gă xii nchaa ñáyíu:

—Nchaa ñáyíu cuení chitnahá ñáhá xì-í, te xìni ñuhu-xi vá cádá-gă-yu sá sání ínì méě-yu, te ìⁿ nduu ìⁿ nduu cada ndee ínì-yu cundecu túha-yu ndohó-yu cuendá-í, te cuěi na ndòhó-yu dătná ndoho-í. ²⁴ Te nchaa ñáyíu cuení sá ñà túú tnàhí ná yáha cundecu ñuyíú-a cuíta nihnú-yu. Dico nchaa ñáyíu ñá túú yùhú cuěi nándi sá ná yăha-yu cundecú-yu ñuyíú-a sá cuendá-í, te ñáyíu-áⁿ naníhí tãhú-yu. ²⁵ Te cuěi nchaandi túhú sá íó ñuyíú-a na nihí ñáyíu cundecu ndihí-yu, dico núu dïu nchaa xíãⁿ ná càda cuíta nihnú-yu te ñá túú vėdana nândíhi-xi sá dúcáⁿ ndècu ndihí-yu nchaa xíãⁿ. ²⁶ Te nchaa ñáyíu na cùcahaⁿ núú-xi cáháⁿ váha cuendá-í ndihí cuendá nchaa tnúhu-í, te tnàhá yùhú Tée cùu ñaní tnàhá-ndó nchàa-ndo cucahaⁿ núù-í núú-yu òré quixi tucu-í ndihí cue espíritú xínú cuèchi núú Tătà-í Dútú Ndiõxí, te mee-gă cada cutnùní ínì nchaa ñáyíu sá ìo càhnu cuu-í. ²⁷ Te na càchí tnúhu ndáá-í xii-ndo sã íó dava nchòhó ñáyíu ndècu iha vitna vá cùú-ni-ndo, chi cundecu-ni-ndo ndéé quiní-ndó sãá nduu ndíhu ndaha ñàha Yá Ndiõxí xii ñáyíu —càchí-gá xáhaⁿ-gă xií-yu.

Ní nadáma dóo Jèsús ndihí núú-gă

(Mt. 17:1-8; Mr. 9:2-8)

²⁸ Te ní cuu dătná úná nduu sá dúcáⁿ ñí cáháⁿ Jèsús, te cuásaá-gă ìⁿ yucu cáháⁿ ndihí-gă Yă Ndiõxí, te ndèca-gă té Pèlú, ndihí té Jàcobó, ndihí té Juáa cuásaá. ²⁹ Te nini càháⁿ ndihí-gă Yă Ndiõxí ní nadáma núú-gă ndihí dóó-gă, te dóó-gă-áⁿ sũúní ñí

nduu cuixíⁿ víhí, te súúní dàtásaⁿ-xi. ³⁰ Te òré-ni-án nǐ xíní-güedé úú tnháá cue tée càháⁿ ndihí-gá, te ìⁿ-dé cúú-dě té Moisés, te ingá-dé cúú-dě té Èliás, ³¹ te súúní dàtásaⁿ-xi nǐ càndéé núú ndécú cue tée úú-áⁿ ndihí-gá, te xĩndatnúhu-güedé nàcuáa ndoho Jèsús cuú-gá ñúú Jerusàlén dàtná ní cachí mée-gă. ³² Te té Pèlú ndihí úú-gá-güedé cuìní víhí-güedě cúdú-güedé, dico ní sahní iní-güedé ñá túú ní xídí-güedé, te ní dánèhé núú ñáhá-xí xì-güedé sá súúní vâha càa núú ndécú Jèsús, ndihí úú cue tée càháⁿ ndihí-gá-án. ³³ Te òré sa ndùcu ndee cue tée úú-áⁿ caca-güedé núhú-güedé, te ní xáhaⁿ tǎ Pèlú xii-gá:

—Mèstrú, ¡váha ní cuu sá ndécú-ó ìha vitna! Te na dàcaa-ndí úní tnháá vehe tnuvixiⁿ, ìⁿ cuu cuèndá-n, te ìⁿ cuu cuèndá té Moisés, te ìⁿ cuu cuèndá té Èliás —càchí-dé xâhaⁿ-dě xii-gá.

Dico té Pèlú chi nǐ mée-dé ñá túú ní cùtnuní iní-dé nása ndùu tnúhu ní cáháⁿ-dé. ³⁴ Te nǐnǐ càháⁿ-dé ní quexìo ìⁿ vícò núú ndécú-güedě-án nǐ dádăhu ñaha-xi xì-güedé, te ní yùhú-güedé sá dúcáⁿ nǐ quexìo vícò-ăⁿ nǐ dádăhu ñaha-xi. ³⁵ Te xití vícò-ăⁿ nǐ tecú ní cáháⁿ Yă Ndiöxí, te xáhaⁿ-gă xii-güedé:

—Tée-a cùu-dé Déhe-í, téé ío cùu iní-í, te tniⁿ-ndo nchâa tnúhu càháⁿ-dé —duha ní xáhaⁿ-gă xii-güedé.

³⁶ Te sátá dúcáⁿ nǐ cáháⁿ Yă Ndiöxí, te ní guide cuèndá-güedé sá mèdii-ná Jèsús ndécú-gă xíaⁿ. Te vá yôo ìⁿ nǐ xáhaⁿ-güedě nàcuáa ndùu nchaa sá nǐ xíní-güedé-án.

Jèsús quidé tǎtna-gá ìⁿ tée cuechi yìhí ñaha espíritú

cúndìhi yucu ñávãha

(Mt. 17:14-21; Mr. 9:14-29)

³⁷ Te ingá nduu-ãⁿ cuãnuu-gá yucu-áⁿ ndìhi-güedé, te ío cuéhé ñãyiu cuáháⁿ tnahá ñáhá xii-gá. ³⁸ Te ìⁿ téé ñùhu tnahá tnuú-yu-áⁿ ñí cáháⁿ níhi-dé, te xãhaⁿ-dẽ xii-gá:

—Mèstrú, ío càháⁿ ndàhú-í núú-n nõu vá cúndèe iní-n càda tátna-n dẽhe-í, chi ìⁿdì duha-dé ndécú, ³⁹ te yìhi ñaha espíritú cúndìhi yucu ñávãha xii-dé, te òré ná nàtnì ñaha-xi xii-dé, te dàcana saa ñaha-xi, te ndàda ruúⁿ ñáhá-xí xii-dé, te tàva-xi tíñú yuhu-dé. Te ío dândoho ñaha-xi xii-dé, chi ndéé núú ñà cúú-gã, te dàña ñaha tnaa-xi xii-dé. ⁴⁰ Te sa ní cáháⁿ ndàhú-í núú cuè téé xica cuu ndìhi-n queñuhu-güedé-xi, dico ñá túú ní ndàcu-güedé —càchí-dé xãhaⁿ-dẽ xii-gá.

⁴¹ Te Jèsús ní xáhaⁿ-gã xii nchaa ñáyiu:

—¡Nchaa nchòhó ñáyiu ndècu ñuyíú-a ío sàá iní-ndó, chi ñá túú cuiní-ndó quíndáá iní-ndó Yã Ndiõxí! Te ní cuu vãi nduu quide ndee iní-í nchaa sá quidé-ndó, ¿te ná ndéé ama vá dúcáⁿ-gã cada-ndo-í? —càchí-gá xáhaⁿ-gã xií-yu.

Te ní xáhaⁿ-gã xii téé cùhú déhe-xi-áⁿ:

—Taxi déhe-n ìha —cachí-gá xáhaⁿ-gã xii-dé.

⁴² Te òré cuáháⁿ téé cuechi-ãⁿ nõú-gã, te espíritú cúndìhi yucu ñávãha-áⁿ ñí dándúá ñáhá-xí xii-dé, te sàhni yìhí ñáhá tùcu-xi xii-dé ní cùu, dico Jèsús níhi ní cáháⁿ-gá ní tenàá-gá espíritú-áⁿ, te ní quee ñaha-xi xii-dé, te ní nacuáha cuèndá ñáhá-gã xii-dé tãtá-dẽ. ⁴³ Te ncháá-yu ní cuñúhu-yu sá dúcáⁿ ñí cuu, te ní cachí-yu sá ìo càhnu cuu Yã Ndiõxí.

*Jèsús càháⁿ tucu-gá sá cùú-gá
(Mt. 17:22-23; Mr. 9:30-32)*

Te nini xĩcuñúhu-yu nàcuáa ní quide Jèsús, te ní xáhaⁿ-gã xii cue tée xìca cuu ndìhi-gá:

⁴⁴ —Nchòhó cundedóho váha-ndo tnũhu na càháⁿ-í-a, te vá ná cuànaa-ndo, chi yúhú Tée cùu ñaní tnáhá-ndó nchàa-ndo sáá ìⁿ nduu te cuáha cuendá ñáhá-güedě xii-í núú cuè tée cùu úhú iní ñáhá —càchí-gá xáhaⁿ-gã xii-güedé.

⁴⁵ Dico cue tée-áⁿ ñà túú ní tècú tnùnì-güedé nàcuáa ndùu tnúhu ní xáhaⁿ-gã xii-güedé, te ducaⁿ ñĩ yáha-güedé, chi ducaⁿ tnàhí ní cachí-gá sá vã tècú tnùnì-güedé, te ní yùhú-güedé cacadⁿ tnúhú-güedé núú-gã nása ndùu tnúhu ní xáhaⁿ-gã xii-güedé.

*Cue tée ndùcu tnúhu núú tnáhá nũu
ndédacàa-güedé ío-gá cúnùu
(Mt. 18:1-5; Mr. 9:33-37)*

⁴⁶ Te cue tée xìca cuu ndìhi-gá ní ngüíta-güedé ndátñũhu-güedé nũu ndédacàa-güedé ío-gá cúnùu, ⁴⁷ dico Jèsús ní cutnùnì iní-gá nàcuáa sàni iní-güedé nũu ní cana-gá ìⁿ té lĩhli, te ní sanu tní ñaha-gã ìⁿ xio dĩñi-gá. ⁴⁸ Te ní xáhaⁿ-gã xii-güedé:

—Nchaa ñáyiu na quèheⁿ cuendá ìⁿ té lĩhli dàtná té lĩhli-a cuendá sá ñúhú ìni ñáhã-yu xii-í ñã, te cada iní-yu sá yúhú ní queheⁿ cuendá-yu, te nchaa ñáyiu na quèheⁿ cuendá ñáhá xii yúhú, te cada iní-yu sá tnáhá Tătà-í Dútú Ndiõxí Yaá ní tendaha ñaha xii-í véxi-í ñuyíú-a ní queheⁿ cuendá-yu. Te nchaa ñáyiu ío ndàhú iní-xi mee-ni xìnu cuechí-yu, ñáyiu-áⁿ ío-gá cúnùú-yu —càchí-gá xáhaⁿ-gã xii-güedé.

Ñáyiú ñá túú cùu úhú iní ñáhá cùndìhi ñahá-yu xii-o

(Mr. 9:38-40)

⁴⁹ Te té Juàá ñi-ni ìíⁿ téé xìca cuu ndìhi-gá ní xáhaⁿ-dě xii-gá:

—Mèstrú, ní xiní-ndí ìíⁿ téé càcunehe ñaha-dé xii-n, te ndèñuhu-dé espíritú cùndìhi yucu ñávãha yìhi ñaha xii ñáyiú, te nchúhú ñá túú ní dàña-gá-ndí ducaⁿ càda-dé, chi ñá túú xìca cuu ndìhi ñaha-dé xii-o —càchí-dé xáhaⁿ-dě xii-gá.

⁵⁰ Te Jèsús ní xáhaⁿ-gã xii-dé:

—Daña-ndo na càda nahi-dé ní cùu, chi ñáyiú ñá túú cùu úhú iní ñáhá xii-o te cùndìhi ñahá-yu —càchí-gá xáhaⁿ-gã xii-dé.

Jèsús càháⁿ-gá dóho té Jàcobó ndìhi té Juàá

⁵¹ Te òré sa ta cùyatni ndaa Jesús andìu, te ní xica-gá cuáháⁿ-gá ñuú Jerusàlén, chi duuⁿ duuⁿ ní sani iní-gá sá quíhíⁿ-gá. ⁵² Te ní tendaha-gã cue téé yòdo nuu cuáháⁿ, te ní quexìo-güedé ìíⁿ ñuú, te ñuú-áⁿ yíndèhu-xi distritú Sàmariá, te ndùcu-güedé ìíⁿ vehe cada túha-güedé òré quexìo-gá. ⁵³ Dico ñáyiú Sàmariá ñá túú ní cuíní-yu cuáñaha nùú-yu vehe, chi cuendá sá ñí cutnùní iní-yu sá ìchi yáha-ni-gá quíhíⁿ-gá ñuú Jerusàlén. ⁵⁴ Te sá dúcáⁿ ñí quidé-yu ñá túú ní cuíní-yu cuáñaha nùú-yu vehe ndetatú-gá, núu ní xáhaⁿ tè Jàcobó ndìhi té Juàá cue téé xìca cuu ndìhi-gá xii-gá:

—Mèstrú, ¿cuíní-n càcáⁿ táhú-ó nùú Yã Ndiõxí cuendá dangáva-gá ñuhú danàa-gá ñáyiú ñuú-a dàtná ní quide té Èliás téé ní xóo cáháⁿ tnúhu Yá

Ndiõxí ndéé sanaha-ǎn? —càchí-güedé xǎhaⁿ-güedě xii-gá.

⁵⁵ Te Jèsús ní nchócótó-gǎ núú-güedě, te níhi ní cáháⁿ-gá dóho-güedé, te xáhaⁿ-gǎ:

—Nchòhó, chi ñá túú vǎha iní-ndó te núu ducaⁿ càháⁿ-ndó. ⁵⁶ Chi yúhú Tée cùu ñaní tnáhá-ndó nchàa-ndo véxi-í sá dácǎcu nihnu-í ñáyiú, te ñá díú vèxi-í sá dácuíta nihnu-í-yu —càchí-gá xáhaⁿ-gǎ xii-güedé.

Te sátá dúcáⁿ ñí xáhaⁿ-gǎ, te ní xica-gá cuáháⁿ-gá ndihí-güedé ingá ñuú.

*Ñáyiú cuìní chitnahá ñáhá xii Jesús ní cùu
(Mt. 8:19-22)*

⁵⁷ Te ñùhu Jesús ichi ndihí-güedé, te iⁿ tée ní xáhaⁿ-dě xii-gá:

—Mèstrú, cuìní-í canchicúⁿ ñáhà-í xii-n nděni ní cuu na quihíⁿ-n —càchí-dé xǎhaⁿ-dě xii-gá.

⁵⁸ Te Jèsús ní xáhaⁿ-gǎ xii-dé:

—Nchaa ñúcuii chi ndècu yaú cúú vèhe-güedi saquihí-güedi, te nchaa quiti ndàva caa tacá-güedi díquí yutnu, dico yúhú Tée cùu ñaní tnáhá-ndó nchàa-ndo chi ñá túú ndèé cáá vèhe-í ñuyíú-a nde-tatú-í —càchí-gá xáhaⁿ-gǎ xii-dé.

⁵⁹ Te dǎtnùní ní xáhaⁿ tùcu-gá xii ingá-dé:

—Yòhó taquixi chitnahá ñáhá-n xii-í —càchí-gá xáhaⁿ-gǎ xii-dé.

Dico tée-áⁿ ñí xáhaⁿ-dě xii-gá:

—Mèstrú, daña na nùhú-í cundetú-í cuú tǎtà-í te chindúxi-í-dé, te dǎtnùní quixi-í chitnahá ñáhá dùcaⁿ-ná-í xii-n —càchí-dé xǎhaⁿ-dě xii-gá.

⁶⁰ Te Jèsús ní xáhaⁿ-gǎ xii-dé:

—Daña ñáyiú ñá túú sàndáá iní ñáhá xii-í ná chindũxi tñaha meé-yu, chi ñáyiú-áⁿ cúũ-yu dàtná ñáyiú ní xihí cuéi ndècu-ní-yu núú ñuyíú-a. Te yòhó taquixi, chi quíhíⁿ-n dànehé-n ñáyiú nàcuáa cada Yá Ndiõxí ndíhu ndaha ñaha-gá xii-yu —càchí-gá xáhaⁿ-gã xii-dé.

⁶¹ Te ní xáhaⁿ tùcu ingá-dé xii-gá:

—Mèstrú, cuení-í chitnahá ñáhà-í xii-n, dico díhna-gá daña na nùhú-í cada ndee iní-í nchaa ñáyiú ndècu vehe-í, te dàtnùní quixi-í —càchí-dé xãhaⁿ-dẽ xii-gá.

⁶² Te Jèsús ní xáhaⁿ-gã:

—Nchaa ñáyiú ní sàndáá iní ñáhá xii-í, te núu vá cáncícúⁿ nihnu ñáhá-yu ni yùhu ni iní-yu, te cùú-yu dàtná ìⁿ téé ní tñi ndaha làtú cutu-dé, chi téé-áⁿ ñúu na ndàcoto-dé ndàa sátá-dẽ òrè xítú-dẽ, te vá quíhíⁿ ndáá làtú-dé ducaⁿ sãtnahá-xi cùú-yu. Te cue ñáyiú chi vá cúú ndãá-yu nàcuáa ndíhu ndaha-gá dava-gá ñáyiú— càchí-gá xáhaⁿ-gã xii-dé.

10

Jèsús téndaha-gá únídico úxí cue téé quíhíⁿ cáháⁿ tnúhu-gá núú ñáyiú

¹ Te sátá dúcáⁿ ñí cuu, te ní cáxi tucu Xítóhó Jesucristú únídico úxí cue téé codonùu-güedé quíhíⁿ-güedé cáháⁿ-güedé tnúhu-gá nchaa ñúú, ndíhi nchaa dava-gá xichi núú quíhíⁿ-gá, te ndí ndúú ndí ndúú-güedé tendaha ñaha-gá xii-güedé quíhíⁿ-güedé. ² Te cùmání-gã caca-güedé, te ní xáhaⁿ-gã xii-güedé:

—Nchòhó xìní-ndó sǎ òré ná sàá yóó cuu nchaa sá xítú ñǎyiu, te ío vǎi cuu. Te na càchí tnúhu ndáá-í xii-ndo sǎ dàtná vǎi sá xítú ñǎyiu cùu, ducaⁿ ío vǎi ñǎyiu cùmání cundedóho tnúhu Yá Ndiǒxí te ío sacú ñǎyiu dàcuaha ñaha xíi-yu tnúhu-gá, núu xǎⁿ xíní ñùhu-xi cǎcáⁿ-ndó nǔú Yǎ Ndiǒxí cuendá sá ná dàcáháⁿ-gá iní ñǎyiu cáháⁿ-yu tnúhu-gá núú ñǎyiu cùmání cundedóho tnúhu-gá. ³ Te nchòhó cúú-ndó dàtná cue mbéé cue quití cuáháⁿ núu yíhí cuè quití dééⁿ. Chi tendaha ñaha-í xii-ndo quǐhíⁿ-ndó nǔú xǐndecu nchaa ñǎyiu cuihna ìní-xi. ⁴ Te vá cánèhe-ndo ñunu cuhuⁿ ndachiuⁿ-ndo, ni nǔú cúhúⁿ dǐhúⁿ-ndó, te ni vǎ cǎdá tǔha-gá-ndó chàu-ndó chi diu-ni chàu yíhí-ndó-ǎⁿ xǎⁿ-ni quǐhi-ndo, te vá ío cuyaa-ndo cáháⁿ ndíhi-ndo ñǎyiu ñùhu ichi. ⁵ Te òré ná quèxio-ndo ìⁿ vehe, te duha cúñaha-ndo xii ñǎyiu dii vèhe-xi-áⁿ: “Yá Ndiǒxí chindee ñàha-gá xii-ndo ío váha cuu iní-ndó cùndecu-ndo”, duha cúñaha-ndo xíi-yu. ⁶ Te núu ñǎyiu-áⁿ ñí nduu táhǔ-yu sá cùndecu váha iní-yu núú Yǎ Ndiǒxí, te cuu-xi sá vǎha sá cúú-xǐ-yu tnúhu cúñaha-ndo-ǎⁿ, dico núu ñá túú ní cáháⁿ váha ndíhi ñàhá-yu xii-ndo, te cúñaha-ndo sǎ vǎ cúú-xí sǎ vǎha sá cúú-xǐ-yu. Dico núu ní cáháⁿ váha ndíhi ñàhá-yu xii-ndo, ⁷ te diu-ni vehe-áⁿ cada vehe tnaa-ndo, te ñá túú-gǎ ndéé nducu-ndo vèhe cundecu-ndo, te caxi-ndo nchàa sá ná tàxí-yu, chi nchaa cue téé quǐde chiuⁿ dacuití táu-güedé sá ñíhí-güedé sá cǎxí-güedé cuendá nchaa chiuⁿ quǐde-güedé. ⁸ Te núu ní sáá-ndó ìⁿ ñuú núu ñí queheⁿ cuendá ñáhǎ-yu xii-ndo, te caxi-ndo nchàa sá ná tàxí-yu. ⁹ Te cada tátna-ndo cuè ñǎyiu

cùhú xĩndecu ñuú-áⁿ, te cúñaha-ndo xii-yu sá sà ní sáá nduu ndíhu ndaha ñàha Yá Ndiõxí xii-yu. ¹⁰ Dico núu ní sáá-ndó ñuú núu ñà túú ní quèheⁿ cuendá ñáhã-yu xii-ndo, te tñi-ndo ìchi cuita cáháⁿ-ndó cuáháⁿ, te cúñaha-ndo xii-yu: ¹¹ “Ndéé tícá chúhmá ñi tñi sáhá-ndĩ ñuú-ndó nàquidi-ndí, te duha quide-ndí cuendá cutnùnì iní-ndó sã ñà túú quide váha-ndo ndècu-ndo. Dico cunaha-ndo sã sà ní sáá nduu ndíhu ndaha ñàha Yá Ndiõxí xii-ndo ni cùu”, duha cúñaha-ndo xii-yu. ¹² Te na càchí tnúhu-í xii-ndo sã ná sáá nduu càda ndáá Yá Ndiõxí cuéchi nchaa ñáyiú, te ñáyiú ñuú-áⁿ ïo-gá ndohó-yu dàvá-áⁿ dàcúúxí ñáyiú ñuú Sòdomá —càchí-gá xáhaⁿ-gã xii-güedé.

Cuendá ñáyiú dava ñuú ñà túú sàndáá iní tnúhu Xítoho Jesucristú (Mt. 11:20-24)

¹³ Te Jèsús xáhaⁿ-gã xii ñáyiú dava ñuú ñà túú sàndáá iní tnúhu-gá:

—¡Ndàhú nchòhó cue ñáyiú ñuú Coràzín! ¡Te ndàhú nchòhó cue ñáyiú ñuú Bètsaidá! Chi núu dícó ñuú Tìrú, ndihí ñuú Sìdón ní quide-í nchaa sá vã yõo tñahí ndàcu cada datná ní quide-í ñuú-ndó-áⁿ ñi xini-ndó ñà, te sá ndéé ama-gá cuihnú-yu dóo ndàhú, te cunucóo-yu núu yàa cuendá sá ndíxí cuéchi iní-yu sá ñà túú quide váha-yu ni cùu. ¹⁴ Dico sáá nduu te ío-gá dandòho ñaha Yá Ndiõxí xii-ndo dàcúúxí ñáyiú ñuú Tìrú, ndihí ñáyiú ñuú Sìdón. ¹⁵ Te nchòhó ñáyiú ñuú Capèrnaúm quide iní-ndó sã sà cuándaa-ndo àndiú, dico ñáhá chi núú ùhú núú ndàhú cundecu-ndo —duha ní xáhaⁿ-gã xii nchaa ñáyiú ñuú-áⁿ.

16 Te xăhaⁿ tùcu-gá xii cue téé tendaha-gă quíhíⁿ cáháⁿ tnúhu-gá-áⁿ:

—Nchaa ñáyiú na cùndedóho nchaa tnúhu cáháⁿ-ndó, te cada iní-yu sá yŷhú càháⁿ-í ndèdóho-yu, te nchaa ñáyiú na dàquee tíhú ñáhá xii-ndo, te tnàhá yúhú daquèe tíhŷ-yu, te nchaa ñáyiú ducaⁿ na dàquee tíhú ñáhá xii-í, te tnàhá Tătà-í Dútú Ndiöxí Yaá ní tendaha ñàha xii-í véxi-í ñuyíú-a dàquee tíhŷ-yu —càchí-gá xáhaⁿ-gă xii-güedé.

Te ducaⁿ te ní xica-güedé cuáháⁿ-güedé.

Ní nasáá cue téé únídico úxí ní tendaha Jèsús ní sáháⁿ ní cáháⁿ tnúhu-gá núú ñáyiú

17 Te cue téé únídico úxí-áⁿ ñí nasáá-güedé te súúní cùdíí iní-güedé, te xăhaⁿ-güedé xii Jèsús:

—Mèstrú, ndéé espíritú cùndìhi yucu ñávăha sàndáá iní ñáhá-xí xii-ndí òré cáciú nèhe ñaha-ndí xii-n —càchí-güedé xáhaⁿ-güedé xii-gă.

18 Te Jèsús ní xáhaⁿ-gă:

—Ndáá càháⁿ-ndó chi yúhú ní xiní-í cútnàhá ní xíta nihnu yucu ñávăha, chi dàtná ní ngava ìⁿ tasaⁿ ñí ngava-xi ñuyíú-a. 19 Te dàtná quíde-ndó òré xènihnu-ndo ìⁿ cóó, àdi ìⁿ nchacua ducaⁿ cada-ndo daquee tíhú-ndó yùcu ñávăha, te ñá túú nă cada ñaha-xi xii-ndo, chi ní taxi-í tnúhu ndee iní ndécú ndìhi-ndo. 20 Dico vá cúdíí iní-ndó cuèndá sá sàndáá iní ñáhá cuè espíritú cùndìhi yucu ñávăha xii-ndo, chi cudíí iní-ndó cuèndá sá sà yodo tnuní-ndó núú tùtú Yă Ndiöxí Yaá ndécú àndiú —cachí-gă xáhaⁿ-gă xii-güedé.

Jèsús cúđí ìní-gá
(Mt. 11:25-27; 13:16-17)

²¹ Te òré-án sũúni nĩ quide đí ìní ñhá Espiritú Yá Ndiõxí xii Jèsús, te ní xáhaⁿ-gã xii Yá Ndiõxí:

—Yòhó Tàtá-í Dútú Ndiõxí, ío chĩñuhu ñaha-í xii-n chi ñiu-n tàxi tnuní-n àndiu ndihĩ ñuyíú-a, te dànehé-n cuè ñáyiú nchaa tnúhu váha, te ñiu-ni ñáyiú-áⁿ cúy-yu ñáyiú ñá túú cùtnuní ìní-xi nchaa tnúhu càháⁿ cue téé túha, te nchaa tnúhu càháⁿ-n-ãⁿ ñá túú ní dàtúu-n nũú ñáyiú càchí sá ío túha, te ío váha sàá díquí-xi. Te ducaⁿ quide-n, chi ducaⁿ cuini-n cunduú —cachí-gá xáhaⁿ-gã xii Yá Ndiõxí.

²² Te xáhaⁿ tùcu-gá xii cue téé ní nasáá-áⁿ:

—Mee Tàtá-í Dútú Ndiõxí ní cachí-gá sá cùnùu-í núú nchaa-ndi túhú sá ío. Te vá yõ ñⁿ xini nàcuáa sàni ìní yúhú Déhe Dútú Ndiõxí, chi ñⁿdii díí-ni mee-gã xini-gá nàcuáa sàni ìní-í. Te ducaⁿ ñⁿdii-ni yúhú xini-í nàcuáa sàni ìní mée-gã, te nchaa ñáyiú càchí ìní-í sá quini-yu nàcuáa sàni ìní Tàtá-í Dútú Ndiõxí te xitnũhu-í-yu, te vá yõ ñⁿ-gã xini nàcuáa sàni ìní-gá chi ñiu-ni ñáyiú ducaⁿ xitnũhu-í-áⁿ xini-yu —càchí-gá xáhaⁿ-gã xii-güedé.

²³ Te ní nchócótó-gã núú xĩndecu mee-ni cuè téé xica cuu ndihĩ-gá, te ní xáhaⁿ-gã xii-güedé:

—Váha táhú nchòhó ndihĩ nchaa ñáyiú ndèhe nchaa nacuáa quide-í vitna. ²⁴ Chi ío cuéhé cue téé ní xóo cáháⁿ tnúhu Yá Ndiõxí ndéé sanaha, ndihĩ cue téé ní xĩndaha ñaha xii ñáyiú ní cuini-güedé cundehe-güedé nchaa sá ndéhé-ndó quide-í vitna, te ñá túú ní xini-güedé, te ní cuini-güedé cund-edóho-güedé nchaa tnúhu càháⁿ-í ndèdóho-ndo

vítna, te ñá túú ní xǐndedóho-güedé –càchí-gá xáhaⁿ-gã xii-güedé.

Nàcuáa ní quide ñⁿ téé distritú Sàmaría

²⁵ Te ñⁿ téé dàcuaha ñaha xii ñáyiú nchaa tnúhu ní chídó tnùní ndíi Moisés ní ndacuíñí-dé xító ndèé-dé Jèsús nùu nása cunduu tnúhu cáháⁿ-gã, te xáhaⁿ-dë xii-gá:

–Mèstrú, ¿ná cúú sǎ cáda-í cuendá nduu táhù-í cundecu-í ndihí Yá Ndiöxí ni caa ni quíhíⁿ-i? –càchí-dé xáhaⁿ-dë xii-gá.

²⁶ Te Jèsús ní xáhaⁿ-gã xii-dé:

–Cuíní-í cachí tnúhu-n nǎsa cáháⁿ-xi núú tütú ndíi Moisés –càchí-gá xáhaⁿ-gã xii-dé.

²⁷ Te xáhaⁿ-dë xii-gá:

–Ndíi Moisés càchí ndíi núú tütú ndíi: “Cuu iní-ndó Dütú Ndiöxí Yaá cúú Ndiöxí-ndó ni yuhu ni iní-ndó, te caní iní-ndó càda-ndo datná cuíní mée-gã, te mee-ni tnúhu váha caní iní-ndó nàcuáa cuu vii cuu váha-ndo nùú-gã, te coo iní-ndó cùu iní-ndó-gã. Te cuu iní-ndó tnàha ñáyiú-ndo dàtná cúú iní-ndó mèe-ndo”, duha càchí ndíi núú tütú ndíi –càchí-dé xáhaⁿ-dë xii-gá.

²⁸ Te Jèsús ní xáhaⁿ-gã:

–Váha-ni cáháⁿ-n, te núu cada-n nàcuáa cáháⁿ-n ãⁿ, te nduu táhù-n cundecu-n ndihí Yá Ndiöxí ni caa ni quíhíⁿ –càchí-gá xáhaⁿ-gã xii-dé.

²⁹ Te sá dúcáⁿ nǐ xáhaⁿ Jèsús xii-dé nùu ndùcu-dé nàcuáa cada-dé cácu nihnu-dé núú tnúhu ní cáháⁿ-dé, te ní xícáⁿ tnúhú-dé núú-gã, te xáhaⁿ-dë:

–¿Yoo cùu tnaha ñáyiú-í-i? –càchí-dé xáhaⁿ-dë xii-gá.

30 Te Jèsús ní cani-gá ìḡ cuèndú núú-dě nàcuáa tecú tnùnì-dé tnúhu-gá, te xáhaⁿ-gǎ:

—Ìḡ téé ní ndee-dé ñuú Jerusàlén ñúhú-dě ichi cuánuu-dé cuáháⁿ-dé ñuú Jericó, te ní quee ñadúhú ichi-dé ní dúhú-güedě dóó níhnú-dě, ndìhi nchaa sá néhé-dě, te ní caniha vìhi-güedé, te nchìto ñu-ná-dé ní dáñá ñàha-güedé te cuáháⁿ-güedé.

31 Te mei òré cātùu-dé-áⁿ ñúhú ìḡ dútú ichi-áⁿ, te òré ní xiní ñáhá dütú-ǎⁿ xii-dé, te ìḡ xio-ni ní xócõo ndee-dé ní yáha-dé. 32 Te ñúhu tucu ìḡ téé cùu levítá ichi-áⁿ, te òré ní xiní-dé téé-áⁿ cātùu-dé, te ñu-ni ducaⁿ ñḡ quide-dé ìḡ xio-ni ní xócõo ndee-dé ní yáha-dé. 33 Dico ìḡ téé distritú Samariá ñúhú tucu-dé ichi-áⁿ te òré ní xiní-dé téé-áⁿ cātùu-dé, te ní cundàhú iní ñáhá-dě. 34 Te ní sáháⁿ-dé núú cātùu téé-áⁿ, te ní quide tátna-dé nchaa núú ñḡ nícuèhé xii téé-áⁿ ñḡ chihi-dé yúcu, te ní dácútú-dě. Te dàtnùnì ní dácáá ñàha-dé sáta quiti-dé, te ndèca ñàha-dé cuáháⁿ ìḡ vehe núú sácõo cue ñáyiu sàcúhuⁿ ichi, te yàcáⁿ ní xito ñaha-dě.

35 Te ingá nduu òré ní nucúhuⁿ téé Samaritànú-áⁿ ichi, te ní tava-dé úú díhúⁿ denàriú, te ní sáha-dé téé cùu xítóhó vehe-áⁿ, te ní xáhaⁿ-dě: “Coto saú-n tée-a, te núu ñá ní tnàhá díhúⁿ sǎ ñḡ taxi-í, te cuèi na dàndoñuhu-gá-n díhúⁿ-n cuèndá-dé, te òré ná quixi tucu-í te nacháhu-í”, duha ní xáhaⁿ tée Samaritànú-áⁿ xii téé dìi vehe xíaⁿ. 36 Te vitḡa cáháⁿ, te núu ndédacàa cue téé únì-áⁿ cúu-güedé téé váha cùu iní-güedé tnàha ñáyiu-güedé —càchí-gá xáhaⁿ-gǎ xii téé dàcuaha ñaha xii-í ñáyiu-áⁿ nchaa tnúhu ní chídó tnùnì ndí Moisés.

37 Te téé-áⁿ ñḡ xáhaⁿ-dě xii-gá:

—Tée ní cundàhú iní ñáhá xii téé ní dánìcuèhé ñáhá cuè ñadúhú-ǎⁿ, téé-áⁿ cúu-dě téé cùu iní tnàha

ñáyi-u-xi —càchí-dé xǎhaⁿ-dě xii-gá.

Te Jèsús ní xáhaⁿ-gǎ:

—Cuáháⁿ te ðiu-ni ducaⁿ càda-n tnahá-n —
càchí-gá xáhaⁿ-gǎ xii-dé.

Jèsús ndécú-gǎ vehe tá Mǎrta ndìhi tá Mǎriá

³⁸ Te Jèsús ñúhú-ni-gǎ ichi cuáháⁿ-gá ndìhi cue
tée xìca cuu ndìhi-gá, te ní sáá-gá ìⁿ ñuú líhli, te xíáⁿ
ní quee ìⁿ xíchí nání Mǎrta ní cáháⁿ ñáhá-xí xii-gá
vehe-xi. ³⁹ Te tá Mǎrta ndècu ìⁿ cúhú-xi nàni-xi
Mariá, te xíchí-ǎⁿ ní ngóo-xi núú Jèsús ndèdóho-xi
nchaa tnúhu càháⁿ-gá. ⁴⁰ Te tá Mǎrta-áⁿ ndìhi
vìhi-ni iní-xi quide-xi chiuⁿ-xi, te ní sáháⁿ-xi núú
Jèsús, te ní xáhaⁿ-xi:

—Mèstrú, ¿náa ñá túú tnahí sàni iní-n sǎ ní
dándóo ndaha ñàha cúhù-í nchaa chùⁿ-áⁿ? Cúñaha
sàú ná quìxi-xi chindee ñaha-xi —cachí-xi xáhaⁿ-xi
xii-gá.

⁴¹ Dico Jèsús ní xáhaⁿ-gǎ:

—Yòhó Mǎrta, ñùhu tneñu vihi-n, te ndìhú iní-n
sǎ ìo vài chiuⁿ-n ñuhu, ⁴² dico xìni ñuhu vihi-gá-xi
cundedóho-n tnúhu càháⁿ-í, chi tá Mǎriá-a sa
ndèdóho-xi tnúhu-í, te vá yóo ìⁿ ndacu xocàni
tnúhu-í sǎ ní ngúndecu ndìhi-xi —càchí-gá xáhaⁿ-gǎ
xii-xi.

11

*Jèsús dánèhé-gá cue tée xìca cuu ndìhi-gá nàcuáa
cáháⁿ ndìhi-güedé Yǎ Ndiǒxí*

(Mt. 6:9-15, 7:7-11)

¹ Te ìⁿ nduu càháⁿ ndìhi Jèsús Yǎ Ndiǒxí ìⁿ xichi,
te sátá ní yáha ní cáháⁿ ndìhi-gá Yǎ Ndiǒxí, te ní
xáhaⁿ ìⁿ tée xìca cuu ndìhi-gá xii-gá:

—Mèstrú, danèhé ñáhá xii-ndí nása cáháⁿ ndihi-ndí Yă Ndiöxí dàtná ní quide ndíi Juáá ní dánèhé ndíi cue téé ní xica cuu ndihi ndíi —càchí-dé xáhaⁿ-dè xii-gá.

² Te Jèsús ní xáhaⁿ-gă:

—Òré cáháⁿ ndihi-ndo Yă Ndiöxí, te cachí-ndó: Yòhó tātá-ndí Dútú Ndiöxí Yaá ndécú àndi, nchaa ñáyiú na càháⁿ-yu sá cúú-n Yàá ío yiñùhu. Te xicáⁿ táhú-ndí núú-n sã ná sàá nduu ndíhu ndàhá-n-yu.

Te cada-n dàtná càchí iní-n ñùyíú-a dàtná quidé-n àndi.

³ Te xicáⁿ táhú-ndí núú-n sã táxí-n sã cándèca iní-ndí ñⁿ nduu ñⁿ nduu.

⁴ Te cada càhnu iní-n nchaa yícá cuèchi-ndí, chi tnàhá nchúhú quidé càhnu iní-ndí nchaa sá quidé ñaha tnaha ñáyiú-ndí.

Te vá dáñá-n dàcaháⁿ ñáhá yùcu ñávãha xii-ndí cada-ndí sá ñà túú vãha, chi coto ñaha-n xii-ndí cuèndá sá vã dúcáⁿ càda ñaha-xi,

duha cáháⁿ-ndó

—càchí-gá xáhaⁿ-gă xii-güedé.

⁵ Te Jèsús ní xáhaⁿ tùcu-gá:

—Te núú ndèdacàa nchohó ndécú ñⁿ téé tnàha tnúhu ndihi-ndo, te dava niú cuáháⁿ-ndó vehe-dé, te òré ní quexìo-ndo, te xáhaⁿ-ndo xii-dé: “Véxi-í nñu vá cündèe iní-n tàxi nuu-n úní tnàhá pàá,

⁶ chi ñⁿ téé xìní tnàhá ndíhi-í ñúhú-dè ichi ní quexìo-dé vehe-í, te ñá túú tnàhí ná cuñaha-í caxi-dé”, quesaha-ndo cñaha-ndo. ⁷ Te téé-án

cáháⁿ-dé ndéé xìtí vehe-dé, te cúñaha-dè xii-ndo: “Vá dásàtú nihá-n chi ndèdí yuyèhe-í, te càa-í

ndihi cue landú-í, te vá cúú ndácóo-í taxi-í sá cuíní-n”, quesaha-dě cúñaha-dě xii-ndo. ⁸ Te na cächí tnúhu-í xii-ndo sã cuëi cùu-dé téé tnàha tnúhu ndihi-ndo, dico ducaⁿ cùñaha-dě xii-ndo, dico dacuítí sã ndácõo-dé taxi-dé sá cuíní-ndó cuendá sá vã dásátú-gá-ndó iní-dé. ⁹ Te yúhú cächí-í xii-ndo sã cãcáⁿ-ndó nõu ná cuíní-ndó nõú Yã Ndiõxí te taxi-gá. Te vá dãná ndèe-ndó cãcáⁿ-ndó nõú-gã nõu ná cuíní-ndó, te ducaⁿ te níhí-ndó. Te cada iní-ndó sã ñi quexìo-ndo vehe ìⁿ tnaha ñáyiu-ndo te ní cáháⁿ-ndó, te ñáyiu-áⁿ ñi tedóho ñàhá-yu xii-ndo te ní nacaáⁿ-yu yuyèhe. Te ducaⁿ càda iní-ndó chi Yá Ndiõxí tedóho ñaha-gã xii-ndo, te taxi-gá sá ná càcáⁿ-ndó nõú-gã. ¹⁰ Chi nchaa ñáyiu ducaⁿ xiquide te Yá Ndiõxí tédõho ñaha-gã xií-yu ñihí-yu sá cuíní-yu. Te ñiu-ni ducaⁿ tùcu nchaa ñáyiu na càcáⁿ núú-gã ìⁿ sá cuíní-yu, chi sãñaha-gã sá xìcáⁿ-yu núú-gã. Te ñiu-ni ducaⁿ tùcu níhí nchaa ñáyiu ñá túú ñãña ndeé xìcáⁿ núú Yã Ndiõxí sá cuíní-yu, chi ñihí-yu.

¹¹ Te nchòhó cue téé cùu tátá ñá túú cùndee iní-ndó cuãha-ndo cuè déhe-ndo ìⁿ yúú caxi-güexi òré xìcáⁿ-güexi ìⁿ pãá núú-ndó càxi-güexi, te ni ñã túú cùndee iní-ndó cuãñaha-ndo ìⁿ cóo caxi-güexi òré xìcáⁿ-güexi ìⁿ chácá nõú-ndó càxi-güexi. ¹² Te ni ñã túú cùndee iní-ndó cuãñaha-ndo ìⁿ nchacua caxi-güexi òré xìcáⁿ-güexi ìⁿ ndíú nõú-ndó càxi-güexi. ¹³ Te nchòhó cuëi ndèé dau sãá iní-ndó, dico sãha-ndo cuè déhe-ndo sã vãha xèxi-güexi òré xìcáⁿ-güexi núú-ndó. Te núu nchòhó ducaⁿ quide-ndo, ÿte uuⁿ-gá ducaⁿ quide Tátá-ndó Dütú Ndiõxí Yaá ndécú àndiu, chi taxi-gá Espíritú-gá cundecu ndihi-ndo te núu na càcáⁿ-ndó nõú-gã!

—càchí-gá xáhaⁿ-gǎ xii-güedé.

*Càchí-güedé sá ndécú ndìhi Jesús yucu ñávǎha
(Mt. 12:22-30; Mr. 3:20-27)*

¹⁴ Te Jèsús ndèñùhu-gá espíritú cúndìhi yucu ñávǎha yìhi ñaha xii ìⁿ téé ní quide ñìhí-xi, te òré ní ndee ñaha espíritú-áⁿ xii téé-áⁿ, te ní nacáháⁿ-dé. Te ío ní cuñùhu ñáyíu sá dúcáⁿ nǐ quide-gá. ¹⁵ Te davá-yu ní xítnàhá-yu:

—Tée-a ndèñùhu-dé nchaa espíritú cúndìhi sácuíhná yíhí ñàha xii ñáyíu, chi ñu-ni sácuíhná-áⁿ chíndèe ñaha-xi xii-dé, te ñu-ni-xi tàxi tnuní-xi nchaa espíritú-áⁿ —càchí-yu xítnàhá-yu.

¹⁶ Te davá-yu xìto ndeé ñáhǎ-yu xii-gá, te xǎhǎⁿ-yu sá ná cádá-gǎ ìⁿ sá vǎ yòo tnàhí ndàcu cada ñuyíú-a cundèhé-yu nàcuáa cutnùní iní-yu núu ndáá sá Yǎ Ndiǒxí ní tendaha ñàha-gá xii-gá véxi-gá ñuyíú-a. ¹⁷ Dico mee-gǎ sa ní cutnùní iní-gá nchaa nàcuáa sàni iní-yu, núu ní xáhaⁿ-gǎ xií-yu:

—Te nchòhó xìní-ndó sǎ ñuu ìⁿ téé yìndaha ìⁿ nacióⁿ vá cúú ìⁿnuu-dé ndìhi cue téé cùndìhi-dé, te vá cúdí-dé cunu-dě. Te ñu-ni ñucaⁿ sǎtnahá tucu-xi cùu cue ñáyíu xíndecu ìⁿ-ni vèhe, chi núu vá cúú ìⁿnuú-yu cundecú-yu, te vá cúdí-yu cundecu càhnú-yu. ¹⁸ Te ñucaⁿ sǎtnahá-xi cùu sácuíhná, chi núu vá cúú ìⁿnuu-xi ndìhi nchaa espíritú cúndìhi-xi te vá cúdí-xi cundecu-xi taxi tnùní-xi. Te ñuha càháⁿ-í chi nchòhó càchí-ndó sǎ sácuíhná chíndèe ñaha-xi xii-í quèñùhu-í nchaa espíritú cúndìhi-xi yìhi ñaha xii ñáyíu. ¹⁹ Te núu yúhú quidé cuendá-ndó sǎ sácuíhná chíndèe ñaha-xi xii-í, te xìni ñuhu-xi cada cuendá-ndó yòo chindee

ñaha xii cue téé xica cuu ndihi-ndo queñuhu-güedé nchaa espíritú cündìhi-xi yìhi ñaha xii ñáyiu. Te mee-güedé càhí-güedé sá nchòhó ñá túú càháⁿ ndáá-ndó sã dúcáⁿ càháⁿ-ndó. ²⁰ Te ndáá sá Yá Ndiõxí chindèe ñaha-gá xii-í queñuhu-í nchaa espíritú cündìhi sácuihná yìhí ñaha xii ñáyiu, te xiãⁿ cutnùní iní-ndó sã sà ní sáá nduu ndihu ndaha ñaha Yá Ndiõxí xii-ndo.

²¹ Te núu ìⁿ téé ío ndee, te súúní ñíí cáá-dě, te ndèé-dé vehe-dé cuendá sá vã cuíta, te ní quide túha-dé titní sá děéⁿ, te ío váha nèhe váha-dé nchaa ndachiuⁿ-dé. ²² Dico núu quexio ingá téé ío-gá ñíí cáá te ndee-gã-dé, te ngüíta-dé nàá-dé ndihi téé ndèé vehe-xi-áⁿ, te cada cànári ñáhá tẽ-áⁿ xii téé ndèé vehe-xi-áⁿ, te quendeé-dé nchaa sá děéⁿ cündèe iní-dé, te taxi tnùní-na-dé nchaa xiãⁿ, ndihi nchaa sá ndécú ndìhi-dé, te dàcáhnũ-dé nchaa cue téé cündìhi-dé nchaa sá ná ñhí-dé.

²³ Te nchaa ñáyiu ñá túú cündìhi ñaha xii-í, te cùu úhú iní ñáhã-yu, te nchaa ñáyiu ñá túú chindèe ñaha xii-í, te dàquee tíhũ-yu chiuⁿ quide-í.

*Espíritú cündìhi yucu ñávãha sá nánchòcáva xito cùu uú
(Mt. 12:43-45)*

²⁴ Te òré ná quèe ñaha ìⁿ espíritú cündìhi yucu ñávãha xii ìⁿ ñáyiu, te cuáháⁿ-xi ndùcu-xi ìⁿ xi-chi núú cündècu-xi te ñá ñhí-xi, te ní sani iní-xi: “Váha-gá núhú tucu-í núú ñí xíndecu-í”, duha ní sani iní-xi. ²⁵ Te cuánuhú-xi, te òré ní nasáá-xi, te ní xiní-xi sá cáá iní ñáyiu-áⁿ dàtná cáá-nã ìⁿ vehe ní natíhú, chi ní nduu vii-ná, vá yõo-gá ndécú. ²⁶ Te sátá dúcáⁿ te ní xica-xi cuáháⁿ-xi

cuándúcú-xí ũsá tnàhá espíritú cúndìhi-xi sá nèhé víhí-gǎ xǐquide, te òré ní níhí-xi cue espíritú-án te ndèca ñaha-xi cuáhán cuèndá ngúndecu ndìhi-xi ñáyiú-án, te ñáyiú-án uuⁿ-gá nándi yáha-yu dàcúúxí ndèé díhna —càchí-gá xáhaⁿ-gǎ xií-yu.

Cuèndá ñáyiú cùu váha ndisa iní-xi

²⁷ Te nini càhán Jèsús tnúhu-án nùú ñáyiú ní cáhán níhi ìⁿ ñadìhí tnuú-yu, te xǎhaⁿ-aⁿ xii Jesús:

—¡Sá váha táhú ñadìhí ní dácácú ñaha xii-n, te ní dácúéhnú ñaha-aⁿ! —cachí-aⁿ xǎhaⁿ-aⁿ xii-gá.

²⁸ Te Jèsús ní xáhaⁿ-gǎ:

—¡Váha-gá táhú nchàa ñáyiú sàcúndedóho nchaa tnúhu càhán Yǎ Ndiǒxí te sàndáá iní-yu! —càchí-gá xáhaⁿ-gǎ xii-aⁿ.

Ñáyiú ñá túú sàndáá iní ñáhá xii Jesús cuiní-yu cada-gá ìⁿ sá vǎ yǒo tnàhí ndàcu cada

(Mt. 12:38-42; Mr. 8:12)

²⁹ Te ta tàcá vai ñáyiú te dàdehnde tnaha-ná-yu, te ní ngúíta Jèsús xáhaⁿ-gǎ xií-yu:

—Nchòhó ñáyiú ndècu ñuyíú vitna, chi ío sàá iní-ndó, te cuiní-ndó càda-í ìⁿ sá vǎ yǒo tnàhí ndàcu cada cuèndá cuiní-ndó cùtnuní iní-ndó nùu ndisa sá Yǎ Ndiǒxí ní tendaha ñaha-gá xii-í véxi-í. Dico ñá túú nǎgá cada-í quiní-ndó, chi sa nìhí-ndó tnúhu nàcuáa ní yáha ndíi Jònás téé ní xóo cáhán tnúhu Yǎ Ndiǒxí ndéé sanaha, te ñu-ni ducaⁿ yáha yúhú tucu. ³⁰ Chi nchaa ñáyiú ñuú Nñivé ní cutnùní iní-yu sá Yǎ Ndiǒxí ní tendaha ñaha-gá xii ndíi Jònás ní sáhán ndíi ñuú-yu. Te ducaⁿ sàtnahá-xi cùu yúhú Téé cùu ñaní tnáhá-ndó nchàa-ndo, chi sàá nduu te cutnùní iní-ndó sǎ Yǎ Ndiǒxí ní tendaha ñaha-gá xii-í véxi-í ñuyíú-a. ³¹ Te na sàá nduu

càda ndáá Yá Ndiõxí cuéchi nchaa nchòhó ñáyiu ndècu ñuyíú-a, te dàvá-áⁿ quini-ndó ñⁿ ñadihí ñaha ní xíndaha ñⁿ nacióⁿ cáá ndàa xio cuha núú quéné nchĩcanchii. Te ñaha-áⁿ ño xica ñí xíndecu-aⁿ, te ní sáháⁿ-aⁿ ní xíndedóho-aⁿ nchaa tnúhu ní cáháⁿ ndíi Salòmón, chi ndíi-áⁿ ño ní sáá sá xini tnúni ndíi. Te ñaha-áⁿ cáháⁿ-aⁿ dàvá-áⁿ sã nchòhó ñáyiu ndècu vitna ñá túú ní quide ndáá-ndó. Dico vitna iha ndècu ndihí ñaha-ndo xii yúhú, te ñiu-í ío-gá cúnúu-í dàcúxí ndíi Salòmón. ³² Te ñiu-ni nduu càda ndáá Yá Ndiõxí cuéchi nchaa nchòhó ñáyiu ndècu ñuyíú-a vitna, dàvá-áⁿ tnàhá cue ñáyiu ní xíndecu ñúú Nĩnivé cundecú-yu núú Yá Ndiõxí, te tnàhá-yu cachí-yu sá ñà túú ní quide ndáá-ndó. Chi ñáyiu ñúú Nĩnivé-áⁿ ñí ndixi túu iní-yu sá ñà túú quide váha-yu ndécú-yu te ní natuhá-yu ichi Yá Ndiõxí cútñahá ní cáháⁿ ndihí ñaha ndíi Jónás tnúhu-gá xií-yu. Dico vitna iha ndècu ndihí ñaha-ndo xii yúhú téé càháⁿ tucu tnúhu Yá Ndiõxí, te ñiu-í ío-gá cúnúu-í dàcúxí ndíi Jónás.

Núú-ó cùu-xi datná ñⁿ ñuhú
(Mt. 5:15; 6:22-23)

³³ Te ñá túú ñí ñⁿ ñáyiu tèñuhú ñⁿ lintérná, te taxi ndecú-yu ñⁿ núú yídähu, àdi chiváha-yu xití ñⁿ tídihí, chi tàxi ndecú-yu ñⁿ núú ññu cuendá nchaa ñáyiu quíhu vehe cutnùni núú-yu. ³⁴ Te núú-ndó cùu-xi datná ñⁿ ñuhú, chi ñⁿ sá ná quini-ndó te ndixi túu iní-ndó ñá cúú xĩáⁿ, te núu càváha núú-ndó, te ducaⁿ cùtnuní iní-ndó ñá cúú sã ndécú núú-ndó, áⁿ te núu cùhú, te vá cùtnuní iní-ndó ñá cúú sã ndécú núú-ndó. Te sá dúcáⁿ cùhú núú-ndó te cada iní-ndó sã ndécú-ndó dàtná ñⁿ núú néé. ³⁵ Te ío cada cuendá-ndó vã cání cuèhé

iní-ndó cuendá tnúhu Yá Ndiöxí cuendá cutnùní
 iní-ndó nàcuáa cundecu-ndo, chi núu na càni
 cuehé iní-ndó cuendá tnúhu-gá, te cùu-ndo datná
 ìⁿ ñáyiú ñá túú cùtnuní núú-xí. ³⁶ Te núu càndoo
 canine iní-ndó, te mee-ni sã vãha ñùhu iní-ndó,
 te cùtnuní váha iní-ndó tnùhu ndáá dàtná cùtnùní
 váha núú-ndó òré càyú ñuhú, ducaⁿ cùtnuní iní-ndó
 —càchí-gá xáhaⁿ-gã xii-yu.

*Jèsús càháⁿ-gá cuendá cue téé cùu fariséú ndihí
 cue téé dàcuaha ñaha xii-í ñáyiú*

(Mt. 23:1-36; Mr. 12:38-40; Lc. 20:45-47)

³⁷ Te òré ní ndihí tnúhu ní cáháⁿ Jèsús, te ìⁿ téé cùu
 fariséú ní cáháⁿ ñáhá-dě xii-gá vehe-dé caxi-gá, te
 cuánguihu-gá vehe-dé, te ní ngóo-gá mèsá. ³⁸ Te
 téé cùu fariséú-áⁿ ïo ní cuñúhu-dé, chi Jèsús ñá
 túú ní ndàha-gá nàcuáa sàni iní-güedé nduu vétú
 iní Yá Ndiöxí òré ní ngóo-gá caxi-gá dàtná quidé
 mèe-güedé. ³⁹ Te Jèsús ní xáhaⁿ-gã xii-dé:

—Nchòhó cue téé cùu fariséú xìní-ndó sã ìo
 ñáyiú nàquete sátá-ni tàsáⁿ ndihí sátá-ni còhó, te
 xití-xi càndehe caduha-ni. Te ducaⁿ sãtnahá-xi cùu
 nchohó, chi ndaha-ni-ndo nàquete-ndo, te iní-ndó
 ñà túú nduu ndoo, te nándi dándahú-ndó tnàha
 ñáyiú-ndo, te quèheⁿ-ndo sá ndécú ndihí-yu, te
 nándi-gá nchaa sá cuehé sá dúhá ñùhu iní-ndó
 quide-ndo. ⁴⁰ ;Te nchòhó cúú-ndó cuè téé ìo ñí
 iní-xi! ;Te náa ñá túú cùtnuní iní-ndó sã Yá
 Ndiöxí Yaá ní cadúha yiqui cùñú-ó diu-ni-gá ní
 chihi-gá iní-ó-ãⁿ? ⁴¹ Te nchaa sá vãha ndècu
 ndihí-ndo cuáha-ndo nchàa ñáyiú xìni ñuhu na
 cundecu ndihí-yu, te núu ducaⁿ na càda-ndo, te
 cuu-ndo ñáyiú sa ní nduu ndoo ní nduu nine iní-xi.

42 'iTe ndàhú ní cuu nchaa nchòhó cue téé cùu fariséú! Chi sãha-ndo Yã Ndiõxí núú ùxí xichi yúcu nání mèntá, ndihí yúcu rùdá, ndihí nchaa dava-gá núú yúcu quëe comidá, dico ñá túú quide ndáá-ndó, te ni ñà túú ñùhu iní-ndó Yã Ndiõxí. Dico tnúhu càháⁿ-í-a tàú-ndó càda-ndo, te ni vã dáñá ndèè-ndó càda-ndo nchaa dava-gá sá vãha.

43 'iTe ndàhú ní cuu nchòhó cue téé cùu fariséú! Chi cuìní-ndó cùnucóo-ndo núú sácõo cue téé ío cùnuu xití veñúhu, te cuìní-ndó mèe-ni ndihí tnúhu yíñùhu càháⁿ ndihí ñaha ñãyiu xii-ndo nchaa núú xicá cùu-ndo.

44 'iTe ndàhú ní cuu nchòhó cue téé dàcuaha ñaha xii ñãyiu nchaa tnúhu ní chídó tnùní ndíi Moisés, ndihí nchòhó cue téé cùu fariséú chi ío dàndahú-ndó mèe-ndo sá quidé ndáá-ndó te ñá ndáá sá quidé ndáá-ndó! Chi cùu-ndo datná ìⁿ ñãyiu ní xihí te ní nguíndũxi, te ñá túú cùtnuní-gá ndèè yíndũxi-yu, te cuëi nà yáha ñãyiu dico ñá túú cùtnuní sá yíndũxi ndíyi. Te ducaⁿ sãtnahá-xi cùu nchohó, chi nchaa ñãyiu ndèhe ñaha xii-ndo ñá túú cùtnuní iní-yu nchaa sá cuèhé sá dúhá sàni iní-ndó —càchí-gá xáhaⁿ-gã xii-güedé.

45 Te ní xáhaⁿ ìⁿ téé dàcuaha ñaha xií-yu nchaa tnúhu ní chídó tnùní ndíi Moisés xii-gá:

—Mèstrú, te sá dúcáⁿ càháⁿ-n te tnàhá nchúhú xicuèhé-n ãⁿ —càchí-dé xáhaⁿ-dë xii-gá.

46 Te Jèsús ní xáhaⁿ-gã:

—iNdàhú ní cuu tnàhá nchaa nchòhó cue téé dàcuaha ñaha xii ñãyiu nchaa tnúhu ní chídó tnùní ndíi Moisés! Chi quide-ndo datná quidé ñãyiu dàcuido ìⁿ tnaha ñãyiu-xi ìⁿ sá ïo véé, te mèé-yu ni lùha ñá túú cuìní-yu cuidó-yu. Te ducaⁿ

sătnahá-xi quide nchohó chi dānehé-ndó ñăyiu nācuáa cadá-yu, dico mee-ndo chi ni lùha ñá túú cuìní-ndó càda-ndo nacuáa dānehé-ndǒ-yu.

⁴⁷ 'iTe ndàhú ní cuu tucu-ndo! Chi càdúha-ndo nǔú ñǐ nguíndǔxi cue téé ní xóo cáháⁿ tnúhu Yá Ndiǒxí ndéé sanaha cuèndá sá cúnàha-ndo núú yíndǔxi cue ndíi, te dǐu-ni cue ñaní tnáhá-ndó ñǐ sahani-güedé cue ndíi. ⁴⁸ Te nchòhó sa nàha-ndo nacuáa ní quide cue ñaní tnáhá-ndó, te càchí-ndó sǎ ñǐ quide váha-güedé sá dúcáⁿ ñǐ sahani-güedé cue ndíi-áⁿ, te vitna càdúha-ndo nǔú ñǐ nguíndǔxi cue ndíi.

⁴⁹ 'Te Yá Ndiǒxí ío sàá nchaa sá xìní tnùnǐ-gá, te ní cachí-gá sá dácàháⁿ-gá iní cue téé cuèndá cáháⁿ-güedé tnúhu-gá núú ñăyiu, te cada-güedé nchaa nācuáa cuìní-gá, te dava-güedé cahni ñàhá-yu xii-güedé, te dava-güedé ío dandòho ñàhá-yu xii-güedé duha ní cachí-gá. ⁵⁰ Te nchaa ñăyiu ñuyíú vitna tnáhá-yu nacháhu-yu núú Yá Ndiǒxí cuèndá sá ñǐ sahani-güedé cue téé ní cáháⁿ tnúhu-gá ndéé cútnàhá ní ngáva ñuyíú. ⁵¹ Te ndéé ndíi Àbél téé ní sahani-güedé ndéé díhna nuu, ndíhi ndéé ndíi Zacàriá téé ní sahani-güedé ndéé núú ñǐ ndíhi-ná ndácáⁿ cuèndá ñàhá Yá Ndiǒxí núú ñăyiu ndècu ñuyíú vitna, te dǐu ndíi-áⁿ ñǐ sahani-güedé mei tnúú veñúhu càhnu sá ío cùnuu, ndíhi xító núú sácǒdó sǎ ndúú tǎhú Yá Ndiǒxí.

⁵² 'iTe ndàhú ní cuu tucu nchaa nchòhó cue téé dàcuaha ñaha xii ñăyiu nchaa tnúhu ní chídó tnùnǐ ndíi Moisés! Chi quide-ndo datná quidé ìⁿ téé tàxi tnuní ìⁿ vehe, chi nacadí-dé te ñá dáñá-dě quíhu ñăyiu te ni mèe-dé ñá túú quíhu-dé. Te ducaⁿ

sătnahá-xi quide-ndo, chi dăcuaha-ndo tnúhu Yá Ndiöxí te ñá túú cuíní-ndó quindáá iní-ndó te ni ñá túú dănehé-ndó ñăyiu cuíní tñi tnúhu-gá năcuáa tàú-xi cunduu cuendá naníhí tàhú-yu –càhí-gá xáhaⁿ-gă xii-dé.

⁵³ Te òré ní ndee Jèsús vehe tée cùu fariséú-án, te cue tée dăcuaha ñaha xii ñăyiu nchaa tnúhu ní chídó tñuní ndii Moisés, ndihi cue tée cùu fariséú ní cudééⁿ-güedě núú-gă, te ní ngüíta-güedé nándi sá xicáⁿ tnúhú-güedě núú-gă cuendá cuíní-güedé nŭu vá cuíta-gá iⁿ tnúhu càháⁿ-gá ⁵⁴ cuendá ducaⁿ ñihí-güedé năcuáa cada-güedé cacáⁿ cuéchi-güedé cuendá-gá.

12

Jèsús càháⁿ-gá cuendá cue tée dândahú méé-xí

¹ Te òré-án ñí tacá titní mĭl ñăyiu núú ndécú Jèsús, te súuní dícó ngõnchihi tnàha-ná-yu. Te ndèdóho-yu ní xáhaⁿ Jèsús xii cue tée xica cuu ndihi-gá:

–Cada cuendá-ndó vă cānchícúⁿ nihnu-ndo năcuáa quide cue tée cùu fariséú, chi cue tée-án ò dândahú-güedé méé-güedě sá quidé ndăá-güedé dico ñá ndăá sá quidé ndăá-güedé. ² Te nchaa tnúhu sá cúu yùhu ni cuu vá cúu yùhu-gá, chi nchaa dacuítíi sã quée tŭu-xi núú ñăyiu. ³ Chi nchaa tnúhu càháⁿ dayuhu-ndo quèe túu-xi núú chítú nŭú tàcá, te nchaa tnúhu càháⁿ méé-ndó vèhe-ndo dacuítíi sã ñihí ñăyiu tnúhu.

*Yá Ndiöxí xíní ñùhu-xi yuhú-ó-gă
(Mt. 10:26-31)*

⁴ 'Te nchòhó cue tée ío váha tnàhá tnúhu ndìhí-í ná càchí tnúhu-í xii-ndo sã vã yùhú-ndó cuè ñáyiú cuèi na càhni ñahá-yu xii-ndo, chi ðiu-ni yiqui cùñú-ndó ndàcú-yu cahní-yu, te ñã túú nãgá ndacú-yu cada ñahá-yu xii-ndo. ⁵ Te na càchí tnúhu-í xii-ndo sã Yã Ndiõxí tàú-ndó yùhú-ndó-gã, chi mee-gã ío cùnuu-gá, te ðiu-gá quidé-gã sá vã cùndècu-gá ñáyiú ñuyíú, te daquihíⁿ ñahá-gã xií-yu núú ùhú núú ndàhú, núú xíãⁿ càchí tnúhu-í xii-ndo sã Yãá-áⁿ tàú-ndó yùhú-ndó-gã.

⁶ 'Te nchòhó xìní-ndó sã ndéé úhúⁿ tnàhá tìlaá cùyãhu-ði núú ùú díhúⁿ, dico Yã Ndiõxí ñã túú cùnaa-gá ni ìⁿ-güedi, chi nèhe cuendá ñahá-gã xii-güedi. ⁷ Te nchòhó ndéé ìⁿ ìⁿ idi díquí-ndó yìndehu, núú xíãⁿ càchí-í sá vã yùhú-ndó, chi cùnuu-gá-ndó dàcúxí tìlaá cuèi vãi vihi-güedi.

Ñáyiú na dàtúu núú dàva-gá ñáyiú sá ndécú ndìhí-yu Xítohó Jesucristú

(Mt. 10:32-33; 12:32; 10:19-20)

⁸ 'Te na càchí tnúhu-í xii-ndo sã nõu na dàtúu-ndo nõú dàva-gá ñáyiú sá ndécú ndìhí ñaha-í xii-ndo. Te ducaⁿ te tnàhá yúhú Tée cùu ñaní tnáhá-ndó nchàa-ndo datúu-í núú nchàa cue espíritú xínú cuèchi núú Yã Ndiõxí sá nchòhó ndécú ndìhí ñaha-ndo xii-í. ⁹ Dico núú na cùñaha-ndo xii ñáyiú sá ñã túú ndècu ndìhí ñaha-ndo xii-í, te ðiu-ni ducaⁿ càda yúhú Tée cùu ñaní tnáhá-ndó nchàa-ndo, chi cùñaha-í xii cue espíritú xínú cuèchi núú Yã Ndiõxí sá ñã túú ndècu ndìhí ñaha-í xii-ndo.

¹⁰ 'Te ndédani càa ñáyiú na càháⁿ cuèhé cuendá yúhú Tée cùu ñaní tnáhá-ndó nchàa-ndo, te cada

càhnu iní ñáhá Yă Ndiǒxí xií-yu. Dico ñáyiú na cǎháⁿ cuèhé cuèndá Espíritú Yă Ndiǒxí, te ñáyiú-áⁿ vǎ cǎdá cǎhnu iní ñáhá-gǎ xií-yu.

11 Te òré ná cǎndeca ñaha-güedé xii-ndo quǐhíⁿ veñúhu, àdi núú cuè téé cùchiuⁿ, te ni vǎ cǎní iní-ndó nǔu nása cunduu tnúhu cúñaha-ndo xii-güedé, te ni vǎ cǎní iní-ndó nǔu ná tnúhu nadànchocáva-ndo nǔu ná tnúhu na cǔñaha-güedé xii-ndo, 12 chi òré-nǎ te mee Espíritú Yă Ndiǒxí dacàhu iní ñáhá-xí xii-ndo tnúhu cúñaha-ndo xii-güedé —cǎchí-gǎ xáhaⁿ-gǎ xii-güedé.

Cuèndá ñⁿ téé cuica

13 Te ñⁿ téé ñúhu tnahá tnuú ñáyiú-áⁿ ñǎ xáhaⁿ-dě xii Jèsús:

—Mèstrú, cúñaha xii ñaní-í sá ná chídava-dé sá ñǎ dándǒ tǎtá-ndǎ cuu cuèndá-ndǎ —cǎchí-dé xǎhaⁿ-dě xii-gǎ.

14 Te Jèsús ní xáhaⁿ-gǎ xii-dé:

—¿Te ná cuèndá ducaⁿ cǎháⁿ-n? Te ñá díú chiúⁿ-áⁿ vǎxi-í cada-í, chi ñá díú tǎe cùchiuⁿ cuu-í —cǎchí-gǎ xáhaⁿ-gǎ xii-dé.

15 Te xáhaⁿ-gǎ xii nchaa ñáyiú xǐndecu-áⁿ:

—Nchaa nchòhó ñáyiú ndèdóho nchaa tnúhu cǎháⁿ-í ío váha cada cuèndá-ndó, te vá cǎní iní-ndó nǎndǎ nducu-ndo cùndecu ndíhi-ndo, chi cuèi vǎi vihi na nihí-ndó cùndecu ndíhi-ndo, dico vá chíndèe ñaha-xi cudíi-ndo cùndecu-ndo ñuyíú-a —cǎchí-gǎ xáhaⁿ-gǎ xií-yu.

16 Te dǎtnùní ní ngüíta-gǎ cǎní-gǎ ñⁿ cuèndú núú-yu cuèndá tecú tnùní-yu tnúhu-gǎ, te xáhaⁿ-gǎ:

—Ñⁿ téé cuica sǔúní ñǎ cuu nchaa tǎtá ní xitu-dé núú ñúhú-dé. 17 Te ní ngüíta-dé sání iní-dé: “¿Te nása cada-í? Te ñá túú ndèe nataxúha-í nchaa sá

nĩ xitu-í”, duha ní sani iní-dé. ¹⁸ Te dātnùní ní sáha váha tucu-dé cuèndá nàcuáa cada-dé, te ní cachí-dé: “Duha na cùnduu, dangòyo-í yacá-í, te ndada càhnu-gá-í, te xití-xi nataxúha-í nchaandi túhú sá nĩ xitu-í, ndìhi nchaa dava-gá sá ndécú ndìhi-í. ¹⁹ Te sáta dúcáⁿ, te cachí-í: Ío vài sá ndécú ndìhi-í, te cudí-xi cuéhé cuíá, te vitna ndetatú-í, te coho-í te caxi-í cada-í, te nándi-gá cada-í cuèndá cudíí ìní-í cundecu-í, duha quesaha-í”, càchí-dé. ²⁰ Dico Yá Ndiõxí ní xáhaⁿ-gã xii-dé: “Yòhó, ñá túú nàndìhi sá sání ìní-n, chi yúhú càchí-í sá niú vitna cuú-n, te nchaa sá ndécú ndìhi-n ¿yoo cuu sá vāha xii-aⁿ-i?”, càchí-gá xáhaⁿ-gã xii-dé. ²¹ Duha yáha nchaa ñáyiu nándi sàni iní-xi cundecu ndìhí-xi ñuyíú-a, dico ñáyiu-áⁿ ïo ndàhú-yu chi ñá túú nã nduu táhũ-yu núú Yá Ndiõxí cundecu ndìhí-yu — càchí Jèsús xáhaⁿ-gã xií-yu.

Yá Ndiõxí xító-gã nchaa ñáyiu sàndáa iní ñáhá xii-gá

(Mt. 6:25-34)

²² Te ní xáhaⁿ Jèsús xii cue téé xica cuu ndìhi-gá:

—Te na càchí tnúhu-í xii-ndo sã vã ïo cani iní-ndó nũu nása cundecu-ndo, àdi nása níhí-ndó sã cáxí-ndó, àdi nása níhí-ndó dǒo cuihnu-ndo.

²³ Chi cùnuu-gá méé-ndó dàcúúxí sã nchító-ndó, te ducaⁿ yiqui cuñú-ndó cùnuu-gá-xi dàcúúxí dǒo sácuihnu-ndo. ²⁴ Te chí cuãha cuèndá nàcuáa quide cue tícácá, chi ni ñà túú chìhi-güedi tata cuu itú natahu-güedi te ni ñà túú ndèé nútnĩ yacá-güedi, te nìhí-güedi xèxi-güedi, chi Yá Ndiõxí xító ñàha-gá xii-güedi. ¡Te nchòhó cúnùu-gá-ndó dàcúúxí nchàa

cue quitì ndava! ²⁵ Te cuèi nándi sá sání vèhi iní-ndó ndècu-ndo, dico ñá ndácú-ndó càda-ndo nacuaá cuehnu-ndo cuèdicó ìⁿ yiqui-gă. ²⁶ Te núu ni sã lúhá xiăⁿ ñá ndácú-ndó càda-ndo, ¿te ná cuendá ío sàni iní-ndó cuendá nchaa sá cuiní-ndó ñihí-ndó cùndecu ndihí-ndo?

²⁷ Te chí cáda cuendá nàcuáa sàhnu ìⁿ tnu itá, chi ni ñà túú quèide chiuⁿ-xi, te ni ñà túú quèheⁿ-xi idi. Te na càchí tnúhu-í xii-ndo sã ndií Salòmón ío vii ní cáa nchaa sá ñi xíndecu ndihí ndií, dico vii-gă tucu càa nchaa itá dàcúúxí nchàa sá ñi xíndecu ndihí ndií. ²⁸ Te cúhú sá ío vitna tnaa-ni cùdí-xi te sàhmí-yu, te cuèi ducaⁿ dico ío vii càdúha Yá Ndióxí nchaa cúhú-ăⁿ. ¿Te nchòhó ío cùnuu-ndo dacúúxí nchàa cúhú-ăⁿ, núu xiăⁿ ío xìto ñaha-gá xii-ndo, te dicó yica cùu iní-ndó sàndáá iní-ndó-gă! ²⁹ Te vá ío canchicúⁿ nihnu-ndo sã cóhó sã cáxí-ndó, te ni vã dándihú-ndó ìní-ndó nùu nása cada-ndo ñihí-ndó. ³⁰ Chi nchaa ñáyiu ñá túú sàndáá iní ñáhá xì Yá Ndióxí ducaⁿ mèe-ni sá cóhó sã cáxí-yu xìca nchicúⁿ nihnú-yu. Dico mee Tătá-ó Dütú Ndióxí sa nàha-gá nándi cùu sá xíní ñùhu-ndo, te taxi-gă. ³¹ Te cada-ndo nchàa nacuaá càháⁿ Yá Ndióxí Yaá yíndàha ñaha xii-ndo, te ducaⁿ te taxi-gă nchaa sá xíní ñùhu-ndo.

*Cuendá sá vãha nduu táhú-ó nùu Yá Ndióxí
(Mt. 6:19-21)*

³² Te vá yùhú nchòhó cue tée ndècu ndihí-í cuèi ío sacú-ndó, chi Tătá-ó Dütú Ndióxí ní cachí-gă sá ndúú táhú-ndó cùndecu-ndo núú ndécú-gă taxi tnùní-ndó tnàhá-ndó. ³³ Te chí dicó nchàa sá ndécú ndihí-ndo, te chí cuãha nchaa ñáyiu ndàhú díhúⁿ-ndó ñáyiu xìni ñuhu, te cada váha-ndo cùndecu-ndo, te ducaⁿ te nduu táhú-ndó sã ío-gă

váha núú Yă Ndiöxí cundecu ndihi-ndo, te xíãⁿ vá cúú tùhú tnàhí-gá-xi, te ni vă ndíhí ñihnu-gá-xi, te ni ñadúhú vă ndácú-güedě duhu-güedě, te ni tĩquidi vá quée-dí. ³⁴ Te núú xíãⁿ cúú cuendá-ndó ñá, te ñu-ni xíãⁿ ñúhú ñí-ndó, áⁿ te núú mee-ni sã ndécú ñùyú-a ndècu ndihi-ndo, te ñu-ni nchaa xíãⁿ ñúhú ñí-ndó.

Xini ñuhu-xi quihí iní-ó cundecu-o

³⁵⁻³⁶ Te ío quihí iní-ndó cundecu-ndo, te cada-ndo dàtná quidé dáva cue téé xínu cuechi sacúndecu túha-güedé cuèi nání òré-áⁿ ndétú-güedě pàtróⁿ-güedě ná òré nasáá-dé sá cuaháⁿ-dé vico tnãdaha. Te núú niú te sa cúú cáyú-ni ñuhú-güedé sá cündetu ñaha-güedé, chi òré ná nàsáá-dé dacàsaⁿ-dé yuyèhe, te ndíhi-ni nacaáⁿ-güedé ndíhu-dé. ³⁷ Te váha táhú nchaa cue téé xínu cuechi-áⁿ, chi ndècu túha-ni-güedé ndétú-güedě ndée òré ní nasáá pàtróⁿ-güedě, te na càhí tnúhu ndáá-í xii-ndo sã òré ná nàsáá pàtróⁿ-güedě-áⁿ te chihi ñaha-dě mèsá xii-güedé, te ndacáⁿ ndee-dé dóó níhnú-dě núú yíquí-dě, te ngüíta-dé cani-dé cóhó-güedě cuendá caxi-güedé. ³⁸ Te ñu-ni ducaⁿ càda-dé cuèi dáva niú, àdi tacuĩhndá-gá, te núú ñá túú xidí-güedé òré nasáá-dé, te cue téé xínu cuechi-áⁿ ño váha tnahá-güedé. ³⁹ Te núú ñíⁿ téé cùu xítóhó ñíⁿ vehe xíní-dé ná òré quíhu ñadúhú vehe-dé ñá, te quihí iní-dé te vá cùdú-dé, te vá dáñá-dě nacaáⁿ-güedé yuyèhe-dé quíhu-güedé duhu-güedě. ⁴⁰ Te nchòhó tucu nchaa-ni nduu quihí iní-ndó cundecu túha-ndo, chi na cuaháⁿ nduu ñá túú yíhi iní-ndó, te quixi tucu yúhú Téé

cùu ñaní tnáhá-ndó nchàa-ndo —cachí-gá xáhaⁿ-gã xii-güedé.

*Cue téé quide ndáá ndihí cue téé ñá túú quide ndáá
(Mt. 24:45-51)*

⁴¹ Te té Pèlú ní xicáⁿ tnúhú-dě núú Jèsús, te xáhaⁿ-dě:

—Mèstrú, ¿te tnúhu ní cáháⁿ-n-ǎⁿ cùu-xi mee-ni cuendá nchúhú ǎⁿ cuendá nchaa ñáyiú? —càchí-dé xáhaⁿ-dě xii-gá.

⁴² Te Jèsús ní xáhaⁿ-gã:

—Càháⁿ-í cuendá ñáyiú quide váha dàtná quidé ìⁿ téé tàxi tnuní ñáhá xii cue ñáyiú xìnu cuechi ndecu vehe patróóⁿ-xi, chí téé-áⁿ ío váha tècú tnùní-dé, te quide-dé nchaa nàcuáa càháⁿ patróóⁿ-dě, te dàcaxi-dé cue ñáyiú xìnu cuechi oré tàú-xi caxí-yu.

⁴³ Te núu ducaⁿ quide váha téé tàxi tnuní ñáhá xii cue ñáyiú xìnu cuechi-áⁿ ñá, te ío váha tnáhá-dé òré násáá patróóⁿ-dě nǎu ndéé cuáháⁿ-dé. ⁴⁴ Te na càchí tnúhu ndáá-í xii-ndo sǎ tǎe quide ndáá táxí tnùní ñáhá xii cue ñáyiú xìnu cuechi-áⁿ cǎñaha-nǎ patróóⁿ-dě xii-dé sá ncháándì túhú-nǎ sá ndécú ndihí-dé quindaha-dě. ⁴⁵ Dico núu téé tàxi tnuní ñáhá xii cue ñáyiú xìnu cuechi-áⁿ ná cànì iní-dé sá cùyàa patróóⁿ-dě vá násáá ndihí-ni-dé ñá, te ngüíta-dé cani-dé nchaa ñáyiú xìnu cuechi, cuèi téé cuèi ñadìhí, te ngüíta-dé caxi-dé coho-dé, te dàxìni-dé méé-dě, ⁴⁶ te nduu ñà túú yìhí iní-dé te násáá patróóⁿ-dě, te dandòho ñaha patróóⁿ-dě-áⁿ xii-dé, te daquìhíⁿ ñáhá-dě xii-dé núú ndécú ñáyiú ñá túú ní quide ndáá.

47 'Te dava cue téé xìnu cuechi xìní-güedé nàcuáa cuìní pàtróóⁿ-güedě cada-güedé te ñà túú quide-güedé, te ni ñà túú cuìní-güedé cundecu túha-güedé cundetu-güedé pàtróóⁿ-güedě, te nchaa cue téé ducaⁿ xìquide dandòho ñaha patróóⁿ-güedě, chi ñàni vìhi-güedé. 48 Te dava cue téé xìnu cuechi ñà túú xìní-güedé nàcuáa cuìní pàtróóⁿ-güedě cada-güedé, te ní quide-güedé sá nēñuú-güedé ìⁿ sá ñà túú tàù-güedé cada-güedé ñà, te cue téé-áⁿ sacú-gá dandòho ñaha patróóⁿ-güedě, chi sacú-gá ñàni-güedé. Te ñáyiu cùtnuní iní-xi nàcuáa cuìní Yă Ndiöxí cadá-yu, te ñiu-ni ducaⁿ tàù-yu cadá-yu nàcuáa cuìní-gá. Te ñáyiu vài-gá tècú tnùnì nàcuáa càháⁿ-gá, te ñiu-ni ducaⁿ vài nchaa sá càháⁿ-gá tàù-yu cadá-yu.

*Ñá túú cùu ìⁿnuu ñáyiu
(Mt. 10:34-36)*

49 'Te yúhú véxi-í ñuyíú-a cuendá cutnùnì iní ñáyiu nàcuáa cada ñaha Yă Ndiöxí xií-yu, ìte cuìní-í sá ndìhi-ni cada-gá nàcuáa sàni iní-gá! 50 Te yúhú ío vài tnúhu sàni iní-í, ìchi sáá nduu te ío ndoho-í, te ñiu-ni xíăⁿ cuhuⁿ iní-í ndéé ná sáá nduu dùcaⁿ yáha-í! 51 Te nchòhó vá cánì ìní-ndó sã yúhú véxi-í ñuyíú-a te cundecu ndìhi tnàha váha-ni ñáyiu, te ñáhá chi da ngúita-yu vá cúú ìⁿnuú-yu cundecú-yu. 52 Te ndéé není vitna ngúita ñáyiu vá cúú ìⁿnuú-yu cundecú-yu, te na càda-o cuendá te núu úhúⁿ ñáyiu xĩndecu ìⁿ-ni vèhe, te vá cúú ìⁿnuu-gá-yu, chi únì-yu ndatnúhu-yu te nàá-yu ndìhi úú-gá-yu, àdi ñáyiu úú-áⁿ ndatnúhu-yu te nàá-yu ndìhi ñáyiu únì-áⁿ.

⁵³ Te dava cue tée cùu tátá vá cúú ìⁿnuu-gá-güedé ndihì déhe ducun-güedé, te ni dáva cue ñáyiu cùu náná vá cúú ìⁿnuu-gá-yu ndihì déhe yòcò-yu, te ni sãnu-yu vá cúú ìⁿnuu ndihì-gá-yu. Te ducaⁿ càdá-yu chi davá-yu quindáá iní ñáhã-yu xii-í, te davá-yu vá quindáá iní ñáhã-yu —càchí-gá xáhaⁿ-gã xii-güedé.

Ñáyiu cùtnuní iní-xi nàcuáa quide-xi ñuyúú ndihì andiú

(Mt. 16:1-4; Mr. 8:11-13)

⁵⁴ Te Jèsús ní xáhaⁿ-gã xii nchaa ñáyiu xñndecu-áⁿ: —Te nchòhó òré ndéhé-ndó ndànchita vícò ndàa xio quée nchíanchii, te càchí-ndó sã cúúⁿ dǎú, te diu ducaⁿ ndìsa quide-xi. ⁵⁵ Te òré ná quène táchí ndàa xio datni nacúaa quène nchíanchii, te càchí-ndó sã ìo cada ihni-xi, te diu ducaⁿ ndìsa quide-xi. ⁵⁶ Te nchòhó ìo váha cùtnuní iní-ndó nàcuáa quide-xi andiú ndihì ñuyúú, ¿te ná cuendá quidé-ní-ndó sã ñã tècú tnùnì-ndó nàcuáa quide Yá Ndiõxí vitna? Te sá dúcáⁿ quide-ndo-áⁿ ìo dándahú-ndó mèe-ndo sá ìo váha cùtnuní iní-ndó, chi ñá ndáá sá cùtnuní iní-ndó.

Nducu-o nàcuáa nucúndecu ndihì váha-o ñáyiu cùu úhú iní ñáhá

(Mt. 5:25-26)

⁵⁷ Te nchòhó, ¿ná cuendá ñá túú dándixi túu-ndo iní-ndó càda-ndo mee-ni sá vǎha sá tàú-ndó càda-ndo-i? ⁵⁸ Te núu ìo ìⁿ-ndo ñí sacáⁿ cuéchi ñáyiu cuendá-ndó cuendá ìⁿ sá ñí quide-ndo, te cuáháⁿ-ndó ndihí-yu núú tée cùchiuⁿ, te ñini ñùhu-ndo ndihí-yu ichi, te nducu-ndo nàcuáa cada-ndo nàcáháⁿ cáhnú iní tnáhá-ndó ndihí-yu

cuendá sá vǎ cándèca ñaha-gá-yu quíhíⁿ núú tǎe cùchiuⁿ, chi núú ducaⁿ na càdá-yu te tǎe cùchiuⁿ-áⁿ nachihí ñaha-dě ndaha cue tǎe cùu poleciá, te cue tǎe-áⁿ chihi ñaha-güedě vecaá xii-ndo. ⁵⁹ Te na càchí tnúhu-í xii-ndo sǎ nǔu na ngáva-ndo vecaá, te vǎ cǎcu-ndo te núú vǎ náchǎhu-ndo nchàa sǎ tàú-ndó –càchí-gǎ xáhaⁿ-gǎ xií-yu.

13

Xìni ñuhu-xi natuha-o ichi Yá Ndiǒxí

¹ Te dǎu-ní òré-áⁿ nǐ ngúnutnǐi ìⁿ úú ñáyiu núú Jèsús cánǐ-yu cuendú núú-gǎ nàcuáa ní quide ñaha té Pilatú xii cue tǎe distritú Galileá cue tǎe ní sahní quíti nduu táhú Yá Ndiǒxí, te mei òré ní sahní-güedé cue quíti-áⁿ nǐ táuchíúⁿ tǎe Pilatú cue sandàdú-dé ní sahní-güedé cue tǎe Galileá-áⁿ, te ní xica níñí-güedě núú ñúhú ndìhi níñí cue quíti-áⁿ, te ní nadácánuu-xi. ² Te Jèsús ní xáhaⁿ-gǎ xií-yu:

–Te núú nchòhó sání ìní-ndó sǎ sà dúcáⁿ nǐ yáha cue tǎe distritú Galileá-áⁿ te cùu-güedé cue tǎe ndècu vihi-gǎ cuéchi-xi dàcúúxí cuè tǎe ñuú-güedé ñá. ³ Te na càchí tnúhu-í xii-ndo sǎ ñǎhá. Te núú nchòhó vǎ ndíxí cuéchi ìní-ndó cuendá nchaa sǎ cuèhé sǎ dúhá quide-ndo ndecu-ndo ña, te tnàhá nchaa nchòhó cuíta nihnu-ndo te núú vǎ nátnǐ-ndo ichi Yá Ndiǒxí. ⁴ Te núú nchòhó sání ìní-ndó sǎ ñáyiu sáhúⁿ úní ní xíhí ní táú ñǎhá vèhe ducúⁿ Silòé ío-gǎ ndécú cuéchi-yu dàcúúxí nchàa ñáyiu xǐndecu ñuú Jerusalén ñá, ⁵ te na càchí tnúhu tuçu-í xii-ndo sǎ ñǎhá. Te núú nchòhó vǎ ndíxí cuéchi ìní-ndó cuendá nchaa sǎ cuèhé sǎ dúhá quide-ndo ndecu-ndo ña, te tnàhá nchaa nchòhó

cuíta nihnu-ndo te núu vá nátn̄i-ndo ichi Yá Ndiǒxí
—càchí-gá xáhaⁿ-gǎ xií-yu.

Yutnu ngǔxí ñá túú cùuⁿ sávidí-xi

⁶ Te Jèsús ní caní tucu-gá ìⁿ cuèndú núŷ-yu
nàcuáa tecú tnùnì-yu tnúhu-gá, te xáhaⁿ-gǎ:

—Ìⁿ téé nùtn̄i ìⁿ yutnu ngǔxí núú ñúhú-dě, te
cuáháⁿ ndéhé-dě nŷu ní cuuⁿ sávidí-xi ní cùu, te ní
ìⁿ ñá túú ní cùuⁿ. ⁷ Te ní xáhaⁿ tēe-áⁿ xii téé ndéé
ñuhu-dé: “Nàha-n sá vitna ní cuu úní cuía quíxí
còto-í yutnu ngǔxí-a te ñá túú xìnì-í ní ìⁿ sávidí-xi.
Te quehndé-n vitna, chí àúⁿ nǎ cuu nùtn̄i-xi quide
tneñu-xi núú ñuhu-áⁿ”, càchí-dé xáhaⁿ-dě xii téé
ndéé ñuhu-dé-áⁿ. ⁸ Te téé ndéé ñuhu-áⁿ nǎ xáhaⁿ-dē:
“Pàtróón, dañá na cùhnu-xi cuía vitna-ná, te na
nàdatayá-í ñuhu núú sàhá-xi, te chihi-í saháⁿ. ⁹ Te
ducaⁿ te cudana cuuⁿ sávidí-xi, àdi núu ñá túú ní
cùuⁿ sávidí-xi ña te téhndé-nǎ-xi”, càchí-dé xáhaⁿ-dě
xii pàtróón-dě —càchí-gá xáhaⁿ-gǎ xií-yu.

*Jèsús quidé tǎtna-gá ìⁿ ñadìhí ní nduu cueyi sǎtá-xi
nduu ndétatú ñáyiu*

¹⁰ Te ìⁿ xito cùu-xi nduu ndetatú ñáyiu, te yìhì
Jesús ìⁿ veñúhu dānehé-gá ñáyiu. ¹¹ Te xíáⁿ ndécú
ìⁿ ñadìhí ní cuu sáhúⁿ úní cuía sǎ cùhú-aⁿ yìhì
ñaha espíritú cùndìhì yucu ñávǎha xii-aⁿ, te xíáⁿ ní
ndada cueyi-xi sǎtá-aⁿ, te ñá dáñá-gǎ-xi nucúnutn̄i
ndáá-aⁿ. ¹² Te òré ní xìnì ñáhá Jèsús xii-aⁿ te ní cana
ñaha-gǎ, te xáhaⁿ-gǎ:

—Yòhó ñaha cùhú, ndúha-n cuéhé tnàhá-n —
càchí-gá xáhaⁿ-gǎ xii-aⁿ.

¹³ Te ní dácáa-gá ndaha-gá ní tendaha ñàha-gá
xii-aⁿ, te òré-ni-áⁿ nǎ ndúha-aⁿ te ní nucúnutn̄i

ndáá-aⁿ, te ní ngüíta-aⁿ ní cachí-aⁿ sá ïo càhnu cuu Yá Ndiöxí. ¹⁴ Dico téé tàxi tnuní veñúhu ní cudééⁿ-dě sá dúcáⁿ nĩ quide Jèsús ní quide tátna-gá ñaha cùhú-áⁿ nduu ndètátú-yu, te ní xáhaⁿ-dě xii-yu:

— Ìó ìñú nduu tàú-ó càda chiuⁿ-o, te ndědani càa nduu-áⁿ quixi-ndo cùtátna-ndo, dico ñá díú nduu cuu-xi nduu ndetátú-ó —càchí-dé xáhaⁿ-dě xií-yu.

¹⁵ Te ní xáhaⁿ Jèsús:

— Nchòhó chi ío dándahú-ndó mèe-ndo sá quidé ndáá-ndó dico ñá ndáá sá quidé ndáá-ndó, ¿náa ñá túú nàndaxi-ndo ndicutu-ndo àdi búrru-ndo dàcoho-ndo-güedi ndute nduu ndetátú-ó áⁿ? ¹⁶ Te ñadìhí-a cùu-aⁿ ñaní tnáhá ndĩ Àbrahám, te dìcò-ni sá yùcu ñáváha quide duha cùhú-aⁿ ní cuu sáhúⁿ úní cuíá, ¿te náa ñá túú xìni ñuhu-xi cutátna-aⁿ cuèi cùu-xi nduu ndetátú-ó áⁿ? —càchí-gá xáhaⁿ-gá xii-dé.

¹⁷ Te sá dúcáⁿ nĩ cáháⁿ Jèsús, núu nchaa cue téé cùu úhú iní ñáhá xii-gá ní cucahaⁿ núú-güedě, dico nchaa dava-gá ñáyiu chi xícudíí ìní-yu xìndéhě-yu nchaa sá vǎ yǒo tnàhí ndàcu cada quide-gá.

Cuèndá ndíquíⁿ yutnu nàni mostázá
(Mt. 13:31-32; Mr. 4:30-32)

¹⁸ Te ní xáhaⁿ-gǎ xií-yu:

— Na càni-í ìⁿ cuèndú núú-ndó nàcuáa tecú tnùnì-ndó nàcuáa cada-xi òré ndíhu ndaha ñaha Yá Ndiöxí xii-ndo. ¹⁹ Ìⁿ téé ní queheⁿ-dé ndíquíⁿ yutnu nàni mostázá te nèhe-dé cuáháⁿ ní sacáⁿ-dé núú ñúhú-dě te ní xínu-xi, te ní sahnu-xi ní cuu dùcúⁿ-xi, te cue quiti ndàva núú tàchí cádúha-güedi tacá-güedi núú díté-xi —càchí-gá xáhaⁿ-gǎ xií-yu.

Nàcuáa quìde levadurá

(Mt. 13:33)

²⁰ Te ní xáhaⁿ tucu Jesús xií-yu:

—Te na càchí tnúhu tucu-í xii-ndo nàcuáa cada tucu Yá Ndiõxí òré ndíhu ndaha ñàha-gá xii-ndo.

²¹ Hⁿ ñadìhí ní queheⁿ-aⁿ levadurá ní chihi-aⁿ úní arròbá yuchi triú, te levadurá-áⁿ ñí quide-xi ní ndaa ñihí yusaⁿ-áⁿ —càchí-gá xáhaⁿ-gá xií-yu.

Yuyèhe cuiñi

(Mt. 7:13-14, 21-23)

²² Te ichi ñuhu Jesús cuáháⁿ-gá ñuú Jerusalén, te nchaa ñuú náhnú, ndíhi nchaa ñuú líhli ta yàha-gá ducaⁿ ta dànehé-gá ñáyiú tnúhu-gá cuáháⁿ. ²³ Te hⁿ ñuú-áⁿ ñí xáhaⁿ hⁿ téé xii-gá:

—Mèstrú, cuení-í cácaⁿ tnúhu-í hⁿ tnúhu núú-n, ¿ndáá sá ïo sacú ñáyiú nàníhí tàhú-ãⁿ? —càchí-dé xàhaⁿ-dë xii-gá.

Te Jèsús ní xáhaⁿ-gá xii-dé ndíhi nchaa ñáyiú:

²⁴ —Cada-ndo sã nánihí tàhú-ndó, te tñi-ndo ìchi Yá Ndiõxí, te ichi-gá-áⁿ cúú-xí dàtná hⁿ yuyèhe cuiñi, te càchí tnúhu-í xii-ndo sã ïo cuéhé ñáyiú cachí iní-yu quíhu-yu yuyèhe cuiñí-áⁿ dico vá ndácü-yu. ²⁵ Te na càni tucu-í ñngá cuèndú núú-ndó nàcuáa tecú tnùní-ndó tnúhu càháⁿ-í. Te òré ná ndàcuíñí téé cùu xítohó vehe, te nacadí-dé yuyèhe, te nchaa nchòhó ñáyiú na quèndóo quehé dacàsaⁿ-ndo yuyèhe, te quesaha-ndo cũñaha-ndo xii-dé: “Tátá, nacaáⁿ yuyèhe na quíhu-ndí”, quesaha-ndo cũñaha-ndo xii-dé. Dico téé cùu xítohó vehe-áⁿ cũñaha-dë xii-ndo: “Ñá túú xìní-í nchòhó ndèé ñáyiú cùu-ndo”, duha cúñaha-dë xii-ndo.

²⁶ Te dàtnùní ngúíta nchòhó cúñaha-ndo xii-dé:

“Nchúhú ní xexi ndihi ñaha-ndí, te ní xihí ndihi ñaha-ndí xii-n, te nchaa ichi ní xóo dacuàha ñaha-n xii-ndí”, quesaha-ndo cũñaha-ndo xii-dé. ²⁷ Dico cachí tucu té cùu xítóhó vehe-áⁿ cũñaha-dě xii-ndo: “Sa ní cachí-í sá ñà túú xiní-í ndéé ñáyiú cùu-ndo. Te chí xócuñí nchòhó ñáyiú ndècu ichi cuehé ichi duha núú ndècu-í”, quesaha-dě cúñaha-dě xii-ndo. ²⁸ Te na sáá nduu dùcaⁿ cada-xi te quiní-ndó tẽ Abrahám, ndihi té Isàác, ndihi té Jácób, ndihi nchaa cue téé ní xóo cáháⁿ tnúhu Yá Ndiõxí, te nchaa cue téé-áⁿ ndécú-güedě núú ndécú-gã táxí tnùnigá, te nchòhó queue tíhú-ndó nũú-gã sá tnúhu ñá túú ní cuíní cada ndáá, te dàvá-áⁿ ndáhyú-ndó te cuu rúhñú-nã núhu-ndo sã sàtú iní-ndó cuendá sá ndóhó-ndó. ²⁹ Te dàvá-áⁿ quíhu nchaa ñáyiú ndi cùmí xio ñuyú núú ndécú Yá Ndiõxí táxí tnùnigá caxí-yu ndihi-gá, te cundécú-yu ndihi-gá. ³⁰ Te dava ñáyiú nchícúⁿ ñá túú cùnuu ndecu ichi Yá Ndiõxí vitna, ñáyiú-áⁿ sáá nduu te ío cunúú-yu. Te dava ñáyiú cùnuu ndecu ichi-gá vitna, ñáyiú-áⁿ sáá nduu te vá ño-gá cunúú-yu —càchí-gá xáhaⁿ-gã xií-yu.

*Jèsús ndàhyú-gá cuendá ñáyiú ñuu Jérusalén
(Mt. 23:37-39)*

³¹ Te diu-ni nduu-áⁿ ñí quexío ñⁿ úú cue téé cùu fariséú núú ndécú-gã, te xáhaⁿ-güedě xii-gá:

—Queue-n ìha quíhíⁿ-n nũu ndéé quíhíⁿ-n, chi téé cùu Herodés cuíní-dé cahni ñaha-dě xii-n —càchí-güedě xáhaⁿ-güedě xii-gá.

³² Te Jèsús ní xáhaⁿ-gã:

—Chí cuàháⁿ te cúñaha-ndo xii téé nèhe mañá-áⁿ sã càchí-í sá ná cùndedóho váha-dé ñⁿ tnúhu càháⁿ-í,

chi cùmání ìⁿ ùú-gá nduu cundecu-í xocàni-í nchaa espíritú cúndìhì yucu ñávãha yìhì ñaha xii ñáyiú, te cada tátna-í nchaa dava-gá ñáyiú cùhú, te ducaⁿ te ndìhì chùⁿ-í, duha cúñaha-ndo xii-dé. ³³ Dico dacuitíí sã cùhùⁿ-í ichi ìⁿ ùú-gá nduu, te ducaⁿ te sáá-í núú quìhìⁿ-í, chi vá cúú tnàhí cuú ìⁿ téé càháⁿ tnúhu Yá Ndiõxí ìngá ñuú, chi mei ñuú Jerusàlén cuú-güedé —càchí-gá xáhaⁿ-gã xii-güedé.

³⁴ Te ní xáhaⁿ-gã xii ñáyiú ñuú Jerusàlén:

—Nchòhó chi sàhni-ndo nchaa cue téé càháⁿ tnúhu Yá Ndiõxí, cue téé ní tendaha-gã véxi, te mee-ni ndìhì yúú sáhní-ndó-güedé. ¡Te titní xito ní cuiní-í nadatàcá ñáhà-í xii-ndo dàtná nádàtácá ìⁿ nchuxì cuè déhe-di sàquìhì-güedi xití ndíxíⁿ-di, dico ñá ní cuiní-ndó, te ducaⁿ-ni sàni iní-í ndéé vitna! ³⁵ Te chí cùndèdóho tucu ìngá tnúhu na càháⁿ-í-a: Yá Ndiõxí dañá ñaha-gá xii-ndo. Te na càchí tnúhu tucu-í xii-ndo sã vã quíní ñáhá-gã-ndó xii-í, dico sáá nduu te quíní ñáhá tùcu-ndo, te nduu-ãⁿ cachí-ndó sã ïo càhnu cuu yúhú Yaá ní tendaha Dütú Ndiõxí véxi ñuyíú-a —càchí-gá xáhaⁿ-gã xii-yu.

14

Jèsús quidé tátna-gá ìⁿ téé ñùhu cuiñu

¹ Te duha ní cuu ìⁿ nduu, nduu ndètatú ñáyiú chi ìⁿ téé cùu fariséú cúnùu ní cáháⁿ-dé Jèsús vehe-dé caxi-gá, te cue téé ndècu vehe-dé ndéhé-güedé ñuu nása cada-gá. ² Te xíaⁿ ndécú tnàhá ìⁿ téé cùhú ñúhú-dé cuiñu. ³ Te Jèsús ní xicáⁿ tnúhú-gã núú cuè téé dàcuaha ñaha xii ñáyiú nchaa tnúhu ní chídó

tnùní ndíi Moisés, ndihi núú cuè téé cùu fariséú, te xáhaⁿ-gă:

—¿Cuu cada tátna-o ìⁿ ñáyiú cùhú nduu ndètátú-ó ãⁿ ñáhá? —càchí-gá xáhaⁿ-gă xii-güedé.

⁴ Dico cue téé-áⁿ ñà túú tnàhí ni cãháⁿ-güedé. Te ní dácàá-gá ndaha-gá ní tendaha-gă téé cùhú-áⁿ ñí quide tátna ñaha-gă xii-dé, te ní xáhaⁿ-gă sá ná nùhú-dé vehe-dé. ⁵ Te ní xícáⁿ tnúhú-gă núú nchàa cue téé-áⁿ, te xáhaⁿ-gă:

—¿Te núú nchòhó ná ngáúnhnu ìⁿ búrru-ndo àdi ìⁿ ndicutu-ndo déhvá, te vá ná tàva ndíhi-ni-ndo-di cuèi cùu-xi nduu ndetátú-ndó-ãⁿ? —càchí-gá xáhaⁿ-gă xii-güedé.

⁶ Te ñá túú ní ñíhí-güedé tnúhu na dànhocáva-güedé.

Ñáyiú càháⁿ-yu quíhíⁿ vico tnãndaha

⁷ Te ndèhe Jesús nàcuáa xíquide nchaa ñáyiú ndècu vico sá sùúni ñí nacáxi-yu xilé sácõo nchihi cue téé cùnuu-gá conchihí-yu òré cuànguìhú-yu mèsá caxí-yu, núú ní xáhaⁿ-gă xií-yu:

⁸ —Òré ná càháⁿ ñáhá ìⁿ ñáyiú xii-ndo ìⁿ vico tnãndaha, te vá cóó-ndó nùú xilé sácõo cue téé cùnuu-gá, chi núú ducaⁿ na càda-ndo, te cudana quexìo dava-gá ñáyiú cùnuu-gá dàcúxí nchòhó.

⁹ Te ñáyiú ní càháⁿ ñáhá xii-ndo-áⁿ quixí-yu te cúñáhá-yu xii-ndo: “Chí cuãñaha xilé núcõo nchihi-ndo-ãⁿ ná cònchihi ñáyiú ní quexìo-a”, quesàhá-yu cúñáhá-yu xii-ndo. Te cuìní-ndó ñáhá cuèi cùcahaⁿ núú-ndó ndàcuíñí-ndó quíhíⁿ-ndó ngõo-ndo nùú xilé xĩnutnì ndéé núú ñí ndihi-ná ndàa sátá-xi. ¹⁰ Te yúhú càchí-í sá òré ná càháⁿ

ñáhă-yu xii-ndo, te ngóo-ndo nõú xilé xĩnutnĩ ndéé núú nĩ ndihĩ-ná ndăa sátá-xi chi cuendá òré ná quèxio ñáyiú ní cáháⁿ ñáhá xii-ndo, te cúñàhá-yu xii-ndo: “Nchòhó cue ñáyiú càháⁿ ndihĩ-í, chí yăha núú xilé sácõo cue téé cùnũũ-gá coo-ndo”, duha cúñàhá-yu xii-ndo. Te ducaⁿ te cada nínu ñaha nchàa ñáyiú yìhĩ ndihĩ-ndo mesá. ¹¹ Te nchaa ñáyiú na càda nínu mee-xi, te ñáyiú-áⁿ ñà túú cùu nínu-yu, te nchaa ñáyiú ñá túú quide nínu mee-xi, ñáyiú-áⁿ cúú nĩnu-yu —càchĩ-gá xáhaⁿ-gă xií-yu.

¹² Te dătnùní ní xáhaⁿ-gă xii téé ní cáháⁿ ñáhá xii-gá:

—Te yòhó òré cuení-n càda-n ìⁿ vico, te vá càháⁿ-n mée-ni cue téé càháⁿ ndihĩ-n, ni cuè ñaní-n, ni cuè ñáyiú cùu ñaní tnáhá-n, ni cuè ñáyiú cuica ndècu yatni ndihĩ-n, chi ñáyiú-áⁿ ducaⁿ càdá-yu ìⁿ nduu cáháⁿ ñáhă-yu xii-n te ndéyăhu-ni sá nĩ quidè-n-yu. ¹³ Te ñáhá chi òré ná càda-n ìⁿ vico, te cáháⁿ-n ñáyiú ndàhú, ndihĩ ñáyiú ñá cúú càca, ndihĩ ñáyiú yacua, ndihĩ ñáyiú cuàá. ¹⁴ Te núu ducaⁿ na càda-n, te cuu-xi ìⁿ sá văha xii-n, chi ñáyiú-áⁿ vă nìhĩ-yu nacoto ñàhá-yu xii-n, dico na cùú-n te sáá nduu ndòto-n ndihĩ nchaa ñáyiú ní quide ndáá ní xĩndecu ichi Yá Ndiõxí, te dává-áⁿ taxi-gá sá ndúú tãhú-n —càchĩ-gá xáhaⁿ-gă xii-dé.

Nàcuáa xĩquide ñáyiú òré càháⁿ ñáhá ìⁿ téé cada vico

(Mt. 22:1-10)

¹⁵ Te sá dúcáⁿ nĩ cáháⁿ Jèsús ní tecú dóho cue téé yìhĩ mesá-áⁿ, núu ní xáhaⁿ ìⁿ-dé xii-gá:

—Ío váha tãhú nchaa ñáyiú na càxi nchaa sá cuăha ñaha Yă Ndiõxí nduu na sàá-yu cundecú-yu

núu ndécú-gă táxí tnùní-gá –càchí-dé xăhaⁿ-dě xii-gá.

16 Te Jèsús ní xáhaⁿ-gă xii-dé:

—İⁿ tée quide-dé vico, te ní dátècú tnúhu-dé cuéhé víhí ñăyiu quíhíⁿ-yu caxí-yu. 17 Te òré sa ní cuu-ná sá caxí-yu, te ní xáhaⁿ-dě xii tée xìnu cuechi núú-dě sá quíhíⁿ-dé cùñaha-dě quíhíⁿ-yu caxí-yu, chi sa ndècu túha nchaa sá caxí-yu. 18 Dico nchaá-yu ní xáhăⁿ-yu xii-dé sá ná cádá càhnu iní tée càháⁿ ñáhá-ăⁿ, chi ñá túú cùyáchí-yu quíhíⁿ-yu vico-áⁿ. Te tée ní càháⁿ ndihí tée xìnu cuechi-áⁿ dïhna ní xáhaⁿ-dě: “Íchí ñí saaⁿ-í ĩⁿ pedàsú ñuhu, te quíhíⁿ ndéhè-í tnavíí, núu xíăⁿ càháⁿ ndàhú-í núú-n să cùñaha-n xii tée càháⁿ ñáhá-ăⁿ xii-í sá ná cádá càhnu iní-dé chi ñá túú cùyáchí-í”, càchí-dé xăhaⁿ-dě. 19 Te ingá-dé ní xáhaⁿ-dě: “Ní saaⁿ-í úhúⁿ yundá ndicutu sa xìtu, te cue quiti-áⁿ quíhíⁿ-í coto ndeé-í-güedi vitna, núu xíăⁿ càháⁿ ndàhú-í núú-n să cùñaha-n xii tée càháⁿ ñáhá-ăⁿ xii-í sá ná cádá càhnu iní-dé chi ñá túú cùyáchí-í”, càchí-dé xăhaⁿ-dě. 20 Te ingá tucu-dé ní xáhaⁿ-dě: “Íchí ñí tnándaha-í nŭu xíăⁿ vá cùyáchí-í quíhíⁿ-í”, càchí-dé xăhaⁿ-dě. 21 Te òré ní nasáá tée xìnu cuechi-áⁿ, te ní nacani tnúhu-dé núú pàtróóⁿ-dě nchaa nàcuáa ní xáhăⁿ-yu. Te ní cudééⁿ tée cùu patróóⁿ-ăⁿ, te ní xáhaⁿ-dě xii tée xìnu cuechi núú-dě-áⁿ: “Yáchí cuáháⁿ nanducu-n nchaa ñăyiu ndàhú, ndihí nchaa ñăyiu ñá cúú càca, ndihí nchaa ñăyiu yacua, ndihí nchaa ñăyiu cuáá, te ndëni ní cuu na nàníhí-n-yu te candècá-n-yu quixi”, càchí-dé xăhaⁿ-dě. 22 Te sátá ñí nasáá tée xìnu cuechi-áⁿ, te ní xáhaⁿ-dě xii pàtróóⁿ-dě: “Pàtróóⁿ, sa ní quide-í chiúⁿ ní táhú-n,

dico ndècu-gá núú cóo-yu”, càchí-dé xǎhaⁿ-dě. ²³ Te téé cùu patróoⁿ-dě-áⁿ nǐ xǎhaⁿ-dě: “Cuàháⁿ tucu nděni ní cuu te cada yica-n na quixí-yu quíhu-yu cuendá ná chítú vehe-í. ²⁴ Te na càchí tnúhu-í xii-n sǎ nì ìⁿ ñáyiú ní cáháⁿ-í díhna vá cúú-gǎ caxí-yu sá sà ní quide túha-í caxí-yu ni cùu”, cachí téé-áⁿ xǎhaⁿ-dě xii téé xínu cuechi núú-dě — càchí-gá xǎhaⁿ-gǎ xii téé-áⁿ.

Ndoho-o cùndecu-o ichi Xítóhó Jesucristú

(Mt. 10:37-38)

²⁵ Te ío cuéhé ñáyiú nchícúⁿ-yu Jèsús, te ní xǎhaⁿ-gǎ xií-yu:

²⁶ —Te núú dava nchòhó cuìní-ndó chitnahá ñáhá-ndó xii-í, te cuu iní ñáhá ndisa-ndo. Te cuèi na dàndóo-ndo tǎtá-ndó, ndìhi náná-ndó, ndìhi ñadihí-ndó, ndìhi déhe-ndo, ndìhi ñaní-ndó, ndìhi cúha-ndo, te cani iní-ndó sǎ cuèi na cùú-ndó sǎ cuendá-í, te ducaⁿ te cuu ndisa-ndo cuè ñáyiú tnahá tnúhu ndìhi-í. ²⁷ Te nchaa ñáyiú vá cáncchícúⁿ ni-hnu ñaha xii-í cuendá sá yùhú-yu ndohó-yu dàtná ndoho-í, ñáyiú-áⁿ vǎ cúú-yu ñáyiú tnahá tnúhu ndìhi-í. ²⁸ Te núú ìⁿ nchòhó ná càni iní-ndó dàcaa-ndo ìⁿ vehe ducúⁿ, ¿te náa ñá díú díhna-gá cada cuendá-ndó nùu ndédau díhúⁿ cuu, ducaⁿ te cutnùní iní-ndó nùu tnahá díhúⁿ-ndó càa vehe-áⁿ àdi ñáhá? ²⁹ Chi núú vá ducáⁿ càda-ndo, te na ngüíta-ndo tàusaha-ndo te vá xínu cada-ndo, te nchaa ñáyiú na cùndehe ñaha xii-ndo, te cáháⁿ cuéhé-yu cuendá-ndó. ³⁰ Te cachí-yu: “Tée-áⁿ ní ngüíta-dé dácàa-dé ìⁿ vehe te ñá ní ndàcu-dé xínu”, cachí-yu. ³¹ Àdi te núú ìⁿ téé yìndaha ñaha xii ñáyiú cuìní-dé nàá-dé ndìhi ìngá tucu téé yìndaha ñaha xii ñáyiú, ¿te náa ñá díú díhna-gá

cada cuendá-dé te núu ndacu-dé ndìhi úxí mĩl cue sandàdú-dé nàá-güedé, ndìhi ócò mĩl cue sandàdú ingá tucu téé yìndaha ñaha xii ñáyiú cùu úhú iní tnáhá ndìhi-dé-ǎⁿ? ³² Àdi te núu xìto-dé sá vǎ ndácú-dě ñá, te òré vátá cùyàtni ñaha-gá téé cùu úhú iní tnáhá ndìhi-dé-áⁿ, te tendaha-dě ìⁿ téé quíhíⁿ-dé quíhu-dé tnúhu ndàhú núú tēe-áⁿ cuendá sá vǎ nàá-güedé. ³³ Te duha càháⁿ-í chi núu nchòhó vá cádá ndèe iní-ndó dàña-ndo nchaa sá ndécú ndìhi-ndo cuendá chitnahá ñáhá-ndó xii-í, te vá cúú-ndó cuè ñáyiú tnàhá tnúhu ndìhi-í.

Ñí ñí nduu víxiⁿ
(Mt. 5:13; Mr. 9:50)

³⁴ Te ñí chi ío váha, dico núu na ndùu víxiⁿ-xi, ¿te nása-gá cada-o nàndíhi-o te núu ducaⁿ-i? ³⁵ Chi ñá túú-gǎ nándíhi-xi nì sá dàcá ñuhu, te nì sá dàcá saháⁿ, chi cuendá-nǎ dǎngoyo-o. Te nchaa nchòhó ñáyiú ní xíndedóho tnúhu ní cáháⁿ-í-a xini ñuhu-xi ío váha cuáha-ndo cuendá —càchí-gá xáhaⁿ-gǎ xii-yu.

15

Cuendá ìⁿ mběé quiti ní xíta
(Mt. 18:10-14)

¹ Te cue téé cuihna ìní-xi quide cobrá ñáhá xii ñáyiú cuendá impuèstú ndìhi cue dava-gá ñáyiú ndècu ichi cuehé ichi duha ní quexió-yu núu ndécú Jèsús cuendá cundedóho-yu tnúhu càháⁿ-gá. ² Te ní ngüíta cue téé cùu fariséú, ndìhi cue téé dàcuaha ñaha xii ñáyiú nchaa tnúhu ní chídó tnùnì ndíi Moisés xícáháⁿ cuèhé-güedé cuendá-gá, te càchí-güedé:

—Tée-a quèheⁿ cuendá-dé ñáyi ndècu ichi cuehé ichi duha, te xèxi ndihí ñaha-dé xií-yu —càchí-güedé xĩtnàha-güedé.

³ Te Jèsús ní cani-gá ìⁿ cuèndú nàcuáa tecú tnùnì-güedé tnúhu-gá, te xáhaⁿ-gã xii-güedé:

⁴ —Ìⁿ tée ndècu ìⁿ ciendú mběé-dě, te ní xíta ìⁿ-di, te nchòhó sa cùtnuní iní-ndó nàcuáa cada tée-áⁿ, chi dándóo-dé cùmídícó sǎhúⁿ cùmí-di ìⁿ yucu, te cúnúndúcú-dé quitì ní xíta xǎⁿ ndéé ndéé naníhí-dě-di. ⁵ Te òré ní naníhí-dě-di te ní dácáá-dě-di chíó-dě ní docó-dé-di sá cúdǎⁿ ìní-dé. ⁶ Te òré ní nasáá-dé vehe-dé, te ní dátacá-dé nchaa cue tée càháⁿ ndihí-dé, ndihí nchaa ñáyi ndècu yatni ndihí-dé, te ní xáhaⁿ-dě: “Chí ná cúdǎⁿ ìní-ó vǐtna, chi ní naníhí-í mběè-í quitì ní xíta ni cùu”, cachí-dé xáhaⁿ-dě xií-yu. ⁷ Te yúhú càchí-í sá ìo-gá cúdǎⁿ ìní Yǎ Ndiǒxí ndihí cue espíritú xínú cuèchi núú-gã nùu ìⁿ ñáyi ndècu ichi cuehé ichi duha na ndixi cuéchi iní-yu cuendá nchaa sá ñà túú vǎha quidé-yu ndécú-yu te tníⁿ-yu ichi-gá, dàcúúxí cùmídícó sǎhúⁿ cùmí ñáyi sa ní tuha ichi-gá, chi ñà túú-gã xíní ñùhu-xi ndixi cuéchi iní-yu chi sa ndécú-yu ichi-gá —càchí-gá xáhaⁿ-gã xii-güedé.

Cuendá díhúⁿ nǐ xíta

⁸ Te ní cani Jèsús ingá cuèndú núú-güedé, te xáhaⁿ-gã:

—Ìⁿ ñadíhí ndécú ndihí-aⁿ úxí díhúⁿ cuixíⁿ, te ní dácuita-aⁿ ìⁿ te ní teñuhú-aⁿ iti, te ní ngúíta-aⁿ nàtihu-aⁿ vehe, te súúní vǎha vǎha ní nanducu-aⁿ ndéé ní naníhí-aⁿ. ⁹ Te òré ní naníhí-aⁿ, te ní dátacá-aⁿ nchaa ñáyi dǐhí càháⁿ ndihí-aⁿ ndihí nchaa ñáyi ndècu yatni ndihí-aⁿ, te ní xáhaⁿ-aⁿ:

“Chí ná cùdíí ìní-ó v̀itna chi ní naníhì-í díhùⁿ-í sá nǐ xíta nǐ cùu”, cachí-aⁿ xáhaⁿ-aⁿ xii-yu. ¹⁰ Te yúhú càchí-í sá dúcáⁿ ìo cùdíí ìní nchaa espíritú xínú cuèchi núú Yă Ndiõxí, núu ìⁿ ñáyiu ndècu ichi cuehé ichi duha na ndixi cuèchi ìní-yu cuendá nchaa sá ñà túú v̄aha quidè-yu, te tnií-yu ichi-gá — càchí-gá xáhaⁿ-gǎ xii-güedé.

Cuendá ìⁿ téé ñá túú ní quide váha

¹¹ Te ní cani tucu Jèsús ìngá cuendú núú-güedé, te xáhaⁿ-gǎ:

— ìⁿ téé ndècu úú déhe ducuⁿ-dé, ¹² te téé lǐhli-gá ní xáhaⁿ-dē xii tǎtá-dē: “Táu, taxi-n tǎhú sǎ cúú cuendá-í”, càchí-dé xáhaⁿ-dē. Te tǎtá-dē-áⁿ nǐ sǎñaha-dē ndí dííⁿ nǔú-güedé sá cúú cuendá-güedé. ¹³ Te núú sàcú-ni nduu, te déhe-dé téé lǐhli-gá-áⁿ nǐ nadico-dē nchaa sá nǐ sǎñaha tǎtá-dē, te ní xica-dé cuáháⁿ-dé ìⁿ ñuú xícá, te yàcáⁿ ní tnií-dé ìⁿ ichi cuèhé ichi duha, te ní ndihì díhúⁿ-dē ní dándóñùhu-dé ndihì cue téé càháⁿ ndihì-dé, ndihì nchaa ñáyiu dìhì x̄ndecu ichi díí ìní. ¹⁴ Te ní ndihì ndoo díhúⁿ-dē ní dándóñùhu-dé, te núú sàcú-ni nduu ní sáá tnamá ñuú núú ndécú-dē-áⁿ, te ñá nihí-gá-dé sá cǎxí-dē, te xihí-dé docó. ¹⁵ Núú ní xica-dé cuáháⁿ ndúcú ch̀iùⁿ-dé núú ìⁿ téé diu-ni ñuú xíaⁿ, te téé-áⁿ nǐ sáha ch̀iùⁿ ñaha-dé ìⁿ xichi núú ñúhú-dē coto-dé cùchí. ¹⁶ Te súúni xihí-dé docó te cuìní-dé caxi-dé nchaa sá sǎha-yu cùchí-áⁿ ní cùu, dico ñá túú ní sǎñàhá-yu xii-dé. ¹⁷ Te uuⁿi ní sani váha ìní-dé, te ní cachí-dé: “j̄ío cuéhé cue téé x̄inu cuechi vehe tǎtá-í te ío cuéhé sǎ xéxí-güedé ndécú, te yúhú duha ndòho-í docó iha! ¹⁸ Te ndacuñí-í te núhú-í vehe tǎtá-í, te cúñaha-í xii-dé: Táu, ñá

túú ní quide váha-í núú Yă Ndiõxí te ni ñà túú ní quide váha-í núú-n, ¹⁹ te ñá túú-gă tàú-í sá cúú-í déhe-n vitna, te cada ñaha-nă-n xii-í dàtná ìⁿ téé xìnu cuechi núú-n”, duha ní sani iní-dé cúñaha-dě xii tătă-dě. ²⁰ Te sátá dúcáⁿ ní sani iní-dé, te ní natni-dé ichi cuánuhú-dé vehe tătă-dě, te xica-gă cuánuhú-dé ní xiní ñáhá tătă-dě xii-dé te ní cundáhú iní ñáhá-dě. Te xìnu tătă-dě-áⁿ ní sáháⁿ nútnahá ñáhá-dě, te ní numi ñaha-dě, te ío váha ní cáháⁿ ndihí ñaha-dě. ²¹ Te ní xáhaⁿ dēhe-dé-áⁿ xii-dé: “Táu, ñá túú ní quide váha-í núú Yă Ndiõxí te ni ñà túú ní quide váha-í núú-n, te ñá túú-gă tàú-í sá cúú-í déhe-n vitna”, cachí-dé xăhaⁿ-dě.

²² 'Dico tătă-dě-áⁿ ní xáhaⁿ-dě xii cue téé xìnu cuechi núú-dě: “Chí queñùhu ndihí-ni dóó văha-gá cuáha-ndo dēhe-í-a na cuìhnu-dé, ndihí ìⁿ dehé ná quìhí díquí ndáhá-dě, ndihí chàú váha na quìhí-dé.

²³ Te quíhíⁿ ngueheⁿ-ndo ìⁿ ndicutu numa quiti caváha-gá, te cahni-ndo-di, te na càda-o vico, te na càxi-o-di. ²⁴ Chi déhe-í-a ní sani iní-í sá ní xihí-dé ní cùu, te ñáhá chi ndècu vívú-dě, te ní sani tucu iní-í sá ní xíta-dé ní cùu te ní nasáá méé-dě”, cächí-dé xăhaⁿ-dě xii cue téé xìnu cuechi núú-dě-áⁿ. Te ní ngüita-güedé ní quide-güedé vico.

²⁵ 'Te déhe-dé téé sàcuéhé-gă cuáháⁿ-dé yucu, te òré cuándixi-dé tá ndùu yatni-dé vehe, te ní tecú dóho-dé ío yaá cúú vico. ²⁶ Te ní cana-dé ìⁿ téé xìnu cuechi, te ní xícáⁿ tnúhú-dě núú-dě ná cuendá ducaⁿ ío yaá. ²⁷ Te téé xìnu cuechi-áⁿ ní xáhaⁿ-dě: “Ñaní-n téé cuáháⁿ ní cùu ní nasáá-dé, te tătă-n ní táúchíúⁿ-dě ní xihí ìⁿ ndicutu nùma quiti caváha-gá cuendá sá ní nasáá váha-dé”, cächí-dé xăhaⁿ-dě.

²⁸ 'Dico ñaní-dé téé sàcuéhé-ăⁿ ní cudééⁿ-dě, te ní cachí-dé sá vă ndìhu-dé vehe cundecu-dé vico-áⁿ

ní cùu, dico ní quee tătá-güedě ní cáháⁿ ndàhú-dé nùú-dě cuendá ndíhu-dé. ²⁹ Te ní xáhaⁿ-dě xii tătá-dě: “Táu, cundedóho váha saú-n tnũhu na cáháⁿ-i-a, yúhú ío cuéhé cuiá ní cuu xínu cuechi-í nùú-n, te ni ìⁿ xito ñá túú quide sáá iní-í nùú-n, te ni ìⁿ chivá lihli ñá túú tàxi-n-di caxi díí iní-í-di ndihí cue tée cáháⁿ ndihí-í. ³⁰ Te vitna ní nasáá déhe-n tée ní sáháⁿ ní dándóñuhu díhúⁿ-n ndihí nchaa ñáyiu xĩndecu ichi díí iní. Te ní sahani-n ìⁿ ndicutu numa quití caváha-gá sá cuendá-dé”, cächí-dé xáhaⁿ-dě xii tătá-dě. ³¹ Te ní xáhaⁿ tătá-dě xii-dé: “Yòhó déhe-í ducaⁿ-ni ndècu ndihí ñaha-n xii-í, te nchaa sá ndécú ndihí-í cúu-xí cuendá-n. ³² Te vitna dacuití tàú-xi sá cádá-ó vico, te cudíí iní-ó, chi ñaní-n-áⁿ ñí quide-í cuendá sá ñí xihí-dé ní cùu, te ñáhá chi ndècu vívú-dě, te sa ní xíta-dé ní cùu, te ní nasáá méé-dě”, cächí-dé xáhaⁿ-dě xii déhe-dé tée sàcuéhé-gă-áⁿ —duha cuáháⁿ cuendú ní caní Jèsús nùú-güedě.

16

Nàcuáa ní quide ìⁿ tée tàxi tnuní ñáhá xii cue tée xínu cuechi

¹ Te Jèsús xáhaⁿ-gă xii cue tée xica cuu ndihí-gá:

—Ní xĩndecu ìⁿ tée cuica, te ducaⁿ ñí xĩndecu ìⁿ tée ní taxi tnuní ñáhá xii cue tée ní xínu cuechi nũú-dě. Te tée-áⁿ ñí xini ñáhá ñáyiu dùhu-dé díhúⁿ tée cùu patróóⁿ-dě, te cuáháⁿ-dé dándóñuhu-dé, te ní xáhăⁿ-yu xii tée cùu patróóⁿ-dě sá dúcáⁿ quide-dé. ² Te tée cùu patróóⁿ-dě-áⁿ ñí cana ñaha-dě xii-dé, te ní xáhaⁿ-dě: “¿Ná cuendá duha cáháⁿ ñáyiu cuendá-n? Yáchí chi na tàxi cuendá-n nchaa chiuⁿ ní quide-n, chi vitna te vá táxi tnuní-gá-n

cuè téé xìnu cuechi núù-í”, càchí-dé xǎhaⁿ-dě. ³ Te téé tàxi tnuní ñáhá xìi cue téé xìnu cuechi-áⁿ ñí sani iní-dé: “¿Te nása cada-í vitna na quèhndé pàtróòⁿ-í chiùⁿ-í? Chi ñá cùndè-gá-í cada-í chiùⁿ véé, te cùcahaⁿ núù-í cácaⁿ ndàhú-í. ⁴ Dico duha cada-í cuèndá queheⁿ cuèndá ñáhá ñǎyiu vehé-yu òré ná quèhndé duuⁿ-ná pàtróòⁿ-í chiùⁿ-í”, duha ní sani iní-dé. ⁵ Te sátá dúcáⁿ te ní cana-dé ìⁿ ìⁿ cue téé tàù núú pàtróóⁿ-güedé. Te téé díhna ní xícáⁿ tnúhú-dé núú-dé, te xǎhaⁿ-dě: “¿Ndèé dau tàù-n núú pàtróóⁿ-i?”, càchí-dé xǎhaⁿ-dě. ⁶ Te téé-áⁿ ñí xáhaⁿ-dě: “Tàù-í ìⁿ cièndú bàrríl acítí”, càchí-dé xǎhaⁿ-dě. Te téé tàxi tnuní ñáhá xìi cue téé xìnu cuechi-áⁿ ñí xáhaⁿ-dě: “Iha náu reciú-n-á, te ndadúha ingá sá ùdico úxí taxi-n”, càchí-dé xǎhaⁿ-dě. ⁷ Te dàtnùnì ní xícáⁿ tnúhú tùcu-dé núú ingá-dé, te xǎhaⁿ-dě: “Te yòhó, ¿ndèé dau tàù-n-í?”, càchí-dé xǎhaⁿ-dě. Te téé tàù-áⁿ ñí xáhaⁿ-dě: “Ìⁿ cièndú ngohnchi triù tàù-í”, càchí-dé xǎhaⁿ-dě. Te téé tàxi tnuní ñáhá xìi cue téé xìnu cuechi-áⁿ ñí xáhaⁿ-dě: “Iha náu reciú-n-á, te cadúha ingá sá cùmídícó-ñǎ taxi-n”, càchí-dé xǎhaⁿ-dě. ⁸ Te téé cùu patróóⁿ-áⁿ ñí cachí-dé sá ïo váha ñùhu díquí tēe dùhu-áⁿ nàcuáa cada-dé cundecu váha-dé. Te nchaa ñáyiu xǐndecu ichi cuèhé ichi duha, ío-gá váha ñùhu díquí-yu nàcuáa cadá-yu cundecu váha-yu ndihì nchaa ñáyiu cùndihì-yu dàcúúxí ñáyiu ndècu ichi Yá Ndiõxí.

⁹ Te yúhú càchí-í sá cádá-ndó sǎ vǎha ndihì nchaa sá ndécú ndihì-ndo ní cuáha ñuyíú yícá cuèchi-a, te ducaⁿ te coo cue téé ío váha tnahá tnúhu ndihì-ndo, te òré ná ndihì nchaa sá ío ñuyíú-a, te Yá Ndiõxí queheⁿ cuèndá ñáhá-gǎ xii-ndo, te

cundecu-ndo ndìhi-gá ni caa ni quíhíⁿ.

¹⁰ Te núu ìⁿ téé quède ndáá cuèi ìⁿ chiùⁿ líhli na càda-dé, te òu-ni ducaⁿ quède ndáá-dé cuèi ìⁿ chiùⁿ cahnu na cada-dé. Dico téé ñá túú quède ndáá, chi cuèi chiùⁿ líhli àdi chiuⁿ cahnu na cada-dé dico ìⁿ-ni quède-dé. ¹¹ Te núu nchòhó vá cáda-ndó sá vǎha ndìhi nchaa sá ñi cuáha ñuyú yíca cuèchi-a ña, te Yá Ndiǒxí vá táxí-gǎ sá vǎha ndècu ndìhi-gá xii-ndo. ¹² Te núu vá cáda ndáá-ndó còto-ndo nchaa sá táxí núu tnaaha ñáyi-ndo, te vá yǒo taxi sá ndúú tǎhú-ndó.

¹³ Te ñi ìⁿ téé xìnu cuechi vá ndácú-dě cunu cuechi-dě núú úú pàtróóⁿ, chí téé-áⁿ cuu váha iní-dé núú ìⁿ pàtróóⁿ-dě te tñi-dé nchaa tnúhu càháⁿ pàtróóⁿ tǎe cùu váha iní-dé núú-xi-áⁿ. Te núú ìngá tucu pàtróóⁿ-dě vá cúú vǎha iní-dé, te ñi vǎ tñí-dě tnúhu càháⁿ pàtróóⁿ-dě-áⁿ. Te ducaⁿ sǎtnahá-xi cùu nchóhó chí vá ndácú-ndó cunu cuechi-ndo núú Yá Ndiǒxí te cuhuⁿ iní-ndó nchaa sá ío ñuyú-a —càchí-gá xáhaⁿ-gǎ xii-güedé.

¹⁴ Te nchaa cue téé cùu fariséú ío ñuhu iní-güedé nchaa sá ío ñuyú-a, te xǐndedóho-güedé nchaa tnúhu càháⁿ Jèsús, te ní cáháⁿ yíchí-güedé cuendá-gá. ¹⁵ Te Jèsús ní xáhaⁿ-gǎ xii-güedé:

—Nchòhó cúú-ndó cuè téé ío váha càháⁿ núú ñáyi cuendá-ñi sá cuìní-ndó cǎháⁿ váha-yu cuendá-ndó, dico Yá Ndiǒxí xìní ndáá-gá nàcuáa càa iní-ndó ìⁿ ìⁿ-ndo, te nchaa sá càchí cue ñáyi ñuyú-a sá ío nàndíhi, Yá Ndiǒxí dáquèe tǎhú-gǎ.

Cuendá nchaa tnúhu ní chídó tnùní ndíi Moisés

¹⁶ Te nchaa tnúhu ní chídó tnùní ndíi Moisés cúnù-xi ñi cuu, ndìhi nchaa tnúhu ní chídó tnùní cue téé ní xóo cáháⁿ tnúhu Yá Ndiǒxí ndéé

sanaha. Dico cútnàhá ní ngüíta té Juàá téé ní xóo dacuàndute ñaha xii ñáyiu ní cáháⁿ-dé tnúhu-í, ndéé dàvá-áⁿ ñà túú-gã ní cùnunu nchaa tnúhu ní chídó tnùní ndíi Moisés ndíi nchaa tnúhu ní chídó tnùní cue téé ní xóo cáháⁿ tnúhu Yá Ndiõxí ndéé sanaha. Te ñiu-ni ndéé dàvá-áⁿ ñi quesaha ta tècú tnùní ñáyiu nàcuáa ndíhu ndaha ñàha Yá Ndiõxí xií-yu, te vâi ñáyiu ío sàni iní-yu vitna nàcuáa cadá-yu ndíhu ndaha ñàha Yá Ndiõxí xií-yu. ¹⁷ Te nchaa tnúhu ní chídó tnùní ndíi Moisés ío ndáá càháⁿ-xi, te ndíi-gá naa andíu ndíi ñuyíú dàcúxí sã ndíi ñⁿ ñⁿ tnúhu-áⁿ cada-xi nàcuáa càháⁿ-xi.

*Jèsús càháⁿ-gá cuèndá ñáyiu dàña tnaha
(Mt. 19:1-12; Mr. 10:1-12)*

¹⁸ Te núu ñⁿ téé na dàña tnaha-dé, ndíi ñadíhí-dé, te tnándaha tucu-dé ndíi ingá-yu, te nèhé víhí quide-dé te núu ducaⁿ na càda-dé, te téé na tnándaha ndíi ñaha ní dáñá yì-xi, te ñiu-ni ducaⁿ ñà túú cùu-xi sá vâha te núu ducaⁿ na cadá-yu —càhí-gá xáhaⁿ-gã xii-güedé.

Cuèndá ñⁿ téé nàni Lázarú ndíi cuèndá ñⁿ téé cuica

¹⁹ Te xáhaⁿ tùcu-gá xii-güedé:

—Ní xíndecu ñⁿ téé cuica, te ní xóo cuihnu-dé mee-ni dõó vâha dóó vii càa, te nchaa nduu súuní vâha ní xóo cada-dé vico vehe-dé. ²⁰ Te ní xíndecu tucu ñⁿ téé ndàhú ní xínani-dé Lázarú, te téé-áⁿ ñi cuhú-dé ní xíndéé-dé nitùhú-dé ndíhyi, te ñⁿ nduu ñⁿ nduu ní xóo taxinucóo ñaha-güedé xii-dé yuyèhe téé cuica-ãⁿ. ²¹ Te téé ndàhú-áⁿ ñi xóo cuú-dé docó, te ní xóo cuiní-dé caxi-dé nchaa sá ñà túú-gã ní xõ yáha caxi téé cuica-ãⁿ, te ñà túú ní xõ níhí-dé. Te cuèi iná ní xóo quíhíⁿ-dì ní xóo nayuu-dì nchaa

núú ndĩhyi ndèé-dé-áⁿ. ²² Te ní sáá ìⁿ nduu te ní xíhí tée ndàhú-áⁿ, te cue espíritú xínú cuèchi núú Yă Ndiöxí ndécá ñàha-xi xii-dé cuándaá núú ndécú tē Àbrahám cundecu-dé. Te ní sáá nduu ñí xíhí tée cuica-áⁿ tnàhá-dé, te ní chindúxi ñaha-güedé xii-dé. ²³ Te ní sáá-dé núú xĩndecu nchaa ñáyiu ní xíhí ñá túú ní quide ndáá núú Yă Ndiöxí te xiáⁿ ïo ndòho-dé ndécú-dě, te ní ndonehe núú-dě te xica ñí xiní-dé té Àbrahám ndĩhi té Lăzarú-áⁿ xĩndecu-güedé. ²⁴ Te níhi ní cáháⁿ-dē, te xăhaⁿ-dē: “Yòhó tătá Àbrahám, cundàhú iní ñáhá xii-í, te cúñaha xii té Lăzarú ná dândaxiⁿ-dé díquí ndáhá-dě, te na quixi-dé dandàxiⁿ-dé yàa-í, chi ïo ndòho-í ñùhù-í núú ñùhú núú càyú-a”, càchí-dé xăhaⁿ-dē xii té Àbrahám. ²⁵ Dico té Àbrahám ní xáhaⁿ-dē: “Ndàhú yòhó ñaní tnàhá-í, dandàcu iní sá ïo váha ní xĩndecu-n ñùyíú, te té Lăzarú ïo ndàhú ní ndoho-dé ní xĩndecu-dé. Te vitna ní nucúndecu váha-dé iha, te yòhó ndóhó-n vitna. ²⁶ Te ñá díú-ní să xăⁿ tucu, chi cuádava ndècu ìⁿ déhvá cùnú ñùhú nèhu-xi núú ndécú-ó, te cuèi nchaa ñáyiu xĩndecu iha na càchí iní-yu quixí-yu núú ndécú-ndó dico vá ndácũ-yu, te ni nchòhó vá ndácú-ndó quixi-ndo núú ndécú-ndĩ”, càchí-dé xăhaⁿ-dē. ²⁷ Te ní xáhaⁿ tēe cuica-áⁿ: “Te núu ducaⁿ te càháⁿ ndàhú-í núú yòhó tătá Àbrahám vitna sá téndàha-n té Lăzarú ná quihíⁿ-dé vehe tătà-í, ²⁸ chi ndècu úhúⁿ-gá ñaní-í, te na cúñaha-dě xii-güedé sá vă cádá-güedé dàtná ní quide-í cuendá sá vă quixí-güedé tnàhá-güedé núú ndécù-í ndóhò-í-a”, càchí-dé xăhaⁿ-dē. ²⁹ Te té Àbrahám ní xáhaⁿ-dē: “Mee-güedé ndécú ndĩhi-güedé nchaa tnúhu ní chídó tnúni ndíi Moisés, ndĩhi nchaa tnúhu ní chídó

tnùní cue téé ní xóo cáháⁿ tnúhu Yá Ndiõxí ndéé sanaha, te nchaa tnúhu-áⁿ ná tñi-güedé nàcuáa càháⁿ-xi”, càchí-dé xáhaⁿ-dě xii-dé. ³⁰ Te ní xáhaⁿ tùcu téé cuica-ãⁿ: “Tătá Àbrahám, dico vá cádá cuendá-güedé nchaa tnúhu-áⁿ, dico núu ñⁿ ñáyiu ñá túú-gã ndécú ñùyúú ñⁿ ñáyiu ndècu ndihi-n quíhíⁿ-yu cáháⁿ ndihi ñàhá-yu xii-güedé nàcuáa ndùu tnúhu váha, te ndixi cuéchi iní-güedé nchaa sá ñà túú quide váha-güedé ndécú-güedé, te cada váha-güedé”, càchí-dé xáhaⁿ-dě xii-dé. ³¹ Dico té Àbrahám ní xáhaⁿ-dě: “Te núu ñá túú cuini-güedé tñi-güedé tnúhu ní cáháⁿ ndíi Moisés, ndihi tnúhu ní cáháⁿ cue téé ní xóo cáháⁿ tnúhu Yá Ndiõxí ndéé sanaha ña, te ñu-ni ducaⁿ càda-güedé cuéi ñⁿ ñáyiu ní xíhí ná ndótó-yu cúñàhá-yu nàcuáa ndùu tnúhu váha, chi vá quindáá iní-güedé”, càchí té Àbrahám xáhaⁿ-dě xii téé cuica-ãⁿ –càchí Jèsús xáhaⁿ-gã xii cue téé cùu fariséú.

17

Quihi iní-ó vǎ cùndècu-o ichi cuehé ichi duha
(Mt. 18:6-7, 21-22; Mr. 9:42)

¹ Te Jèsús ní xáhaⁿ-gã xii cue téé xica cuu ndihi-gá:

–Dacui^{tí}í sǎ cóo cuè téé dacàháⁿ-güedé ñáyiu cadá-yu nándi sá cuèhé sá dúhá, j dico ndàhú ní cuu cue téé ducaⁿ na dàcaháⁿ ñàhá xii-yu cadá-yu nándi sá cuèhé sá dúhá! ² Chi váha-gá sá ñùu na dàcutu ndéé ñáyiu ñⁿ yúú yödó dücúⁿ-güedé te dàquée ñàhá-yu xii-güedé xití ndute làmár, te ñá díú sǎ cùndècu-güedé dacàháⁿ-güedé ñáyiu cadá-yu nándi sá cuèhé sá dúhá, cuéi ñáyiu ndàhú iní-xi dandàhú-güedé. ³ Te ío quíhi iní-ndó cùndècu-ndo.

Te núu ìⁿ ñaní tnáhá-ndó quide-dé ìⁿ sá ñà túú tàú-dé cada-dé sá cúú-xí-ndó te cáháⁿ-ndó dõho-dé, te núu ní ndixi cuéchi iní-dé sá ñà túú ní quide váha-dé, te cada càhnu iní-ndó sã ñí quide-dé. ⁴ Te cuèi úsá xito na càda-dé nándi sá ñà túú tàú-dé cada-dé sá cúú-xí-ndó ìⁿ nduu, te núu na quixi-dé úsá xito núú-ndó, te cachí-dé sá vã dúcáⁿ-gã cada-dé, te xìni ñuhu-xi cada cahnu iní-ndó-dé —càchí-gá xáhaⁿ-gã xii-güedé.

Ñáyiú sàndáá ndisa iní-xi

⁵ Te ní xáhaⁿ cuè téé xìca cuu ndìhi Jesús xii-gá:

—Chindee ñàha xii-ndí cuèndá ducaⁿ te quíndáá-gá iní-ndí sá Yã Ndiõxí ndácú-gã quidé-gã nchaa sá vãha —càchí-güedé xãhaⁿ-güedé xii-gá.

⁶ Te ní xáhaⁿ Jèsús:

—Te núu nchòhó quíndáá ndisa iní-ndó sũúni cuèdicó luha líí dàtná cuíní-ndó càa ìⁿ ndíquíⁿ yutnu nàni mostázá, te ducaⁿ te cuu cúñaha-ndo xii ìⁿ yutnu: “Quene-n ìha te quíhíⁿ-n cuìhnu-n xití làmár”, duha cúñaha-ndo. Te ducaⁿ càda-xi te núu na quíndáá ndisa iní ñáhá-ndó xii-í —càchí-gá xáhaⁿ-gã xii-güedé.

Nàcuáa tàú ìⁿ téé xìnu cuechi cada-dé

⁷ Te xãhaⁿ tùcu-gá xii-güedé:

—Te núu ìⁿ nchòhó ndécú ìⁿ téé xìnu cuechi núú-ndó, te cuáháⁿ-dé yucu cuàngada chiúⁿ-dé, àdi cuáháⁿ-dé yucu coto-dé quitì, te òré ní nasáá-dé vehe sá ñí sáháⁿ-dé yucu, te vá cũñaha nchòhó cue téé cùu patróóⁿ-dè xii-dé: “Yáchí nehé caxi-n dítá”, vá dúhá cũñaha-ndo. ⁸ Chi nchòhó cue téé cùu patróóⁿ-dè cúñaha-ndo xii-dé: “Cundií iní cada

túha sá cúdini-í, te díhna-gá-í caxi-í dítá te dǎtnùní caxi-n”, duha cúñaha nchòhó cue tée cùu patróón xii-dé. ⁹ Te òré ná ndíhí chiuⁿ ní táhú nchòhó cue tée cùu patróón cada tée xìnu cuechi núú-ndó, te ñá túú tàú-ndó ndàcáⁿ táhú-ndó núú tée xìnu cuechi núú-ndó. ¹⁰ Te duha càháⁿ-í chi núu òré ná ndíhí nchaa chiuⁿ ní táhú Yă Ndiõxí cada-ndo, te cachí-ndó: “Nchúhú cúú-ndǐ cue tée xìnu cuechi núú Yă Ndiõxí, dico ñá túú tàú-gá ndacáⁿ táhú-gǎ núú-ndǐ, chi mee-ni chiuⁿ ní táhú-gǎ ní quide-ndǐ”, duha cachí-ndó —càchí-gá xáhaⁿ-gǎ xii-güedé.

Jèsús quidé tǎtna-gá úxí cue tée tnàhá cuéhé sǎ dátèhyú nihnu-xi yiqui cùñú ñáyiu

¹¹ Te ñuhu Jesús ichi cuáháⁿ-gá ñuu Jerusálén, te ní yáha-gá núú ràyá distritú Sàmariá ndíhí distritú Galileá. ¹² Te ta cùyatni-gá ìⁿ ñuu líhli cuáháⁿ, te ní sátnahá ñáhá úxí tnàhá cue tée cùhú xii-gá, te tnàhá-güedé cuéhé sǎ dátèhyú nihnu-xi yiqui cùñú-ó dico xica lùha ní ngúnu tnǐ-güedé, ¹³ te níhi ní cáháⁿ-güedé, te xáhaⁿ-güedé xii Jèsús:

—jMèstrú, cundàhú iní ñáhá xii-ndí! —
càchí-güedé xáhaⁿ-güedé xii-gá.

¹⁴ Te òré ní xiní ñáhá Jèsús xii-güedé, te ní xáhaⁿ-gǎ:

—Chí cuáháⁿ núú dütú ná cùndehe ñaha-dé xii-ndo —càchí-gá xáhaⁿ-gǎ xii-güedé.

Te ní xica-güedé cuáháⁿ-güedé, te ichi-ni ñuhu-güedé cuáháⁿ-güedé ní ndúha-güedé cuéhé tnàhá-güedé. ¹⁵ Te nchaa-güedé ní cutnùní iní-güedé sá ñí ndúha-güedé, dico ìⁿ-ni-dé ní nacuico-dé, te ní ngüíta-dé níhi ní cáháⁿ-dé, te ní cachí-dé sá ìo càhnu cuu Yă Ndiõxí. ¹⁶ Te ní

ngüíñí xítí-dě núú Jèsús, te ní nuu núú-dě ndàa núú ñúhú ndàcáⁿ táhú-dě núú-gă. Te téé-áⁿ cúú-dě téé distritú Sàmariá. ¹⁷ Te Jèsús ní cachí-gá:

—Úxí tnàhá-güedé ní ndúha cuéhé tnàhá-güedé. ¿Te ndèé ndécú dàva-gá-güedé-i? ¹⁸ ¿Te náa ìⁿdìi-ni téé ìngá ñuú-a ní nacuíco-dě ndàcáⁿ táhú-dě núú Yă Ndiöxí, te cächí-dé sá ìo càhnu cuu-gá ñă? — cächí-gá.

¹⁹ Te ní xáhaⁿ-gă xii téé-áⁿ:

—Ndacuíñí te núhú-n, chi sa ní ndúha-n cuéhé tnàhá-n, chi ní sándáá iní-n Yă Ndiöxí —cächí-gá xáhaⁿ-gă xii-dé.

Nàcuáa yìndaha ñaha Yá Ndiöxí

(Mt. 24:23-28, 36-41)

²⁰ Te cue téé cùu fariséú ní xícáⁿ tnúhú-güedě núú Jèsús nùu ná ama ngüíta Yá Ndiöxí ndíhu ndaha-gă ñáyiu. Te ní xáhaⁿ-gă:

—Ñá túú ñă cada-xi ñuyíú quini-ndó cuendá cutnùní iní-ndó sã ndíhu ndaha ñàha Yá Ndiöxí xii-ndo. ²¹ Te ni vã yõo cachí: “Iha ndècu-gá táxí tnùnigá, àdi yacáⁿ ndécú-gă táxí tnùnigá”, chi tnuú-ndó sà ndecu-gá ndíhi nchaa ñáyiu yìndaha-gá —cächí-gá xáhaⁿ-gă xii-güedé.

²² Te ní xáhaⁿ-gă xii cue téé xìca cuu ndíhi-gá:

—Te nchòhó chi sáá nduu, te cachí iní-ndó sã sũúní cuèdicó ìⁿ nduu quini ñáhá-ndó xii yúhú Téé cùu ñhaní tnáhá-ndó nchàa-ndo, dico vá quini ñáhá-gă-ndó xì-í. ²³ Te coo ñáyiu cúñáhá-yu xii-ndo: “Iha ndècu-gá, áⁿ yacáⁿ ndécú-gă”, quesàhá-yu cúñáhá-yu xii-ndo. Dico vá quindáá iní-ndó quíhíⁿ-ndó ndíhí-yu núú cächí-yu, te ni

vã cání iní-ndó quĩhíⁿ méé-ndó. ²⁴ Chi dàtná cuíní-ndó quide-xi oré sàá ndúté àndiu, chi uuⁿni dàyehé-xi nihíi ñuyíú, ducaⁿ càda-xi nduu na quixi tucu yúhú Tée cùu ñaní tnáhá-ndó nchàa-ndo, te dàvá-áⁿ quiní ñáhá nchàa-ndi túhú ñáyiú xii-í. ²⁵ Dico díhna-gá ndoho vìhi-í, te daquèe tíhú ñáhá ñáyiú ñuyíú-a xii-í. ²⁶ Te cadá-yu dàtná ní guide ñáyiú ní xíndecu cútnáhá ní xíndecu té Nőé, te diu-ni ducaⁿ sãtnahá-xi cada nchaa ñáyiú ndècu vitna ndéé sáá nduu quixi tucu yúhú Tée cùu ñaní tnáhá-ndó nchàa-ndo. ²⁷ Chi caxi-ní-yu, coho-ní-yu, te caca cuu-ni cue tée xica ndáhú, te tnãndaha-ní-yu, chi ducaⁿ ñi quidé-yu dàvá-áⁿ ndéé ní sáá nduu cuãnguee té Nőé xití bàrcú, te ní ngúíta-xi ní cuuⁿ dáú ñi ndaa ndute ñuyíú, te nchaá-yu ní xihí ní cáhá-yu dàvá-áⁿ. ²⁸ Te diu-ni ducaⁿ ñi quide tucu ñáyiú cútnáhá ní xíndecu té Lőt, chi xexí-yu xihí-yu, te sàáⁿ-yu te nãdicó-yu, te xixitú-yu nãndi sá xixitú-yu, te nchaa cue tée xídácáá-güedě vehe. ²⁹ Te òré ní quee té Lőt ñuú Sòdomá, te ní ngoyo ñuhú andiu, te dàcá yúú sũúni dícó ní nduu ñuhú-ñã-xi, te ní xihí nchaandi túhú ñáyiú ñuú-áⁿ. ³⁰ Te diu-ni ducaⁿ sãtnahá-xi cada ñáyiú na sáá nduu quixi tucu yúhú Tée cùu ñaní tnáhá-ndó nchàa-ndo ñuyíú-a.

³¹ Te núu ñiⁿ ñáyiú càndodó-yu díquí véhě-yu nduu-ãⁿ, te ñi vá ndĩhu-gá-yu quehéⁿ-yu ñiⁿ ndachíúⁿ-yu canehé-yu quĩhíⁿ, te ñáyiú cuáháⁿ yucu, te ñi vá ñuhú-gá-yu vehé-yu. ³² Te chí dándàcu iní nãcuáa ní yáha ñadĩhí té Lőt. ³³ Te nchaa ñáyiú cuíní dàcácu nihnu mee-xi ñuyíú-a ña, te cuíta nihnú-yu, te nchaa ñáyiú na cùú sá

cuèndá-í, te naníhí tàhú-yu.

³⁴ Te na càchí tnúhu tucu-í xii-ndo sã ndùu-án, te núu úú-yu càa ìⁿ núú xĩto, te ìⁿ-yu ndanchitá-yu ndaá-yu andiu, te ìⁿ-yu quendóo. ³⁵ Te núu úú ñáyiú ðìhí nchícõ-yu ìⁿ-ni vèhe, te ìⁿ-yu ndanchitá-yu ndaá-yu andiu, te ìⁿ-yu quendóo. ³⁶ Te núu úú cue téé yìhì-güedé yucu, te ìⁿ-dé ndànchita-dé ndaa-dé andiu, te ìⁿ-dé quendóo — càchí-gá xáhaⁿ-gã xii-güedé.

³⁷ Te sá dúcáⁿ ñí cáháⁿ-gá nõu ní xícáⁿ tnúhú-güedé núú-gã, te xáhaⁿ-güedé xii-gá:

—Mèstrú, ¿te ndéé ducaⁿ càda-xi-i? —cachí-güedé xáhaⁿ-güedé xii-gá.

Te ní xáhaⁿ-gã:

—Te nchòhó xìní-ndó sã ncháá nõú yúcú yìqui cuñú ní xíhí, te yacáⁿ tàcá cue ndixíí xéxí-güedé — cachí-gá xáhaⁿ-gã xii-güedé.

18

Jèsús càháⁿ-gá cuèndá ìⁿ juéxí ndìhì cuèndá ìⁿ ñaha quèé

¹ Te Jèsús ní caní-gá ìⁿ cuèndú núú-güedé cuèndá sá vã ná tũhú iní-güedé cáháⁿ ndìhì-güedé Yã Ndiõxí nchaa-ni òré. ² Te xáhaⁿ-gã:

—Ìⁿ ñuú ndécú ìⁿ juéxí, te ni ñà túú sàndáá iní-dé Yã Ndiõxí, te ni ìⁿ tnúhu xáhaⁿ ñáyiú ñá túú cuìní-dé cada cuèndá-dé. ³ Te ðiu-ni ñuú-áⁿ ndécú tùcu ìⁿ ñadihí ñaha quèé, te ní sáháⁿ-aⁿ càháⁿ ndàhú-aⁿ núú juéxí-áⁿ cuèndá cada ndáá-dé ìⁿ cuéchi. ⁴ Te titní xito ní cuu sáháⁿ-aⁿ càháⁿ ndàhú-aⁿ núú-dé te ñá túú cuìní-dé cada cuèndá-dé tnúhu càháⁿ-aⁿ ni cùu,

te ndéé núú ñà cúú-gă te ní sani iní-dé: “Te cuëi ñá túú sàndáá iní-í Yă Ndiöxí, te ni ñà túú quide cuendá-í nchaa tnúhu càháⁿ ñáyiú cada-í, ⁵ dico na càda ndáá-í cuendá ñaha queé-a ndihí ñáyiú cùu úhú iní tnáhá ndihí-aⁿ, chi vá cùndè-gá iní-í nuu núu quixi-aⁿ dasàtú iní ñáhá xii-í”, duha ní sani iní téé cùu juéxí-áⁿ —càchí-gá xáhaⁿ-gă xii-güedé.

⁶ Te ní xáhaⁿ tùcu-gá xii-güedé:

—Cada cuendá-ndó nàcuáa ní sani iní juéxí téé cuihna iní-xi-áⁿ. ⁷ Te Yă Ndiöxí ío chindee-gá nchaa ñáyiú ní cáháⁿ-gá cundecu ndihí-gá, chi cuëi nduu cuëi niú càháⁿ ndihí ñáhá-yu xii-gá, te vá cùyàa-gá nachinaa-gá nchaa sá quidé ñaha nchaa ñáyiú cùu úhú iní ñáhá xii-yu. ⁸ Te ío ndihí ducaⁿ càda-gá. Te òré ná quixi yúhú Téé cùu ñaní tnáhá-ndó nchàa-ndo, ¿te náa naníhí-gă-í ñáyiú sàndáá ndisa iní Yă Ndiöxí-ăⁿ? —càchí-gá xáhaⁿ-gă xii-güedé.

Nàcuáa quide ñⁿ téé cùu fariséú ndihí ñⁿ téé cùu cobradór

⁹ Te Jèsús ní cáháⁿ-gá núú ñáyiú nàcuáa quide ñáyiú sàni iní sá ío quide ndáá te dàquee tíhũ-yu tnàha ñáyiú-yu, te xáhaⁿ-gă xii-yu:

¹⁰ —Úú cue téé cuáháⁿ-güedé veñúhu càhnu sá ío cùnuu cáháⁿ ndihí-güedé Yă Ndiöxí, te ñⁿ-dé cúú-dě téé cùu fariséú, te ñngá-dé cúú-dě téé cuihna iní-xi quide cobra ñáhá xii ñáyiú cuendá impuèstú.

¹¹ Te téé cùu fariséú-áⁿ nútní-dé càháⁿ ndihí-dé Yă Ndiöxí, te xáhaⁿ-dë xii-gá: “Yöhó Dútú Ndiöxí ndàcáⁿ táhù-í núú-n, chi ñá túú quide-í dàtná quidé dàva-gá-güedé, chi dùhu-güedé, càháⁿ ndihí-güedé ñadìhí te ñá díú ñadìhí-güedé cúũ-yu, te nándi-gá

nchaa sá cuèhé sá dúhá quède-güedé, te ni ñà túú quède-í dàtná quidé tée cuihna ìní-xi quède cobrá ñáhá xii ñáiyu cuèndá impuèstú ndécú ìha. ¹² Chi yúhú ñá túú tnàhí ná xéxì-í úú nduu xití samàná cuèndá sá càháⁿ ndihì ñaha-í xii-n, te nchaa sá ñihí-í te càhu-í úxí xichi, te ìⁿ xichi tàxi-í xii-n”, càchí-dé xăhaⁿ-dě xii Yá Ndiöxí. ¹³ Dico tée cuihna ìní-xi quède cobrá ñáhá xii ñáiyu cuèndá impuèstú-án chi xica lùha nutnî-dé, te ni lùha ñá túú cùyî-dé ndonehe núú-dě andiü cuèndá sá ndíxí cuèchi ìní-dé nchaa sá ñà túú vâha quède-dé, te ndèdí ndaha-dé pèchú-dé sá ndìhú ìní-dé, te xăhaⁿ-dě xii Yá Ndiöxí: “¡Yòhó Dútú Ndiöxí cundàhú ìní ñáhá xii-í, chi ío cuèhé sã ñà túú vâha quède-í núú-n!””, càchí-dé xăhaⁿ-dě xii Yá Ndiöxí. ¹⁴ Te na càchí tnúhu-í xii-ndo sã tée cuihna ìní-xi quède cobrá ñáhá xii ñáiyu-án ñí tedóho Yá Ndiöxí nchaa tnúhu ní cáháⁿ-dé, te ní quède càhnu ìní-gá nchaa sá ñà túú vâha ní quède-dé, te cuánuhú-dé vehe-dé. Te tée cùu fariséú-án ñà túú ní tédóho ñaha Yá Ndiöxí xii-dé. Chi nchaa ñáiyu na càda cahnu mee-xi ñuyíú-a te vá cúü-yu ñáiyu cùnuu, te nchaa ñáiyu ñá túú quède cahnu mee-xi, ñáiyu-án cunúú-yu –càchí Jèsús xáhaⁿ-gã xií-yu.

Jèsús quidé ï-gã landú

(Mt. 19:13-15; Mr. 10:13-16)

¹⁵ Te ìⁿ ũú ñáiyu ndècá-yu landú ìhli cuáháⁿ núú Jèsús chi cuìní-yu sá téndàha ñaha-gá xii-güexi, te òré ní xiní cue tée xica cuu ndihì-gá sá ndécã-yu landú-án cuăháⁿ núú-gã, te ní ngüíta-güedé ténàá ñáhá-güedě xií-yu, te xăhaⁿ-güedě sá vã dúcáⁿ càdá-yu. ¹⁶ Dico Jèsús ní cana ñaha-gã xii-güedé, te ní xáhaⁿ-gã:

—Chí dáńá ná quìxi nahi landú lĩhli-áⁿ nũ-í-a, te vá càdí-ndó ìchi-güexi, chi dàtná cúú vãha iní cue landú lĩhli-áⁿ ducaⁿ cùu váha iní cue ñáyiu yìndaha ñaha Yá Ndiõxí. ¹⁷Te na cãchí tnúhu ndáá-í xii-ndo sã nũu vá quìndáá iní ñáhá-ndó dàtná quidé dàva landú lĩhli sàndáá iní ñáhá xì-í, te vá ndĩhu ndaha ñaha Yá Ndiõxí xii-ndo, te vá ndúú tãhú-ndó cùndecu-ndo ndihí-gá ni caa ni quíhíⁿ —cãchí-gá xáhaⁿ-gã xii-güedé.

Īⁿ tée cuica càháⁿ ndihí-dé Jèsús
(Mt. 19:16-30; Mr. 10:17-31)

¹⁸Te ĩⁿ tée cùnuu ní xícáⁿ tnúhú-dě núú Jèsús, te xãhaⁿ-dě xii-gá:

—Yòhó Mèstrú, cùu-n tée ío váha iní-xi, te cuìní-í nũu vá cùndèe iní-n cãchí tnúhu-n nã cúú sã vãha cada-í cuèndá nduü tãhú-í cundecu-í ndihí Yá Ndiõxí ni caa ni quíhíⁿ —cãchí-dé xãhaⁿ-dě xii-gá.

¹⁹Te Jèsús ní xáhaⁿ-gã xii-dé:

—¿Te cùtnuní iní-n nãcuáa ndùu tnúhu càháⁿ-n sã yũhú váha iní-ãⁿ? Chí ĩⁿdìi díi-ni Yá Ndiõxí váha iní-gá. ²⁰Te yòhó xìní-n nãcuáa ní cachí Yã Ndiõxí cada ñáyiu, te duha ní cachí-gá: “Nchòhó cue tée vá càháⁿ ndihí-ndo ñàdihí te núu ñã díú ñàdihí-ndó cùú-yu, te ducaⁿ-ni nchòhó cue ñáyiu dìhí tucu vá càháⁿ ndihí-ndo tẽe te núu ñã díú yì-ndo cuu-güedé, te vá cáhni-ndó tnàha ñáyiu-ndo, te ni vã dúhú-ndó sã ndécú ndihí-yu, te ni vã dácàcu-ndo cuéchi neñuú sá cúú-xí tnàha ñáyiu-ndo, te canehe-ndo sã yìñùhu núú tãtá-ndó ndihí núú ñãná-ndó”, duha ní cachí Yã Ndiõxí cada ñáyiu —cãchí Jèsús xáhaⁿ-gã xii-dé.

21 Te té-e-áⁿ ñí xáhaⁿ-dě xii-gá:

—Nchaa xíǎⁿ ní ngüíta-í quídè-í ndéé cútnàhá cúú làndú-í —càchí-dé xǎhaⁿ-dě xii-gá.

22 Te Jèsús ní xáhaⁿ-gǎ xii-dé:

—Dico cùmání ìngá núú sǎ cádá-n, vitna te quíhíⁿ-n te dico-n nchàa sá ndécú ndíhi-n, te díhúⁿ-n cuǎha táhú-n cuè ñáyiu ndàhú, te ducaⁿ te nduu táhú-n cùndecu váha-n núú ndécú Yǎ Ndiǒxí táxí tnùnì-gá, te na yǎha ducaⁿ càda-n te quixi-n chitnahá ñáhá-n xì-í —càchí-gá xáhaⁿ-gǎ xii-dé.

23 Te sá dúcáⁿ ñí xáhaⁿ Jèsús xii-dé, te ío ní cundìyí-dé, chí ío cuica-dě. 24 Te sá ñí xiní ñáhá Jèsús xii-dé cundìyí-dé, núu ní cachí-gá:

—¡Ío úhú quíndáá iní ñáyiu cuica Yǎ Ndiǒxí cuèndá ndíhu ndaha ñàha-gá xií-yu! 25 Te yáchí-gá yáha ñⁿ caméyu yaú ñⁿ yiqui tìcú dàcúúxí sǎ quíndáá iní ñⁿ ñáyiu cuica Yǎ Ndiǒxí cuèndá ndíhu ndaha ñàha-gá xií-yu —duha ní cachí-gá.

26 Te nchaa ñáyiu ní tecú dóho-xi tnúhu ní cáháⁿ-gá ní xáhǎⁿ-yu xii-gá:

—¿Te yoo naníhí tǎhú te núu ducaⁿ vàiⁿ? —càchí-yu xǎhǎⁿ-yu xii-gá.

27 Te Jèsús ní xáhaⁿ-gǎ xií-yu:

—Cue ñáyiu ñuyíú-a chí vá ndácǔ-yu ná cadá-yu nàcuáa ndíhu ndaha ñàha Yá Ndiǒxí xií-yu, dico mee-gǎ chí ndacu-gá ndíhu ndaha ñàha-gá xií-yu chí nchaa sá vǎha ndàcu-gá quídé-gǎ —càchí-gá xáhaⁿ-gǎ xií-yu.

28 Te té Pèlú ní xáhaⁿ-dě xii-gá:

—Nchúhú ní dándõo-ndí nchaa sá ndécú ndìhi-ndí, te ní tuha ñaha-ndí xii-n —càchí-dé xáhaⁿ-dë xii-gá.

²⁹ Te ní xáhaⁿ-gã xii ñáyiu:

—Na càchí tnúhu ndáá-í xii-ndo sã ncháá ñáyiu na dándóo vehe-xi, àdi tátá-xi, nǎná-xi, ñaní-xi, cúha-xi, ñadihí-xi, déhe-xi cuendá sá cuení-yu ndíhu ndaha ñàha Yá Ndiõxí xii-yu, ³⁰ te ío-gá cuéhé sã cuãñaha-gã xii-yu cundecu ndihí-yu, te ñá díú-ní xǎⁿ, chi tnàhá nduu táhũ-yu cundecu ndihí ñàhá-yu xii-í ni caa ni quíhíⁿ ná sàá nduu —càchí-gá xáhaⁿ-gã xii-yu.

*Jèsús càháⁿ tucu-gá sá cáhni ñàha-güedé xii-gá
(Mt. 20:17-19; Mr. 10:32-34)*

³¹ Te Jèsús ní taudíⁿ-gá ndi ùxúú cue téé xìca cuu ndihí-gá tnuú ñáyiu, te ní xáhaⁿ-gã xii-güedé:

—Vitna te quíhíⁿ-ó ñùú Jerusàlén, chi yàcáⁿ cada-xi nchaa nàcuáa sa ní chídó tnùní cue téé ní xóo cáháⁿ tnúhu Yá Ndiõxí ndéé sanaha nàcuáa yáha yúhú Téé cùu ñaní tnàhá-ndó nchàa-ndo.

³² Chi cuáha cuendá ñàhá-güedé xii-í núú cuè téé ñá túú cùu cue téé isràél, te cudíquí ndeé ñàhá-güedé xii-í, te cúcuéhé ñàhá-güedé, te tíú díí ñàhá-güedé xii-í. ³³ Te caniha-güedé ndihí ñíí, te dǎtnùní cahni ñàha-güedé xii-í, dico nduu úní sá cùú-í te ndoto-í —càchí-gá xáhaⁿ-gã xii-güedé.

³⁴ Dico ni ñíⁿ tnúhu ní cáháⁿ-gá ñá túú ní tècú tnùní-güedé, chi ío yídáhu tnúhu ní cáháⁿ-gá ñùu xǎⁿ ni ñíⁿ ñá túú ní tècú tnùní-güedé.

*Jèsús quidé tǎtna-gá núú ñⁿ téé cuàá ñúú Jericó
(Mt. 20:29-34; Mr. 10:46-52)*

³⁵ Te òré tá cùyatni Jèsús ñúú Jericó cuáháⁿ, te yuhu ìchi cuáháⁿ-gá-áⁿ núcõo ñⁿ téé cuàá xicáⁿ ndàhú-dé. ³⁶ Te òré ní tecú dóho-dé xicáháⁿ vài ñáyiu xiyáha-yu, te ní xicáⁿ tnúhú-dě núú ñáyiu ndècu ndihí-dé ná cuendá ducaⁿ vài-yu yáha. ³⁷ Te ní xáhãⁿ-yu sá Jèsús téé ñúú Nazàrét ñúhú-dě ichi. ³⁸ Te níhi ní cáháⁿ-dé, te xáhaⁿ-dě xii-gá:

—Jèsús ñaní tnáhá ndïi Dàvií, cundàhú iní ñáhá xii-í! —càchí-dé xáhaⁿ-dě xii-gá.

³⁹ Te ñáyiu xixódó núú nùú Jèsús ní tenàá ñáhãⁿ-yu xii-dé, te xáhãⁿ-yu sá ná càdí-dé yuhu-dé dico uuⁿ-gá níhi ní cáháⁿ-dé xáhaⁿ-dě xii-gá:

—Yòhó téé cùu ñaní tnáhá ndïi Dàvií, cundàhú iní ñáhá xii-í! —càchí-dé xáhaⁿ-dě xii-gá.

⁴⁰ Te Jèsús ní ngüíñí-gá, te ní táúchíúⁿ-gã ní sángueheⁿ ñaha cuè téé ndihí-gá. Te òré ní quexìo-dé núú-gã, te ní xicáⁿ tnúhú-gã núú-dě, te xáhaⁿ-gã:

⁴¹ —¿Ná cuìní-n càda ñaha-í xii-n-í? —càchí-gá xáhaⁿ-gã xii-dé.

Te téé cuàá-áⁿ ñí xáhaⁿ-dě:

—Mèstrú, cuìní-í cada tátna-n nùu-í cuendá cundehe-í —càchí-dé xáhaⁿ-dě xii-gá.

⁴² Te Jèsús ní xáhaⁿ-gã:

—Sa ní ndúha núú-n chi ní sándáá iní-n Yã Ndiõxí —càchí-gá xáhaⁿ-gã xii-dé.

⁴³ Te òré-ni-áⁿ ñí ndúha núú-dě, te ní chinchícúⁿ-dé Jèsús, te ní cachí-dé sá ïo càhnu cuu Yá Ndiõxí. Te nchaa ñáyiu ní xiní nàcuáa ní cuu ní ndúha núú-dě tnáhãⁿ-yu ní cachí-yu sá ïo càhnu cuu Yá Ndiõxí.

19

Jèsús ndìhi ìn tée nàni Zaqueú

¹ Te Jèsús ní sáá-gá ñuú Jerìcò, te ta yãha-gá xití ñuú-án cuãháⁿ. ² Te ñuú-án ndécú ìn tée cuica nàni-dé Zàqueú, te cùnuu-dé táxí tnùnì-dé cue tée cùndìhi-dé, cue tée cuihna ìní-xi quìde cobrá ñhá xì ñáyìu cuèndá impuèstú. ³ Te tée-án cuìní-dé quìnì-dé Jèsús òré-án ní cùu te ñá ní ndàcu-dé, chi ío cuéhé ñáyìu, te ñá túú dùcúⁿ-dé. ⁴ Te xìnu-dé ní ngódó núú-dě te ní sáá-dé díquí ìn yutnu sìcómorú nùtnì yatni yuhu ìchi núú yãha Jèsús cuèndá cuìní-dé quìnì ñáhá-dě xii-gá. ⁵ Te òré tá yãha Jèsús xíaⁿ, te ní ndonehe núú-gã díquí yutnu núú cándòdo-dé-án, te ní xáhaⁿ-gã xii-dé:

—Zàqueú, tanùu ndìhi díquí yutnu-án, chi tnaví quexìo-í vehe-n ndètatú-í —càchí-gá xáhaⁿ-gã xii-dé.

⁶ Te té Zàqueú-án ñ nuu ndìhi-dé díquí yutnu-án, te ío ní cudí ìní-dé ní queheⁿ cuèndá-dé Jèsús vehe-dé. ⁷ Te sá ñ xìnì ñáyìu ní quexìo Jèsús vehe-dé, te nchaá-yu ní ngüíta-yu càháⁿ cuéhé-yu cuèndá-gá, te xìtnàhá-yu:

—Tée-a cuánguihu-dé vehe ìn tée ndècu ichi cuehé ichi duha —càchí-yu xìtnàhá-yu.

⁸ Te té Zàqueú-án ñ ndacuñí-dé tnuú-yu, te xãhaⁿ-dě xii Jèsús:

—Yòhó Mèstrú, na cuãha-í ñáyìu ndàhú cuádava nchaa sá ndécú ndìhi-í. Te núu yoo ní dándàhú-í ní dúhù-í, te codo ùní-gá tnàhá sá ñ dúhù-í-yu nacuañaha-í xii-yu —càchí-dé xãhaⁿ-dě xii-gá.

⁹ Te Jèsús ní xáhaⁿ-gã xii té Zàqueú:

—Vitna ní naníhí tàhú-n ndìhì nchaa ñáyiú xĩndecu vehe-n, chí tnàhá-n cùu-n ñaní tnàhá ndĩi Àbrahám. ¹⁰ Te yúhú Tée cùu ñaní tnàhá-ndó nchàa-ndo véxi-í nándùcu-í ñáyiú ní xíta nihnu cuèndá dàcácu nihnu-í-yu núú ùhú núú ndàhú — càchí-gá xáhaⁿ-gã xii-dé.

Nàcuáa ní quide-güedé ndihì díhúⁿ cuàáⁿ
(Mt. 25:14-30)

¹¹ Te nchaa ñáyiú-áⁿ ñí sani iní-yu sá ndìhì-ni ndíhu ndaha ñàha Yá Ndiõxí xii-yu cuèndá sá ñí cuyatni Jèsús ñuú Jerusàlén, te xíáⁿ ñúu ní ngüíta Jèsús ní cani-gá ñⁿ cuèndú núú-yu cuèndá tecú tnùnì váha-yu tnúhu-gá. ¹² Te xáhaⁿ-gã xii-yu:

—Ní xĩndecu ñⁿ tée cùu ñaní tnàhá ñáyiú cùnuu, te cuáháⁿ-dé ingá ñuú xícá cuèndá yàcáⁿ cuáha ñaha-güedě chùuⁿ coo-dé, te dàtnùnì ndixi-dé quíndaha-dě títí ñuú. ¹³ Te cùmání-gã quee-dé quíhíⁿ-dé, te ní cana-dé úxí cue tée xĩnu cuechi núú-dě, te ní sáñaha-dě ndí dííⁿ núú-güedě ñⁿ caa ñⁿ caa díhúⁿ cuàáⁿ, te ní xáhaⁿ-dě: “Chí cádá ndàhú ndihì díhúⁿ-áⁿ ndéé ná sàá nduu nàsáá-í”, càchí-dé xáhaⁿ-dě xii-güedé. ¹⁴ Dico nchaa ñáyiú ñuú

quíndaha-dě-áⁿ ñà túú tnàhá iní-yu sá quíndàha ñaha-dé, núu ní tendàhá-yu cue tée nèhe tnúhu cuáháⁿ núú cuè tée cuáñaha chùuⁿ coo-dé-áⁿ, te ní xáhãⁿ-yu sá cũñaha-güedě sá ñà túú tnàhá iní-yu sá tée-áⁿ quíndaha ñaha-dé xii-yu. ¹⁵ Dico dacuítí sã ñí sáha-güedé tée-áⁿ chùuⁿ coo-dé sá díú-dě quíndaha-dě ñáyiú nchaa ñuú-áⁿ, te ní nacuico-dě cuánuhú-dé ñuú-dé. Te òré ní nasáá-dé vehe-dé, te ní tendaha-dě ñⁿ tée ní sánúcana ñaha

xìi cue tée xìnu cuechi núú-dě, cue tée ní dándõ ndaha-dě dîhúⁿ cuendá cácaⁿ tnúhú-dě núú-güedě ìⁿ ìⁿ-güedé nõu ndèé dau ní chídó-xí dĩquí dĩhúⁿ sã nĩ dándõ ndaha ñàha-dé-áⁿ. ¹⁶ Te tée ní ndèxio dĩhna xãhaⁿ-dè: “Pàtróóⁿ, ní quide-í ndáhú ndìhì dĩhúⁿ-n sã nĩ dándõ ndaha ñàha-n xii-í, te sá ìⁿ nĩ taxi-n te ní chídó-xí ùxí-gá tnàhá te náu-a naqueheⁿ cuendá-n”, càchí-dé xãhaⁿ-dè. ¹⁷ Te tée cùu patróóⁿ-dè-áⁿ nĩ xãhaⁿ-dè: “Ío váha tée xìnu cuechi cuu-n chi ío váha ní quide-n, te sá nĩ quide váha-n ndìhì sacú dĩhúⁿ sã nĩ dándõ ndaha ñàha-í xii-n, te xíãⁿ nõu yúhú càchí-í sá táxí tnùnì-n ùxí ñuú vitna”, càchí-dé xãhaⁿ-dè. ¹⁸ Te ní ndèxio ingá-dé, te ní xãhaⁿ-dè: “Pàtróóⁿ, ní quide-í ndáhú ndìhì dĩhúⁿ-n sã nĩ dándõ ndaha ñàha-n xii-í, te sá ìⁿ nĩ taxi-n te ní chídó-xí ùhúⁿ-gá tnàhá te náu-a naqueheⁿ cuendá-n”, càchí-dé xãhaⁿ-dè. ¹⁹ Te ní xãhaⁿ tée cùu patróóⁿ-dè-áⁿ xii-dé: “Te yòhó taxi tnùnì-n ùhúⁿ ñuú”, càchí-dé xãhaⁿ-dè xii tée xìnu cuechi-áⁿ. ²⁰ Te dătnùnì ní ndèxio tucu ingá-dé, te xãhaⁿ-dè: “Pàtróóⁿ, náu dĩhúⁿ-n-á, te naqueheⁿ cuendá-n chi ní taxúha-í ní chidúcúⁿnuu-í ìⁿ pãñú te ñá túú ní quide-í ndáhú ndìhì dĩhúⁿ-n, ²¹ chi ní yùhú ñàhà-í xii-n, chi cùu-n ìⁿ tée dĩí, te nàqueheⁿ-n ìⁿ sá ñà túú ní tàxi ndecu-n, te nàtahu-n ìⁿ xichi núú ñà túú ní chìhi-n tatá”, càchí-dé xãhaⁿ-dè xii pàtróóⁿ-dè. ²² Te ní xãhaⁿ pàtróóⁿ-dè xii-dé: “Yòhó cúú-n ìⁿ tée cuihna ìní-xi xìnu cuechi núù-í, te dĩu-ni nchaa tnúhu càháⁿ-n-ãⁿ càchí tnùnì-xi nàcuáa cuu ndáá cuéchi-n. Te nõu sàni ìní-n sã cùú-í ìⁿ tée dĩí, te nàqueheⁿ-í ìⁿ sá ñà túú ní tàxi ndecu-í, te nàtahu-í ìⁿ xichi núú ñà túú nĩ chìhi-í tatá, ²³ te nõu ducaⁿ ña, ζte ná cuendá ñá

túú ní càhu iní-n dàsaⁿ nuu-n díhúⁿ nǐ taxi-í, te cúñaha-n chǎhu-yu díquí-xi, te òré ná nàsáá-í vehe-í, te sa ngódó lùha-gá díquí-xi naqueheⁿ cuendá-í ní cùu-í?” cachí-dé xǎhaⁿ-dě xii téé xìnu cuechi-án. ²⁴ Te ní xáhaⁿ tǎe cùu patróóⁿ-án xii cue téé xǐndecu xíáⁿ: “Chí quéndèè díhúⁿ cuàáⁿ néhé tǎe-a, te cuáha-ndo tǎe nèhe úxí tucu díhúⁿ cuàáⁿ-án”, càchí-dé xǎhaⁿ-dě xii-güedé. ²⁵ Te ní xáhaⁿ-güedé: “Pàtróóⁿ, dico sa nèhe-dé úxí díhúⁿ cuàáⁿ”, càchí-güedé xǎhaⁿ-güedé. ²⁶ Te ní xáhaⁿ tǎe cùu patróóⁿ-án: “Na càchí tnúhu-í xii-ndo sǎ cuè ñáyiú òó xii-xi te níhí-gǎ-yu cundecu ndìhí-yu, te cue ñáyiú sacú ndécú ndìhí cuita ndìhí nihnu nchaa sá ndécú ndìhí-yu”, càchí téé cùu patróóⁿ-án xǎhaⁿ-dě xii-güedé. ²⁷ Te xǎhaⁿ tùcu-dé xii-güedé: “Nchaa ñáyiú cùu úhú iní ñáhá xii-í ñá tnàhá iní-yu quindaha-í-yu, te chí cándecá-yu taquixi iha, te cahni-ndó-yu núu-í-a”, càchí téé cùu patróóⁿ-án xǎhaⁿ-dě xii-güedé —duha cuáháⁿ cuendú ní cani Jèsús núú ñáyiú.

Jèsús cuànguihu-gá ñuú Jerusàlén

(Mt. 21:1-11; Mr. 11:1-11; Jn. 12:12-19)

²⁸ Te sátá dúcáⁿ nǐ cáháⁿ-gá, te ní nucúhuⁿ ichi-gá cuáháⁿ-gá ñuú Jerusàlén. ²⁹ Te òré sa ní cuyatni-gá ñuú Bèttagé, ndìhí ñuú Bètaniá te xíáⁿ cáá yùcu nani Olívú, te ní xáhaⁿ-gǎ xii úú cue téé xìca cuu ndìhí-gá:

³⁰ —Chí cuáháⁿ ñuú cáá yàtni yacáⁿ, te òré quexìo-ndo yacáⁿ, te naníhí-ndó ìⁿ búrru ndètní-dì, te vátá yóo ìⁿ-gá codo ñàha xii-dì, te nandaxi-ndo-dì te candeca-ndo-dì quèxi. ³¹ Te núu yoo na càcáⁿ tnúhu núú-ndó nǎ cuendá

nándàxi-ndo-di, te cúñaha-ndo xii-yu sá yǔhú Yaá xíca cùu ndihì-ndo xini ñuhu-í-di —càchí-gá xáhaⁿ-gã xii-güedé.

³² Te cue téé-áⁿ ñí xica-güedé cuáháⁿ-güedé, te nchaa-ni nàcuáa ní xáhaⁿ Jèsús ducaⁿ ñí cuu, ³³ chi mei òré nándàxi-güedé búrru-áⁿ ñí quexìo cue ñáyiú cùu xítohó-di xícaⁿ tnúhu-yu núú-güedé, te xǎhǎⁿ-yu:

—¿Ná cuendá nándàxi-ndo búrru-ndí-i? —
càchí-yu xǎhǎⁿ-yu.

³⁴ Te ní xáhaⁿ-güedé xii-yu:

—Nà ndaxi-ndí-di chi Yaá xíca cùu ndihì-ndí xíní ñuhu ñaha-gá xii-di —càchí-güedé xáhaⁿ-güedé xii-yu.

³⁵ Te ndèca-güedé-di cuáháⁿ núú ndécú Jèsús, te òré ní quexìo-güedé ndihì-di núú ndécú-gã te ní sacáⁿ ndodo-güedé dóo-güedé sátá-di, te ní ngódó ñáhá-gã xii-di. ³⁶ Te ío cuéhé ñáyiú ta sàcáⁿ-yu dóo-yu ichi cuáháⁿ-gá cuendá núú dóo-yu-áⁿ yǎha-gá ndihì quitì yòdo-gá. ³⁷ Te ní nucuíta nuu-gá ichi tìndúú yucu Òlívú tá cùyatni-gá ñúú Jerusàlén cuáháⁿ, te nchaa ñáyiú sàndáá iní ñáhá xii-gá nchìcúⁿ ñáhǎ-yu te ní ngüíta-yu níhi càháⁿ-yu sá cúdíí iní-yu, te càchí-yu sá ìo càhnu cuu Yá Ndiǒxí cuendá sá ñí xini-yu nchaa sá vǎ yǒo tnàhí ndàcu cada ní quide-gá. ³⁸ Te càchí-yu:

—¡Ío càhnu cuu Yaá véxi quindaha ñaha xii-o, te diu-gá cúú-gã Yaá ní tendaha Yǎ Ndiǒxí véxi quide núú-gã! ¡Te ío càhnu cuu mee-gá! ¡Te andíu ñǎ túú tnàhí ná cúú! —duha càchí-yu.

³⁹ Te ñⁿ úú cue téé cùu fariséú ñúhú tnàhá tnuú ñáyiú-áⁿ ñí xáhaⁿ-güedé xii Jèsús:

—Mèstrú, cúñaha nchàa ñáyiu ndihi-n na càdí-yu yuhú-yu —càchí-güedé xáhaⁿ-güedě xii-gá.

⁴⁰ Dico Jèsús ní xáhaⁿ-gã xii-güedé:

—Te na càchí tnúhu-í xii-ndo sã nõu ñáyiu-a na càdí-yu yuhú-yu ña, te nchaa yúú cãháⁿ níhi-xi dàtná ìⁿ ñáyiu —càchí-gá xáhaⁿ-gã xii-güedé.

⁴¹ Te òré ní cuyatni-gá ñuú Jerusàlén te ní xiní-gá, te ní ndáhyú-gá cuendá nchaa ñáyiu dii ñuú-xi-áⁿ sã ndìhú iní-gá. ⁴² Te ní xáhaⁿ-gã xii cue ñáyiu-áⁿ:

—Ío cuu váha iní-í te núu dìcò nchòhó tecú tnùnì-ndó vitna ìⁿ tnúhu sá cádá vãha ñaha xii-ndo, chi ñá túú-gã ná cuu cundecu-ndo, te núu na tècú tnùnì-ndó. Dico ñá tècú tnùnì-ndó, chi ío yidáhu tnúhu-a. ⁴³ Te sáá nduu tnündòho tnúhu ndáhú sá cúú-xi-ndó, te nchaa cue téé dava-gá ñuú cúú ùhú iní tnáhá ndihi-ndo quixi-güedé chidoco ñaha-güedé xii-ndo, te ni càndéé núú ndécú-ndó-ãⁿ dacàa-güedé ndóho cuendá xíaⁿ quihí váha-güedé nàá ndihi ñaha-güedě xii-ndo, te vá dáñá-güedě cunu-ndo. ⁴⁴ Te cahni ñaha-güedě xii-ndo, te ndihi nchaa vehe-ndo dàngoyo-güedé ndéé cimièntú-xi, chi ñá túú ní cuìní-ndó nàcuáha-ndo cuendá òré ní quixi coto ñaha Yã Ndiòxí xii-ndo —duha ní xáhaⁿ-gã xii ñáyiu ñuú-áⁿ.

Jèsús ñá túú tnàhá iní-gá nàcuáa quidé-yu veñúhu (Mt. 21:12-17; Mr. 11:15-19; Jn. 2:13-22)

⁴⁵ Te Jèsús cuánguihu-gá xití veñúhu càhnu sá ío cùnuu, te xití veñúhu-áⁿ xíndecu cue ñáyiu quide ndáhú ndihi cue ñáyiu xísaaⁿ. Te ní queñuhu ñaha Jèsús xií-yu quehé. ⁴⁶ Te ní xáhaⁿ-gã xií-yu:

—Núú tütú Yă Ndiöxí cãháⁿ-xi nàcuáa ní cãháⁿ-gá, te duha ní cachí-gá: “Vehe-í cúú-xí núú cãháⁿ ndihí ñaha ñáyiu xii-í”, duha ní cãháⁿ-gá cãchí-xi núú tütú-gá. Dico nchòhó quidé-ndó vèhe-gá vehe ñadúhú —cãchí-gá xáhaⁿ-gã xii-yu.

⁴⁷ Te Jèsús nchaa nduu dānehé-gá ñáyiu xití veñúhu, dico cue téé cùu dútú cúnùu, ndihí cue téé dācuaha ñaha xii ñáyiu nchaa tnúhu ní chídó tnùní ndíi Moisés, ndihí cue téé cūnuu ñuú-áⁿ ndúcú-güedé nàcuáa cada-güedé cahni ñaha-güedé xii-gá. ⁴⁸ Dico ñá ñihí-güedé nàcuáa cada-güedé, chi cuendá nchaa ñáyiu ío cùdíí ñí-yu ndèdòho-yu nchaa tnúhu cãháⁿ-gá.

20

Jèsús ndécú ndihí-gá tnúhu ndee ñí (Mt. 21:23-27; Mr. 11:27-33)

¹ Te ñⁿ nduu yihí Jesús xití veñúhu cāhnu sá ío cūnuu danehé-gá ñáyiu tnúhu sá cãháⁿ nàcuáa naníhí tãhú-yu. Te ní quexìo cue téé cùu dútú cúnùu ndihí cue téé dācuaha ñaha xii ñáyiu nchaa tnúhu ní chídó tnùní ndíi Moisés, ndihí cue téé cùu sacuéhé núú ñáyiu isràél, ² te ní xáhaⁿ-güedé xii-gá:

—Cuìní-ndí cachí tnúhu-n xii-ndí nása ndúu tnúhu ndee ñí ndécú ndihí-n núu quide-n nándi sá quidé-n. ¿Te yoo ducaⁿ ñí taxi tnúhu ndee ñí-áⁿ xii-n? —cãchí-güedé xãhaⁿ-güedé xii-gá.

³ Te Jèsús ní xáhaⁿ-gã:

—Yúhú tñahá-í cuìní-í cácaⁿ tnúhu-í ñⁿ sá càcáⁿ tnúhu-í núú-ndó, te cachí tnúhu-ndo. ⁴ Te chí cãchí tnúhu xii-í yoo ní táuchíúⁿ ñí dácuándùte ndíi Juáa

ñáyi. ¿Yá Ndiöxí ãⁿ cuè téé ñuyíú-a ní táúchíúⁿ dùcaⁿ ní quide ndí? —càchí-gá xáhaⁿ-gã xii-güedé.

⁵ Te ní ngüíta-güedé xĩtnàha-güedé:

—¿Nása cúñaha-o? Chi núu nà cúñaha-o sã Yã Ndiöxí ní táúchíúⁿ dùcaⁿ ní quide ndí Juàá ñá, te quesaha-dě: “¿Ná cuendá ñá túú ní sàndáá iní-ndó tnũhu ní cáháⁿ ndí vàiⁿ?”, quesaha-dě. ⁶ Àdi te núu nà cúñaha-o sã cuè ñáyi ñuyíú-a ní táúchíúⁿ dùcaⁿ ní quide ndí ña, te nchaa ñáyi cuáha ñàhá-yu yúú xii-o, te cahni ñàhá-yu, chi càchí-yu sá ndàá sá Yã Ndiöxí ní táúchíúⁿ-gã ní cáháⁿ ndí Juàá tnúhu-gá núú ñáyi —càchí-güedé xĩtnàha-güedé.

⁷ Te ní xáhaⁿ-güedé xii-gá sá ñà túú xìní-güedé yoo ní táúchíúⁿ dùcaⁿ ní dácúándüte ndí Juàá ñáyi.

⁸ Te ní xáhaⁿ Jèsús xii-güedé:

—Te núu ducaⁿ te ni yũhú vá càchí tnúhu-í xii-ndo yòo ní taxi tnúhu ndee iní duha quide-í —càchí-gá xáhaⁿ-gã xii-güedé.

*Cuendá cue téé cuihna iní-xi
(Mt. 21:33-44; Mr. 12:1-11)*

⁹ Te sátá dúcáⁿ te ní ngüíta Jèsús ní caní-gá ìⁿ cuendú núú ñáyi nàcuáa tecú tnùní-yu tnúhu-gá, te xáhaⁿ-gã xii-yu:

—Ìⁿ téé ní xitu-dé mee-ni yòho yaha stilé núú ñũhú-dě. Te ní sáá ìⁿ nduu quĩngaca cuu xica-dě vài nduu te ní dándõo ndaha-dě sá ñĩ xitu-dé-áⁿ xii ìⁿ ũú cue téé cáháⁿ ndihí-dé cuendá cada chiúⁿ-güedé, te ní ndatnúhu-güedé sá òré ná cùu te cuu cuendá dava-güedé te ducaⁿ te ní quee-dé cuáháⁿ-dé. ¹⁰ Te sátá ñĩ sáá nduu ñĩ cuu nchaa ndéhé yoho yàha stilé sá ñĩ xitu-dé-áⁿ, te ní xáhaⁿ-dě xii ìⁿ téé xĩnu cuechi núú-dě: “Cuàháⁿ cácaⁿ-n sã cúú cuendá-í núú cuè téé

ní dándõ ndàha-í nchaa yoho yàha stilé sá nǐ xitu-í”, càchí-dé xǎhaⁿ-dě. Te téé xìnu cuechi-áⁿ nǐ xica-dé cuáháⁿ-dé, dico cue téé ndèè nchaa yoho yàha stilé-áⁿ nǐ tni-güedé téé xìnu cuechi-áⁿ te ní caniha-güedě, te ní nacuícúⁿ ñáhá-güedě xii-dé, te ñá túú tnàhí ná ní sǎñaha-güedě. ¹¹ Te dǎtnùní téé cùu xítóhó nchaa yoho yàha stilé-áⁿ nǐ tendaha tùcu-dé ingá téé xìnu cuechi núú-dě cuáháⁿ-dé, dico ñu-ni ducaⁿ nǐ quide ñaha-güedě xii-dé, chi ní xícuèhé ñáhá-güedě, te ní caniha-güedě te ní nacuícúⁿ ñáhá-güedě, te ñá túú tnàhí ná ní sǎñaha-güedě. ¹² Te téé cùu xítóhó nchaa yoho yàha stilé-áⁿ nǐ tendaha tùcu-dé ingá-dé cuáháⁿ-dé, te ñu-ni ducaⁿ nǐ quide ñaha tùcu-güedé, chi ní dánícuèhé ñáhá-güedě, te ní nacuícúⁿ ñáhá-güedě.

¹³ Te téé cùu xítóhó nchaa yoho yàha stilé-áⁿ nǐ sani iní-dé: “¿Nása cada-í vitna? Váha-gá tendaha-í déhe-í téé ío cùu iní-a núhú-dé, chi cudana te òré quini ñáhá-güedě xii-dé, te canehe-güedé sá yíñuhu núú-dě”, duha ní sani iní-dé. ¹⁴ Dico òré ní xini cue téé quide chiuⁿ-áⁿ dēhe xítóhó nchaa yoho yàha stilé-áⁿ, te ní xítnáha-güedé: “Téé-ǎⁿ téé véxi nduu táhú ñuhu-a ndíhi nchaa sá cáá núú-xi, dico cahni-o-dě te mee-o nduu tahú-ó sǎ ndúú táhú-dě”, càchí-güedé xítnáha-güedé. ¹⁵ Te ní queñuhu ñaha-güedé ñⁿ xio yuhu ñuhu-áⁿ, te ní sahani ñaha-güedě xii-dé —duha cuáháⁿ cuendú ní cani Jèsús núú-yu.

Te dǎtnùní ní xáhaⁿ tùcu-gá xií-yu:

—¿Te nchòhó sa cùtnuní iní-ndó nacuáa cada ñaha xítóhó ñuhu-áⁿ xii cue téé-áⁿ ñǎ? ¹⁶ Chi núhú-dé te cahni-dé cue téé-áⁿ, te dándóo ndaha-dě ñuhu-dé

xii cue tée cùtnuní iní-dé cada ndáá —càchí-gá xáhaⁿ-gã xií-yu.

Te sá dúcáⁿ ñí cáháⁿ-gá, núu ní cachí-yu:

—¡Sá vã càchí Ndiõxí sá dúcáⁿ yãha-o! —càchí-yu.

¹⁷ Te Jèsús ní ndacoto-gá núũ-yu, te ní xáhaⁿ-gã:

—Chí càchí tnúhu nása quèe-xi nacuáa càháⁿ-xi núú tütú Yã Ndiõxí, núú càchí-xi:

Yúú sã ñí dáquée tíhú cue tée dàcaa vehe ní saa-xi cùu-xi yúú cúnùu vitna.

Duha càchí-xi núú tütú-gá. ¹⁸ Te nchaa ñáyiu ñá túú cuíní tñi tnúhu-í, te ndohó-yu dàtná ñⁿ ñáyiu tnàhnú duuⁿ òré ndúá-yu núú yúú, àdi núu na tàú ñáhá-xí te dàcachi duuⁿ ñaha-xi —cachí-gá xáhaⁿ-gã xií-yu.

Cuèndá impuèstú

(Mt. 21:45-46; 22:15-22; Mr. 12:12-17)

¹⁹ Te cue tée cùu dútú cúnùu, ndihi cue tée dàcuaha ñaha xii ñáyiu nchaa tnúhu ní chídó tnùní ndíi Moisés ní cuíní-güedé tñi-güedé Jèsús òré-ni-á ní cùu, chí ní cutnùní iní-güedé sá cuèndá-güedé ní cáháⁿ-gá, dico ní yuhú-güedé cuèndá sá ïo vãi ñáyiu. ²⁰ Te ní ndúcú-güedé nàcuáa cada-güedé tñi ñaha-güedé xii-gá, te ní tendaha-güedé cue tée cuáháⁿ ngoto dayuhu ñaha xii-gá, te cuáháⁿ-güedé dàtná cue tée váha iní-xi, te ndùcu-güedé nàcuáa cada-güedé nũ cáháⁿ-gá ñⁿ tnúhu sá ñã túú tàú-gá cáháⁿ-gá cuèndá ducaⁿ te candeca ñaha-güedé xii-gá quíhíⁿ cuáha cuèndá ñáhá-güedé núú tõe cùnùu. ²¹ Te ní xáhaⁿ-güedé xii Jèsús:

—Mèstrú, ñihí-ndí tnúhu sá dánèhé-n ñáyiu mee-ni tnúhu váha, te cuèi ndédani càa ñáyiu ñⁿ-ni càháⁿ-n ndiíhí-yu, te càháⁿ ndáá-n nàcuáa

càháⁿ Yá Ndiöxí cundecu-o ñùyú-a. ²² Te cachí tnúhu xii-ndí nñu váha-ni cháhu-ndí té Cèsár téé ío cùnnu cuendá impuèstú àⁿ ñáhá —càchí-güedé xáhaⁿ-güedé xii-gá.

²³ Dico Jèsús ní cutnùní iní-gá sá xító ndèé ñáhá-güedé xii-gá, núu ní xáhaⁿ-gá xii-güedé:

²⁴ —Chí dánèhé ñáhá xii-í ñⁿ díhúⁿ cuixíⁿ te cachí tnúhu-ndo nñu yoo núú-xi ndéé, ndihí yoo diu-xi ndéé —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Núú tē Cèsár ndéé ndihí diu-dé —càchí-güedé xáhaⁿ-güedé xii-gá.

²⁵ Te ní xáhaⁿ tùcu-gá xii-güedé:

—Te núu ducaⁿ te chí nácuáha té Cèsár sá cúú cuendá-dé, te sá cúú cuendá mée Yá Ndiöxí, te xiáⁿ nacuáha-ndo-gá —càchí-gá xáhaⁿ-gá xii-güedé.

²⁶ Te ñá ní ndàcu tnahí-güedé datìcánuu ñaha-güedé xii-gá núú tñuhu càháⁿ-gá, chí òré ní cáháⁿ-gá, te da ní cuñúhu-güedé nchaa tñuhu ní cáháⁿ-gá, te váha-gá ní sadí-güedé yuhu-güedé.

Cuendá nchaa ñáyi ndoto

(Mt. 22:23-33; Mr. 12:18-27)

²⁷ Te sátá dúcáⁿ te ní sáá ñⁿ úú cue téé cùu saducéú núú ndécú Jèsús. Te cue téé-áⁿ ñà túú sàndáá iní-güedé sá ndótó cue ñáyi ní xihí, te ní xáhaⁿ-güedé xii-gá:

²⁸ —Mèstrú, ndíi Moisés càchí ndíi núú tütú ndècu vitna sá nñu ñⁿ téé na cùú, te quendóo ñadihí-dé te ñà túú dèhe-dé ní xõ ndihí-aⁿ, te téé cùu ñaní-dé naqueheⁿ-dé ñaha ní quendóo quèé-áⁿ cuendá coo déhe-dé ndihí-aⁿ cuendá ñaní-dé téé ní xihí-áⁿ. ²⁹ Te ní xíndecu úsá tñahá cue téé mee-ni ndí ñaní-güedé.

Te téé díhna ní níhí ñadìhí-dé, dico ñá túú ní cùdíi-dé cundecu-dé chi ní xíhí-dé, te ni ìⁿ déhe-dé ñá túú ní xõ ndihì ñadìhí-dé-áⁿ. ³⁰ Te téé cùu uú ní naqueheⁿ-dé ñaha ní quendóo quèé-áⁿ dico ní xíhí tucu-dé, te ni ìⁿ tucu déhe-dé ñá túú ní xõ ndihì ñaha-áⁿ. ³¹ Te téé cùu uní ní naqueheⁿ tucu-dé ñaha ní quendóo quèé-áⁿ, te ðiu-ni ducaⁿ ñí xíhí-dé, te ní xínu ndì ùsá-güedé ní cándeca ñaha-güedě xii ñaha-áⁿ, dico ni ìⁿ-güedé ñá túú ní xõ déhe-güedé ndihì-aⁿ, te ní ndihì-güedé ní xíhí. ³² Te ndéé núú ñí ndihì-ná ní xíhí tnahá ñadìhí-áⁿ. ³³ Te na sàá nduu ndòto-güedé ndihì ñaha-áⁿ ¿Te ndëdacàa-güedé ñadìhí-güedé cuu-aⁿ-i? Chi ndì ùsá-güedé ní cándeca ñaha-güedě xii-aⁿ — càchí-güedé xàhaⁿ-güedě xii-gá.

³⁴ Te Jèsús ní xáhaⁿ-gã xii-güedé:

—Nchaa ñáyiú ñuyíú-a tñándahá-yu. ³⁵ Dico nchaa ñáyiú ní nduu táhú ndoto díhna nuu ñáyiú-áⁿ cundecú-yu ndihì Yá Ndiõxí ñí caa ñí quíhíⁿ, te yàcáⁿ ñá túú-gã sá cándèca tnahá-yu. ³⁶ Te ni ñà túú-gã tnúhu xíhí, chi cuu-ná-yu dàtná cue espíritú xínú cuèchi núú Yá Ndiõxí cuëndá sá ñí ndotó-yu, chi cùú-yu déhe-gá. ³⁷ Te ndéé ndíi Moisés ní chídó tñuní ndíi núú tütú ndíi sá ncháá ñáyiú ní xíhí ndotó-yu, te ðiu-ni xíaⁿ càháⁿ-xi cuëndá tnutàù nchìcúⁿ ñuhú, te ðiu-ni xíaⁿ càchí tucu-xi sá Yá Ndiõxí cúú-gã Ndiõxí ndíi Àbrahám, ndíi Isàác, ndihì ndíi Jàcób. ³⁸ Te cue téé-áⁿ chi cuèi ní xíhí-güedé sá cúú-xí nchòhó, dico sá cúú-xí Yá Ndiõxí chi ndècu vívú-ni-güedě. Chi cùtnuní iní-ó sã Yá Ndiõxí cúú-gã Ndiõxí mee-ni cuè ñáyiú xíndecu vívú, te ñá túú cùu-gá Ndiõxí cue ñáyiú ñá

túu ndècu vívú. Te sá cúu-xí mèe-gá chi nchaa ñáyiú ndècu ndihí-gá ndécú vívú-yu cuèi sa ní xíhí-yu núu ñùyíú-a —càchí-gá xáhaⁿ-gã xii-güedé.

³⁹ Te ñⁿ tée dàcuaha ñaha xii ñáyiú nchaa tnúhu ní chídó tnùní ndíi Moisés ní xáhaⁿ-dë xii Jèsús:

—Mèstrú, váha-ni càháⁿ-n —càchí-dé xáhaⁿ-dë xii-gá. ⁴⁰ Te ñá túu-gã ní cùyí-güedé cácaⁿ tnúhú-güedé ni ñⁿ tnúhu núu-gã.

Yoo déhe-xi cùu Cristú

(Mt. 22:41-46; Mr. 12:35-37)

⁴¹ Te Jèsús ní xáhaⁿ-gã xii-güedé:

—¿Te nása càchí-tu-yu sá Crístú Yaá tendaha Yá Ndióxí quixi ñuyíú-a cùu-gá déhe ndíi Dàvíí? ⁴² Te mee ndíi Dàvíí-áⁿ ñí cachí ndíi núu librú Sălmú: Dútú Ndióxí ní xáhaⁿ-gã xii Yaá cúu Xítohó-í:

“Ngóo xio cùha-í,

⁴³ te yúhú cada-í te nchaa sá cúu ũhú iní ñáhá xii-n canehe-xi sá yíñùhu núu-n.”

Duha ní xáhaⁿ Dútú Ndióxí xii Yaá cúu Xítohó-í càchí ndíi núu librú Sălmú. ⁴⁴ ¿Te nása cùu Crístú déhe ndíi Dàvíí, te mee ndíi ní cachí ndíi sá cúu-gã Xítohó ndíi-i? —càchí Jèsús xáhaⁿ-gã xii-güedé.

Jèsús càháⁿ-gá cuendá cue tée dàcuaha ñaha xii ñáyiú nchaa tnúhu ní chídó tnùní ndíi Moisés

(Mt. 23:1-36; Mr. 12:38-40; Lc. 11:37-54)

⁴⁵ Te òré ndátnùhu Jèsús ndihí cue tée xica cuu ndihí-gá xíndedóho ñaha ñáyiú, te xáhaⁿ-gã xii-güedé:

⁴⁶ —Cada cuendá-ndó vã cáda-ndó nàcuáa quide cue tée dàcuaha ñaha xii ñáyiú nchaa tnúhu ní chídó tnùní ndíi Moisés, chi tnàhá iní-güedé cuihnu-güedé dóo nání sã sácuihnu cue tée

cùnuu. Te nchaa núú tàcá ñáyiú cuìní-güedé sá ndìhi tnúhu yĩñùhu cáháⁿ ndìhi ñàhá-yu xii-güedé, te nàcáxi-güedé xilé sácõo nchihi cue téé cùnuu-gá xití veñúhu conchihi-güedé, te ducaⁿ-ni quide-güedé cuèi òré quíhu-güedé mèsá caxi-güedé òré ndécú-güedé #ⁿ vico, chi mee-ni núú sácõo cue téé cùnuu-gá cuìní-güedé coo-güedé. ⁴⁷ Te quèndeé-güedé vehe nchaa ñáyiú dìhí ñáyiú quèé, te ío naha càháⁿ ndìhi-güedé Yă Ndiõxí cuendá cuìní-güedé cáháⁿ váha-yu cuendá-güedé. Te sá dúcáⁿ quide-güedé te sáá nduu te ío-gá ndoho-güedé núú ùhú núú ndàhú dàcúúxí dàva-gá ñáyiú –càchí-gá xáhaⁿ-gă xii-güedé.

21

*Díhúⁿ nduu táhú Yă Ndiõxí ní dáquëe #ⁿ ñaha ndàhú ñaha quèé
(Mr. 12:41-44)*

¹ Te Jèsús ní xiní-gá xití veñúhu xídáquëe cue téé cuica díhúⁿ nduu táhú Yă Ndiõxí xití alcanciá, ² Te ní xiní-gá tnàhá #ⁿ ñaha ndàhú ñaha quèé ní dáquëe-aⁿ úú díhúⁿ còbrí, ³ te ní xáhaⁿ Jèsús xii cue ñáyiú xĩndecu-áⁿ:

—Na càchí tnúhu ndáá-í xii-ndo sã ñàha ndahú ñaha quèé-a ío-gá nándìhi díhúⁿ nĩ dáquëe-aⁿ xití alcanciá nduu táhú Yă Ndiõxí dàcúúxí díhúⁿ nĩ dáquëe dava-gá-yu. ⁴ Chi nchaa ñáyiú-áⁿ ní dáquëe-yu mee-ná sá nĩ ndóo-ná, dico ñaha quèé-a cuèi ndàhú-aⁿ dico ní dáquëe-aⁿ nihíí díhúⁿ sã cuááⁿ-áⁿ sã cáxí-áⁿ ní cùu –cachí-gá xáhaⁿ-gă xii-yu.

Jèsús cächí-gá sá ngóyó veñúhu
(Mt. 24:1-2; Mr. 13:1-2)

⁵ Te ñⁿ úú ñáyiú xǐcáháⁿ-yu cuendá veñúhu cànhu sá ño cùnūu sá ño vii càa nchaa yúú yíhí, ndìhì cuendá nchaa sá ñí sáñaha tǎhú ñáyiú yìhì xítí-xi. Te Jèsús ní xáhaⁿ-gǎ xíi-yu:

⁶ —Sáá nduu te nchaa sá cúññūhu-ndo-a vǎ cúndūu-gá-xi dàtná cáá-xí vitna, chi ní ñⁿ-gá yúú vǎ códó nchìhì tnaha-gá-xi chi ndìhì ngoyo —cächí-gá xáhaⁿ-gǎ xíi-yu.

Nàcuáa cada-xi nduu ta cùyatni naa ñuyíú
(Mt. 24:3-28; Mr. 13:3-23)

⁷ Te cue tée xǐndecu-áⁿ ñí xícáⁿ tnúhú-güedě núú Jèsús, te xǎhaⁿ-güedě xii-gá:

—Mèstrú, ¿te ná nduu dùcaⁿ cada-xi ngoyo veñúhu, àdi nándì cùu sá cádá-xí cuendá cutnùnì iní-ndí sá sà ta cuyatni nduu ducaⁿ cada-xi-i? —cachí-güedé xǎhaⁿ-güedě xii-gá.

⁸ Te Jèsús ní xáhaⁿ-gǎ xii-güedé:

—Ío quihì iní-ndó cùndecu-ndo, te vǎ dáñá-ndó mèe-ndo dandahú ñáhá ñáyiú xii-ndo. Chi ío cuéhé cue tée coo ñuyíú-a, te danàni-güedé méé-güedě dàtná nánì-í te cachí-güedé: “Yúhú cùu-í Crìstú Yaá ní tendaha Yǎ Ndiöxí véxi ñuyíú-a”, duha cachí-güedé. Te cachí tucu-güedé: “Vitna sa ní sáá nduu càda-xi nchaa nacuéa ní cáháⁿ-í”, duha cachí-güedé. Dico vǎ quíndáá iní-ndó, te ní vǎ túhá-ndó-güedě. ⁹ Te òré ná nihí-ndó tnúhu sá tìtní nacióⁿ xǐnàá-güedé te dava ñuú xǐnàá-güedé ndì mèe-güedé, te vǎ yùhú-ndó chi dacuítíí sǎ dúcáⁿ

càda-xi, dico vátá sàá-gá nduu nàa ñuyíú òré ducaⁿ
càda-xi —cachí-gá xáhaⁿ-gã xii-güedé.

10 Te xăhaⁿ tùcu-gá xii-güedé:

—Nchaa cue téé ìⁿ nàcióⁿ nàá-güedé ndihí cue
téé ìngá nàcióⁿ, te titní ñuú ngüíta-güedé nàá-güedé.

11 Te titní xichi ñuyíú ñihí vîhi tnáa, te titní tucu
xichi ñuyíú coo tnamá, te titní tucu xichi ñuyíú
quixi cuéhé, te titní núú sã cáda-xí àndi, te yùhú
ñáyiu.

12 Te òré cúmăní-gă cada-xi nchaa nàcuáa
càháⁿ-í-a, te cue téé cùu úhú iní ñáhá xii-ndo tñi
ñaha-güedé, te candeca ñaha-güedé xii-ndo quihíⁿ
xítí veñúhu-güedé cada ndáá-güedé cuéchi-ndo,
te chihi ñaha-güedé vecaá xii-ndo, te candeca
ñaha-güedé quihíⁿ núú cuè téé cùnuu yindaha
nacióⁿ àdi núú dâva-gá cue téé cùnuu sá cuendá-í.

13 Te òré ducaⁿ na càda ñaha-güedé xii-ndo, te òré-án
tàú-xi cáháⁿ váha-ndo cuendá-í núú-güedé. 14 Te vá
cání ìní-ndó nùu nása cunduu tnúhu cúñaha-ndo
xii-güedé cuendá cácu nihnu-ndo. 15 Chi yúhú
dacàhu iní ñáhà-í xii-ndo tnúhu cúñaha-ndo
xii-güedé, te taxi-í sá vátá quini tnùnigá-ndó, te
ni ìⁿ ñáyiu cùu úhú iní ñáhá xii-ndo vá ñihí-gá-yu
tnúhu cúñahá-yu xii-ndo. 16 Te ndéé tătá-ndó,
ndihí ñaní-ndó, ndihí cue ñáyiu cùu ñaní tnáhá-ndó,
ndihí cue ñáyiu càháⁿ ndihí váha-ndo cuăha cuendá
ñáhă-yu xii-ndo nùú cuè téé cùchiuⁿ, te dava-ndo
càhni ñaha-güedé xii-ndo. 17 Te ío cuéhé ñăyiu
cuu úhú iní ñáhă-yu xii-ndo sã cuendá-í. 18 Dico
Yá Ndióxi ío coto ñaha-gă xii-ndo chi ndéé idi
díquí-ndó còto-gá. 19 Te núu na càda ndee iní-ndó

cànchicúⁿ nihnu ñaha-ndo xì-í, te nduu táhú-ndó cùndecu-ndo ndihì Yá Ndiöxí ñi caa ñi quíhíⁿ.

²⁰ Te nduu na quìní-ndó ñùhu doco sandadú ñi cándéé yuhu ñúú Jerusàlén, te sa cutnùnì iní-ndó sã sà ní cuyatni nduu dànaa-güedé ñuú-áⁿ. ²¹ Te dàvá-áⁿ nchaa ñáyiú xĩndecu distritú Jùdeá xínì ñùhu-xi cunú-yu quíhíⁿ-yu xití yucu, te nchaa ñáyiú xĩndecu ñuú Jerusàlén queé-yu xití ñuú-áⁿ, te ñáyiú ñá túú xĩndecu ñuú-áⁿ vã ndìhu-gá-yu. ²² Chi dàvá-áⁿ cuu-xi nduu tnũndòho tnúhu ndàhú, te ducaⁿ càda-xi chi ducaⁿ ndèé tnunì núú tütú Yã Ndiöxí nàcuáa dandòho ñaha-gá xií-yu. ²³ Te ndàhú ní cuu nchaa ñáyiú dìhí ñúhú dèhe-xi, ndihì nchaa ñáyiú ndèca déhe vitna sàdi na sáá nduu dùcaⁿ cada-xi! Chi ío cuéhé tnũndòho tnúhu ndàhú coo núú ndécũ-yu dàvá-áⁿ, te xíãⁿ cuu-xi ñⁿ tnũndòho tendaha Yá Ndiöxí quixi sá cúú-xí-yu. ²⁴ Te dava cue téé cuú-güedé cahni ñaha-güedé, te dava-güedé tñi ñaha-güedé candeca ñaha-güedé quíhíⁿ nchaa ñuú xícá, te cue téé dava-gá ñuú cunuu-güedé ñuú Jerusàlén, te mee Yã Ndiöxí cachí-gá te núu ná daha nduu cunuu-güedé ñuú-áⁿ.

Nàcuáa cada-xi òré quixi tucu Téé cùu ñanì tnáhá cuè ñáyiú

(Mt. 24:29-35, 42-44; Mr. 13:24-37)

²⁵ Te cada-xi ñⁿ sá vātá quìní-gá ñáyiú núú nchĩcanchii, ndihì núú yóó, ndihì núú nchàa chódínì, te ñuyíú-a coo tnúhu ndìhú iní-xi te vã cutnùnì iní-yu nása cadá-yu cuendá sá ío dusaⁿ càda ndute lamár òré candaundéé tnáhá-xí. ²⁶ Te nchaa ñáyiú cuneé-yu sá yùhú-yu, ndihì sá ndìhú iní-yu cuendá nchaa sá cadá-xí ñùyíú-a,

te quidi-xi andiu. ²⁷ Te sátá dúcáⁿ te quini-ndó yǔhú Té cùu ñaní tnáhá-ndó nchàa-ndo quee-í andiu quixi-í ichi xití vícó, te dàvá-áⁿ quini ñáhá nchàa ñáyiú sá ïo cùnuu-í te ndàcu-í quide-í nchaa sá vâha. ²⁸ Te òré ná ngüita-xi ducaⁿ càda-xi, te cuita cundee-gă iní-ndó quihíⁿ, te quihí iní-ndó chi sa ní cuyatni vii-nă nduu căcu nihnu-ndo vă cùndècu-gá-ndó núu ñùyíú yǐcá cuěchi-a –càchí-gá xáhaⁿ-gă xii-güedé.

²⁹ Te ní caní-gá ïⁿ cuèndú núu-güedě nàcuáa tecú tnùní váha-güedé tnúhu-gá, te xáhaⁿ-gă xii-güedé:

–Chí cùndèhe yutnu ngúxí ndihí nchaa dava-gá yutnu. ³⁰ Chi nàtahú ndaha-xi, te òré ducaⁿ quide-xi te càchí-ndó sǎ sà ní cuyatni nuu cahni.

³¹ Te diu-ni ducaⁿ sǎtnahá-xi cùu oré ná quini-ndó càda-xi nchaa nacuáa càháⁿ-í, te sá dúcáⁿ te cutnùní iní-ndó sǎ sà ní cuyatni nduu ndíhu ndaha ñàha Yá Ndiǒxí xii-ndo.

³² Te na càchí tnúhu ndáá-í xii-ndo sǎ òré vátá cùú-gá cue ñáyiú xǐndecu ñuyíú-a vitna, te cada-xi nchaa nàcuáa ní cáháⁿ-í. ³³ Te andiu ndihí ñuyíú-a chi ndihí nihnu-xi, dico tnúhu-í chi vá ndíhí nihnu-xi, chi cùu-xi tnúhu ndáá.

³⁴ Te quihí iní-ndó vă cùndècu-ndo ichi cuehé ichi duha, te vá cúú-ndó ñáyiú quihu, te vá cúhúⁿ ìní-ndó mèe-ni nchaa sá ïó ñuyíú-a, chi núu ducaⁿ na càda-ndo te nacuanaa-ndo sǎ sáá nduu càda-xi nacuáa ní cáháⁿ-í. Te uuⁿni sáá nduu-ăⁿ, ³⁵ te cada-xi dàtná cuini-ndó quide ïⁿ trampá chi uuⁿni ngàva-xi, te ducaⁿ càda-xi nchaa ñáyiú xǐndecu ñuyíú-a, chi uuⁿni sáá nduu-ăⁿ. ³⁶ Te nchòhó cundecu túha-ndo te ío cáháⁿ ndihí-ndo Yá Ndiǒxí cuèndá ndacu-ndo yâha-ndo nchàa tnúndòho quixi

ñuyíú-a, te ducaⁿ te nasáá-ndó cùndecu-ndo núú ndécú yǔhú Tée cùu ñaní tnáhá-ndó nchàa-ndo — cachí-gá xáhaⁿ-gǎ xii-güedé.

³⁷ Te nduu ndùu ní xóo danèhé Jèsús ñáyiú tnúhu-gá xití veñúhu càhnu sá ïo cùnuu, te niú niú ní xóo quíhíⁿ ngúdú-gá xití yucu Òlívú. ³⁸ Te nehé nehé ní xóo quíhíⁿ nchaa ñáyiú veñúhu-áⁿ ñí xóo cundedóho-yu nchaa tnúhu càháⁿ-gá.

22

Ndùcu-güedé nàcuáa cada-güedé cahni-güedé Jèsús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Te sa ní cuyatni nduu tnáhá vico pàscuá, te vico-áⁿ xéxí ñáyiú pàá sá ñà túú yìhi levadurá. ² Te cue tée cùu dútú cùnùu, ndihí cue tée dàcuaha ñaha xii ñáyiú nchaa tnúhu ní chídó tnùní ndíi Moisés ndúcú-güedé nàcuáa cada-güedé cahni-güedé Jèsús, te dicó-ni sá xǐyùhú-güedé ñáyiú.

³ Te yucu ñávàha ní dácáhu ìní ñáhá-xí xii té Jùdás déhe té Iscàrioté, te núú tnáhá tée-áⁿ cúu ùxúú tnáhá cue tée xìca cuu ndihí-gá ní cùu.

⁴ Te té Jùdás-áⁿ ñí sáháⁿ-dé ní ndatnúhu-dé ndihí cue tée cùu dútú cùnùu, ndihí cue tée tàxi tnuní ñáhá xii cue tée quède cuendá veñúhu nàcuáa cada-dé cuáha cuèndá-dé Jèsús núú-güedé. ⁵ Te ío ní cudíí ìní-güedé, te ní xáhaⁿ-güedé xii-dé sá cuañaha-güedé díhúⁿ, ⁶ te ní xáhaⁿ-dé sá cúu quèheⁿ-dé díhúⁿ-áⁿ, te ní ngúíta-dé ndúcú-dé nàcuáa cada-dé cuáha cuèndá-dé Jèsús núú-güedé òré ñá túú ñáyiú.

*Cùdini Jesús ndihì cue té xìca cuu ndihì-gá
(Mt. 26:17-29; Mr. 14:12-25; Jn. 13:21-30; 1 Co.
11:23-26)*

⁷ Te ní sáá nduu nǐ quesaha vico xexí-yu pàá sá ñà túú yìhì levadurá, te ñiu-ni nduu-ǎⁿ sáhní-güedě ìⁿ mběé lǐhli xèxí-yu. ⁸ Te Jèsús ní xáhaⁿ-gǎ xii té Pèlú ndihì té Juàá:

—Chí cuáháⁿ chi cada túha-ndo núú cùdini-o sacuaa nduu vico pascuá —càchí-gá xáhaⁿ-gǎ xii-güedé.

⁹ Te ní xícáⁿ tnúhú-güedě núú-gǎ, te xǎhaⁿ-güedě xii-gá:

—¿Te ndèè cáá vehe cuiní-n càda túha-ndí-i? —càchí-güedé xǎhaⁿ-güedě xii-gá.

¹⁰ Te ní xáhaⁿ Jèsús xii-güedé:

—Chí cùndèdóho na càchí tnúhu-í xii-ndo nàcuáa cada-ndo. Òré quǐhu-ndo xítí ñuú núú quǐhìⁿ-ndó, te naníhí-ndó ìⁿ téé tànehe ìⁿ yoó ndute, te téé-án candéndaha-ndo-dě quǐhíⁿ, te núu ndèdacàa vehe na ndíhu-dé te xíaⁿ quǐhu-ndo. ¹¹ Te cúñaha-ndo xii xítóhó vehe-án: “Yáá cúú Mèstrú càchí-gá nǔu ndèdacàa xichi xítí vehe-n cuǎñaha nùu-n xii-gá cudini-gá ndihì cue téé xìca cuu ndihì-gá sacuaa nduu vico pascuá”, duha cúñaha-ndo. ¹² Te dàtnùní ñànehé ñáhá-dě xii-ndo ìⁿ quartú cáhnú càa núú nǐnu, chi vehe yòdo tnaha cuu-xi, te sa ní quide túha-dé nchaa sá ná ndǐhì, te nchòhó ñìcò-ñǎ sá cùdini-o cada túha-ndo —càchí-gá xáhaⁿ-gǎ xii-güedé.

¹³ Te ní xica-güedé cuáháⁿ-güedé, te nchaa-ni nàcuáa ní xáhaⁿ Jèsús xii-güedé ní cuu, chi nchaa sa

ndècu túha, te ní quide túha-güedé sá cùdìni-güedé ndìhi-gá sacuaa nduu vico pascuá-án.

14 Te sáta nǐ tnahá òré cudìni Jesús ndìhi cue téé ní táuchíúⁿ-gǎ cáháⁿ tnúhu-gá núú ñǎyiu, te cuánguihu ndìhi ñaha-gǎ xii-güedé mèsá. 15 Te xáhaⁿ-gǎ xii-güedé:

—jDucaⁿ-ni ïo sàni iní-í sá cùdìni ndìhi ñaha-í xii-ndo sàcuaa nduu vico pascuá òré cúmǎní-gǎ sáá nduu ndòho-í te cuú-í! 16 Te na càchí tnúhu-í xii-ndo sǎ vǎ dúhá-gǎ caxi ndìhi ñaha-í xii-ndo nduu vico pascuá, chi ndéé òré ná sáá nduu nàsáá-ndó nǔú táxí tnùní Yǎ Ndiǒxí cundecu-o, te dàvá-án cada iní-ndó sǎ dàtná sá cǎxí tùcu-o chi ío váha cuu iní-ó cùndecu-o —cachí-gá xáhaⁿ-gǎ xii-güedé.

17 Te ní queheⁿ-gá ñⁿ vǎsú ñúhú ndùdí ndéhé yoho yàha stilé, te ní ndacáⁿ táhú-gǎ núú Yǎ Ndiǒxí, te dàtnùní ní xáhaⁿ-gǎ xii-güedé:

—Chí quéhéⁿ vǎsú ñúhú ndùdí ndéhé yoho yàha stilé-a, te coho-ndo lùha luha nchaa-ndo. 18 Te na càchí tnúhu tucu-í xii-ndo sǎ vítná-nǎ duha xìhi ndìhi ñaha-í xii-ndo ndùdí ndéhé yoho yàha stilé-a te vá cóhó ndìhi ñaha-gá-í, dico na sáá nduu nàníhí tnáhá-ó nǔú ndécú Tǎtà-í Dútú Ndiǒxí táxí tnùní-gá, te dàvá-án cada iní-ó sǎ dàtná sá cóhó ndìhi ñaha tucu-í xii-ndo, chi ío cudíí iní-ó —càchí-gá xáhaⁿ-gǎ xii-güedé.

19 Te sáta nǐ túhú cóhó-güedě ní cudìni-güedé, te ní queheⁿ-gá pàá te ní ndacáⁿ táhú tùcu-gá núú Yǎ Ndiǒxí, te dàtnùní ní táhú cuèchi-gá, te ní dácǎhñu ñaha-gǎ xii-güedé, te xáhaⁿ-gǎ:

—Pàá-a cùu-xi datná yiqui cùñú-í, chi cahni ñaha-güedě xii-í sá cuèndá-ndó, te ducaⁿ-ni

càxi-ndo paá-a cuèndá ndacu iní ñáhá-ndó xii-í
—càchí-gá xáhaⁿ-gǎ xii-güedé.

²⁰ Te ðiu-ni ducaⁿ ñi quide-gá ndihí vàsú ñúhú
ndùdí ndéhé yoho yàha stilé, chí ní queheⁿ-gá te òré
sǎñaha-gǎ xii-güedé coho-güedé, te ní xáhaⁿ-gǎ:

—Ndudí ñúhú vàsú-a cada iní-ndó sǎ cúú-xí
dàtná níñi-í sá cáti òré cahni ñaha-güedé xii-í. Te
sá dúcáⁿ càti níñi-í xiáⁿ cutnùní ndáá sá Yǎ Ndiõxí
cada-gá ingá núú sǎ vǎha sá cúú-xí-ndó.

²¹ Dico vitna chi iha tnàhá téé cuáha cuèndá ñáhá
xii-í núú cuè téé cùu úhú iní ñáhá yihí-dé mèsá.

²² Te yúhú Téé cùu ñaní tnàhá-ndó nchàa-ndo ñuhu
ichi-í cuáháⁿ-í cuú-í dàtná ní cachí Yǎ Ndiõxí. ¡Dico
ndàhú ní cuu téé ducaⁿ na cuáha cuèndá ñáhá xii-í
núú cuè téé cùu úhú iní ñáhá! —càchí-gá xáhaⁿ-gǎ
xii-güedé.

²³ Te ní ngüíta-güedé ndúcú tnùhu núú
tnàhá-güedé nùu nděda càa-güedé ducaⁿ càda cuáha
cuèndá ñáhá xii-gá núú cuè téé cùu úhú iní ñáhá.

Xíndatnúhu-güedé ndědacàa-güedé cunuu-gǎ

²⁴ Te sátá dúcáⁿ te ní ngüíta-güedé
xíndatnúhu-güedé nùu ndědacàa-güedé tàú-güedé
cunuu-güedé. ²⁵ Dico Jèsús ní xáhaⁿ-gǎ xii-güedé:

—Nchaa cue téé yìndaha ñaha xii ñáyiú ío tàxi
tnuní-güedé, te mee-güedé cuiní-güedé sá càháⁿ
váha ñáyiú cuèndá-güedé. ²⁶ Dico nchòhó vá dúcáⁿ
càda-ndo, chí núú ñⁿ-ndo cùnⁿuu te cada-ni-ndo sǎ
ñǎ túú cùnⁿuu-ndo, àdi cuu-ndo ñⁿ téé tàxi tnuní
ñáhá xii cue téé xìnu cuechi, te cada-ni-ndo sǎ
cúú-ndó ñⁿ téé xìnu cuechi-áⁿ. ²⁷ Te vá càchí-ó sǎ
tée xìnu cuechi cunuu-gá-dé, chí téé quíhu mèsá

cúnùu-gá-dé. Dico yúhú ndécú ndìhì ñaha-í xii-ndo dàtná ìⁿ téé xìnu cuechi.

²⁸ Te nchòhó ducaⁿ-ni ndècu ndìhì ñaha-ndo xii-í, te tàyáha ndìhì ñaha-ndo xii-í nchaa sá táyáha-í véxi. ²⁹ Te Tàtá-í Dútú Ndiõxí ní cachí-gá sá táxí tnùn-í, te yúhú càchí-í xii-ndo sã sàá nduu te tnáhá-ndó tàxi tnuní-ndó. ³⁰ Te dàvá-áⁿ caxi-o coho-o càda-o núú táxí tnùn-í, te yàcáⁿ ngüita-ndo càda ndáá-ndó cuèchi ndì ùxúú xichi ñáyiú isràél — càchí-gá xáhaⁿ-gã xii-güedé.

Jèsús càháⁿ-gá sá tẽ Pèlú cúñaha-dě xii ñáyiú sá ñà túú xìní ñáhá-dě xii-gá

(Mt. 26:31-35; Mr. 14:27-31; Jn. 13:36-38)

³¹ Te Xítohó Jesucristú ní xáhaⁿ-gã xii té Xímú:

—Yòhó Xímú, cundedóho váha ìⁿ tnúhu na càháⁿ-í-a, chi dàtná cuìn-í-n quìde táchí triú sàcáⁿ-xi duha sàcáⁿ-xi dàcáⁿ, ducaⁿ quèsaha yucu ñáváha cada ñaha-xi xii-ndo. Chi coto ndeé ñáhá-xí xii-ndo te núú ndisa sàndáá iní ñáhá-ndó xii-í. ³² Dico yúhú xicáⁿ táhù-í núú Yã Ndiõxí cuèndá-n, cuèndá sá vã dáñá ndeé-n quìndáá iní ñáhá-n xii-í. Te òré ndixi túú iní-n sã ñà túú ní quìde váha-n, te quíhíⁿ-n cuãha-n cuè téé cùndìhì-n tnúhu ndee iní cuèndá canchicúⁿ nihnu-ni-güedé ichi Yá Ndiõxí —càchí-gá xáhaⁿ-gã xii-dé.

³³ Te ní xáhaⁿ-dẽ xii-gá:

—Mèstrú, sa ndècu túha-í sá quíhíⁿ ndìhì ñaha-í xii-n vècaá, àdi cuéi na cùú ndìhì ñaha-í xii-n —càchí-dé xáhaⁿ-dẽ xii-gá.

³⁴ Te Jèsús ní xáhaⁿ-gã:

—Pèlú, na càchí tnúhu-í xii-n sã cùmání-gã cana ìⁿ líhi te úní xito cáháⁿ-n núú ñáyiú sá ñà túú xìní ñáhá-n xii-í —càchí-gá xáhaⁿ-gã xii-dé.

Sa ní cuyatni ndoho Jèsús

³⁵ Te Jèsús ní xáhaⁿ-gǎ xii-güedé:

—Te cútnàhá ní tendaha ñaha-ĩ xii-ndo nĩ sáháⁿ-ndó chiúⁿ-í, chi ñá túú ní cǎnehe-ndo ni ìⁿ sá cùhúⁿ dǐhúⁿ-ndó, te ni ìⁿ sá cùhúⁿ ndàchiuⁿ-ndo ñá túú ní cǎnehe-ndo. Te chí cǎchí tnúhu núu ìó ìⁿ sá nĩ cumání xii-ndo —cǎchí-gǎ xáhaⁿ-gǎ xii-güedé.

Te ní xáhaⁿ-güedě:

—Ñáhá, chi ni ìⁿ sá ñà túú ní cùmání xii-ndí —cǎchí-güedé xáhaⁿ-güedě xii-gǎ.

³⁶ Te ní xáhaⁿ-gǎ:

—Te vitna núu ndècu ndìhi-ndo sá sácùhuⁿ dǐhúⁿ-ndó, àdi sá sácùhuⁿ ndachiuⁿ-ndo te canehe-ndo. Te núu ñá túú ndècu ndìhi-ndo machití, te nadico-ndo dǒó tǐcachi ñihnu-ndo te cuaaⁿ-ndo. ³⁷ Te na cǎchí tnúhu-í xii-ndo sǎ dàcuítí sǎ yǎha-í nàcuáa cǎháⁿ-xi núú tütú Yǎ Ndiǒxí núú cǎchí-xi: “Ìⁿ-ni nĩ quide ñaha-güedě xii-gǎ, ndìhi cue téé ndècu cuéchi-xi”, duha cǎchí-xi núú tütú-gǎ. Te ñá díú-ní xǐǎ yǎha-í chi nchaandi túhú nàcuáa cǎháⁿ-xi núú tütú-gǎ yáha-í —cǎchí-gǎ xáhaⁿ-gǎ xii-güedé.

³⁸ Te xáhaⁿ-güedě:

—Mèstrú, iha ndècu úú machití —cǎchí-güedé xáhaⁿ-güedě xii-gǎ.

Te ní xáhaⁿ-gǎ:

—Chí návìí-nǎ yuhu-ndo, vá cǎháⁿ-gǎ-ndó —cǎchí-gǎ xáhaⁿ-gǎ xii-güedé.

Jèsús cǎháⁿ ndìhi-gǎ Yǎ Ndiǒxí yucu Òlívú
(Mt. 26:36-46; Mr. 14:32-42)

³⁹ Te Jèsús ní quee-gǎ cuáháⁿ-gǎ yucu Òlívú, chi ducaⁿ tnàhí quide-gǎ. Te cue téé xìca cuu ndìhi-gǎ

nchìcúⁿ ñáhá-güedě xii-gá cuáháⁿ. ⁴⁰ Te òré ní quexìo-gá xíáⁿ, te ní xáhaⁿ-gă xii-güedé:

—Chí càháⁿ ndìhi Yá Ndiöxí cuèndá sá vă dácàháⁿ ñáhá yùcu ñávâha xii-ndo càda-ndo sá ñà túú tàú-ndó càda-ndo —cachí-gá xáhaⁿ-gă xii-güedé.

⁴¹ Te sátá dúcáⁿ te ní quee dîⁿ-gá tnuú-güedé cuáháⁿ-gá ìⁿ xio, te sa ñùnchíí luha ní xica ndehe-gá núú ndécú-güedě, te xíáⁿ ñí ngúíñí xítí-gă càháⁿ ndìhi-gá Tătá-gă Dútú Ndiöxí. ⁴² Te xáhaⁿ-gă:

—Táu, te núú dîcô cachí-n te taunihnu ñaha-n xì-í cuèndá sá vă ndóhò-í ná sàà òré, dico vá cádá-n nàcuáa càchí iní mée-í, chí cada-n nàcuáa càchí iní mée-n —càchí-gá xáhaⁿ-gă xii Tătá-gă Dútú Ndiöxí.

⁴³ Te sátá dúcáⁿ te ní quexìo ìⁿ espíritú xínú cuèchi núú Yá Ndiöxí ní sáñaha-gă-xi tnúhu ndee iní xii-gá. ⁴⁴ Te òré súúní ndìhú iní-gá, te uuⁿ-gá súúní ñi yuhu ñi iní-gá càháⁿ ndìhi-gá Dútú Ndiöxí, te tnée-gă cáá dàtná cáá ñíí te ngóyó núú ñúhú.

⁴⁵ Te sátá ñí yáha ní cáháⁿ ndìhi-gá Tătá-gă Dútú Ndiöxí, te ní ndacuíñí-gá cuánuhú-gá núú ñí dándõo-gá cue téé-áⁿ, te òré ní nasáá-gá te xíxídí-güedé cuèndá sá ïo cuéhé tnúhu sàni iní-güedé cuèndá-gá. ⁴⁶ Te xáhaⁿ-gă xii-güedé:

—¿Ná cuèndá xídí-ndó? Chí ndácõo, te cáháⁿ ndìhi-ndo Yá Ndiöxí cuèndá sá vă dácàháⁿ ñáhá yùcu ñávâha xii-ndo càda-ndo sá ñà túú tàú-ndó càda-ndo —cachí-gá xáhaⁿ-gă xii-güedé.

*Ní tnî-güedé Jèsús ndécá ñaha-güedé cuáháⁿ
(Mt. 26:47-56; Mr. 14:43-50; Jn. 18:2-11)*

⁴⁷ Te càháⁿ dúcáⁿ-ní Jèsús ní quexìo vai cue téé, te ìⁿ téé xica cuu ndìhi-gá nání Jùdás cúnùu-dé yódó nùu-dé núú-güedě ní quexìo ndée núú-gă, te

ní teyuhu ñaha-dé xii-gá, te núú tnàhá téé-án cúú ùxúú cue téé xica cuu ndihi-gá. ⁴⁸ Te ní xáhaⁿ Jèsús xii-dé:

—Júdás, ¿te yòhó cuáha cuèndá ñáhá-n xii yúhú Téé cùu ñaní tnáhá-ndó nchàa-ndo núú cuè téé cùu úhú iní ñáhá xii-í cáháⁿ-n núu duha tèyuhu ñaha-n-án? —càchí-gá xáhaⁿ-gã xii-dé.

⁴⁹ Te sátá nǐ xiní nchaa cue téé cùndihi Jesús nàcuáa cùu cue téé ní quexìo-án, núu ní xicáⁿ tnúhú-güedě núú-gã, te xáhaⁿ-güedě xii-gá:

—Mèstrú, ¿cuu nàá-ndí ndihi-güedé ndihi machití-a ñǎ? —càchí-güedě xáhaⁿ-güedě xii-gá.

⁵⁰ Te ñⁿ-dé ní xehndé-ni-dé lóho xio cùha ñⁿ cue téé ní quexìo-án, te téé-án xínú cuèchi-dé núú dùtú cúnùu-gá, te ní quendeé duuⁿ lóho-dé. ⁵¹ Te Jèsús ní xáhaⁿ-gã xii-güedé:

—Chí dáñá-güedě, vá dúcáⁿ càda-ndo —cachí-gá xáhaⁿ-gã xii-güedé.

Te ní dácàá-gá ndaha-gá ní tendaha-gã núú nǐ xíndeé lóho téé-án, te ní nduu váha dàtná-ni càa. ⁵² Te nchaa cue téé cùu dùtú cúnùu, ndihi cue téé tàxi tnuní nchaa cue téé quide cuendá veñúhu sá ño cùnuu, ndihi cue téé cùu sacuéhé núú ñáyiú isràél, nchaa cue téé-án vèxi tñi ñaha-güedě xii-gá, te ní xáhaⁿ-gã xii-güedé:

—Nchòhó, nèhe-ná-ndó màchití, nèhe-ná-ndó càrrutí véxi-ndo núú ndécù-í, dàtná quidé-ndó ñⁿ ñadúhú quidé ñaha-ndo xii-í. ⁵³ Te ducaⁿ-ni nǐ xiní-ndó nǐ xíndecu-í xití veñúhu càhnu sá ño cùnuu ní xóo danèhé-í ñáyiú, te ni lùha ñá túú ní cùu tnándeé ñáhá-ndó xii-í òré-án, te vitna ní sáá òré ducaⁿ càda-ndo, te cada sácúíhná nàcuáa cùu iní-xi —càchí-gá xáhaⁿ-gã xii-güedé.

Té Pèlú càháⁿ-dé núú ñäyiu sá ñà túú xìní-dé Jèsús (Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Te ní tñi-güedé Jèsús, te ndèca ñaha-güedé xii-gá cuáháⁿ vehe téé cùu dútú cùnù-gá, te té Pèlú xica xica-ni nchicúⁿ ñáhá-dě xii-gá cuáháⁿ. ⁵⁵ Te òré ní quexìo-güedé xíaⁿ te ní dátñahá-güedé ñuhú quehé vehe-áⁿ, te ní càndéé yuhu nùhú-áⁿ nǐ ngóo teté-güedé, chí quìde víxiⁿ-xi, te tñahá té Pèlú ní ngóo teté ndihì ñaha-dě xii-güedé. ⁵⁶ Te xíaⁿ ndécú ìⁿ xíchí xínú cuèchi vehe-áⁿ, te òré ní xini-xi nùcúo teté tñahá té Pèlú, te ní ndacoto-xi núú-dé, te ní xáhaⁿ-xi xii-güedé:

—Tñahá téé-a xica cuu ndihì-dé téé ndèca-güedé cuánguìhu-áⁿ —càchí-xi xǎhaⁿ-xi xii-güedé.

⁵⁷ Dico té Pèlú ñá túú ní nǔnuu-dé, te xǎhaⁿ-dě xii-xi:

—Yúhú ñá túú xìní-í téé-áⁿ —càchí-dé xǎhaⁿ-dě xii-xi.

⁵⁸ Te tna tnaa-ni ní cuu, te ní xini ñáhá tucu ìⁿ-dé, te xǎhaⁿ-dě:

—Yòhó tñahá-n xica cuu ndihì-n téé ndèca-güedé cuánguìhu-áⁿ —càchí-dé xǎhaⁿ-dě xii-dé.

Dico té Pèlú ní xáhaⁿ-dě:

—Ñáhá, ñá díú yúhú xíca cùu ndihì-í-dé —càchí-dé xǎhaⁿ-dě.

⁵⁹ Te sa ní cuu dátñá ìⁿ òré te càchí tucu ingá-dé:

—Ndáá sá tée-a xica cuu ndihì-dé téé ndèca-güedé cuánguìhu-áⁿ, chí tñahá-dé cúú-dé téé distritú Galileá —càchí-dé xǎhaⁿ-dě xii-güedé.

⁶⁰ Te té Pèlú ní xáhaⁿ-dě xii téé-áⁿ:

—Yúhú ñá túú cùtnuní iní-í nása ndùu tñuhu càháⁿ-n —càchí-dé xǎhaⁿ-dě.

Te ni vătă xĩnu ducaⁿ-gã tnúhu càháⁿ-dé ní cana-ni ìⁿ líhi. ⁶¹ Te Xítóhó Jesucristú ní nchócótó-gã núú-dě, te òré-ni-áⁿ nĩ ndacu iní-dé tnúhu ní xáhaⁿ-gã xii-dé sá cùmání-gã cana ìⁿ líhi, te úní xito cáháⁿ-dé sá ñà túú xìní ñáhá-dě xii-gá. ⁶² Te té Pèlú ní quee-dé tnuú-güedé cuáháⁿ-dé ìⁿ xio, te ní ndáhyú víhí-dě ní ndixi cuéchi iní-dé.

Cùdiquí ndeé-güedé Jèsús

(Mt. 26:67-68; Mr. 14:65)

⁶³⁻⁶⁴ Te cue téé ndèé ñáhá xii Jèsús ní cudíquí ndeé ñáhá-güedě xii-gá, te ní dádăhu-güedé núú-gã, te ní caniha-güedě xii-gá, te xáhaⁿ-güedě:

—¡Cáháⁿ ná cótó yòo ní caniha xii-n! — cachí-güedé xáhaⁿ-güedě xii-gá.

⁶⁵ Te cuéhé víhí-gã tnúhu cuéhé ní xáhaⁿ-güedě xii-gá.

Jèsús ndécú-gã jùndá

(Mt. 26:59-66; Mr. 14:55-64; Jn. 18:19-24)

⁶⁶ Te sátá nĩ túndaá, te ní tacá cue téé cùu sacuéhé núú ñăyiu isràél, ndihí cue téé cùu dútú cúnùu, ndihí cue téé dàcuaha ñaha xii-yu nchaa tnúhu ní chídó tnùní ndí Moisés, te ndèca-güedé Jèsús cuáháⁿ núú cádá-güedě jùndá, te òré ní quexìo-güedé ndihí-gá núú cádá-güedě jùndá-áⁿ, te ní xáhaⁿ-güedě xii-gá:

⁶⁷ —Cuíní-ndí cachí tnúhu-n xii-ndí nŭu ḍiu-n cùu-n Cristú Yaá ní tendaha Yá Ndiõxí véxi ñuyíú-a —càchí-güedé xáhaⁿ-güedě xii-gá.

Te ní xáhaⁿ-gã xii-güedé:

—Te núu na càchí-í sá ḍiù-í cúu Crìstú ñá, te nì vá quìndáá iní-ndó, ⁶⁸ àdi te núu ìⁿ sá ná càcáⁿ tnúhu-í

núú-ndó, te nì vá càchí tnúhu-ndo, te ni vǎ dáńá ñàha-ndo. ⁶⁹ Dico vitna ní cuyatni nduu ngóo yúhú Tée cùu ñaní tnáhá-ndó nchàa-ndo xio cuha Dútú Ndiõxí Yaá ío cùnuu —cachí-gá xáhaⁿ-gǎ xii-güedé.

⁷⁰ Te dǎtnúní nchaa-güedé ní xícáⁿ tnúhú-güedé núú-gǎ, te xáhaⁿ-güedé xii-gá:

—¿Te yòhó cúú-n Dēhe Yá Ndiõxí te núu ducaⁿ vǎni? —càchí-güedé xáhaⁿ-güedé xii-gá.

Te ní xáhaⁿ Jèsús:

—Ndáá sá díú Dēhe-gá cúú-í dàtná càchí mée-ndó-ǎⁿ —càchí-gá xáhaⁿ-gǎ xii-güedé.

⁷¹ Te ní xítnàha-güedé:

—Ñá túú-gǎ xíní ñùhu-xi cue tée cáháⁿ nǔu ndáá sá ndècuéchi-dé àdi ñá túú ndècuéchi-dé chi yuhu mee-dě ní cáháⁿ-dé vitna ní xíndedóho-o —càchí-güedé xítnàha-güedé.

23

Jèsús ndécú-gǎ núú tǎ Pilatú

(Mt. 27:1-2, 11-14; Mr. 15:1-5; Jn. 18:28-38)

¹ Te nchaa-güedé ní ndacuíñí-güedé, te ndèca-güedé Jèsús cuáháⁿ núú tǎ Pilatú, ² te núú tǎe-áⁿ nǐ ngüíta-güedé sàcáⁿ cuéchi-güedé cuendá-gá, te xáhaⁿ-güedé:

—Ní naníhí-ndǐ tée-a dándahú-dé ñáyiú ñúú-ó, chi xáhaⁿ-dě xii-yu sá vǎ chǎhu-gá-yu impuèstú xii té Cèsár tée ío cùnuu, te càchí-dé sá díú-dě cúú-dě Cristú Yaá ní tendaha Yǎ Ndiõxí véxi ñuyíú-a te yíndaha-dé ñáyiú càchí-dé —càchí-güedé xáhaⁿ-güedé xii-dé.

³ Te té Pilatú ní xícáⁿ tnúhu-dé núú-gǎ, te xáhaⁿ-dě xii-gá:

—¿Ndáá sá díú-n cùu-n téé yìndaha ñaha xii ñáyiú israèl-ǎⁿ? —càchí-dé xǎhaⁿ-dě xii-gá.

Te Jèsús ní xáhaⁿ-gǎ xii-dé:

—Dìu-í yìndàha-í-yu —càchí-gá xáhaⁿ-gǎ xii-dé.

⁴ Te té Pilatú ní xáhaⁿ-dě xii nchaa ñáyiú, ndìhi cue téé cùu dútú cúnùu:

—Yúhú cútñùní iní-í sá ñà túú nì ìⁿ cuéchi téé-a —càchí-dé xǎhaⁿ-dě xii-yu.

⁵ Dico níhi-gá ní cáháⁿ-güedé, te xǎhaⁿ-güedě:

—Càchí-ndí sá ïo dusaⁿ xǐquide ñáyiú cuendá nchaa sá dánèhé ñáhá-dě xií-yu, te ní quesaha-dě ndéé distrítú Galileá, te ní yáha-dé ñìhí distrítú Jùdeá dánèhé-dé ñáyiú, te vitna ní sáá-ni-tu-dé ndéé ndíha dànehé-dé-yu —càchí-güedé xǎhaⁿ-güedě xii té Pilatú.

Jèsús ndécú-gǎ núú tǎ Hèrodés

⁶ Te sá dúcáⁿ ñí tecú dóho té Pilatú ní cacu nehé-yu distrítú Galileá, núu xǎⁿ ní xícáⁿ tnúhú-dě núú-yu núu téé Galileá cúú-gǎ. ⁷ Te ní xáhǎⁿ-yu sá díú tǎe yàcáⁿ cúú-gǎ, núu xǎⁿ ní na dàyáha ñaha-dě xii-gá ndaha té Hèrodés téé cùu gobiernú distrítú Galileá chi nduu-ǎⁿ ndécú-dě tnàhá-dé ñúú Jerusàlén-ǎⁿ. ⁸ Te òré ní xiní té Hèrodés-ǎⁿ Jèsús te ïo ní cudíí ìní-dé, chi ní cunaha dùcaⁿ-ni cuiní-dé quini ñáhá-dě xii-gá te ñá túú tnàhí xìní ñáhá-dě xii-gá ní cùu, chi cuendá-ni tnúhu ñìhí-dé cuendá-gá, te ndètu-dé sáá ìⁿ nduu quini ñáhá-dě xii-gá, te cada-gá ìⁿ sá vǎ yǎo tnàhí ndàcu cada cundehe-dé ní sani iní-dé. ⁹ Te vǎi sá ñí xícáⁿ tnúhú-dě núú Jèsús, dico ni ìⁿ tnúhu ñá túú ní cáháⁿ-gá. ¹⁰ Te xǎⁿ xǐndecu tnàhá cue téé cùu dútú cúnùu, ndìhi cue téé dàcuaha ñaha xii ñáyiú nchaa

tnúhu ní chídó tnùní ndíi Moisés, te cue téé-án sùúní ìó iní-güedé sàcáⁿ cuéchi-güedé cuendá-gá. ¹¹ Te té Hèrodés ndíhi cue téé cùu sandadú-dé ñá túú ní cùu váha iní-güedé núú Jèsús, te ní cudíquí ndeé ñáhá-güedé xii-gá, te ní dácúíhnú ñàha-güedé dóó váha xii-gá dàtná cáá dǒó sácúíhnu cue téé sàquíndaha ñàha xii ñáyíu. Te dàtnùní té Hèrodés ní dánùhú ñáhá tùcu-dé xii-gá ndaha té Pilatú. ¹² Te nduu-án ní tnahá tnúhu té Pilatú ndíhi té Hèrodés, chi cùu úhú iní tnahá-güedé ní cùu.

*Càchí-güedé sá cáhni-güedé Jèsús
(Mt. 27:15-26; Mr. 15:6-15; Jn. 18:39-19:16)*

¹³ Te té Pilatú ní nadatàcá-dé nchaa cue téé cùu dútú cùnùu ndíhi dava-gá cue téé cùnùu, ndíhi nchaa ñáyíu ñuú-án, ¹⁴ te ní xáhaⁿ-dǎ:

—Nchòhó ndécá-ndó tǎe-a véxi ní taxi cuendá-ndó-dǎ iha, te càchí-ndó sǎ ìo dusaⁿ quide ñáyíu cuendá nchaa sá dánèhé ñáhá-dǎ xii-yu, te núú-ndó ndùcu tnúhu-í núú-dǎ nǔu ná ní quide-dé. Dico yúhú cútnùní iní-í sá ñà túú nì ìⁿ cuéchi-dé dàtná càháⁿ-ndó-án. ¹⁵ Te cuèi té Hèrodés dǎu-ni ducaⁿ càháⁿ-dé sá ñà túú cuéchi-dé nǔu ní techìuⁿ ñàha tùcu-dé cuándixi-dé iha. Te vitna sa ní cutnùní iní-ó sǎ ñà túú tàú-xi cahni-o-dǎ chi ñà túú cuéchi ní quide-dé. ¹⁶ Te na dǎndoho-ni-í-dé te dàcácu-í-dé —càchí-dé xáhaⁿ-dǎ xii-yu.

¹⁷ Te ndí tnahá nduu víco pascuá te dacuítíi sǎ dácácu té Pilatú-án ìⁿ cue téé yìhi vecaá, chi ducaⁿ tnahí quide-dé. ¹⁸ Dico ncháá-yu ní cuáá-yu, te xǎhǎⁿ-yu xii-dé:

—¡Queñuhu téé nàni Jèsús-án, te cahni-n-dǎ! ¡Te dàcácu-n tǎ Barràbás! —càchí-yu xǎhǎⁿ-yu xii-dé.

19 Te té Barràbás-áⁿ ñi sanu ichi-dé ñáyiú ñuú ingá ichi, te ní ngüíta-yu ndihí-dé ní cuu úhú iní-yu cue tée cùchiuⁿ, te ní sahani-dé ndíyí núu xíáⁿ ní chihi ñaha-güedě vecaá xii-dé. 20 Te té Pilatú cuiní-dé dàcácu-dé Jèsús núu xíáⁿ càháⁿ ndihí ñaha tùcu-dé xií-yu ni cùu, 21 dico uuⁿ-gá níhi ní cuáá-yu, te ní xáháⁿ-yu xii-dé úú xito:

—¡Cata caá-dé núú cùrúxí! ¡Cata caá-dé núú cùrúxí! —càchí-yu xáháⁿ-yu xii-dé.

22 Te xito cuu úní ní xáhaⁿ tē Pilatú:

—¿Te ná cúú cuēchi ní quide-dé te núu ducaⁿ cuiní-ndó càda-í-dé-i? Te yúhú cùtnùní iní-í sá ñà túú cuēchi ní quide-dé núu xíáⁿ ñà túú tàú-xi cahni-o-dě, te na dāndoho-ni-í-dé te dàcácu-í-dé —càchí-dé xáhaⁿ-dē xií-yu.

23 Dico níhi-ni càháⁿ-yu xáháⁿ-yu sá ná càta caa ñaha-dé xii-gá núú cùrúxí, te ñáyiú-áⁿ ndihí nchaa cue tée cùu dútú cùnùu xicáháⁿ níhi-güedé ndihí-yu ndéé ní xínu iní té Pilatú cada-dé nàcuáa càchí iní-yu. 24 Te ní xáhaⁿ-dē xií-yu sá cúú càda-dé nàcuáa xáháⁿ-yu. 25 Te ducaⁿ te ní dácăcu-dé té Barràbás téé ní sanu ichi ñáyiú ñuú ingá ichi, te dīu-ni-dé ní sahani-dé ndíyí núu xíáⁿ ní xíhi-dé vecaá, te dātnùní ní táuchíúⁿ-dē cada-güedé Jèsús nàcuáa xáháⁿ-yu.

Sàta caa-güedé Jèsús núú cùrúxí

(Mt. 27:32-44; Mr. 15:21-32; Jn. 19:17-27)

26 Te ndēca-güedé Jèsús cuáháⁿ núú catá càa ñaha-güedé xii-gá, te ichi cuáháⁿ-güedé ndihí-gá ní tñi-güedé ñiⁿ téé ñuú Cirené nání-dē Xímú ñúhú-dē ichi duha cuándixi-dé ní sáháⁿ-dé yucu, te ní

dácuídó ñàha-güedé xii-dé cùrúxí nchídó Jèsús, te ní ngüíta nchicúⁿ-dé sátá-gă.

²⁷ Te ío cuéhé ñăyiu nchicúⁿ ñáhá xì-gá cuáháⁿ, te vâi ñăyiu ðìhí ío níhi ndàhí-yu sá ndihú iní-yu cuendá Jèsús. ²⁸ Te Jèsús ní nchócótó-gă núŷ-yu, te ní xáhaⁿ-gă:

—Nchòhó ñăyiu ðìhí ñuú Jerusàlén, vá ndàhyú-ndó cuendá-í chí ndàhyú cuendá méé-ndó ndihí cuendá déhe-ndo. ²⁹ Chi sáá nduu quèsaha ñăyiu: “Sá vâha táhú nchaa ñăyiu ñá túú càcu déhe-xi, ndihí nchaa ñăyiu vátá quìní-gá cuhuⁿ déhe-xi, chi ni ñà túú xìní-yu dacàdí-yu”, duha quèsàhá-yu. ³⁰ Te dàvâ-áⁿ cũñaha ñăyiu xii nchaa tĩndúú ndihí nchaa núú xìquí: “Chí tácuuⁿ ngónchihí ñaha-ndo xì-ndí”, duha cúñàhá-yu. ³¹ Te núú yúhú téé quide ndáá duha quide ñaha-güedé xii-í vitna, te ndèé-gá cada-güedé nchaa ñăyiu ndècu ichi cuehé ichi duha —càchí-gá xáhaⁿ-gă xii-yu.

³² Te ndèca tucu-güedé úú tnàhá cue téé ndècu ndisa cuéchi-xi cuáháⁿ cuendá cahni ñaha-güedé xii-güedé ndihí Jèsús. ³³ Te òré ní quexìo-güedé ndihí-gá ìⁿ xichi núú nání Yìquí Dìquí Ndŷyi, te xíáⁿ ñí sata caa ñaha-güedé xii-gá núú cùrúxí, ndihí úú cue téé ndècu ndisa cuéchi-xi-áⁿ, te ìⁿ-dé ní sata caa-güedé xio cùha-gá te ìngá-dé ní sata caa-güedé xio dàtni-gá ðiu-ni núú cùrúxí tucu. ³⁴ Te ní xáhaⁿ-gă xii Tátá-gă Dútú Ndiöxí:

—Táu, cada càhnu iní sá quidé-güedé, chi ñá túú cùtnuní iní-güedé ná cúú sã quidé-güedé —càchí-gá xáhaⁿ-gă.

Te cue téé cùu sandadú ní xito ndéé-güedé nũu ndédacàa-güedé cuu cuendá-güedé dóó-gǎ.
 35 Te nchaa ñáyiú xĩndecu-áⁿ ndéhě-yu nàcuáa quide-güedé Jèsús, te nchaa cue téé cùnuu ní cudíquí ndeé ñáhá-güedě xii-gá, te ní xítñàha-güedé:

—Te dava ñáyiú ní ndacu-dé ní dácăcu nihnu-dé, te vitna na dácăcu nihnu-dé méé-dě, te núu ndisa sá Crístú Yaá ní tendaha Yă Ndiöxí véxi ñuyíú-a cùu-dé —càchí-güedé xítñàha-güedé.

36 Te tñáhá cue téé cùu sandadú ní cudíquí ndeé ñáhá-güedě xii-gá, chi ní sándehe yatni-güedé núú tácàa-gá sãñaha-güedě ndudí íá còho-gá ní cùu, 37 te ní xáhaⁿ-güedě xii-gá:

—Te núu yòhó cúú-n těe yìndaha ñaha xii ñáyiú isràél, te dácăcu nihnu mee-n —càchí-güedé xăhaⁿ-güedě xii-gá.

38 Te ní taxi ndecu-güedé ìⁿ sá ndeé lètrá ndàa díquí-gǎ te ndèé úní núú tñũhu, tñúhu grìégú, ndìhi tñúhu làtín, ndìhi tñúhu hèbreú, te duha quèe-xi ndi nuní núú tñũhu-áⁿ “Tée-a cùu-dé téé yìndaha ñaha xii ñáyiú isràél”, duha quèe-xi.

39 Te ìⁿ téé ndècu ndisa cuéchi-xi, téé ní sata caa-güedé dìñi-gá xĩcuèhé ñáhá-dě xii-gá, te xăhaⁿ-dě:

—Te núu yòhó cúú-n Crístú Yaá ní tendaha Yă Ndiöxí véxi ñuyíú-a, te dácăcu nihnu mee-n, te dácăcu nihnu ñaha xii nchúhú tñáhá-ndí tucu —càchí-dé xăhaⁿ-dě xii-gá.

40 Dico ingá téé cùndìhi-dé téé tàcaa ingá xio dìñi-gá ní tenàá ñáhá-dě xii-dé, te xăhaⁿ-dě:

—¿Te náa ñá túú ndàcu iní-n Yă Ndiöxí vitna duha càa-o ndoho-o ndihi téé nàni Jesús-a ñă? ⁴¹ Chi nchoo tàú ndisa-o sã dúhá ndòho-o nacháhu-o cuěchi-o, dico Jèsús-a chi ñá túú cuěchi-dé —càchí-dé xăhaⁿ-dě xii téé tàcaa ndihi-dé-áⁿ.

⁴² Te dătnùní ní xáhaⁿ-dě xii-gá:

—Jèsús, ndacu iní ñáhá-n xii-í òré ná quixi-n taxi tnuní-n ñùyíú-a —càchí-dé xăhaⁿ-dě xii-gá.

⁴³ Te Jèsús ní xáhaⁿ-gă:

—Na càchí tnúhu ndáá-í xii-n sã méi ndùu vitna cundecu ndihi ñaha-í xii-n nűú ní nduu táhù-í cundecu-í —càchí-gá xáhaⁿ-gă xii-dé.

Ní xíhí Jèsús

(Mt. 27:45-56; Mr. 15:33-41; Jn. 19:28-30)

⁴⁴ Te òré ní cuu cuádava nduu. Te ní cunee ñihí ñuyíú, te ducaⁿ-ni càa ní cuu ndéé caá úní sacuaa.

⁴⁵ Chi ñá túú-gă ní dăyehé nchíanchii te ní ndátá dđó cúú còrtiná veñúhu càhnu sá ïo cùnuu ní quée dava ndáá. ⁴⁶ Te níhi ní cáháⁿ Jèsús, te xáhaⁿ-gă xii Tătá-gă Dútú Ndiöxí:

—Táu, naqueheⁿ cuendá-n espíritú-í —càchí-gá xáhaⁿ-gă xii Tătá-gă.

Te tnúhu-ná-áⁿ ñí cáháⁿ-gá te ní xíhí-ni-gá.

⁴⁷ Te òré ní xiní téé cùu capitáⁿ sá dúcáⁿ ñí cuu, te ní ndacu iní-dé Yă Ndiöxí, te ní cachí-dé:

—Sá ndáá ndisa sá tēe-a cùu-dé ìⁿ téé ío quide ndáá ndécú ñùyíú-a ni cùu —duha ní cachí-dé.

⁴⁸ Te chitu ñăyiu ní tacá xiáⁿ chi cuíní-yu cundèhé-yu nása cada-güedé Jèsús. Te sátá ñí yáha ní xiní-yu nàcuáa ní quide ñaha-güedě xii-gá, te ní ndihí-yu ní ndaca ta càní-yu pèchú-yu cuánuhú sá ndihú iní-yu. ⁴⁹ Dico ndècu tnahá cue ñáyiu xini

tnáhá ndìhì Jesús, ndìhì ñáyiú dìhí ní chinchícúⁿ ñáhá xì-gá ndéé distritú Galileá, te ñáyiú-áⁿ xica-ni xĩxĩnutnĩ-yu xĩndéhě-yu nchaa nàcuáa ní quide ñaha-güedě xii-gá.

Chindúxi-güedé Jèsús

(Mt. 27:57-61; Mr. 15:42-47; Jn. 19:38-42)

⁵⁰ Te ndècu ìⁿ tée ñuú Arimàteá nání-dě Chèé, te ñuú-áⁿ yíndèhu-xi distritú Jùdeá, te ío váha iní-dé te quide ndáá-dé núú Yá Ndiõxí, te tnàhá-dé cúú-dě chiuⁿ te ní xíndecu-dé jùndá cue tée isràél. ⁵¹ Te ñá ní tnàhá tnàhí iní-dé nàcuáa ní cáháⁿ-güedé núú jùndá nàcuáa cada-güedé Jèsús. Te tée-áⁿ ndétú-dě sáá nduu ndíhu ndaha ñaha Yá Ndiõxí xii-dé ndìhì ñáyiú. ⁵² Te tée-áⁿ ñí sáháⁿ-dé núú tě Pilatú te ní xáhaⁿ-dě sá ñuu vá cùndèe iní-dé dañ-dě chindúxi-dé yiqui cùñú Jèsús. Te té Pilatú-áⁿ ñí sáha-dé tnúhu. ⁵³ Te ní nunehe-dé yiqui cùñú-gá núú cùrúxí, te ní chidúcúⁿnuu-dé ìⁿ dóó cuixíⁿ, te ní chihí-dé ìⁿ yaú nchii yiqui naha càva, te vátá yõo ìⁿ-gá nguíndũxi yaú-áⁿ. ⁵⁴ Te cùu-xi nduu vispré nduu ndètátú ñáyiú, núú xĩquide túha-ná-yu sá cúú ìngá nduu.

⁵⁵ Te nchaa ñáyiú dìhí ní chinchícúⁿ ñáhá xì Jesús ndéé distritú Galileá ndèndàhá-yu té Chèé ní sáháⁿ núú nchii yaú-áⁿ, núú ní xiní-yu nàcuáa ní sacáⁿ-dé yiqui cùñú-gá xití yaú-áⁿ. ⁵⁶ Te ducaⁿ te cuánuhú-yu vehé-yu, te ní quide túha-yu acití sáháⁿ tnámí, ndìhì pomàdá, te ní ndetátú-yu ìngá nduu-áⁿ ñí quidé-yu nàcuáa càháⁿ tnúhu Yá Ndiõxí.

24

*Ní ndoto Jèsús**(Mt. 28:1-10; Mr. 16:1-8; Jn. 20:1-10)*

¹ Te ndumìngú nehé víhí-ní cuǎháⁿ tucu ñáyiú dìhí núú nchìí yaú ní chihi-güedé yìquì cùñú Jèsús, te nèhé-yu nchaa sá sàháⁿ tnámí ñǎ quide túha-yu-áⁿ cuǎháⁿ, te tnàhá tucu ìⁿ ùú-gá tnàha dìhí-yu nchìcúⁿ ñàhá xì-yu cuáháⁿ. ² Te òré ní quexió-yu yuhu yàú-áⁿ te ní xiní-yu sá yùú ndèdí ìⁿ xio-ná ndécú, ³ te ní quíhu-yu xití yaú-áⁿ, dico ñá túú-gǎ yìquì cùñú Jèsús yíhí. ⁴ Te ñá ní cùtnuní tnàhí iní-yu ndèé ichi cuáháⁿ yìquì cùñú-gá, te ní xiní-yu úú espíritú xínú cuèchi núú Yǎ Ndiòxí xǐnutnì-xi dǐñí-yu te xǐxǐhnu-xi dóó chàhnchí. ⁵ Te ní yùhú-yu te ñá túú ní cùyí-yu cundèhé-yu cue espíritú-áⁿ, te cue espíritú-áⁿ ñǎ xáhaⁿ-xi xì-yu:

—¿Ná cuèndá nándùcu-ndo Jesús Yaá ndécú vǐvú núú yǐndǔxi ñáyiú ní xíhí-i? ⁶ Te ñá túú-gǎ yìquì cùñú-gá ndécú ìha chi sa ní ndoto-gá, te chí dándàcu iní nàcuáa ní cáháⁿ-gá cùtnàhá ní xíndecu-ndo ndìhi-gá distritú Galileá, ⁷ chi ní cachí-gá sá méé-gǎ cúú-gǎ ñaní tnàhá-ndó nchàa-ndo, te dacuití cuǎha cuèndá ñàhá-güedé xii-gá núú cuè téé ndècu ichi cuehé ichi duha, te cata caa ñaha-güedé xii-gá núú cùrúxí, te núú cùrúxí-áⁿ cuú-gá dico nduu úní sá cúú-gá te ndoto-gá, duha ní cachí-gá xii-ndo.

⁸ Te òré-áⁿ ñǎ ndacu iní-yu tnúhu ní cáháⁿ Jèsús. ⁹ Te sáta dúcáⁿ te ní naquehéⁿ-yu ichi cuánuhú-yu, te ní caní-yu cuèndú núú ndì úxí ìⁿ cue téé ní

táuchíuⁿ Jèsús cáháⁿ tnúhu-gá, ndihí núú dàva-gá ñáyiú. ¹⁰ Te ñáyiú ducaⁿ nàha tnúhu cuánuhú núú-güedě-áⁿ cúú tǎ Màriá Magdalèná, ndihí tá Juáná, ndihí tá Màriá nǎná tǎ Jàcobó, ndihí dava-gá ñáyiú ðíí. ¹¹ Dico cue tée-áⁿ ñí sani iní-güedé sá ðicó cáhú ìní-yu tnúhu xǎhǎⁿ-yu xii-güedé nǔú ñǎ túú ní sàndáá iní-güedé nàcuáa ní xǎhǎⁿ-yu.

¹² Dico té Pèlú ní quee-dé xínú-dě cuáháⁿ cuándéhé-dě yaú núú ñí chihí-güedé yiquí cùñú Jèsús, te ní sáá-dé te ní ngáundeyi-dé xító nihni-dé xití yaú-áⁿ te ní xiní-dé sá mée-nǎ dóó ñí xíducúⁿ nuu-gá yúcu ìⁿ xio, te ío ní cuñúhu-dé sá dúcáⁿ ñí cuu, te ní natnì-dé ichi cuánuhú-dé vehe núú xíndecu-güedé.

Ichi ñuú Emàús
(Mr. 16:12-13)

¹³ Te ðiu-ni nduu-ǎⁿ ñúhú ùú cue tée ní xica cuu ndihí Jèsús ichi cuáháⁿ-güedé ìⁿ ñuú nání Emàús, te sàcúhuⁿ-güedé dàtná úú òré ichi ndéé ñuú Jerusàlén, te ndéé ñuú Emàús. ¹⁴ Te ta ndàtnúhu-güedé cuáháⁿ nchaa nàcuáa ní cuu, ¹⁵ te ñini dùcaⁿ xicáháⁿ-güedé, te Jèsús ní natnahá ñáhá-gǎ xii-güedé te ndèca tnaha-gá ndihí-güedé cuáháⁿ. ¹⁶ Te cuèi ndèhe ñaha-güedé xii-gá dico dàtná ìⁿ sá ndèdí núú-güedě, chi ñá ná quíni ñáhá-güedě xii-gá ní cùu. ¹⁷ Te Jèsús ní xicáⁿ tnúhú-gǎ núú-güedě, te xáhaⁿ-gǎ:

—¿Ná tnúhu xicáháⁿ-ndó ñùhu-ndo ichi núú ducaⁿ ìo cùu ndiyí-ndó-í? —càchí-gá xáhaⁿ-gǎ xii-güedé.

¹⁸ Te ìⁿ tée nàni Cleofás ní xáhaⁿ-dě xii-gá:

—¿Te ná cuendá nchaa ñáyiú íchí nǐ sáá ñuú Jerusálén xìní-yu nchaa nàcuáa ní cuu, te ìⁿ dìi-ná yòhó ñá túú xìní-n-í? —càchí-dé xǎhaⁿ-dě xii-gá.

¹⁹ Te ní xáhaⁿ-gǎ xii-güedé:

—¿Te ná ní cuu-i? —càchí-gá xáhaⁿ-gǎ xii-güedé.

Te ní xáhaⁿ-güedě xii-gá:

—Cuendá Jèsús téé ñuú Nazàrét càháⁿ-ndí, chi téé-áⁿ cúú-dě ìⁿ téé càháⁿ tnúhu Yá Ndiǒxí, te ío váha ndùu tnúhu càháⁿ-dé ní cùu, te quèide-dé sá vǎ yǒo tnàhí ndàcu cada nacuaá cudíí ìní Yǎ Ndiǒxí ndìhi ñáyiú ní cùu. ²⁰ Te cue téé cùu dútú cùnùu, ndìhi cue téé cùnùu taxi tnuní ñáhá xii-ndí ní sáha cuendá ñáhá-güedě xii-dé núú tǎ Pilatú te ní sata caa ñaha-güedě te núú cùrúxí-áⁿ nǐ xíhí-dé. ²¹ Dico vitna sa ní cuu úní nduu sá nǐ xíhí-dé, te nchúhú ní sani iní-ndí sá tǎe-áⁿ dàcácu nihnu ñaha-dě xii nchúhú ñáyiú isràél núú nchàa tnúndòho tnúhu ndàhú ndécú-ndí. ²² Dico ío cùnúhu-ndí cúú, chi ìⁿ ùú ñáyiú dìhí ní tuha ñaha xii-dé ndécú ndìhi-ndí ní sáháⁿ ngotó-yu ndéxuehe tàcuíhndá-gá yaú núú nǐ chihi-güedé yìquì cùñú-dé, ²³ te ní nasáa-yu càchí-yu xii-ndí sá ñà túú-gǎ yìquì cùñú-dé yíhí xítí yaú-áⁿ. Te ní xìní-yu espíritú xínú cuèchi núú Yǎ Ndiǒxí, te ní xáhaⁿ-xi xii-yu sá ndécú vǐvú-dě. ²⁴ Te sátá dúcáⁿ te ìⁿ ùú cue téé cùndìhi-ndí ní sáháⁿ ndéhé-güedé yaú-áⁿ, te ní xìní-güedé sá ndáá cúú-xí nchàa tnúhu ní cáháⁿ ñáyiú dìhí-áⁿ, dico ñá túú ní xìní-güedé téé-áⁿ —càchí-güedé xǎhaⁿ-güedě xii-gá.

²⁵ Te Jèsús ní xáhaⁿ-gǎ xii-güedé:

—Ío cùmání sǎ xìní tnùní-ndó, chi ío cuèé sàndáá iní-ndó tnúhu ní cáháⁿ cue téé ní xóo cáháⁿ tnúhu

Yá Ndiöxí ndéé sanaha! ²⁶ ¿Te náa ñá túú tàú-xi sá ndóhó Crìstú òré cúmăní-gă sáá nduu ndàa-gá andiü núú ndécú Dütú Ndiöxí cundecu-gá-ă? — cächí-gá xáhaⁿ-gă xii-güedé.

²⁷ Te ní ngüíta-gá xáhaⁿ-gă nàcuáa quèe-xi nchaa tnúhu cáháⁿ-xi núú tütú Yă Ndiöxí cuendá-gá, te díhna-gá ní cáháⁿ-gá nàcuáa ndùu nchaa tnúhu yòdo tnuní núú tütú ndíi Moisés, te dătnùní ní cáháⁿ-gá nàcuáa ndùu nchaa tnúhu yòdo tnuní núú tütú nchaa cue téé ní xóo cáháⁿ tnúhu Yá Ndiöxí ndéé sanaha.

²⁸ Te òré ní quexìo-güedé yuhu ñùú núú cuaháⁿ-güedé-án, te Jèsús ní quide-ni-gá sá yăha-gá quíhíⁿ-gá ingá xichi ni cùu. ²⁹ Dico ní cáháⁿ ndàhú-güedé núú-gă sá quéndöo-gá xiáⁿ ndetatú-gá ndíhi-güedé, te xăhaⁿ-güedě xii-gá:

—Quendóo ndíhi ñaha xii-ndí iha ndetatú-n chi sa ní cuaa, te tnaví cundi^{qu}iⁿ —cächí-güedé xăhaⁿ-güedě xii-gá.

Te xiáⁿ cáá ìⁿ vehe cuánguihu-güedé ndetatú-güedé ndíhi-gá. ³⁰ Te òré sa yìhi-güedé mèsá ndíhi-gá cùdini ndíhi ñaha-güedé, te ní queheⁿ-gá pàá te ní ndacáⁿ táhú-gă núú Yă Ndiöxí, te ní táhú cuèchi-gá te dătnùní ní dácăhñu ñaha-gă xii-güedé. ³¹ Te òré-án ñă naquiní ñáhá-güedě xii-gá ní cùu, dico uuⁿi ní ndónhú-gă. ³² Te ní xítnàha-güedé:

—Te ndáá sá sùúni cùdíí ìní-ó òré tá ndàtnúhu-o ndíhi Jesús véxi ichi, te ta dănehé ñáhá-gă xii-o nchàa nacuáa quèe-xi tnúhu cáháⁿ-xi núú tütú Yă Ndiöxí —cächí-güedé xítnàha-güedé.

33 Te ñá túú-gă ní x̃ndetu-güedé chi ndìhi-ni ní natñi-güedé ichi cuánuhú-güedé ñúú Jerusàlén, te ní nasáá-güedé núú x̃ndecu ndi ùxí ñⁿ cue téé ní táúchíúⁿ Jèsús cáháⁿ tnúhu-gá, ndìhi dava-gá ñáyiú.

34 Te cue téé x̃ndecu-áⁿ x̃háⁿ-güedě:

—Ndáá sá ñ ndoto Yaá cúú Mèstrú, chi ní xini ñáhá t̃ Ximú —càchí-güedé x̃háⁿ-güedě.

35 Te cue téé ní nasáá-áⁿ ñ cani-güedé cuèndú nàcuáa ní cuu ichi, ndìhi nàcuáa ní cuu ní naquiní-güedé Jèsús òré ní táhú-gă pàá ní dácãh̃ñu ñaha-gă xii-güedé.

Jèsús ní quexìo-gá núú x̃ndecu cue téé ní xica cuu ndìhi-gá

(Mt. 28:16-20; Mr. 16:14-18; Jn. 20:19-23)

36 Te càháⁿ dúcáⁿ-ní-güedě nàcuáa ní cuu ní quexìo Jèsús ní ngúnutñi-gá ndéé tnuú-güedé, te x̃háⁿ-gă xii-güedé:

—Yá Ndiòxí chindèe ñaha-gá xii-ndo ïo váha cùu iní-ndó ndècu-ndo —cachí-gá x̃háⁿ-gă xii-güedé.

37 Te da ní yùhú-güedé, te ní sani iní-güedé sá d̃icó ñⁿ espíritú cúú sã ndéhé-güedě ní cùu. 38 Dico Jèsús ní x̃háⁿ-gă xii-güedé:

—¿Ná cuèndá yùhú-ndó, te sàni ñⁿ sani úú iní-ndó-í? 39 Chí cùndèhe ndaha-í ndìhi sáhà-í te quiní-ndó nã d̃iu-ni-í. Te chí tэндàha ñaha xii-í te cundehe-ndo, te núu ñⁿ espíritú ndécú yìqui cuñú-xi dàtná ndécú ndìhi yùhú —càchí-gá x̃háⁿ-gă xii-güedé.

40 Te sáta dúcáⁿ ñ x̃háⁿ-gă te ní dánèhé ñáhá-gă xii-güedé ndaha-gá ndìhi sáhá-gă. 41 Te ío ní cuñúhu-güedé, te ní cud̃í iní-güedé sá ndécú-gă

tnúú-güedé dico sàni ìn sàni úú iní-güedé, te ní xáhaⁿ Jèsús xii-güedé:

—¿Ndècu ndihì-ndo luha sá cáxí-ó ìha ñá? —
càchí-gá xáhaⁿ-gã xii-güedé.

⁴² Te ní sáñaha-güedě xii-gá luha chácá nǐ chíhó, ndihì dítá ñũnú ñúhú ndùdí, ⁴³ te ní queheⁿ-gá te ndèhe-güedé ní xexi-gá. ⁴⁴ Te dǎtnùnì ní xáhaⁿ-gã:

—Nchaa sá nǐ yáha-í-a cùu-xi sá nǐ cachí tnúhu-í xii-ndo cùtnàhá ndécú ndihì ñaha-gá-í xii-ndo, chi ní cachí-í sá dàcuítí cǎda-xi nchaa nacuáa càháⁿ-xi núú tütú ndí Moisés, ndihì núú tütú ndéé tnúhu ní cáháⁿ cue téé ní xóo cáháⁿ tnúhu Yá Ndiöxí ndéé sanaha, ndihì núú librú Sǎlmú —càchí-gá xáhaⁿ-gã xii-güedé.

⁴⁵ Te òré-án nǐ sáñaha-gã sá xìnì tñùnì-güedé, te ní tecú tñùnì-güedé nchaa tnúhu càháⁿ-xi núú tütú Yá Ndiöxí. ⁴⁶ Te ní xáhaⁿ-gã xii-güedé:

—Ducaⁿ ndéé tñunì núú tütú Yá Ndiöxí sá dàcuítí sǎ yúhú Crìstú cuú-í, te nduu únì ndoto-í. ⁴⁷ Te ñihì ñuyú cùtenuu tnúhu ní cáháⁿ-í, dico díhna nuu-gã ñuú Jerusálén ngúita-yu cacunehe ñàhá-yu xii-í, te cáháⁿ-yu nàcuáa ní dánèhé-í-yu, te cúñàhá-yu xii cue ñáyiú sá ná dándixi túu-yu iní-yu sá ñà túú quìde váha-yu, te dàñá-yu nchaa ichi cuèhé ichi duha ndécú-yu, te natnì-yu ichi Yá Ndiöxí, te ducaⁿ te cada càhnu iní-gá nchaa yíca cuèchi-yu.

⁴⁸ Te vitna nchòhó cuu-ndo cuè téé cáháⁿ ndáá nchaa nàcuáa ní cuu chi ní xìnì núú-ndó. ⁴⁹ Te yúhú tendaha-í Espiritú Yá Ndiöxí quixi cundecu ndihì-ndo, chi ducaⁿ nǐ cachí-gá. Dico chí cùndecu-ni ñuú Jerusálén-áⁿ ndéé ná quèxio Espiritú Yá Ndiöxí ngúndecu ndihì-ndo cuèndá

chindee ñàha-xi xii-ndo cada-ndo nchaa nacuáa ní cáháⁿ-í —càchí-gá xáhaⁿ-gǎ xii-güedé.

Jèsús cuánda-gá andiu
(Mr. 16:19-20)

⁵⁰ Te Jèsús ní queñuhu ñaha-gǎ xii-güedé ñúú Jerusàlén ndécá ñàha-gá cuáháⁿ ñúú Bètaniá, te xíaⁿ ñí ndonehe-gá ndaha-gá núú ñínu, te ní xícáⁿ táhú ñàha-gá xii-güedé núú Yǎ Ndiǒxí. ⁵¹ Te sátá ñí xícáⁿ táhú ñàha-gá xii-güedé núú Yǎ Ndiǒxí, te ní quee-gá tnuú-güedé cuánda-gá andiu. ⁵² Te ní ngüíta-güedé ní cachí-güedé sá ïo càhnu cuu Jèsús, te ní natnii-güedé ichi cuánuhú-güedé ñúú Jerusàlén, te súú ní cùdíí ìní-güedé ñúhú-güedé ichi. ⁵³ Te nchaa nduu ní xíndecu-güedé veñúhu càhnu sá ïo cùnuu ní ndacáⁿ táhú-güedé núú Yǎ Ndiǒxí, te ní cachí-güedé sá ïo càhnu cuu-gá. Duha ní cuu dàvá-áⁿ.

Tnúhu ní cáháⁿ yǎ ndiǒxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

clxx

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

872f7754-0986-5ecd-a059-925a708a6939